



11

2-4

10

6

7 K<sup>14</sup>

10







~~11 2 A 10~~

~~b-36-e-31~~





ΧΑΛΛΗ. 6. 14

Ρ. 9.

IOANNIS CASÆ  
LATINA MONI-  
MENTA.



Quorum partim versibus, partim  
soluta oratione scripta  
sunt.

CVM PRIVILEGIO.




FLORENTIAE

*In Officina Iuntarum Bernardi Filiorum*  
*Edita 1111. Id. Iun. 1564.*

LOANING CASE  
JAMES M. MONTGOMERY  
ATTY.

Quincy, Illinois, September 10, 1873

Wm. H. Smith, Esq.




Wm. H. Smith, Esq.

Quincy, Illinois

Sept 10 1873

HANNIBAL ORICELLARIUS  
PETRO VICTORIO  
S A L.



*Non videor mihi posse amplius ob  
preces multorum, qui vndi-  
que idem hoc etiam atq; etiam  
petunt, vel potius flagrant,  
in consilio permanere: nec, quæ  
primum suppressenda censue-  
ram, IOANNIS Casa,  
auunculi mei, latina ingenij monimenta domi tenere:  
quibus omnibus omnis hominum generis postulatis, non  
parui apud me ponderis, accessit auctoritas tua: qui  
diligenter mihi suastisti, ut hoc sine ulla dubitatione  
facerem: nec paterer diutius tam suaves admirabilis  
naturæ fructus reconditos abditosq; iacere, priuaremq;  
cupidos ipsorum magna solidaque voluptate, quam se  
inde hausturos sperant, nec frustra ita, ut tu idem as-  
seuerabas, ac sine causa sperant. Cum tu igitur au-  
ctor accesseris, vel (ut verius loquar) sponsor, qui qua-  
si damni infecti promiseris: meque hoc tuo periculo fa-  
cere iusseris, vix possum amplius tot honestorum homi-*



num volumini refragari. quare totam rem tibi trado,  
& amoris tuo magno erga auctorem ipsum fideiq; com-  
mitto: facies igitur quod ex dignitate illius, commu-  
nique utilitate esse iudicabis. Unum ego illud doleo et  
molestè in primis fero, quod ea, quæ maiore animo,  
nec minori (ut arbitror) consilio, aut iam inchoaue-  
rat, aut tota mente complexus fuerat, absoluerè, non  
potuit: ita enim fortasse sitis illa ingens, quæ animos  
fere omnium inuasit, legendi ipsius scripta, expleri po-  
tisset. nisi potius ipsa eo pacto excitata fuisset: neque  
enim modus ullus est, finisque honestarum & ingenuo  
viro dignarum voluptatum, sed, quanto plus aliquis ea-  
rum capit, tanto magis desiderio ipsarum inflamma-  
tur, ac semper ulterius aliquid ardentè appetit.  
Unde autem id factum sit tu probe nosti: vel cuncti  
potius, qui cognitum hominem habuerunt, atque in  
ijsdem, quibus ipse, locis aliquando vixerunt: cui enim  
perspecta non sunt multa magnaque ipsius occupatio-  
nes? cui itidem inaudita est imbecillitas corporis, dolor  
que acer articulorum, quo sæpe ille miserabilem in mo-  
dum conficiebatur? ut de vitæ si non breuitate, saltè  
non longinquitate taceam, cum illa potissimum ætate  
mors eum oppresserit, quæ mens hominis perfici incipit:  
et plenos integrosq; fructus edere potest. Sed huic quo-  
que rei tu occurris: affirmasque huiuscemodi partus  
optimorum ingeniorum non ex numero moleque ipso-  
rum, sed ex vi naturæq; spectari debere: & hanc sem-  
per consuetudinem fuisse eorum, qui rectè & ordine  
iudicarunt:



iudicarunt : quorum institutum verum esse, multis &  
veterum & recentium laboribus perspicui posse . cum vi  
deamus quadam parua monimenta ingeniosorum ho-  
minum in honore & pretio esse : alia autem magna  
aliorum , qui non tam polite sua scripta limarunt : nec  
laborem illum emendandi tulerunt , contemni magnò-  
pere ab eruditis, et omni laude carere . nihil vero ipsum  
minus umquam studuisse, quam populo placere : con-  
tentumque semper fuisse omnibus in rebus iudicio pau-  
corum . postremum autem hoc quin verum sit, ac pror-  
sus isto modo se habeat , non possum inficiari . Restat  
igitur vnum, quod valde me pungit : vereor enim ne pa-  
rum pie faciam, si aduerser voluntati mortui, & homi-  
nis eius mortui, cuius in primis voluntatem ratam esse  
& mandata omnia firma optare, & pro viribus etiam  
eniti debeo : non multos enim dies ante, quam e vita di-  
scederet, cum mentio facta esset horum laborum, quid  
fieri de illis vellet, siquid ipsi accidisset, plane significa-  
uit : deleri enim funditus ipsos, in ignemque imponi  
statim imperauit . cum tamen socios multos habeam  
huius culpæ, si culpa illa appellanda est, extiterintque  
omnibus temporibus alij, qui hac in re vltima voluntati  
mortuorum non obtemperarint, sed potius commu-  
ni bono consuluerint, studioque ac cupiditati honesto-  
rum virorum morem gesserint, facilius ( ut opinor ) cri-  
men hoc sustinebo, & a manibus ipsius mortui veniam  
impetrabo . Nuper certe idem factum est ab heredi-  
bus, summi ac singularis viri, Francisci Guicciardi  
ni:

ni: qui cum historiam illam suam, tantopere nunc omni-  
bus probatam, imperfectam ac minime expolitam re-  
linqueret, mandauerat diligenter ut occultaretur, vel  
potius interrogatus a scriba, dum testamentum com-  
poneret, quid de illa statueret, magno, & constanti ani-  
mo respondit, comburatur. illi tamen recte fecisse exi-  
stimantur, quod ipsam ediderint: & non solum scele-  
re liberantur, verum etiam eximia quadam laude di-  
gni putantur, & maximo beneficio cunctos mortales  
affecisse creduntur. Idem igitur mihi euenturum, si  
idem effecero prorsus confido. id est apud multos me  
gratiam initurum, & affinem quoque mecum mihi igno-  
turum. Praesertim cum id, quod ille omnino voluit, pra-  
estari a me nulla ratione potuerit: neque enim valeo plu-  
rimos cohibere, in quorum manus iam pridem non pauci  
scriptorum illorum peruenerunt, & ne ipsi ea diuul-  
gent impedire. quod iam de non nullis ipsorum usu ve-  
nit, ac non sine magno meo dolore factum est. Post-  
quam igitur animo ipsius satisfieri vix potest: cum i-  
psa vndique emanent, ac formis etiam vbique excu-  
dantur, existimaui me rectius facturum, si omnibus  
iis de causis ipse illa integriora correctioraque edidis-  
sem, atque ita assiduis vocibus multorum, acerrimisque  
desideriis obsecunda sem. Quod tamen tui iudicii esse  
volo, & ( ut initio dixi ) a te totum proficisci, cum dili-  
genter prius, an fieri debeat, cogitaris. (ur enim ego  
in hac re non sequar sententiam tuam, &, quod tibi  
probatum fuerit, id verum esse prorsus putem, quem  
de

de his litteris recte existimare posse vna omnium voce  
compertum atque exploratum est. auunculus certe  
meus tibi primas deferebat, ac de tua eruditione diui-  
nitus sentiebat. Sed, ut omittam nunc doctrinam, &  
praeclaram multarum honestarum artium cognitio-  
nem, illud in primis me in hac opinione confirmauit,  
quod video, quanto amore illum mortuum prosequare,  
quantaq; beneuolentia memoriam ipsius colas. (Cur igitur  
hoc tua potissimum cura non committam, quod ve-  
num nomen ipsius plurimum illustrare potest, & ab om-  
ni iniuria temporis, obliuioneq; vindicare? nam, cum  
mos semper fuerit, ut tu optime scis, consuetudoque  
etiam veterum illorum Graecorum, doctissimorum vi-  
rorum, labores suos mittendi ad fortunatos homines  
& maximos reges, quod ita putarent se patrocini  
multum gratiaq; suis scriptis comparaturos: nec non  
laudis etiam aliquid illorum ipsorum nomini allaturos,  
cum aliter se cupidos eorum esse ostendere non possent,  
statui ego, quidquid honoris ac dignitatis hoc pacto ad  
quempiam peruenire potest, tibi potissimum deferre, &  
tuis proprijs laudibus ingenijque commendationibus ag-  
gregari. Quem animi mei sensum tibi non semel an-  
tea significauit: et si tu semper id modestiae causa vehe-  
menter recusasti. in eo vero ego non solum iudicium  
meum sequor: & id, quod magnopere multis modis con-  
uenire intelligo, facio; verum etiam aliquo pacto vo-  
luntati illius, cuius honeri laudique ambo toto animo  
studemus, pareo: quodque ipse praestare non potuit, &  
ad

ad exitum perducere, gero: scio enim illum in animo  
habuisse magnum opus efficere, ac subtiliter copioseq;  
de tribus plenioribus polucioribusq; linguis, tamquam  
alterum M. Varronem, vno volumine disputare, ac  
tuo nomini vigilas has suas, qui in idem studium toro pe  
ctore incubueris, & ad summam intelligentiam ipsa  
rum perueneris, apte ( ut aiebat ) congruenterq; dica  
re: & si ille doctissimus vir suum in primis proprium  
que sermonem celebrauit: ipse vero non eum tantum  
in quo natus erat, sed Græcum etiam Latinumq;, cu  
ius imago quadam ac vestigium noster est, frequenta  
re & colere cogitabat, & veterem etiam ipsorum ori  
ginem fontemq; aperire: atque omnem denique coniun  
ctionem ipsorum ornatumq; explicare. Cum igitur  
magnus hic ipsius conatus impeditus fuerit: & in me  
dio cursu tam præclara voluntas fracta, qua ego ra  
tione potui, volui desiderium ipsius implere. Quare  
hoc amanti tui hominis læto animo munus accipe:  
teq; id ab auctore ipso, architectoq; huius operis accipe  
re existimato, qui tui semper studiosissimus fuit, ac  
dum vixit demum ( nihil enim maius excogitare valeo  
ad ostendendam egregiam ipsius voluntatem erga te )  
cumulate tibi in amore respondit. Vale Roma.  
Idib. Novemb. M D L X I I I.

PETRVS VICTORIVS  
HANNIBALI ORICEL

LARIO S.



VO D mihi suauissime Hanni-  
balonus imposuisti, quam-  
uis sua sponte magnum fue-  
rit, numquam tamen graue  
mihi duxi: libenter enim id  
tuli: & in singulis ipsius par-  
tibus tractandis voluptatem  
non paruam inueni. nam,  
quod in primis alicui mole-  
stum esse potuisset, dubium

que ipsum habere, an edi hæc scripta oporteret, mihi ne-  
gotium non exhibuit: nec vllam in partem suspensum  
me tenuit: iam pridem enim mecum statueram rectum  
hoc esse; dolebamq; potius tam sero id fieri: ac de re, que  
scrupulum non magnum in se haberet, tantopere deli-  
berari. Impulit autem me in hanc mentem, fecitque vt  
certi prorsus animi essem de omni hoc facto, iudicium;  
quod olim feceram de ingenio doctrinaq; huius eximij  
viri, in quo me socios eomitesque multos habere præcla-  
re intelligebam: qui & ipsi existimabant nihil limatius,  
ac politius his monimentis inueniri posse: nihil auctoris  
ingenio acutius perfectiusque. Quos certe fructus an-  
tea admirabilis nature ipsius videram: videram autem  
multos: hanc profecto opinionem de illo in animo meo  
excitarant. Possem autem multa de summo ingenio hu-

ius hominis : infinita quæ cura , quam in hoc genere scri-  
ptorum poneret, verè prædicare, quæ me ab omni repre-  
hensione culpaque temeritatis (vt opinor) vindicarent : at  
quæ id non tam vt me tibi, cui hæc omnia nota & perspec-  
ta sunt, quam vt alijs omnibus purgarem. Sed, cum  
res in eum locum iam venerit, vt cuncti mortales ex his  
præclaris monumentis specimen aliquod capere illarum  
rerum facile possint, vel potius perfecte de ipsis existima-  
re, iudicia ipsorum non præoccupabo : nec crimen arro-  
gantæ subibo. de his solum alienis scriptis illud ex animo  
pronuntiabo, quod M. Cicerò aliquando de suo quo-  
dam libro, quem valde probabat, ac perfectum vndique  
esse arbitrabatur, in epistola quadam scripsit. me non re-  
cusare, si forte aliter quam ego sentiam, de illis aliquan-  
do existimatum fuerit, quin quantum de his libris, tan-  
tundem de mei iudicij fama ( si vlla ipsa est ) detrahatur.  
Nam non parui etiam ponderis, vt hoc securo animo fa-  
cerem, apud me fuit, quod videbam hos viros his scriptis  
semperternæ memoriæ commendatos, quorum laudem ac  
gloriam libenter omnes probi & honesti homines audi-  
turi essent, ac si quid etiam maculæ ac vitij aspersum fo-  
ret in eorum splendore decoreque illustrando, ipsum il-  
los dignitate eorum captos, & iucunditate illa persufos,  
non animaduersuros, improbum verè fuisset, ac nefarij  
sceleris profecto simile, tam præclarum argumentum oc-  
cultare, ac vitam horum honestissimorum virorum per-  
petuis tenebris dicare : quamuis enim ingenti ipsorum  
virtuti scriptores deesse potuisse non videantur, non ta-  
men ( nisi fallor ) facile parem huic nostro, & iudicio, &  
facultate dicendi, præconem illa inuenisset. Quod ve-  
ro pertinet ad labores, quos magnos variosque sustinui,  
vt liber purgatus & ab omni macula vacuus exiret, om-  
nem ego hanc molestiam indignitatemque deuorau-  
i, vt amici hominis laudi honorique seruirem : nec vni-  
quam odiosos mihi labores illos esse cognoui, non modo  
enim

enim ipsos grata memoria sodalis condidit, sed omnem penitus inde tristitiam amaroremque depulit. Læuauit quoque non nihil hunc meum laborem, quod eodem tempore me gratum tibi facturum esse cognoui, quem etiam perspexi eidem rei toto animo studere, ac curare quanta maxima diligentia posses, ut hæc affinis tui nonimenta integra prodirent. in quo ego officium hoc tuum vel pietatem potius, vehementer laudo: ac maius quidem te in illud beneficium contulisse iudico, cum memoriam ipsius ita viuam tenueris, quam si illum in vitam reuocasses? cum enim ille mortalis natus esset, necessario non multo post extinctus fuisset: hæc autem (ut spero) eterna erunt, & nulla iniuria temporis vetustateque delebuntur.

Remitto igitur ad te librum excusum, & iam communem omnium, publicumque factum, qui prius tuus priuatusque erat; vel potius magis nunc, quam umquam, tuum, cum ornet plurimum, atque omni dignitate augeat eum, qui tibi auunculus fuit; ac veris propriisque ipsius laudibus celebret, non suspectis & aliunde, ut sæpe contingit, ascitis. quin autem redundet quoque in te aliquid huius gloriæ dubitandum non est: neque etiam parui illud estimandum? gaude igitur non parum eximio hoc tuo ac præstanti bono, contigisseque tibi in vita cum alijs multis animi & fortunæ donis, ut nascere e sorore huius præclari viri: & si es tuo nomine nobilissimus, non mediocri tibi laudi ducito: præstatoque te dignum, ut facis, tanta sanguinis egregiæque virtutis conjunctione. quin certe te ille plurimum amarit, & summa cura studioque mores ingeniumque tuum expoliuerit, dubium non est. Sed hæc non sunt huius temporis: Illud magis addendum est, & ipso tota hæc epistola concludenda. Gratum admodum, acceptumque mihi munus tuum fuisse, præclarissimum honestissimumque munerum omnium, existimareque me beneficio hoc valde honorem meum creuisse, postquam, de quo tecum prius se




dulo egeram, efficere noluiſti, vt perſonam aliquam tan-  
to dono digniorem inuenires: ſatis enim me, ſatſque te-  
ſtimonijs, ipſius crebris, in hoc volumine ornatum puta-  
bam, ac mihi aliquo modo eternitatem partam rebar.  
Nam conſuetudinem illam antiquorum Græcorum non  
improbo, quam tu in tuis litteris attigiſti: vnde memo-  
riæ proditum eſt quendam ex illis, ſapientiæ ſtudioſum,  
habitum fuiſſe eo tempore contumacem, qui nullum vm-  
quam ſuum opus ad principem aliquem virum miſerit,  
cum multa præclare ſcripiſſet, quaſi eos contempſerit,  
& illo honore indignos putarit. Romani vero ſcripto-  
res, illi veteres: & qui florere ante, quam reſp. in vnus  
potestate caderet, hoc non faciebant, neq; inſtitutum  
illud ſeruabant, quia maiores nullòſ ſe, aut opulentioreſ  
habebant: quare ad amicòſ, familiaresque ſaòs hoc tradu-  
cebant, quos tu imitari voluiſti, cum tamen contra hac  
arte magna copia ipſorum ſit. Sed poſtquam tu aſſer-  
tas hoc etiam in mentem auctori ipſi veniſſe, vt miſ hu-  
iſcemodi aliquo munere honeſtaret, non poſſum  
id, vt cetera ipſius omnia conſilia factaque

non magnopere laudare: eoque nomi-

ne immortales tibi gratias agere.

Vale. Florentia III. Id.

Iun. MDLXIII.





# PETRVS VICTORIVS

## LECTORI S.



**N**ON putavi alienum humanissime lector de non nullis te admonere, quæ tibi cognita esse oportet initio huius noui operis perlegendi; non tam nostri muneris ornandi causa, et auctoris ipsius celebrandi, quam ut laborem tuum leuem, et instruam te ita, ut uerius iudicare de omnibus his paruis ingenij magni monumentis possis. præsertim autem ijs ipsorum partibus, in quibus quippiam ignoratum aut existimationi ipsius labis aliquid adportare, aut sensum animi tui impedire posset, diligentius id faciam. nam quædam sunt quæ nulla mea opera egent; nec suspensum te ullo pacto tenere possunt, quia non minus ipse quam ego, statim ut legeris, percipies cuiusmodi illa sint, et quantum ipsis tribui debeat. Hæc autem sunt primum carmina, quæ primum etiam locum obtulerunt. illa uero uarijs temporibus condita fuerunt.

re . quam is maiorem ipsorum partem scripserit  
postremis uitæ suæ annis , cum se in Euganeos  
montes abdidisset : recessumque illum coleret , in  
quo non paruo temporis spatio bene beateque ui-  
xit . nam et multo melius illic , quam alibi umquam ,  
ualuit , & totum se litteris scriptionibusq; inuol-  
uit : unde si se auelli passus non esset , & uiuum  
adhuc cum superstitemque haberemus : & uolu-  
men hoc plenius , copiosiusq; manibus tereremus .  
Sed multo plus apud eum consilia aliorum ualue-  
runt , quam uerum ipsius iudicium , quod fecerat  
de fortunæ uarietate , inconstantiaq; rerum huma-  
narum , quæ non satis prudentia consilia inuitum  
ipsum illinc retraxerunt , & quasi de statu mentis  
deiecerunt . Huius autem animi ipsius testis es-  
go ( ut opinor ) non omnino leuis esse possum , qui  
cum eo illo ipso tempore totum pæne diem locutus  
sum in itinere : cum ille , pontificijs litteris euoca-  
tus , Flaminia uia Romam proficisceretur : oc-  
curri autem ipsi Pisauri : uisus enim mihi est non  
ualde securi animi fuisse de euentu illius consilij ,  
doluitque sibi inuito , ac recusanti extortam fuisse  
bonam mentem , in qua manendum sibi esse , quod  
reliquum erat uitæ , secum deliberauerat . Quod  
sequitur in editione hac : pertinetque ad uitam no-  
stram informandam , & multis grauib; mole-  
stijs liberandam , multo prius ab ipso scriptum fue-  
rat : cumque illud sæpe Romæ lectum & ponde-  
ratum

ratum esset ab eruditis & ingeniosis uiris, quorum  
in ea urbe omni ætate magna copia fuit, semper  
eorum iudicijs maxime probatum fuit, & summis  
laudibus in cælum sublatum, & propter oratio-  
nis elegantiam & propter sententiarum gravita-  
tem, totiusque illius disputationis acumen & sub-  
tilitatem. *V*ita præterea Petri Bembi, in qua  
ille litteris mandanda multum laboravit, ut amici  
hominis, & qui in iisdem studijs, quibus ipse dedi-  
tus erat, totius occupatus fuerat, atque in ipsis ui-  
tam cum summa laude consumpserat: (quamvis in  
ipsa nihil amicitiae dederit, & omnia summa cum fi-  
de uereque exposuerit) perfecta ab eò expoliataque  
fuit. Contareni uero uita, numquam satis lauda-  
ti hominis, quamvis omnes graues & honesti uiri in  
eius doctrina, probitate, castitate, prudentia, pie-  
tate erga deum celebranda inter se contendere ui-  
deantur, non omnes numeros absolutionis assecuta  
est, neque extremam auctoris manum obtinuit:  
ut, quemadmodum ille uir integer, & uiridique per-  
fectus absolutusque fuerat, ita etiam libellus, qui ui-  
tam ipsius explicat, & cuncta hominis consilia fa-  
ctaque memoriae prodit, nulla parte mancus debilis  
que foret. Inuidisse igitur tantæ ipsius gloriæ ali-  
quo modo fortuna uisa est, nec passa fuisse, ut quem  
admodum in huius summi uiri uita nihil labis aut  
culpæ inesset, ita etiam omnis macula notaque ab  
his politissimis scriptis abesset. quanto magis au-

tem

tem illa fini extremoq; propinquā est, tanto magis  
rudis inchoataq; est. quod ijs omnibus, qui legent,  
cognitum esse debere existimaui. ne siquid forte  
illic incuriæ uitiq; aliquando offendatur, illud au-  
ctori assignetur: ipsiusq; inscitie aut negligentia  
commissum esse credatur: nemo enim est scriptor  
eruditus, laudisq; alicuius et gloriæ cupidus, qui  
non diligenter sua scripta relegat, ac nouo quo-  
dam studio laboreq; suo illa purgare ac nitidio-  
ra reddere conetur: cum hic noster in primis in  
ea re diligens accuratusque foret, & plurimum  
studij in suis omnibus laboribus emendandis adhi-  
beret, quod morte præuentus, aut subitis magnis  
que occupationibus inde abreptus, præstare in  
eo, quod maxime ornare & omni uirtute expolire  
cupiebat, non potuit; cum argumentum ex senten-  
tia nactus esset, & quod omnem ornatum lumen-  
que orationis sustineret. patet autem quanto ani-  
mi ardore aggressus hoc sit, & quale quasi uesti-  
bulum aditumq; huius præclari operis struxerit.  
Restat nunc, in quo maior adhuc scrupulus, mea  
sententia, est: quodque magis me sollicitat honoris  
causa huius præstantissimi uiri, labor quem po-  
suit in uertendis in Latinum sermonem contioni-  
bus Thucydidis: cum enim semper arduum esse ac  
difficile existimauerim conuertere aliquid e Græ-  
cis scriptoribus. (siquis recte & cum mediocrit-  
etiam laude munus hoc obire uelit: nam, ut pleriq;

hoc

hoc faciunt, qui nullo ornatu adbibito, nullo sele-  
lectu uerborum, nullo iudicio, quo quo modo sen-  
tentias expressisse contenti sunt. si hoc etiam ipsum  
præstare possent, nihil est tam proclue & para-  
tum in primis semper durum & laboriosum puta-  
ui attingere hunc scriptorem, & aliquam ipsius  
partem in alium quempiam sermonem comporta-  
re. contiones uero has propter obscuritatem sen-  
tentiæ, orationisq; breuitatem, ne dicam aspe-  
ritatem & duritiem, maiorem adhuc molestiam in  
se continere non sine causa (ut arbitror) credidi.  
Et tamen hic noster tot tantisque difficultatibus  
deterritus non est, sperauitque se posse studio &  
diligentia sua ipsas superare: uel potius ingenij &  
industriæ suæ periculum facere uoluit: experiri  
que, ut fuit semper audius ueræ laudis ac gloriæ,  
an ex hoc quasi certamine honeste discedere pos-  
set, & tamquam palmam inde domum reportare:  
nihil enim sibi unquam facile pronumq; proposuit;  
sed semper cum ijs, qui summum locum in qualibet  
laude tenent, contendendum putauit, & aliquos  
etiam ipsorum fortasse uicit & omni honore spolia-  
uit: hoc enim uerius esse puto: cum compertum ha-  
beam, maiorem partem horum laborum ab ipso e-  
xercitationis causa fuisse susceptam, cum maiora  
quædam meditaretur, ac doctrina ingenioque suo  
digniora, ipsas tamen quoque edendas putauit, ma-  
gis utilitatis aliorum causa, quam illius ipsius de-

A

coran

corandi, qui multum operæ ac diligentia in ipsis po-  
suit, quippe cum nihil, temptatum ab ipso, iudicem  
negligendum: butuscemodique, ut nullum fructum  
ferre possit studiosis, habendum. nec tamen hoc  
quoque (ut apparet) opus absoluit, nam conatum  
hunc magnum ingenij ipsius summam laudem inuen-  
turum fuisse, si exitum habuisset, dubitandum non  
est: fecisset enim, ut prudentissimi gravissimiq; scri-  
ptoris orationes subtilissimæ et magnorum consilia  
rum plenissimæ, eleganter et erudite scriptæ, ab ijs  
etiam legi possent, qui illius ipsius sermonis, quo  
primum scriptæ fuere, rudes & expertes omnino  
sunt: ac ne nunc quidem, & si omnes illæ expressæ  
non sunt, dici potest id non aliquo modo præstitis-  
se: uel prope saltem ad id ipsum accessisse: qui enim  
primi ad rem aliquam arduam aggrediuntur, ra-  
tionemque illius laboris superandi ac viam mon-  
strant, ij aliquo modo illius negotij, difficilisq; ope-  
ris confectores haberi & appellari possunt. Siqui  
autem extiterint, qui in aliquibus locis ab hoc no-  
stro interprete dissentiant: atque alium fuisse sen-  
sum auctoris, quam qui ab ipso expressus est, con-  
tendant, ij meminisse debebunt, semper habitas es-  
se has orationes obscurissimas, & ijs etiam tempo-  
ribus, quibus sermo Græcius uigebat, & hic lucu-  
lentus scriptor in manibus disertorum erat, nego-  
tium ipsas facessere solitas ijs, qui ipsas accurate le-  
gerent, quippe cum M. etiam Cicero ita de illis  
existima

existimauerit. & hoc suum iudicium monimentis li-  
terarum mandarit : cum enim Thucydidem ipsum  
magnopere laudasset, quamuis, contra sententiam  
quorundam, oratori nullo modo utilem, nec foren-  
si generi dicendi accommodatum affirmasset, hæc  
addidit. Ipsæ illæ contiones ita multas habent ob-  
scuras abditasque sententias, uix ut intelligantur.  
Si igitur tantâ caligo ipsas semper texit, ut uix lu-  
minibus penetrari ad multas partes ipsarum eo quo  
que tempore potuerit, quid mirum si nunc, in maio-  
re multo harum rerum cæcitate, diuersa ingenia,  
& ea quidem acuta & ualde exercitata, diuersos  
sensus inde eliciunt, & aliqua opinionum uarieta-  
te distrabuntur. Nam iudicium huius nostri aucto-  
ris nullo modo arbitror contemnendum, cum sit no-  
tum omnibus & exploratum quanta fuerit acies in-  
genij illius, & quantam curam diligentiamque ille  
adhibere sit solitus in ijs omnibus, quæ literis pro-  
debat, & in manus eruditorum peruentura uide-  
bat, præter quam quod cum ille natura consuetu-  
dineque factus esset ad res magnas publicasque &  
cogitandas & administrandas, multo melius ad  
occultos hos reconditosque sensus peruenire pote-  
rat, quam qui numquam in re publica gubernanda  
uersatus esset : nec ullo tempore cogitationem ali-  
quam talis hominis propriam suscepisset : conside-  
ret demum secum, si forte ipse antea hoc opus ag-  
gressus esset, quam sæpe multumque secum dubita-



turus fuisset, & in non paucis fortasse locis hæsu-  
rus; ut humanius clementiusque postea de scriptis  
aliorum iudicaret: nam hoc in primis genus exercita-  
tionis expositum esse uocibus maleuolorum, & fa-  
cile ab obrectatoribus reprehendi accusarique  
posse, omnes nouerunt: nulli enim adhuc in hoc ne-  
gorio ita felices fuerunt, ut non incurrerint in ma-  
ledicta inuidorum: inuenerintque aliquos, quæ ex  
eorum erroribus laudem sibi comparare stude-  
rint. Sed hoc relicto, in quo ille aut uacuus est ab  
hoc omni periculo maloque, aut si qua illuc offensio  
est, nostra est, qui ea, quæ ipse animi causa exer-  
citationisque studio scripserat, edere, & in ma-  
nus doctorum hominum tradere uoluimus: cum  
sciamus ipsum plures epistolas summa, elegantia et  
eruditione refertas uarijs temporibus scripsisse,  
paucas tantum, quas ederemus inuenire potuimus;  
cum bona pars illarum aut amissa sit, aut una cum  
alijs quibusdam ipsius diuersi generis scriptis custo-  
diatur, quæ in his locis collocata sunt, ut his tem-  
poribus commode tractari, inuestigarique non po-  
tuerint. Nam doctam illam & grauem episto-  
lam: si tamen epistola ipsa appellanda est, quæ an-  
te historiam Petri Bembi sine nomine iam excusa  
fuerat, putauimus auctori restituendam: quod enim is-  
psum tunc mouit, postquam ut scriberet eam co-  
actus est, ne cuius esset eo tempore intelligeretur  
(uoluit enim existimari nimis honoris cupidus, si  
suum



suum nomen in fronte alieni operis, & illius quidem  
ualde illustris & clari, adfixisset: nec suæ digni-  
tatis id esse ullo pacto arbitrabatur) cum incom-  
modi nihil nunc gignere possit, non putavi attenden-  
dum: contra enim hoc tempore nulli alij rei stude-  
tur, nisi ut quantum fuerit ingenium hominis ab om-  
nibus intelligatur: atque ita ope horum monimen-  
torum uiuum ipsum celebrequi contra tenebras mor-  
tis uetustatemque teneatur. quare non putavi  
partum illum esse negligendum, qui & ipse meo iudi-  
cio ad nomen ipsius celebrandum ualde aptus est.  
quod autem narraui, uerum esse noui: cuncta illa  
nobilis & beata ciuitas. Si ipsæ igitur, quæ adhuc  
latent & abditæ sunt: & hæc, quæ reddita ipsi  
est, colligi potuissent, non parum (ut arbitror)  
uolumen hoc auxissent, et utilitatem etiam non par-  
uam ijs, qui legerent, attulissent. Idem etiam ac-  
cidit de alijs non nullis, quæ præclare inchoaue-  
rat, ut alia de causa, quia scilicet plane perfecta  
non sunt, ipsa coniungi cum his non potuerint, &  
specimen quoque & ipsa dare cum reliquis magni in-  
genij, singularisq; doctrinæ huius summi uiri. Sed  
multo maior iactura fuit, quod ipse mature extin-  
ctus est, qui non solum hæc, quæ instituerat, absolue-  
re & expolire potuisset, uerum etiam alia maio-  
ra multo & grandiora conficere. quod ipse, ut iam  
dictum a me est, & multis quoque notum, tota men-  
te cogitabat, & magna cupiditate huius eximij o-  
peris

peris efficiendi ardebat: is enim profecto fuit, &  
tali ingenio præditus is uir, ut, si diutius uixisset,  
gloriam omnium, qui inferiore hac ætate uixe-  
runt, omni genere suorum scriptorum, non solum  
adæquaturus, uerum etiam superaturus esset.  
*Vale.*

Pateat yniuersis & singulis qualiter R. Do.  
Alexander Strozza Præpositus Flor. In-  
quisitor hæreticæ prauitatis, visis latinis  
monimentis Ioannis Casæ, partim versis  
bus, partim soluta oratione scriptis, ea tã  
quã in nullo discrepantia a sancta & cath.  
doctrina sacrosanctæ Rom. ecclesiæ im-  
primendi facultatem concessit. Die 7. mē-  
sis Iunij. 1564.

Alexander Strozza,

# In hoc volumine continetur.



*Arminum Liber.*

*De officijs inter potentiores,*

*Et tenuiores amicos.*

*Petri Bembi vita.*

*In historias Petri Bembi prefatio.*

*Epistola ad Ranutium Farnesium Car.*

*Epistola ad Petrum Victorium.*

*Gasparis Contareni vita.*

*Plures orationes Thucididis*

*Epistola Petri Victorij ad Jo. Casam*

1

27

53

77

82

85

89

145

201

IOANNIS CASAE  
CARMINA.



LAMINII manes, instar mi-  
hi numinis vmbra  
Flaminij, hæc campis cernis ab  
Elysjs?  
An tibi, quæ nostris fuerat tam  
feruida cura

Cocytus nigris eluit amnis aquis?  
Tu solius Priuliq; ausus compescere inanes,  
Et molli versus frangere voce truces.  
At nunc ille malo Galateum carmine vexat,  
Et sanctum nobis pellit ab vrbe virum.  
Tu ne ausus Priuli Galateum pellere ab vrbe,  
Aspera q; in dulcem dicere verba senem?  
Tu ne auctor Roma montani vt munera vici,  
Fumosi vt curam præferat ille laris?  
Aureus ille senex, vitæ cui licia Parca  
Intacta ducunt candidiora niue?  
Qui nec Principibus, vrbi nec scilicet agra  
Formidet medicis adplicuisse manus?

Quemq; adeo nemorum custos, pecorisq; magister  
 Mandavit sacro summus adesse gregi,  
 Hinc eas, & fuscas ignoti ad flumina Melphæ  
 Pascere cum vili coniuge pergit oves?  
 Quid si animis inueniuntq; senumq; est illius æque  
 Dulcior Hybleis alba senecta fauis?  
 Quid si illum retinent quicumque Amaryllida curant,  
 Huius ad exemplum peccet ut illa minus?  
 Uxorem hunc tamen ad vetulamq; humilemq; releges,  
 Frigida ut in viduo ne cubet illa toro?  
 Quæ puras pridem didicit perducere noctes,  
 Et monitis casta est & proba facta viri.  
 Sed tu Flaminij potius iam nobilis umbra,  
 Et multum insigni conspicienda lyra:  
 Nite cæca huius cepere obliuia lucis,  
 Cum tibi mors avidas intulit atra manus:  
 Huc ades, & Priulum compescas; nam male nobis  
 Iandudum insolito versus in ore sonat.

**V** T capta rediens Helene cum coniuge Troia,  
 Lento homine atque animi lenis, nimiumq; remissi,  
 Incidit in cadem ipsam & funus sorte sororis,  
 Quam præceps miseri virtus iugularat Orestis,  
 Succisam de more comam missura sepulcro  
 Germanæ cineri, fertur dempsisse capillo  
 Vix tandem e summo paulum, ne forte placeret  
 Tonsa minus metuens Spartanis improba mæchis:  
 Haud aliter Calatæe malis erroribus actus

Nuper

Nuper ego, & Phrygios nautas, Paridemq; secutus  
 Ausugi longe: atque idem, redyt tamen ut mens  
 Ad sese peregre nimium remorata, proterua  
 Ornamenta fuga sensim lenteq; repono:  
 Parui etenim refert Veneris ne cupidine, ut illa,  
 Incensus, pulchra vel saucius ambitione,  
 Tramite declinem recto, violemq; pudorem.  
 Debueram dudum crinem secuisse decorum:  
 Hoc est argentum, comites, & stragula, cœnas,  
 Lususq; & musas missas secisse loquaces,  
 Intrepidus nuper curata mentis & acer  
 Corrector: sed enim prauus populi pudor obstat;  
 Hunc propter pauidi phaleris amicum inepitis:  
 Nec sicci madidam audemus, veriti bene potum  
 Conuiuium vulgus, collo dempsisse coronam.

Dedecus ambitio pulchrum est, nūtiūq; fauentis  
 Laudatum populi studio: I bone quo tua uirtus  
 Te uocat, i pede fausto, et nomen laudibus auge,  
 Aequales aiunt comitesq; pūq; propinqui:  
 Quod si natura, aut ratio, uirtutis habendos  
 Germanas propriasq; notas euincat honores,  
 Publice ut aes signant, extemplo ut noscere, nummus  
 Quanti quisque siet, possint: per turbida Ponti  
 Curramus rapidi maria, & gelidas properemus  
 Ipsa hieme in media tantum ad decus ire per alpes,  
 Oblui podagra, nervos urentis & artus.

Nunc prauos inter tituli discrimen inanes,  
 Atq; bonos nullum signant: saepe & toga pectus

Candidius mulco; & maius pulla arctaq; texit,  
 Quam laxi, Tyrioq; infecti murice amictus:  
 Nam si legitimum nobis virtutis inurant  
 Fasces & tituli signum; meretur honores  
 Ipsa vel vita, informis ne prodeat: inq;  
 Excusus, Priulusq; bonus, simplexq; Fæternus,  
 Prudens & vera virtutis cultor uterq;  
 Vitrea quos numquam ticillat gloria, febris  
 Purgatos huius. Nos quamvis cesserit horror  
 Atque æstus, sani nondum tamen vsque valemus;  
 Sicq; animus positam reminiscitur ambitionem,  
 Vulnus ut obductum prurit tamen, hæret a fello  
 Ut nudo cliellis nonnumquam vlcus in armo.

Vos agite aureolum tondete a vertice crinem  
 Lasciuo huic capiti, atque domi cohibete; seueri,  
 Non Menelaus vti, erronem me: tu, Priulusq;  
 Utroque & melior Polus (quod dicere vestra  
 Pace mihi liceat) neidag; extrudite Roma  
 Restantem: ut duri mulam quandoque cerebri,  
 Luctantem in triuiu, atque equi parere negantem;  
 Sibilo agunt primum & magnis clamoribus; inde  
 Profiliunt longis armati fustibus: illa  
 Nixa diu, tandem plagis deterrita currit.

**S**I te cura vigil sophia delectat: & acre  
 Ingenium vires, si sufficit; vivere porro  
 Munere tam claro diuini: sic rectius atque  
 Commodius multo longe, decessis aut

Quod



Quod tibi cumque neant parca victurus amica.  
 Nec de te plebis quæ sit sententia, magni  
 Securus pendas: ignarum pleraque vulgus  
 Prauo metuitur modulo: tu negliges, & isto,  
 Qui nunc te exercet, fugias decedere campo:  
 An populi arbitrio quisquam, plebisque, bonorum  
 Posthabeat sanus plausum, quem iure feres tu:  
 Quandoquidem cunctos quicumque feruntur eisdem  
 In spatijs, iam recto nimirum ac sapienter  
 Iudice præcurris Bembo: cum hic interea nos  
 Desidia arguimur populo; ne forte probari  
 Credideris genus hoc vitæ simplex: etenim ad res  
 Versiculis, missisque iubent accedere nugis:  
 Ex umbra & tenebris in solem exire, diemque  
 Et gnauimè, segniem culpant: Altera blando  
 Pars animum integrum querit, me dedit amor  
 Per luxum, & patui verbis obiurgat acerbi:  
 Qui simul ac stomachum, quamquam per multa ferenti  
 Ut placem, morunt: rege ro grauiora receptis:  
 Ut proprium seruis auri sceleratus acervum  
 Undique congestum: neglectis, iura fidemque  
 Exponis tota venalem, legibus, urbe:  
 Cum miserum atque inopem deiectum rurè paterno  
 Deferis, atque adeo prudens, nummisque redemptus  
 Prodis: & exunctum producta licet clientem  
 Usque adigis, dum ædes etiam proferibat auribus:

Turpiter aut vltro seruis, plerumque furentis  
 Mancipium domini: Manibus tenet ferræ catinam

Cœnanti ingenuis? aliam ten' sumere mentem  
 Deterioris heri ad nutum atq; aliam? haud animo par  
 Est generi, quicumq; suos apud ortus honeste  
 Imperio abiectus pareat, trepidusq; ministrat.  
 Quid quod amicitia, caro dum cuncta lucello  
 Metiris, cultus tu nullos, nullaq; nosti  
 Officia: anormiq; decor concinnus inepto  
 Quid dislet nescis? pecudis na nos cute rectam  
 Naturam inspicimus, quid publica cum geritur res.  
 Per te, si furtis quo sit locus atq; rapina,  
 Bellorum causas iussus praeidere, nutris;  
 Desidia, aut tu me censor culpaueris, ori?  
 Flagras ambitione, ardesq; cupidine saeva  
 Purpurei, haud uitam hanc mores ue decentis, amictus.  
 Uror amoris ego haud me dignis ignibus, esto  
 Quando ita me insimulas; quid tum? peccamus uterq;  
 Nil est cur tu nre prior incuses, grauiora  
 Offendens multo, & nimium distantia recto:  
 Nam qui uel paruo conductus peierat, & qui  
 Tamquam turbata victum sibi quaritat unda  
 Piscator, pacem bellis ubi miscuit, idem,  
 Iudicium atq; crucem si demas, ire latrones.  
 Inter iam uelit & ingulare homines, sua quisq;  
 Defendunt lenes uicia & minuunt, aliena  
 Carpere pleriq; austeri, nimiumq; seueri.  
 Adde quod incurata gerens, serpenti aq; intus  
 Ulcera corrupto tandem pulmone peribis,  
 Purgandum illius cum te committere morbi

Non medico studeas ; annus non vnus & alter  
 Imminuat quicquam : pulchris macrescere captum  
 Diuitijs frustra tantum doleamus amici :  
 Nec mea post paulo febrisq; reliquerit ultero  
 Frigidior veniens morbum cum leniet etas,  
 Intereaq; veterius non animum grauis vrget,  
 Nec tamen insequitur populus : quid si nihil omni  
 Est actum in uita nobis, quod ledere quemquam  
 Possum? non ego rem, mihi sollers quam pater auxit,  
 In Venerem effundam, neq; lue petitus amator  
 Iniusta, omittam fundumq; laremq; tueri:  
 Nec fuerim, mimam quo sit mihi laxius unde  
 Munerer, vsquam inopi nimium contractus amico :  
 Deniq; non mos, non etas alienior : adde  
 Ille etiam laqueo statuit qui nectere collum  
 Aurata ne trabe, an de putri pendeat ulmo  
 Si quicquam referre putas ; quam ego honestius ac tu  
 Intereo ; seu me Musis & Apolline claro,  
 Seu quis me pulehro captum culparit amore :  
 Nec tamen insequeris colloq; ac saucibus anguis  
 Inflat is viro vitam deducere inertem  
 Indignum clamat fucos, segnem malus vrget :  
 At tecum si quis sic egerit : Iter ad urbem  
 Europa ex omni, credo, ve vestigia summo  
 Inspiciant veteris veneranda in colle Quirini:  
 Sive in Auentino Romae, ac non perditus exul  
 Expes ut quisq; est, huc se se contulit, ut se  
 Bargulum ad Illyricum dicas, latrociniumq;

Concessum; nimium merita dicatur acerbus.  
Oderit & rabidum populusq; patresq; venenum.

Non ego: nec vulgi si irritor vocibus hoc nunc iuvet  
Immeritum quemquam latrari: possum ego multos.  
Eximere e numero, turpis contagia morbi  
Quos nulla attigerint, sanos, recteq; valentes.  
Sincerum ut Molsa pectus, lauere salubres  
Pierij quem fontis aquae: puroq; Camœnæ  
Curatum canem servant. Studioq; referti  
Spectatus dudum tanto plausuq; theatri  
Ubalдинus, inops agriq; lariusq; paterni,  
Virtutis locuplex: populo spectante Quirini  
Hunc non donatum scana decedere turpe est.

### In mulieres nuptas Hippolyti.

Ex Euripide.

**C**oncinnum in auras luminis hominum malum  
Cur protulisse dixerim te feminas  
Iuppiter? etenim erat si ferendum hominum genus,  
Haudquaquam oriri debuit de semina:  
Sed emere liberorum oportuit sibi  
Semina genus mortaliū, ferens tua  
In templa tantum aut aris, aut auri graui,  
Ferriue, quanti vnus foret quisq; pretij,  
Domosq; habere feminis sine liberis.  
Nam nunc in ades vehere cum malum parant,  
Extemplo opes pro eo rependunt patrias.

Atque

Atque hoc liquet malum esse magnum seminam,  
 Namq; ad alienos pellit hanc ex ædibus. 7 de mul  
 A se pater prognatam & eductam, suis,  
 Additq; dotem, ut liberet sese malo:  
 At ille contra, stirpem in ades noxiam  
 Qui ad se recepit, latus est cum pessimam H  
 Pulcherrime ornat statuam, & auro & purpura.  
 Certat, beatas sumptibus miser domos  
 Exhaustiens: atque hæret: etenim splendidis  
 Affinibus gausus uxorem asperam.  
 Perfert: proba at si ea, sed propinqui futiles  
 Evenerint, hanc miseriam comprimunt.  
 Verumtamen commodius evenit, quibus  
 Nullius vxor sedet in ædibus preti,  
 Ac fatua: nam sapientem ego odi seminam:  
 Nea nec intra venerit limen domus,  
 Qua, quam mulierem sapere par est, plus sapit:  
 Facilius etenim perspicaces edocet  
 Astutias, dolosq; Cyprie improba:  
 At fatua mulier ob stoliditatem sapit:  
 Penetrare nempe ad feminas oportuit  
 Nulli licere familiarium, simul  
 Sed beluarum includere rabiem domi  
 Loqui insciam, sermonem ut inferre alteri  
 Ipsa nequirent, nec alij illas adloqui:  
 Nunc facinora, intus quæ mala mala cõgitant  
 Domina, foras hac familiares efferunt.

Cum ab Vrbe profectus, Venetias iret.

**H**umida Tyrrheni fugientem flamina venti  
 Calumq; pestilens Laiis;  
 Ne Venetum excipiente missima litora, & aurea  
 Salubriores, putribus  
 Iam membris senio, & podagra turgentibus acri;  
 Quae stare suerunt nec mala  
 Imbuta tussi, neq; in ipsis fluctibus udae  
 Faerne, mireris licet:  
 Prorsus, qui Romam liquit, rerum ille carebit  
 Pulcherrimo spectaculo;  
 Nec cœtum aque illustrem hominum, nec Palladis aque  
 Instructa pectora artibus,  
 Terrarum ut cunctas lustret circumuagus oras;  
 Offendet usquam gentium;  
 Fragmina nec muri aspiciet maiora uetusti  
 Non diminutis urbibus;  
 In primis Bromij lacices & frigida siccis  
 Requiret idem faucibus  
 Pocula lympharum sub terras condita opacas,  
 Aut fossa Lucanam in niuem:  
 Ipse ego, seruenti delapsam ex imbrice lympham  
 Nuper, nec altos in scrobes,  
 Et uappam, salices inter quæ nata palustres  
 Cani saporem patrij  
 Potanii offundet, medijs seruoribus, ardens

*Arence*

*Arenae saue traxero:*

*Ast idem hospitibus placidos & dulcia pacis:*

*Impertientes commoda*

*Mortales cernam, & locupletem ciuibus urbem*

*Dispar probantibus nihil:*

*Cernam lorica uiolentam, ensesq; superbum*

*Inermibus suffragijs*

*Constrictum, & dira execratum cadu amorem*

*Longe exulantem gentium:*

*Illic cum cano prudentia sera capillo*

*Paret uicissim, & imperat:*

*Illo se nusquam propendens contulit equum*

*Bona comes concordia;*

*Fraudibus Hesperia ut pulsum est, timuitq; rapacis*

*Uncas licentiae manus.*

### De Vbaldino Bandinello

**T***Alacaro capiti iam nimium diu*

*Munus Melpomene lugubre; Naniam*

*Debemus: querulam prome puer hyami.*

*Siccis non ego te genis,*

*Mærore aut vacuus pectora lurido*

*Laudabo: neq; desiderium moræ*

*Nostrum diminuunt, aut hominum atterens*

*Furtim tristitiam dies...*

*Te morum studium, te sapientiae*

*Cura, & nobilium fecerat artium*



Ubaldine quies gnaua, operosaq;  
 Musarum otia diuitem,  
 Non auri, pavidis addere mentibus  
 Mordacem validi sollicitudinem,  
 Non ostri, experiens quod reparat Ligur,  
 Nobis merce superflua  
 Irritet, fugiens pauperiem, aquora  
 Iracunda leui nauita palmula,  
 Aestatem Libya perferat igneam  
 Idem, idem Aemonias nives,  
 Vestigans lapides, femina quos petis  
 Vel flauo capiti, vel sereti decus  
 Collo. Mentibus Atlantiades Dens  
 Calcar subdere meritis  
 Ludens dum cuperet, fertur inutile  
 Prompsisse aurum, acuens illo hebetes, uis  
 Exercet puerum non degere uulce  
 Mater sedula futili:  
 At fortes (quoniam robore stat suo  
 Virtus, Peliaca ut quercus, & aquoris  
 Saxum Carpathij) nec famula decet  
 Auscultare pecunie,  
 Nec firmos fragili fidere: defluit  
 Fortuna, ut subitis auctior imbribus  
 Extemplo aret aqua riuus inops sua  
 Nimbos si popule Deus  
 Tu dulcem es Latij copiam adeptus, & Graium diuitias,  
 Graium diuitias, & dominam urbium  
 Artem:



Artem : quò mihi nunc & patria occidit  
 Multo flebilior tua :

Arni mæret enim fluminis accola,  
 Florens ingenijs accola fluminis  
 Arni, tot te animi compositis diu  
 Theſauris, tacitum mœri:

Ut nauium pelago præcipitans notus  
 Uertis; quæ remorans, largiter aluam  
 Impletat ſpatioſum: illa Arabum ferens  
 Gazas, illa ebur Indicum,

Et gratum redolens thus ſuperis ferens,  
 Et pexa e ſolijs vellera ſericis,  
 Aetnaæ Cereris plenaq; frugibus,  
 Portus ſtrenua patrios

Ditaret, populos & procul oppidis  
 Effuſos ſtudio ad ſe raperet lucri:  
 Nunc ſeni arbitrio voluitur Adria  
 Cacis obruta fluctibus

At tu, progenies aurea fulmine  
 Gaudentis Iouis, o deſere ne meum  
 Carmen, Muſa: diu ſed vigeat ſacri  
 Cuſtos pagina nominis.

Hic me Caſtaly tramitis arduos  
 Flexus, Aeolia hic me docuit Lyra  
 Ictus; O nebulam obliuiſio & arceat:  
 Furuam a nomine ſplendido

Noctem: ne volucris filia temporis  
 Ne rubiginis atra admoncas meis

Dentem

Dentem carminibus, neu nigra nubibus  
 Condas Italiae decus.

Ad Hannibalem Oricellarium nepotem,  
 diligentissime cauendum esse ab  
 adulatoribus.

**M**Entem blandicie perdere credulam  
 Norunt non secus, ac mortiferas male  
 Multo melle nouerca  
 Olim cum medicant dapes.  
 Viro imbuta malo dulcia murmura  
 Mendacia fuge lingue; & teneras neque  
 Falsis laudibus aures  
 Admoris, cupidus puer  
 Verarum, bona ni decipit indoles;  
 Et tete excutias, tinniet improba  
 Nugas cum modulans vox;  
 Quas atro rapidi ferent  
 Cum fumo borea & puluere sordido:  
 Ni quicumque libens dicier audies  
 Verbis, te labor illum  
 Rebus finxerit arduus:  
 Sensus vt iuueni pellicit intimos  
 Virgo candida; cum turgidulas tegens  
 Nulla veste papillas  
 Tolli illum recipit sinu,  
 Sic laudes animum, vera vbi concinunt;

Per

Permulcere solent : nec mulier tamen  
 Ut cantu sine dulcis  
 Spernit psallere tibia,  
 Sic virtus, populus si taceat, sedens  
 Cessabit : nihilo nec minus obsita  
 Noctis ferueat umbra,  
 Et deserta silencio,  
 Quam cum per medias inclyta ducitur  
 Urbes, & celebris voce fauentium  
 Direpta hostibus arma  
 Affigit foribus deum :  
 Cum laudis faciem sumpserit impudens  
 Fraus, affinxerit & cum tibi non tua  
 Blanda nomina voce,  
 Et dulcem illecebram struet ;  
 Ne te precipitem trudat amor tui,  
 Ne nugis capiare, ut volucris solet  
 Dulci paruula cantu  
 Tecti vepribus aucupis .

## Ad Fortunam ;

**E**Xpers consilij, quæ pede lubrico  
 Incedis, zephyris mobilior Dea  
 Et fluctu lonij incertior aquoris ;  
 Te, cum leta sinum pandis, & vberes  
 Fundis diuitias, ac miseris ades  
 Improvisa, boni progeniem Iouis

Dicunt :

Dicunt. Tu ratio, tu sapientia,  
 Servatrix eadem crederis urbium;  
 Virtutisq; sedens in solio nites;  
 Sed mox torua domos regum ubi concutis,  
 Et congesta diu munera, turribus  
 Deiectis, subito turbine dissipas;  
 Vana te comitem stultiæ ferunt  
 Deliram; Immeritum tu, titulo bonis  
 Dempso, nobilitas; frena superbia  
 Atris tu manibus detrahis ebræ,  
 Successu, & ruere hanc sic temere ad suum  
 Rides arbitrium, innox humilem truces.  
 Vultus deposituram: O uinam meæ  
 Oblita ostiolum prætereas domus,  
 Seu tu sanguineis oppida territans  
 Bellis, ingrederis per Latium fera,  
 Seu pacemq; gerens, & populos beans  
 Pennis inuolutas uersicoloribus:  
 Nam sic instabilem uisere te meos,  
 Vel letam atq; hilarem, pertineam lares.

INCIPIT II A

De Francisco Tornuno Cardinali.

**Q**UO tollor pauidus? quo feror insolens?  
 O qua Castalijs fontibus aureos  
 Crines, osq; lanis virgineum, genus  
 Magni Melpomene Iouis,  
 Cruri purpureos induæ candido

Soccus

Soccus : nam iuga transmittimus alpium

Soli : unus enim est mi comes argui

Mendaci metuens pudor :

Valem diua tuum tu moneas uia :

Si pure colui uestra puer sacra

Feruens mence noua , si senior tua

Nunc uestigia persequor

Quercus umbriferas inter & ilices

Quarens aërias : Non ego diuinium

Vanis edidici perstrepere auribus

Empto carmine : non ego

Corruptus pretio nunc meditor parum

Castra ducere te ad uestibulum domus

At tu prome puer , prome age barbiton

Cessantem nimium diu .

Spartanus ueluti , per nemus asperum

Dumis insidiantem ut pecori lupum

Egit , cum fremitu & laude fauentium

Pagorum redit ad gregem ;

Villorumq; globos sanguine sordidos

Fert rictu generoso , e iugulis feri

Uulsos hostis , aquas sic repetit sui

Tornunus Rhodani , bene

Defensa Hesperia clarius , & impigri

Compresso celebrer militis impetu ,

Bellona ancipitis numina militis

Horrere immemoris diu :

Alterna sedenim ille admonuit serum :

D

Fortuna

Fortune, celeri uertere turbine  
 Gaudentis uacuum corpus, uti choros manu :  
 Lasciua iuuenes ubi  
 Ducunt, & Zephyris huc agitantibus  
 Atq; illuc, Phrygio Sidonias acu  
 Illusas chlamydes, instabili cura  
 Lustrant atria poplite  
 Directa ingrediens passibus equitas  
 Ad normam paribus, nec modulo sibi  
 Maiore, atq; alijs commoda diuidens,  
 Quorum non dubia est comes;  
 Illos are micans non pedum cohors;  
 Non sauis equitum turma fremantium  
 Horrens cuspibus terreat, aut mari quae  
 Vecta caruleo rates :  
 Nam recto fauet, & iustitiam bono  
 Plerumq; equus alit Iuppiter exiit  
 Obscuram & comitru, & fulmine terreat  
 Fraudem, atq; implicitos dolos  
 Nudans. At uigilem fallit amabilis  
 Acrem simplicitas, & super aeneas  
 Accersita fores, & super ardua  
 Pernix mania transilic  
 Hanc puro retinens in gremio fouet,  
 Sincere Italiam & diligit hospitam  
 Tornunus, patriam cuius uti suam,  
 Natorum, & memor aurea  
 Cuius coniugis : hunc purpureus pudor,

Eluisq;

Elutisq; fides candida sordibus,  
 Et presso digitis ore silentium  
 Arcanum insequitur, neq;  
 Infandumq; nefas ense domans Themis  
 Districto cornitem se negat inclyto  
 Impolluta seni, mundaue ueritas  
 Albo lucida pallio.  
 Ergo permadidos felle animos nigro  
 Regum diluere est ausus, & aspera  
 Permulcere manu pectora turbida  
 Plena ira, inrepidam struens  
 Pacem, qua manibus sanguineis diu  
 Atrectata, magis post niteat, uelut  
 Fulgentes lapides, arane lucida  
 Cum tergere uolunt, luto  
 Conspurcant: id agens egregius senex  
 Celtarum procerum sanguis, & oppida  
 Firmans obtinuit Marte labantia  
 Quassante, & miseris suas  
 Urbes restituit ciuibus, impigram  
 Pacem, tela cruenta inter & asperos  
 Procubens sonitus fexi z etenim geb.  
 Torpens quam peperit timor  
 Pacem, seruiet illa, horrifoni simul  
 Bellone strepitus ingruerint fera,  
 Imbellis. sedenim desine feruidos  
 Dulcis Melpomene modos:  
 Nam nec cuncta pudor fert, neque ueritas

*Cum lucro alma decorum explicuit caput  
Semper : cum melius tecta silentio  
Virtus inuidiam latec*

**S***unt qui versiculo minutiore,  
Verum pernitido atq; persuenci,  
Tamquam pallady liquore olui  
Complures properent linire chartas:  
Atque, araneoli angulos domorum  
Ut tela tenui solent replere  
Quantumuis facile, ore fila paruo  
Nentes longa, ita compleant libellos  
Totos uersiculo minutiore:  
Hi vatium in numero an ne sint habendi  
Vulgus viderit, atque siqua vulgo  
Pars vatium est similis, quibus Thalia  
Flacci sordet, optimi poetae,  
Quod is uersiculo minutiore  
Atque perfacili atque persuenci  
Totas spreuerit occupare chartas.*

**De Margarita regis Gallorum sorore.**

**H***EU mos, ut atris saepe coloribus  
Contaminatus purum animum inquinat.  
Vix eluendis sordibus per  
Tadia solliciti laboris:  
Ne vitreis & fontibus & coma*



*Silue virentis letum, & amabile*  
*Ruris silentium sequentem*  
*Aonia puerum camæna*  
*Mersere sacri gurgite fluminis,*  
*Intacta ut essem candidior niue:*  
*Immunda sed mox polluit me*  
*Roma luto nimium tenaci,*  
*Quod longa nec dum discutiat dies,*  
*Sacri nec amnes hactenus abluant;*  
*Quin horret & me, & ora cano.*  
*Fæda nigro refugit Thalia.*  
*Vulgus venenis vertere Colchicis*  
*Plerasque mentes aptius, eripit*  
*Sensus priores, atque mutat*  
*Alba nigris, maculisque gaudet:*  
*Impurus atra quem populus manu*  
*Tractarit, ille & decolor & niger*  
*Erit diu, obductamque facem*  
*Vix iterans remouebit annus,*  
*Notam relinquens: at mihi candida*  
*Mandanda uirgo est regia pagina*  
*Farnesio iubente, bacca*  
*Purius illa nitens Eoa,*  
*Inuaminato digna cani, dea,*  
*Est ore, lucis Castalijs dea*  
*Quæ vulgus arcetis profanum,*  
*Et nitrido prohibetis amne*  
*O tetra tandem consilia hac bonæ*

Obliuioni

Obluioni tradite turbida;  
 Labemque nobis rore sacro  
 Abluite, illunniemque vulgi.

Deflet mortem Horatii Farnesij.

**T**E flebimus flos Hesperia puer  
 Madente multis carmine lacrimis;  
 Et, debitam laudi Thalias,  
 Nania lugubris occupabit:  
 Ille, ense pectus qui tibi candidum  
 Traiecit, iisdem vulneribus Lati  
 Cecidit & spes, & iuuescens  
 Italiae decus ense carpsit  
 Horati eodem. Non ego sauciam  
 Ictu parentem mortifero tuam  
 In lacrimas culpam ruentem,  
 Nec uidua gemitus puella  
 Compescere ausim carmine: lugeat  
 Immo illa dulces funere nuptias  
 Miscens amaro, nec fac umquam  
 Te misera illacrimata steris:  
 Iam nec capillo parcere, nec genis  
 Aequum puella est regia; lacrimis  
 Efflagita Martem cruentum  
 Uberibus, pueri cadentis  
 Dulces ocellos, & tua gaudia,  
 Qua conciderunt exorientia:  
 Ut stella, qua uix dum coorta

Hesperium

*Hesperium occulitur sub aquor.*

*Non ille auorum, nec soceri immemor:*

*Dulcique flagrans igne tui, neci*

*Ulero obuios gressus superbos*

*Intulit, intrepidumq; pectus*

*Obiecit hosti, qua uiolenti*

*Bellona nigris feda cruoribus*

*Est uisa Marci senientis*

*Sanguineas glomerare turmas.*

*Nunc latus umbras uulnera nobiles*

*Ostentat inter pulchra, nemus tenens*

*Beatum, ubi Hectorque & Latini*

*Sunt ueteres, Rutilique Reges:*

*At Thespis o grata sororibus*

*Obliviosi pelleret temporis*

*Idonea umbram, atraque mortis,*

*Gloria, vulneribus mederi;*

*O trade Musis & Polyhymnia*

*Custodiendum nomen Horatii*

*Clarum, & domum Farnesiorum*

*Hanc Latij, Italiaeque lumen.*

### In Petrum Victorium:

**N**obis Calliope magnum alienum es superest uetus:

*Nam pridem ratio scripta mihi est pectore in intimo:*

*Tu quaeso patere a te solam quidquid id est dea.*

*Non Victorius est exiguis uersibus, aut hyæ*

*Aptandus*

Aptandus tenui: vester amat Phœbus eum, neq;  
 Ulli plura bonum munifica crediderim manu.  
 Largitum: uber enim sicut ager, ruraq; pampino  
 Nitis florida lacchi, & Bromio & frugibus oppida  
 Circum plena hilarant, muneribus diues Apollinis  
 Etruscos populos ingenij fruge bona bonus  
 Ille enutrit alens. Sic senior uertice Pely  
 Olim Phyllirides frondifero semifer uberi  
 Graios nobilium seminio dicitur artium  
 Duxisse. Ille dies e medio tollere qui potest  
 Ritu Cecropio scripta tibi clara volumina  
 Victori, eripiet roriferis sidera noctibus  
 Idem subtrahet & piscibus, idem aquora nantibus.  
 Contages populi te tetigit lurida morbidi  
 Numquam, te ambitio curriculum pratercunium  
 Obliquis oculis aspiciens nec pepulit, neq;  
 Illi roboris hoc attribuit Iuppiter, ut sacrum  
 Phœbo discutiens commoueat pectus, originem  
 A Caolicet, & Porphyrione a ualido trahat  
 Conatis solium Calicolum scandere fratribus.  
 Non res, cui cumulus semper abest, cuncta ue metiens  
 Aurum te pupugit: te nitidum Musa salubribus  
 Fontis Castaly lauit aquis candida, tu mea  
 Es lumen patria percelebris: sat mihi fructuum  
 Ignaua hac tulerint exilia in montibus asperis  
 Quæsis, argueris desidiæ ni tibi debitum  
 Carmen, ni ue inopis quod cicharæ dinumerem modos,  
 Acceptum id mihi te ferre neges, iureq; respuas.

O qua

**O** qua terrificos vicina e turre cietis  
 Tot nocte ara sonos tinnula, totq; die;  
 Si mihi uentura noctis dormire licebit  
 Per tot tinnitus particulam misero,  
 Nec cum defessos iam iam contingeret ocellos,  
 Vos metuet subito, diffugietq; sopor,  
 Ipse ego cras vobis vltro cortiq; rudencis  
 Spiras, & firmo e robore fulcra dabo;  
 Tutius ut sonitu boreamq; laceffere sauo  
 Possitis posthac, & maria, & conitrus.


**C**UM cinctum nimbus, & nigra nube sedentem  
 Deficient olim flammea tela Iouem:  
 Cum sueta in pontum plenis decurrere ripis  
 Precipitem sistunt flumina prona pedem:  
 Fluctibus & raucis Siculum pertundere litus  
 Ionij cum iam desinat unda maris:  
 Tunc quoq; uicinis suspensa in turribus ara  
 Cessabunt bombos edere raucisonos.

**C**UM mare nec fremitus edet, nec sibila venti,  
 Nec nimbi, abruptis nubibus igne, sonum:  
 Et cum nubigene Thaumantidis ora sinumq;  
 Deficiet croceus, purpureusq; color:  
 Cum pontum nudi pisces, cum littora picta  
 Conchae, cum densum deseret umbra nemus:  
 Turre tua tunc Corneli dulcissime raucos  
 Tinnula cessabunt ara ciere sonos.

F I N I S.

E

**O** que terrarum viscera et intra viscera  
 Tormenta et horum viscera, torpore  
 Simili membra noctis horum viscera  
 Per tota viscera pariter viscera  
 Nec cum quibus iam contingeret oculos  
 Vos mecum subito dissingit labor  
 Iste ego cum vobis vobis torpore viscera  
 Spiritus, et summo et robore viscera  
 Tuus in somnia viscera viscera  
 Tuus post viscera viscera.



**C** De cunctis viscera viscera  
 Desiderium viscera viscera  
 Cum fuerit in hoc viscera viscera  
 Prescriptum viscera viscera  
 Fluctibus viscera viscera  
 Ipsi cum iam quibus viscera viscera  
 Tunc quod viscera viscera viscera  
 Cessant viscera viscera viscera.

**C** De nate viscera viscera viscera  
 Nec nate viscera viscera viscera  
 Et cum viscera viscera viscera viscera  
 Desiderium viscera viscera viscera  
 Concha viscera viscera viscera viscera  
 Tunc viscera viscera viscera viscera  
 Tunc viscera viscera viscera viscera.

# DE OFFICIIS INTER POTENTIORES ET

TENVIORES AMICOS:



AGNA omnino veteres, diuturna-  
que molestia caruisse, mihi videri  
solent: qui non, quo modo nobis  
fere institutum est, ingenuos ho-  
mines, sed plane seruos in famula-  
tu habuerint: quorum ad victum,  
cultumque, & ceteras vite opor-  
tunitates, opera ac ministerio vte-  
rentur. Nam cum hominis natu-

ra celsa, ampla que, & erecta sit, longeque ad imperandum  
magis, quam ad parendum accommodata, in eam vigen-  
tem atque integram herile imperium, quod nos facimus,  
exercere qui volunt, ij molestum negotium, atque odio-  
sum aggrediuntur. Itaque veteribus in edomitos iam, &  
quali mansueta factos, quippe quos prius aut compedes, er-  
ga stulumque; aut a pueritia vsque captiuus animus ener-  
uasset atque emollisset, neque difficilis, opinor, neque in-  
iucunda dominatio fuit. Nobis contra cum robustis, va-  
lentibusque, & tamquam adhuc feris res est, qui & pro-  
pter nature spiritus dominatum aspernantur, & oderunt,  
& propter libertatem dominis etiam resistunt: rationem  
quidem dominationis iniquius interdum, sepe tamen iu-  
re, ab ipsis heris requirunt & repetunt: ex quo querela-  
rum, expostulationum, litium plena sunt omnia. Sic e-  
nim est profecto: Nam iniusti rerum nostrarum ratiocina-  
tores sumus: ac, cum sua quisque, quam alius, & que bona  
nimio carius estimet, eo que plus in omni ratione ferat ex-  
pensum,

E ij pensum,



pensum, quam acceptum referat, res conuenire non potest: hinc acerba illa sane querimonia atque exprobratio: Ego me domi tuae contriui: contraque. Ego te sustentavi, alui, in honore habui. Quam quidem inter homines controuersiam, quodque disidium, ut, quantum est in nobis, sedemus & componamus, a nobis, hoc est ab hominis officio minime duximus esse alienum. Quamobrem, cum in eam cogitationem se penumero incumberem, præcepta quædam, & tamquam artem de necessitudine, & communione eâ, quæ potentes inter, ac tenuiores coniugatur, quæque ab eâ re, quam imitari plurimum visa est, seruitutis, acerbum sane nomen inuenit, degenda composui, eamque litteris mandare institui; ut labore nostro, si modo, quod cupiebamus, aliqua ex parte assecuti sumus, normam utrique haberent, ad quam dirigere si se vellent, ijs commoditatibus, propter quas eam coniunctionem, quæ sane vna omnium maxime turbulenta videtur, copulassent, placide, tranquilleque fruerentur.

Quoniam igitur communionis, societatisque vnius cuiusdam inter homines præcepta tradimus: plures autem sunt hominibus inter ipsos, & variæ communitatum species, quarum aliud alijs propositum sit: principio hæc ipsa, de qua sit nobis hoc tempore explicandum, secerni a ceteris, seiungique debet; ut, quamquam de omnibus quædam communiter præcipi soleant, quæ ad vberiore[m] quandam, amplioremque artem pertinent: tamen, quoniam huius quoque generis separatim præceptiones sunt, eæ a nobis distincte, dilucideque exponantur. In omni itaque societate vincienda aut voluptatis dulcedine, fruendæque incun- ditatis studio homines ducuntur, aut rerum, quibus vtuntur, facultatem, potentiam, opes & copias, ceteraque id genus adipisci, tuerique, aut etiam adaugere volunt: quæ omnia in rationem utilitatis cadunt: aut honesti, rectique, ac decori pulchritudine & splendore excitati, illectique rapiuntur. Ac priori quidem in genere (exemplis enim res ficta peritior) libidinosi amores sunt, & quæ delicæ appellantur,



antur; ceteraque eiusdem modi. Utilitatis autem genus latissime fufum est: continet enim rempublicam primum; vniuersam; deinde singulas fere ciuitatis partes; nam in ita est ciuibus communiter inter ipsos societas eam ob causam, vt congregati, salui; incolumesque esse possent: tum multæ questus; lucriq; causa communionem sunt priuatim contracta. Tertium autem genus amicitiam complectitur, non hanc popularem, sed illam bonorum, cum scilicet honestum; laudabile, decorum, non emolumento captans alioquo, sed sua ipsum vi ac dignitate inductos homines virtutis amantes coniunxit arte, atque deuinxit. Tenuiores autem homines cum se ad principum ciuitatis amicitiam applicant: contraq; clari, potentes, opulenti cum obscuros, infirmos, exiles in contubernium, ac familiaritatem recipiunt; neutri fere honestatis decorem consecrari, ac ne attendere quidem videntur, sed utilitatem modo, aut voluntatem sequi. Id ex eo intelligere licet, quod neque illi bonos quosdam viros, iustosve, aut sortis, ac moderatos, quibus inseruiant, sed gratiosos, ac locupletes, si vtrumvis liceat, delegerint, & fortunis ditati confestim, tamquam id operis habuerint, discedunt, aut certe cupiunt: atq; hinc rursum laboriosum quemlibet, aut industrium, & solertem, frugique exquirunt, eosque in signiori aliqua virtute præstantibus longe præferunt. Quare, quæ de vera illa, & germana amicitia præcipiuntur, cum morum similitudo, & conuenientia bonorum animos stabili quodam amore, & caritate deuinxit, huic necessitudini conuenire non poterunt: diuersorum enim generum eadem præceptiones esse non possunt: neque vero eadem esse genera, quorum exitus, finesq; diuersi sunt. Atque alia est etiam humanarum societatum diuisio: nam aut pares inter se copulantur, quales fratrum coniunctiones sunt: aut dispares: cuiusmodi parentum est, ac liberorum inter ipsos communitas. Per multum vero refert ad inueniendi officij rationem, utro quis in genere, tam, qua de agimus, necessitudinem constituerit: quamquam in promptu id quidem est:

ambigi

pterea, quod ijs instructi sint, superioribus, aut etiam anteferi putent oportere. At vir ego, inquit, sum melior, eruditior, nobilior, vna modo re inferior, quæ ipsa non in virtute posita est, sed ex fortuna pendet; Sit ita sane: mitto enim, quod plerumque nimium semet ipsos diligunt, nimium amplexantur; sed, vt ita sit, tenendum tamen illud, nihil in hac communione relictum esse ijs rebus, quas illi commemorant, loci: principem esse pecuniam, imperium obtinere potentiam placuit: accepta semel condicio est, quæ aut tunc recusanda fuit, cum ferebatur, aut ne nunc quidem improbanda. Fuit olim apud Aethiopas lex, vt eum regem facerent, qui procerissimus reperiretur. Num igitur philosophus, brevis si forte fuerit, atque Aethiopiæ regnum affectet, non ea lege puniendus sit? Atqui sapientia proceritati, omnique corporis staturæ longe antecellit: ne mo negat id quidem: sed ea tamen Aethiopes lege viuunt, quam violare sit nefas: sic nos eam seruare legem debemus, quam nobis, quasi populo, vsus, vitæque communis promulgauit, & tamquam suasit, quamq; adeo ipsi sanximus. Tantum enim abest, vt quicquam adscribendum cuiquam sit, præter id, cuius haberi semel rationem placuerit; vt sepe id ipsum, adiectis ijs, quæ plurimi alioqui sunt, uilius efficiatur: vt meretrix pudore deterior est: ad quæstum enim eius æstimatio refertur, quem pudor, quamquam laudabilis ipse per se, tamen imminuit: petulantia verò, tametsi sua ipsa vi, naturaque turpis, auget. Neque vero aliam ob causam quibusdam in ciuitatibus institutum est, vt eximia quadam virtute ciues populi arbitrio innocentes relegarentur, isque mos ab Aristotele, quanto, qualique philosopho? non admodum improbatur; nisi, quod cum vna æquabilitate res eorum publica contineretur, omnino, quod emineret, cuiuscumque tandem id modi esset, amputandum, & tamquam complanandum censebant: vt ne virtuti quidem, sese nimium attollenti, parcerent. Quare diuitiæ tantum, atque opes in ea re censenda, atque æstimanda ponderentur, quibus semel principatus, & do-

minatio data est : reliqua circumcidantur : his se virtus, nobilitas, doctrina submittat : hoc qui recusant ( magnus est autem numerus ) seditiosi vt in republica ciues, sic in amicitia turbulenti existimandi sunt. Vinciuntur igitur necessitudine hac longe potentia ac diuitijs disparēs : vinculum autem est non caritas, sed vtilitas : ex quo illud conficitur, quod antea quoque dictum est a me, errare eos, qui hanc necessitudinem verē illius, iustæque amicitiae legibus temperari putant. Nam hoc quoque genus importunum est, magnam quandam, æquabilemque beneuolentiam, atque ardorem amoris requirentium : distinguenda sunt enim necessitudinum genera, ne temere omnia ab omnibus expectentur : quibus enim sua cuique priuatim vtilitas proposita pene ex conuentu sit, eos nostra causa tantum velle putare, vt alienum commodum anteferant suo, temere optantis est, non considerate iudicantis. Neque vero eadem vtrisque proposita vtilitas est, sed operam atque obsequium a tenuioribus potentes expetunt : inopes contra a diuitibus, atque honoratis pecuniam, aut dignitatem : illi enim, vt pote diuitijs affluentes, nullum sequuntur emolumentum, sed id modo attendunt, quod eam sibi coniunctionem ad dignitatis splendorem honorificam, ad victum autem, cultumque, atque res gerendas, cum iucundam, tum vero multis sane locis peropportunam esse intelligunt. Inferiores autem propter paupertatem, atque inopiam, pecuniæ fructum, aut dignitatem querunt : tum propter imbecillitatem factiosos, opulentosque amicos sibi, tamquam adminiculum, parant. Quibus ita constitutis, quoniam expedit cum vnaquaque in re eum nos bene cognitum habere, qui cum negotium nobis futurum sit, tum in huiusmodi necessitudine vel in primis refert non ignota nobis esse eorum, quibus cum viuimus, studia & voluntates, vt vel ad eas nos dirigamus, vel rem totam, si modo fieri possit, repudiemus : opere pretium est, locupletum, ac potentium, contraque tenuium, atque inopum naturam, & tamquam formam quandam, & speciem, quoad possumus, inuestigare,

gare, in medioque ponere. Neq; vero exquisitam quandam ad rationem exigi hæc a nobis debebunt: quoniam nec omnibus æque in rebus subtilitas quærenda est, nec vero postulandum, vt prescius agatur, quam ipsarum, quæ subiectæ sunt, rerum vis & natura patiatur. Ac locupletes quidem ita fere sunt morati, vt superbia, & fastidio efferantur: perinde enim affecti viuunt, quasi bonis omnibus affluant: & quoniam, quanti vnumquodque sit, æstimari se re nummis soleat, eaq; ratione argento venire omnia, quia eo ipsi abundant, omnium penes se rerum pretium esse opinantur. itaq; beati sibi videntur. Ad hoc accedit, quod homines magnam partem in re facienda, atque exaggeranda occupatos, diuitijsque inhiantes vident. Quare illarum possessione, tamquam excellenti inter homines bono quodam, quod vnum expetant, quodque admirentur omnes, ipsi gloriantur: reliquos autem despiciunt, nec homines putant: quæ quidem arrogantia insolentiaque ea quoq; re augetur plurimum, neque adeo immerito, quod multos multa locupletem rogare necesse est: tum arbitrantur sese dignos esse dominatu: propter copias enim, quibus ipsi affatim præditi sunt, dominationem, regnumque expeti putant. Gloriosæ itaque, atque insolentes diuitiæ sunt: eadem petulantiam habent, superbix comitem: difficile est enim, nisi si forte ratio adsit, prudentiaq; secundo fortunæ cursu non auferri. Eorundem est dissuere luxuria: nam & delicati, mollesque sunt, & copiarum ostentatione beati videri volunt. Ad summam stulta pecunia est, sed fortunata, & felix. Præterea autem multo hæc sunt eadem nouis in diuitijs deteriora, quam in veteribus vitia: repente enim diuites facti sunt, abundandi, vt ita dixerim, imperiti; vt plerique Romæ: in quo si qui fortasse fuerint, qui de trahi sibi a nobis querantur, ij meminisse debebunt, non hunc nobis de hominibus, sed ipsa de re institutum esse sermonem. Potentium autem mores partim cum locupletum natura, & consuetudine congruunt, partim aliquanto sunt etiam probiores: nam & honorum studium in his

est, & animus virilis, atque ad agendum promptus: præbet enim potentia facultatem, & propter dignitatem gravitas quedam ipe est. Ac de locupletum quidem, ac potentium moribus hæc teneus. In paupertate vero atque inopia omnia ijs contraria reperientur. Sic igitur animati erga potentes & pecuniosos tenues amici esse debebunt, ut illorum incommoda, contumelias, iniurias, ineptias non modo facile perferant, sed amanter etiam tegant: eosque, quo ad fieri possit, diligant: colant quidem certe omnibus locis, atque obseruent: diligere enim volunt, propterea quod existimant, a quibus amantur, iisdem se se probari. Itaque cum omnia sibi diuites arrogent, amicorum obsequijs, atque obseruantia magnopere delectantur: sui enim de se iudicij habere eos ascriptores putant. Difficile est autem diligere eum, quem non probes: nihiloque factu facilius sic moratos, quemadmodum dictum est, probare: verum tamen, ut ait Tiresias ille,

*Quando pauperiem missis ambagibus horres;*  
deuoranda hæc sunt, ferendumque equo animo, quod corrigere nequeas: præsertim cum non virtute, & probitate hæc necessitudo contineatur, sed emolumentis, & fructu. Stulte igitur faciunt, atque inutiliter, qui, tamquam Horatianus Dauus, decenibri in dominos abutuntur libertate:  
*Tu, cum sis, quod ego: & fortassis nequior:* perniciosæ enim hæc sunt, præsertim aduersus potentiam, superbiamque. Quare non modo dici, proferrique hæc non expedit, sed ne cogitari quidem sine detrimento possunt: retrahunt enim nos ab obsequio, & cultu potentis amici, sine quo contineri necessitudo hæc diutius non potest. Non minus est autem eorum vitium, damnum certe idem, qui de superioribus amicis in omni sermone absentibus detrahunt, eosque, quos reuereri, & colere non modo decet, sed etiam fructuosum est, ledunt. Itaque dupliciter accusandi sunt, & quod ab officio recedunt, & quod eorum cum factis minime consentit oratio: cum eo enim reuiuunt, quem sermone improbant. Superbi etiam, atque arrogantes monendi sunt, atque,

que, vt ab hoc studio defistant, hortandi : nam nihil obsequio, atque obseruantie tam est aduersarium, quam arrogantia : obseruamus enim & colimus, quos insigni aliqua re antecellere nobis putamus : omnia autem sibi qui arrogant, ne illi longe abest vt cuiquam obsequi velint. Ac sunt omnino quidam nulla de re tam solliciti, quam vt ne cuiquam succumbere, aut quicquam cuiquam concedere videantur : ij se se inferiores appellari, mortis instar putant, pauperiores tantum dici volunt : austeri, tristes, duri, omnia summo iure, seuerè agentes, atque acerbe : qui si appellentur modo, continuo ad calculos abeant, confestim sua, atque aliena digitis metiantur : rationem subducant, a qua ne punctum quidem cuiusquam causa decedere ius esse arbitrentur : ij, vt antea dictum est, ad aliud studium traducendi sunt, ne etatem sollicitè anxieque degant, & ea exacta, frustra, quod nihil processerit, fortunam, quod facere solent, accusent, cum ipsi in culpa sint. Nobis autem leni homine opus est, molli flexibiliq; ingenio prædito, qui & de suo iure decedere didicerit, & parere fortunæ : idque animo hilari, aut certe equo facere possit, vt non appareat coactum obsequi : nemo enim, quem colit, illi inuitus obtemperat. Quoniam igitur superbiæ occurrendum est, nihil est autem ad eam molliendam, ac demulcendam valentius obseruantia, atque obsequio, in eo exiles, atque inopes amici elaborare debebunt, vt in superiores omne officium, omnemque cultum conferant : id partim in dictis apparebit, partim in factis. In sermone igitur, & congressionibus non modo comitas, & suauitas adhibenda est, sed quedam etiam reuerentia : assentatio autem, de qua mox dicitur, procul amouenda. Permultum vero id refert : nam neque quicquam est, quod tam crebro incidat, quam vt loquamur ; & ad conciliandos hominum animos summa in oratione vis est. Illa igitur primum cautio adhibeatur in verbis, vt summissa, vt humilia sint, vt prope abiecta : blandum enim in sæculum incidimus, cuius in errore nihil est cur versari nos cum reliquis pudeat : contumax est non mo-



do, monere, sed etiam consilium dare: reprehendere vero non ferendum. Longum est autem singula persequi. Quare genus ipsum indicasse sit, opinor, satis. Deinde repugnandum, si qua in re forte fuerit, ut pedetemptim, timideque fiat, & tamen & raro, & non nisi necessario: neque enim est obsequentis aduersari: sæpe autem in congregationibus, aut in conuiuijs disputationes inducuntur incertis, aut subtilibus de rebus, in quo docti quidam homines, & ingeniosi facere sane imprudenter solent: arripiunt enim ipsi tamquam suo iure sermonem, obloquuntur, interturbant, pertinaciter resistunt, redarguunt denique, id que acerbè, atque acriter: non sunt hæc obseruantia, aut obsequij signa. At non mea, inquiunt, culpa est, quod homo rudis, atque illitteratus, & fortasse hebes, de rebus obfcuris atque inuolutis balbutiens me lacestat, irriter, in contentionem vocet, præsertim eam ipsam artem, ad quam disputatio pertineat, professum: sed parcendum tamen est, quasique cum amico lucteris, non cum aduersario, non est viribus utendum: scitum est enim in loco cedere, aut succumbere: victoria vero sæpe perniciem habet: ex quo vetus illud *νίκη καὶ μῆρα*. At difficile est, inquiunt, præsertim concalescentis iam altercatione animis tum in eo ipso, quod profiteamur, cuiquam nos cedere videri, pati non possumus. Ego neque hoc disputo, & si postulant, etiam concedo: Illud teneo, atque denuntio, inutile id illis esse; plane etiam perniciosum. Quare superbiam excutiant, animum molliant, aut amicitiam se se gerere nescire fateantur. diligenter etiam caueant, ne quando committant, ut cum potenti amico iocari aggrediantur, nisi ab eo ipso inuitati, ac prope iussi: inest enim in ioco equabilitatis significatio, & securitas quædam, qua superbia irritatur: cauillationem autem, & dicta superiorum, quamquam habebunt sæpe aculeum, & contumeliam, hilaritate & lepore excipiant: iracundiam, nequa sorte erumpat (effruescet enim illa quidem) quam diligentissime poterunt, comprimant: ac, ne si acrius quidem pupugit, quicquam mordere audeant: neque

Que enim est obedientis, doloris sui poenas persequi: quo autem cuiquam vberius erit ingenium, atque acutius, eo difficilius is præstare hoc poterit: multa enim occurrent falsa, quæ vix reticebit: Estque omnino haud quaquam mediocris patientiæ, cum sæpe vapules: telum autem semper teneas, numquam referire: sed iracundia tamen perquam diligenter cohibenda est, neque cum superiore, ne iusta quidem de causa, concertandum: nam & victi oderunt, & pares cum discedunt, tamen vinci se putant. Itaque alio se se conuertunt, & eos, quorum tractata semel læsit asperitas, in posterum non attingunt. Quo autem modo iucunda consuetudine, assiduisque sermonibus, & comitate superbia mollitur, ita silentio, seueritate, & tristitia recrudescit: tum stultum est, quorum contumelias perpeti necesse habeas, eorum non ferre iocos. Quare ita se se tenues comparare amici debebunt, ut potentis vel immoderatam in iocando licentiam, non modo bonam in partem accipiant, sed etiam, quo familiarius tractentur, habere se gratiam significent. Reliqua vero in vitæ consuetudine ea moderatio adhibeatur, ut in sermone plurimum hilaritatis: plurimum & festiuitatis insit, non effuse, sed ad voluntatem nutumque diuitis amici omnis oratio temperetur: tristitia vero, & taciturnitas absit, quæ minime amabiles, & plerumque inuisæ, suspectæque sunt: quos enim tristes animaduertunt, ijs se suspicantur non satisfacere. Præcidatur etiam loquacitas: est enim reuerentis adhibere modum: neque vero sermonem ipsi priores inducant, nisi si forte iussi sint aliquid in medium, consumendi otij causa, ut sit, proponere: ad superiores enim pertinet iudicare, quæ potissimum de re velint audire; neque immerito is arguitur, qui præfestinet, ubi herus adsit, præloqui. Quod autem dictum a me est, procul ex hac consuetudine amouendam assentationem esse, videamus, quam vim habeat: non sum enim nescius, secus a plerisque solere præcipi: qui cum adulationem vnam omnium rerum fructuosissimam esse contendunt, facile permultos nominant haud magni pretij homines,



mines, qui vna assentatione adiuti, non modo diuitias pararunt, sed ad summos etiam dignitatis gradus irrepsērunt; sed, quamquam ab vtilitate profecta hæc ratio est, non debent honestatis, & iustitiæ obliuisci. Itaque, ne quid turpitudinis, lucri causa, contrahatur operam dabunt, tuebunturque iustitiam, si non summam illam bonorum, at hanc popularem saltem vulgi: etenim vnum pecuniæ fructum sequi si volumus, neque honestatem audimus, eos ipsos superiores amicos spoliemus licet, aut aduersarijs prodamus. Cauendum est igitur, quamquam ab vtilitate profecta hæc ratio est, ne longius si progressi erimus, iustitiæ fines transgrediamur. Quid est autem, quod ab honestate longius absit, quam assentatio, & blandicia? quarum cura & nutrimentis hominum educuntur, sæpe etiam gignantur, & procreantur vitia. Metuet igitur,

*Scurrantis speciem præbere, professus amicum.*

Finitima est autem obsequio blandicia: tum in vnaquaque re difficile est statuere quatenus: sunt enim vitia cum virtutibus prope continentia, aut ita certe inter se coniuncta, vix vt appareat commissura: sed quædam tamen est regula, qua vt qui volent, neque a probitate discedent, & vtilitati tamen consulent. Est igitur in congressionibus sermonis quædam temperatio, & modus, quam quidem virtutem, cum ea vocabulo carere videretur, ab amicitia mutuati, *φιλικῶν* Peripatetici nominauerunt: quod, eius compotes qui sint, talem ad omnem congressum humanitatem, affabilitatemq; adhibeant, qualem adhibere inter se amici consueuerint. In eo autem posita est, vt neque omnia ad voluntatem loquamur, & petulantia tamen absit, & tristitia, austeritasque vitetur. Ad eam autem mediocrem retinendam per magni refert, qui cum loquare, quique ipse sis: id quale sit, vt pleraque omnia, in ijs animaduerti maxime potest, qui, longo quodam interiecto tamquam intervallo, inter se distant, vt in parentibus, & liberis, vt in priuatis, & ijs, qui sunt in magno aliquo imperio: quæ enim in priuatum commode dicta existimantur, eadem in magistratum

tum collata petulantia habentur non ferendæ. Ac parentes quidem obiurgare flagitium est, magistratum nefas, patrem vero non dedecet. Hanc in sermone mediocritatem retinere hic noster vel mordicus debet: lubricus enim locus est, ut neque ad assentationem delabatur, minimeque sit amarus, aut agrestis. Id autem, nisi quid me fallit, ea ratione efficere non incommode poterit, si, quæ superiore in amico probanda erunt, ea & suo loco, & pleniore etiam aliquanto, ut dicitur, ore laudabit, peccata vero non attinget omnino: ad pares enim amicos monitio, atque obiurgatio, non ad inferiores pertinet. Qui vero ea laudant, quæ non probant, improbi hominis funguntur officio, & vani, ac fallacis, & fraudulentis. Omnis autem sermo verecundia plenus esse debet: non modo quia sic omnino bene moratos decet, sed quia securitatem etiam petulantia præferre videtur. Absit igitur obscenitas: tætræ etiam, immundæque res ne appellentur, singulisque cum dictis, tum factis significatio quædam insit, non negligere tenuem amicum, quid de se superior sentiat. Provideant etiam, ut gestus, motus, incessus, status, sessio, accubatio, manus, oculi, vox, non ineptius modo vacent: est enim id aliud cuiusdam disciplinæ præcipere, sed ut reuerentiam quandam erga potentem amicum, cultumque indicent. Remoucantur igitur cachinni, & clamores, & palæstrici quidam motus; tum oscitatio frequens, atque excreatio, reliquaque id genus, quæ soluti, liberi que sunt animi, ad amicorum æquales congressiones referuentur. Vestitus etiam ratio habeatur, ut elegans, ut mundus, ut aptus sit: volunt enim ostentatione diuitiarum, quemadmodum dictum est, beati videri: tum ad luxuriam pertinet, quorum utantur ministerio, eos non agrestes, nec sordidatos habere, sed elegantes, & ornatos. Quamquam autem in sermone plurimum cultus obseruantiaque elucet, permultum tamen etiam in factis apparet. Quamobrem superioribus inferiores præsto sint, obsequantur, obtemperent, neque re tantum ipsa, sed etiam significatione quadam, & specie: nihil enim necesse est

est tantas amicorum cateruas domi alere : ad speciem comparantur, & pompam. Quare ne hæc quidem negligent : adsint, assent, sectentur, assiduitatem præsent, molestiam caueant : neque sic cogitent, non hæc sibi datas esse partis, sed certum quoddam munus assignatum : sunt enim communes inferiorum omnium amicorum. Qui vero cunctantur, qui tergiversantur, & cessant, perniciosum genus in hanc communionem inducunt : parce enim, ac restricte munus ipsi suum cum exequuntur, potentem amicum prope admonent, ut benignitatem ipse quoque suam contrahat, ac minutatim, exigueque præbeat omnia. In rebus autem gerendis, curandisque mandatis, primum fides, integritasque præstanda est, non modo quia decet, rectumque est, sed quia fructuosum est etiam : quos enim fideles expecti sunt, ipsi se se totos committunt, & tradunt, eoque bene etiam illis facere coguntur. Deinde cura, & diligentia, & sollertia, quasi in re propria adhibeatur, maior etiam si fieri possit : quo difficilior est cura rerum alienarum. Sed hæc communia societatum omnium : illud huius coniunctionis est proprium. Neque enim, quod commodissimum, aptissimumque quaque in re fuerit, spectare debebunt, sed illud modo attendere, quod maxime potenti amico probeatur : id quod una in re notatum ad reliqua omnia transferri poterit. Qui igitur vltimo fere in gradu dignitatis locati sunt, homines eruditos, atque in scribendo exercitatos seorsum parant, qui de omnibus rebus, quæcumque inciderint, epistolas componant, ut ex superiorum amicorum nomine reddantur : ipsi per se ea præcepta seruantes, quæ magno labore didicerunt, hominibus illitteratis, a politaque, & accurata oratione abhorrentibus suas lucubrationes non probant : optima quæque, aptissimaque inducuntur : omnia peruertuntur, retexuntur omnia. Quid igitur est tui consilij ? illud scilicet Euripidis de Phœnissis :

*Potentium stultitia perferenda est :*

*Et (quamquam difficile factu est)*

*Vna cum insipientibus desipiendum.*

Vnam

Vnam igitur habebunt non scriptorum modo, sed etiam actionum omnium regulam, potentis amici voluntatem, ac iudicium: ad eam se formabunt, eaque metientur dicta, factaque omnia: neque vero perpendent, quam recta sit, aut praua, sed tantum elaborabunt, ut eam bene cognitam, obseruandoque notatam habeant: dabuntque operam, non ut recte, si quid mandatum est, curent, sed ad voluntatem superioris amici apte, atque accommodate. Itaque inferior amicus imperium herile discat, ut quod frons velit, oculi sciant. Hæc fere sunt inferiorum partes, atque officia amicorum, vel stirpes potius quædam atque initia, e quibus ea orta, ac profecta sunt: expositis enim generibus, singulas tamen secare, ac persequi partes, cum infinitum duximus, tum vero etiam minime necessarium. Locupletibus vero & factiosis multo, ne errent, huiusmodi præceptiones attentius audiendæ, retinendæque sunt: est enim potentia, nisi si quis artem, hoc est, rationem adhibeat, ipsa per se licentior. Itaque solutam eam, ac liberam paulo si diutius siueris, ubi se corroborauit, exultat, effrenateque effertur, ac ruit. Quid enim mereat quis, ut non nullorum, quos significari a me, quam nominari est æquius, immanem, ac barbaram superbiam ferre velit? qui quidem eo usque sunt odio digni, nihil ut mirum sit, si abiectissimi quoque homines egestatem, vel summam perpeti malint, quam eos non modo ferre, sed ne aspicere quidem. At tenues, atque inopes, satis ab ipsa necessitate, quod sui sit officij, admonentur: & si quid tamen peccent, sane haud deesse corrector potest. Statuant igitur diuites se quoque legem tenere: quando patrium etiam ius quibusdam quasi cancellis natura circumscripsit, quos transire nefas, impiumque sit: nec quos fortuna, atque opibus anteeunt, eos tamquam desertos omnino, ac neglectos, pro nihilo habeant: nec vero abiectissimum quoddam obseruantie genus, cultumque seruitio proximum omnes ab omnibus requirant: dilantur enim interualla, contrahunturque, quibus alij alios præcurrunt. Ad eorum igitur magnitudinem, & spatium te-

nuium officia amicorum referantur: neque enim par est Superiorum omnium præstantia. Itaque deum (plurimum enim inter se distantibus in rebus id, quod monstrare volumus, apparebit maxime) deum igitur veneramur, & colimus: homo autem paulo locupletior sacrificium sibi quoque ad aram fieri ab inopi amico si postulet, infaniam: nec claros quidem, atque illustres ciues pari obseruantia colimus; ac Persarum regem. Ut igitur inferioris partes sunt, obsequium ut præstet non grauare, sed libenter, nec semper monitus, sed sæpe ultro: ita superioris contra est officium, eorum sedulitate nec abuti, nec acerbe obsequium exigere: sicque cogitare, amicorum uti se se opera, si non gratuita, at voluntaria, at certe libera, non autem seruis imperitare: liberi enim sunt, nec lege tantum (nam id quidem perspicuum est) sed etiam natura: si quidem is natura seruus est, cuius vnum est, aut certe præcipuum, in corporis, membrorumque usu positum munus: quique ita rationis est participes, illam ut sensu percipiat, non ea ipse ut præditus sit: ij autem, quos iandudum inferiores amicos appello, non ut operarij quidam, ac baiuli, membrorum robore; ac laertis, sed potius industria, & ingenio, & rerum usu, animi denique viribus, non corporis commendantur. Liberi igitur sunt: verum consuetudo, atque dicendi mos famulatum, ut antea quoque dictum est, tristi sane verbo, coniunctionis huius necessitudinem nominauit: sed idem tamen molliuit: etenim vel superiores qui sunt amici apud eos, quos diligunt, quamquam tenues sunt, seruitutem seruare se se, quia ita mos est dicendi, dicunt: ut iam beneuolentiæ id, obseruantiaque nota, non seruitij vocabulum sit. Sed verum inuestigantes de rebus, opinor, potius, quam de nominibus sollicitos esse oportet. Nam quamdiu veteribus seruos bella suppeditarunt, nec habere eos lege prohibitum est, nihil magnopere fuit, cur liberorum opera, & ministerio vterentur. Itaque nihil mirum, si non suum propriumque est ei rei vocabulum impositum; quæ fere esset incognita. Vbi vero & bellica nostris in hominibus fran-

ꝑ virtutē cēpta est, atque hominem religionis socium serui-  
 tute premere impium existimatum, verissimile est, vt infimi  
 initio homines mercedula adducti cum facere quæstum oc-  
 cēperint, vt opulentioribus Seruorum vice ministrarent: de  
 inde vero re paulatim in morem inducta honesti quoq; ho-  
 mines eum ipsum quæstum non sint aspernati. Verum se-  
 ro viguit hic quidem mos, eo scilicet demum tempore, cum  
 ij e medio sublati sunt, qui ei rei nomen cudere, & tamquam  
 fabricari poterant. Itaque in re noua vetus vocabulum  
 quod vsurpemus, nisi quid me forte fallit, non est: noua-  
 re autem nobis quidem non licet: jis enim hæc tractare co-  
 namur vocibus, quæ multis antea sæculis prope conticue-  
 runt, quam hæc inuenta communio sit. Sed nos eo redea-  
 mus, vnde digressi sumus. Tenuiores igitur amicos ad fa-  
 mulatum vsque qui deprimunt (quotus autem quisque est,  
 qui id non conetur efficere?) ij non modo inhumaniter fa-  
 ciunt, atque inclementer, sed etiam iniuste, ac plane tyran-  
 nice. Cuius enim est dominatus, in xysto multas ho-  
 ras quotidie ambulantes amicos adesse ad vnum iube-  
 re, eosque apertis capitibus dextra, sinistra stantes ne respi-  
 cere quidem? Regibus igitur hæc, atque huiusmodi impe-  
 ria relinquuntur: qui vero parem illis præstantiam assecuti  
 non sunt, desinant eorum speciem affectare: ne & suis odio  
 si, inuisique sint, & irrideantur ab alienis. Nihiloque ele-  
 mentius illud est, cum leui quaq; de causa contumelijs, con-  
 uicioque, & clamoribus honestos sæpe homines consecretan-  
 tur: idque palam in publico. Quid vos seruis faceretis? vt  
 enim sit impotentium amicorum ferre omnia, vestrum cer-  
 te est, quantum eos oneretis, videre. Nam qui eosque  
 proterui sunt, atque effrenati, vt manus etiam hominibus  
 liberis afferant, eos tamquam desperatos aliquos coercen-  
 dos censemus, non admonendos. Negat Aristoteles, vl-  
 lum esse officium, quod in seruum, quia quidem seruus sit,  
 tueri dominus debeat: sed quia homines tamen serui sunt,  
 aduersus eos quoq; humanitatis leges inuiolatas seruari cen-  
 set, oportere. Nec vero illud incommode, quod falsus ille

Sauria, quamquam seruus, & quidem nequam, homini libero respondit in iurgio.

*Tam ego homo sum, quam tu.*

At ij ne liberos quidem homines putant, quorum etiam durior est, quam bestiarum quarundam, apud eos causa: etenim quibus equis ipsi vehi consueuerunt, eos curari diligenter student, neque labore nimio defatigari, fessosque recreari, & conuiescere volunt: hominibus vero quando aut quisquam parcat, aut medetur, aut vlla in re consulit? aut quod nam Romę genus est tam omni indignitate, atque iniquitate exercitum, quam potentium tenues amici? sunt hæc non modo Christianę caritati, atque humilitati repugnancia, sed ab humanitate quoque hac communi, longe, longeque abhorrent. Ne igitur humanitatem fortuna obruat, neque opes, & potentia libertatem coerceant. Difficile est autem omnibus in rebus modum non solum tenere, sed etiam, qui sit, cogitatione inuestigantes statuere: variantur enim officia personis, temporibus, ætatibus, rerum natura, hominum moribus, locorum consuetudine, rebus alijs prope innumerabilibus: quam quidem varietatem vno aspectu intueri, & comprehendere, hominis est acute, celeriterque dispicientis. Nos neque acius cernere nos quicquam putamus, neque id magnopere nunc quidem necesse esse arbitramur: satisfieri enim huic loco posse statuimus, si præcipiemus vt ea, quæ superius memorata sunt, retinere velint. Sunt autem duo; vnum, vt amicorum obsequio, atque opera tum clementer, & benigne, tum etiam iuste, hoc est, congruenter, vtantur; alterum, vt ipsi minime sint amari, minimeque difficiles ac morosi. In munibus igitur assignandis, dandisque negotijs, personarum ratio, & delectus habeatur, vt, si quid sordidius tractandum inciderit, vilissimo cuique mandetur: neque per homines nobiles, quod nonnulli peruersitate quadam adducti student, verrantur ædes, aut e triclinijs, conclauibusve immunditię efferantur: laboriosa vt ne imbecillis, ne ve sub turpia quędam honestis, aut ludicra & leuia grandioribus natu imperentur.



rentur. Nec enim Homerus Phœnicem Achillis iussu pocula ministrantem facit, hominem senem & græuem, sed adolefcentem, æqualemque suum Patroclum. Illud etiam præstent, vt nihil omnino cuiquam maioris aut oneris imponatur, aut laboris, aut contentionis, nisi necessario, aut certe magna de causa: præcipit enim humanitas, vñ ne aliena sollicitudine, & cura, præsertim quæ grauior sit, tamquam animi causa, abutamur. Nam ij quoque, qui serui plane sunt, ferre hæc grauius, egreque pati solent.

*Hæc heri immodestia cœgit me,*

*Qui hoc noctis a portu ingratis excitauit:*

*Non ne idem hoc luci me mittere potuit?*

Ferramenta, & vestes, reliquumque instrumentum animale habuisset Dædalus dicitur: num igitur eum censemus, aut quæ ferræ essent opera, cœlo mandare solitum, aut eam ipsam, cum molendum tamen nihil esset, veruisse quiescere? Hunc igitur imitentur, sitque imperium in amicos iustum, & clemens: Qui vero acerbe ab amicis operas exigunt, qui semel atque iterum cessantibus suscensent atrociter, qui se se implacabiles, atque inexorabiles præbent, præterquam quod iniuriam faciunt, non amicorum cateruis se se stipatos esse cogitare debent, sed hostium. Atque etiam est in sermone, & conuictu superiorum comitas quædam, vel seueritas potius, sed humanitate, & iucunditate condita, qua præditi qui fuerint, eos domestici amici, quasi parentes verebuntur, non autem, vt tyrannos, metuent, eoq; etiam diligent. Omnes enim, quem metuunt, eundem oderunt. Verum plerique familiaritatem nimiam vitare dum volunt, quod apud eos, qui in consuetudinem se se penitus immerferint, retinere se dignitatem vix putant posse, contumaces sunt, atque inhumani. Ac fuit omnino Deïoces quidam Medus, vir sapiens in primis, qui cum propter iustitiam, vt est apud Herodotum, rex esset constitutus, cum alia multa dicitur habuisse salutariter instituta, sum illud in primis, quod ad maiestatem pertinet: quæ-

cumq;

cumque etiam incederent, transgisse per interpretem dicitur, ut Medorum audiret ipse neminem, neque cuiquam aspiciendi sui potestatem faceret. Metuebat scilicet vir magnus inuidiam: ægreque laturos sentiebat ciues suos, qui cum pari dignitate tam multos annos vixissent, eum ipsum tanto sibi honore præferri. Huic igitur malo occurrere ea ratione putauit posse, si se se non familiaritati modo, sed etiam oculis ciuium subtrahisset: fore enim, ut paulatim ab ea, quam de se cogitationem habere soliti essent, desueti, maius quiddam animo conciperent & mente: sic est enim omnino: nam quæ incognita, intractataque habemus, ea maiora plerumque animo nobis fingimus, & suspicamur esse. Neque vero ego is sum, qui superioribus id præcipiam, ut se se inferioris ordinis amicis, quasi germanis fratribus, patefaciant ac nudent: sit hoc simplicis, sinceræque amicitiae proprium: sed, ut hoc non probarim, ita austeros, tristisque, & duros esse eos nolim. Recte autem Deioces, ut in Barbaris quidem, dominationeque noua: quamquam multa eum secuta esse incommoda necesse est, in primisque illud, quod æqualium, quod suorum, quod ciuium denique consuetudine, & conspectu caruit. Dignitatem igitur potentes retineant, sed bono modo; audiantque, negotijs curisque vacui, domesticos amicos, & quidem humaniter, benigneque respondeant: interdum etiam ultro ipsi appellent, familiariter quoque garriant, dentque se se ad lenitatem: ut intelligant homines tenues non tamen seruiliter se tractari. Est enim hominis natura minime dominationis patiens, quo magis seruitutis, ac famulatus species, quæ ut in suis appareat, de industria quidam efficere solent, occultanda est, atque opprimenda. Sed est etiam in nonnullis malitia quædam simulata comitas, qui, quo diutius amicorum operis fruuntur, gratis homines miseros, atque abiectos se producunt, & clementiæ, bonitatisque simulatione lactant, ut annorum multorum labores vna cum blanda appellatione compensentur. Tollatur igitur meretricius hic mos; malitiaque, & fraus non ex hac consuetudine solum,

lum, sed e tota vita pellatur: nec, pecunia fraudare quem-  
 -piam si turpe putamus, vitæ, atque etatis alienæ fructus in-  
 -tercipere, frustrariq; per bonitatis speciem homines vel a-  
 -micos; vel certe familiares, tenuēs quidem atque inopes,  
 -rectum, honestumque censeamus. Callida est etiam, ma-  
 -litiōsaque eorum interpretatio, qui, quod tenuibus amicis  
 -non iniuste, aut grauitè imperarint, quodque in eos inge-  
 -niō, leni, & clementi sint, vigilias, labores, curas, pericula,  
 -damna omnia dissoluta illis esse existiment, assatimque sa-  
 -tisfactum aut uiment: quasi vero id initio spectatum sit, vt  
 -obsequium obsequio, ac non pecuniæ fructu, atque emolu-  
 -menti compensaretur. Neque enim citharædum, in epu-  
 -lis qui caneret, ijdem si conduxerint, atque is vbi postridie  
 -mercedem exigat, absidere hominem iubeant, audireque se  
 -vicissim vel modulatiū canentēs, non iniusti sint: non e-  
 -nim commodata oblectatio est, eandem vt reponere æ-  
 -quum sit, sed quasi vendita. Quomodo autem superiorum  
 -incommoda, & contumelias inopes perpēti decet, neq; id  
 -patienter solum, sed etiam demisse, ita vicissim, si quid of-  
 -fensum ab inferioribus sorte sit, si quid repertum vel in na-  
 -tura est, vel in moribus vitij, æquo animo, tolerabiliterque  
 -ferre id superiores debent. Quam enim difficile sit ad alie-  
 -nū arbitrium, sensumque viuētem, vt eum dicta, tum  
 -facta, tum ipse mediūsfidius mōtus, gestusque ad alienam  
 -voluntatem dirigatur, nihil offendere, nusquam incurrere,  
 -ex eo intelligere licet, quod ne, ad nostrum quidem iudici-  
 -um, ad libidinemq; cum viuimus, facile nobis petipsis satisfa-  
 -cere solemus. Provideant igitur, ne, si quid aut quōtidiano  
 -in ministerio minus apte, minusve eleganter forte ceciderit,  
 -aut, in rebus mandatis gerendis, non exquisitam quandam  
 -sollertiam, industriam, diligentiam, celeritatem præstite-  
 -rint tēues amici, continuo exscescant, atq; efferranturi  
 -racundia: quod faciunt quidam, & sane furenter, & sæpe.  
 -Nihil est enim facilius, quā per alium efficere, quod ve-  
 -lis, quā id ratione commodissime fieri possit, optantem co-  
 -gitatione designare: sed facientes multa impediunt, multa  
 -inter-

interturbant, & retrahunt. Quamobrem cum indulgere potentes inopum peccatis equum est, tum se se ipsos excutere perscrutarique decet; ne, si quid forte in animo mendicant latuerit, quam ipsi culpam sustinere debent, eam amicis attribuant: sepe enim usu venit, ut superiorum inconstantia, peruersitate, festinatione, iracundia, leuitate bene, ac prudenter instituta, procurataque res, accurateque, ac diligenter administrata conturbentur, secusque cadant: Ex quo illud e veteri comœdia:

*Quam arduum, diu boni, negotium est,*

*Idem hero cum seruitutem seruias.*

Caueant igitur hoc quoque: neque in amicos stomachum erumpant, cum irati sibi met ipsis esse debeant. Quoniam autem non beneuolentia, neque caritate adducti, sed premiorum illecti spe, quemadmodum antea quoque dictum est, ad hanc coniunctionem accedunt, procurandum est; ut, qui suas partes diligenter, accurateque peregerint, qui obseruantiam, & sedulitatem, fidemque, & sollertiam præstiterint, ne laborum suorum præmio, ac mercede fraudentur. Ac quo modo ad inferiorum quidem officium pertinet, ut ne quicquam acerbius exigere videantur, neque potentem amicum flagitent, neue vrgeant, sed tantum admoncant, & rogent, idque verecunde (longe enim ab obsequio, atque obseruantia recedit, qui ad summam illam rationem, ac veritatem ius suum persequitur, eamque ob causam indigne parentes ferre solent, cum a liberis in iudicium vocantur: ex æquari enim cum ijs se nolunt) sic hesitantis est, atque adeo iniuriam cogitantis cunctari, expectareque; dum admonearis, ut, quod debeas, dissoluas. Est enim plane debitum, ne forte errent, ut, quorum vita in nostris commodis consumitur, eos remuneremus. Non igitur beneficium se se dare arbitrentur, neque in gratiæ loco potentes, atque opulenti ponant, cum bene de se meritos tenues amicos facultatibus augment, ac locupletant: sed ita existiment, obsequij se, atque obseruantię præmium soluere, iustum quidem ac debitum: quaque ipsi mensura operas, indu-

striamque

striamque ab illis exegerunt, eadem retribuunt mercedem, imitenturque terræ, agrorumque consuetudinem, qui, a quibus diligentius coluntur ac laboriosius, ijs vberiores fructus ferunt: præterquam enim, quod officio facient satis, utilitati etiam consulent: grati enim habebuntur, ac benefici: atque ea re omnium erga se voluntates, studiaque amicorum excitabunt, ut summa alacritate, summaque contentione adsint, obsequantur, obtemperent. Illud etiam summo opere vitandum est, in quod plerique solent incurrere, ut domesticis, familiaribusque amicis male ne sit, neve cibaria restrictè nimium dent, ne vilissima quæque, & contemptissima consecantur, ne algeant, ne esuriant: nam id quoque in mercedis, non in gratiæ loco ponendum est, ut illi, sua quisque pro dignitate, alantur. Qui vero aut demensum quasi seruis, exigue sordideque præbent; aut, si quis quid commiserit, si quis vspiam cessauerit, id cibo & potione subducenda vindicant, dupliciter reprehendendi sunt; & quod illorum in se cum odia, tum etiam voces irritant, a quibus diligi, colique velint; & quod, per quos lautitiam, magnificentiamque ostentari, elucereque volunt (nullam enim aliam ob causam tantos suscipiunt sumptus) per eodem illorum Sordes, avaritiæque detegitur, atque effertur. Huc accedit, quod aspere, auareque tractati, de potentis amici benignitate cum semel desperarunt, in posterum quoque eum contemnunt. Itaque neque dant operam, ut illius sibi gratiam concilient, & si quam etiam collectam habent, dilabi facile patiuntur: neque enim gratis diligere, ac ne diligi quidem, nisi ex ea re ad se utilitas redeat, volunt. Itaque aut nulli, aut vilissimus quisque in officio est: utilitas enim, quæ huiusmodi necessitudinem constituit, eadem tollit. Quamobrem sua quoque interesse potentes statuere debent, ut, quoad fieri possit, alacres, speique bonæ plenos inferiores amicos habeant, amantesque sui, ultroque, ac libenter obsequentes: id assequantur, si leniter, si humaniter utentur imperio, & si bene, benigneque merentibus fecerint. Nunc vero imitantur plerique

ciuitatum quatuorundam leges, non sapientissimas illas quidem, quæ poenæ, supplicijq; metu detertere improbos ab iniustitia tantum conantur, satisque habent; si illud præstiterint, vti facinorosis inutile sit peccare, aut plane etiam eruminosum. Rectius autem est eas sequi, quæ regiæ a Xenophonte appellantur: eæ enim efficiunt non modo, vt peccare inutile, perniciosumq; sit, sed etiam, vt recte facere sit fructuosum, cum præmia bonis, fortibusq; proponant. Studeant igitur potentes, vt voluntario amicorum obsequio vtantur: ita enim demum potentia iucunda est, si in volentes eam exerceas: in inuitos autem, ac repugnantes, imperium ijs dedisse mihi deus videtur, quos dignos iudicauit, qui ita adfectu viuerent, quemadmodum Tantalus, quem apud inferos ferunt semper secundæ mortis metu torqueri. Callidum est etiam quorundam, versutumque consilium, qui domesticos inferiores amicos inter se congruentes metunt, eoque in discordijs dissidijsq; in familia commouendis, odijsq; fouendis, atq; alendis sunt occupati: conspiratorem enim in patremfamilias consentientem domum aiunt; dissidentem autem inter se cum eo conuenturam: qui si in improbos inciderunt atque infideles amicos, quid est, cur cauere eos, quam coercere, aut omnino ijs carere malint? Sin probos, integrosque nacti sunt, metuere nihil atinet: qui autem esse potest discrepantium inter se amicorum usus? Addiscant igitur imperij gerendi rationem: neque enim facilis quedam res est, aut peruulgata: ac, si verum querimus, ne humanitatis quidem vsquequaque, sed magna ex parte diuinitatis: verum ea doctrina ab alia quadam arte petenda est, quam qui tenebunt, næ illi facile præstebunt, vt ab ijs, qui inter se vel fraterne diligant, colantur ipsi, atq; amentur plurimum: ea tamen illud habet præceptum saluberrimum, quo iubentur, qui cum aliquo imperio sunt, eorum quibus dominantur, voluntates, beneuolentiamque collectam, & comparatam habere: nam & dominatio tutior est ac munitior, & obtemperantium usus tum fructuosior, tum longe, multumque iucundior. Quo magis accu-

sandi



sandi sunt, qui æternum cum familia sua bellum susceperunt, qui non modo suorum patrocinium non suscipiunt, sed etiam ipsi oppugnant, & quasi aduersarijs atque inimicis, quibus possunt locis, incommodant, ac, quo quemq; industriorem, fidelio remque experti sunt, eo deprimunt magis, veriti scilicet, ne, si semel emerferint, vel ad alium se conserant, vel rem suam agere velint: rectius autem erat, quomodo veteres efficiebant, ut e seruis sibi liberos haberent, eos, qui liberaliter seruirent, sic hos a mercenaria, & seruilis, ad gratuitam, & liberalem amicitiam illos euocare: neque vero rectius tantum, sed etiam vtilius. Quod est enim prædium, quæve possessio tam opima, tamque omnium fructuum ferax, & fertilis, quam amicus est? Quantum vero interesse putamus, per gratuitos ne amicos res nostra, nosque ipsi curemur, an per hosce, in quibus amicitie simulachra vix illa quidem apparent? amicitia vero ipsa plane longe abest. Etenim, qui vite suæ, velut usuram, locant, ij, fieri non potest, quin laborum mercedulam, spemque dubiam utilitatis spectent, se seque respiciant, deque se vnus anxij sollicitique sint. Itaque, quomodo coloni, qui non suos, sed de dominis conductos, fundos colunt, nec arbores serere, nec fundum instruere, nec vero villam ædificare ornareve volunt, sed eam modo culturam adhibent, quæ præsentis fruges, quam minimo fieri possit impendio; quam vberissimas habeat, sic ij, quamdiu quidem, tamquam operarij aliqui, deseruiunt, nulla re augeri, aut amplificari superiores amicos student, neque dant operam, illi ne nudi, inanesque sint, sed, ipsi ut quam breuissimo temporis spatio quamplurimum auferant, in eo laborant. Vbi vero a quaestu ad caritatem, atque amicitiam ingenuam illam, ac gratuitam traducti sunt, iam, quasi agrorum domini, non illud modo attendunt, quantum ex ea coniunctione vno illis, aut altero anno reficiatur, quantumque ex ea re capiant, sed, uti nos ornatos, beneque cultos habeant, id vero curant, atque enituntur. Itaque, amore ac beneuolentia complexi nos, omnem laborem suscipere, omneque adire periculum gestiunt.



nostra causa non secus quidem ac sua: nec iam defatigantur, aut conquiescunt, aut separatim sibi quicquam a nobis prospiciunt: quæ quidem amicitia, nisi superbia humanitatem obterat, nisi hominis ponamus naturam: immanitatem autem beluarum induamus, sua ipsa sponte oriatur, atque alescat: nihil est enim, quod homini accidere iucundius possit, quam hominis consuetudo, præsertim congruentis: ut sapientem quoque, qui hæc tractant, in solitudine beatum fore negent. Nihil est autem proclivius, quam ut, quorum iucunditate oblectemur maxime, ea diligamus, atque amemus plurimum. Magna præterea est conuietus, & contubernij, ad hominum animos benevolentia implicandos, vis. nam bestiarum quoque nonnullarum animaduertere desiderium licet, cum ab ijs eas distrahas, quibus cum pauci consueverint: ut, qui eum, cuius fidem experti sunt, industriam probant, mores laudant, cuiusque benevolentiam, atque amorem erga se perspectum, & cognitum habent, non corde ament, neque cum eo opes suas æquabiles faciant, naturæ mihi vim adferre uideantur humanæ.



# PETRI BEMBI VITA.



ETRVS BEMBEVS VENETIIS  
natus est, annis post Christum  
ortum MCCCCLXX. patrem  
habuit Bernardum Bembum,  
hominem, cum vetere nobili-  
tate, tum doctrina, tum etiam  
dignitate clarissimum: nam res  
Venetum publica a certis no-  
minatim familijs administra-  
tur: eę clare habentur: reliqui

ciues; quamquam sunt eorum multe amplę honestęq; fa-  
milie, neque genus suum magnopere extollunt, & in sua  
quique re gerenda occupati; ciuitatis procuracionem fere  
non attingunt. Inter eas familias Bembi antiquissima stirpe  
orti, cum omni tempore in rep: floruerint, ampli in primis,  
illustresque numerantur. erat preterea Bernardus suo e-  
tiam priuatim nomine, propter iuris scientiam, qua pluri-  
mum excellebat, apud ciuitatem multum admodum gra-  
tiosus; & propter summam prudentiam, multiplicemque  
rerum vsum, propterque vite grauitatem, magna in homi-  
ne erat auctoritas. Hic cum a sua ciuitate ad populum Flo-  
rentinum legaretur, qua in legatione obeunda biennium  
domo abesse Venetorum legibus cogeretur; faciendum si-  
bi esse existimauit, vt Petrum filium, quamquam admodum  
is tum puer erat, secum educeset; propterea quod Floren-  
tinorum instituta parum a Venetorum moribus illo tem-  
pore abessent: non dum enim sub vnus dominatione illo-

rum

rum erat respublica, sed nobilitatis fere arbitrio regebatur; & quod ea ciuitas prestare ingenijs crederetur, acui puerum, in quo iam tunc præclara indoles elucesceret, volebat: tum Italicam linguam, qua non elegantissime Veneti, illis præsertim temporibus, vterentur, emendari in illo, Florentino rum hominum consuetudine, existimabat posse: nam omnium Italiæ nationum commodissime eam loqui ciuitatem autumant. Nec vero patris consilium filij sefellit industria: sic enim excitatum puerile Bembi ingenium Florentiæ est, sic teneræ pueri aures, animusq; puro ac dulci illo Etrusco- rum sermone imbutus, vt iam inde a prima adolescentia, multa cum Latine, tum vero Tusce a se scripta ediderit, quibus nihil hominum auribus politius, nihil omnino elegantius, aut suauius accidere possit. Iacebat omnino temporibus illis eloquentia: inquinata enim loquebantur; nullus erat verborum delectus, nullum scriptorum discrimen. nam & ipse negligebatur Cicero, vel contemptui potius erat; & Cæsarem propter historiam modo cursim & negligeriter legebant; Terentium, Virgilium, bonos ceteros, in ludo tantum, idque per pauci, ediscebant: post puerilem illam disciplinam sumebat eos in manus nemo. duros, obscuros, asperos scriptores adamabant; consecretabanturq; abditas, abstrusasque historias, aut fabulas: qui ijs ineptijs referri essent auctores, ij eruditi numerabantur: itaque vnus Ouidius de veteribus in honore erat. ergo, si verum querimus, nihil ante Bembi ætatem Latine scriptum octingentis ipsis annis, aut eo amplius est, quod Romanam illam veterem redoleat; aut magnopere lectione dignum sit: solæcismus enim vitabant, quantum quidem ex arte grammatica didicerant, idque ipsum haudquaquam semper: id vnum præstare qui poterant, Latine loqui sese putabant: nulli, qui purus ille, incorruptusq; veterum Romanorum sermo esset, nouerant; ac ne suspicabantur quidem. Par erat atq; idem eorum error, qui Italice scribebant: qui cum duos haberent scriptores, mea quidem sententia, vel cum Latinis, vel cum Græcis conferendos: nam alterius versus et  
suauis

suauitatis plurimum habent & dignitatis: & varijs ingenijs, aut etiam artis luminibus referti sunt, & animum sæpe permouent atque impellunt; vt de amore ne Græcus quidem quisquam melius; alterius oratio dulcis, copiosa, polita, ornata, mollis, saccta, rem ante oculos ponens, vt geri ea, quæ legas, non narrari videantur. Hos cum haberent auctores duos, vtrumque in suo maxime genere excellentem, scribebant ipsi inepte, abiectissimis verbis; nullus erat orationis ornatus, nullæ homine erudito dignæ sententiæ, nulla compositionis, aut numerorum ratio: licet in manus sumere, quæ tunc multi scriptitarunt: præter vnum Politianum, illumque ipsum minus dulcem, minus omnino elegantem, quam vt legisse Petrarca lectissimos versus videatur; ceteros ad vnum indignos dicas, qui in scriptorum numero habeantur. vnum scurrile vigeat genus; in eo sane ridiculi nonnulli; sed ipsi quoque multis in locis inertes ac languidi. Hanc igitur inter erroris atque insitiæ caliginem Bembus ad veterum scriptorum tamquam lumen ac lucem respexit primus, primusque ab hominibus, magnis quidem hortationibus, magno suo labore, multis reclamantibus ac repugnantibus, impetrauit, vt Ciceronis, vt Virgilij, vt Cæsaris similes sese in dicendo, quam Apuleij, Macrobij, Statijque esse mallent, cum contenderet oportere, qui scriberent, eam dicendi formam, quæ optima esset, habere animo & cogitatione comprehensam; ad eam tamquam ad exemplum aliquod orationem scriptionemque suam dirigere; Demosthene autem, aut Cicerone perfectius in dicendo aliquid promere se posse qui profiterentur, sua quidem sententia nimium subire oneris, nimium suis fidere viribus; quorum etiam iam olim errore ac temeritate factum esse existimabat, vt malos multos scriptores haberemus: nam, cum nonnulli a Cicerone discedere, sui que plane esset vellent, cum aliter, atque ille, dicere studerent; quoniam is perfectus, absolutusque esset; deterius dicere cogeantur. Hæc Bembus cum dictitaret, cumque etiam litteris manderet, egre ille quidem, sed multis tandem persuasit, spreto

ac repudiatos antea scriptores optimos illos, repeterent: propositosque sibi ad imitandum haberent. quoquidem Bembi labore, quibusque præceptis, quantum eloquentia adaucta sit, cuius facile est noscere; si ea, quæ ante hanc illius disciplinam scripta sunt, cum huius ætatis scriptoribus conferantur. Ea obita legatione domum Bembus cum patre redijt, iam bonarum artium studijs incensus, iam eloquentiæ, ac scribendi magno quodam amore flagrans. itaque in Siciliam vsque ad Constantinum Lascarem Græcarum litterarum causa profectus, trienniumque ibi commoratus est; tantumque ingenio, labore, assiduitate profecit, ut Græce non modo optime sciret, sed etiam polite, luculenterque scriberet: atque in Sicilia cum esset Latine de Aetnæ incendijs scripsit ad Angelum Gabrielem: qui liber, ab eo editus, in manibus hominum eruditorum non sine aliqua laude versatur. Post eam peregrinationem celeriter Bembus assecutus est, ut maxima apud omnes Italiæ ciuitates, tum apud exterarum etiam nationes, eius esset ingenij admiratio: ita enim, uti res est, sic homines statuebant; perdifficile factu esse vnum atque eundem duabus linguis tam scite, tamque ornate copioseque uti posse; quodque pauci vno in sermone vnumquam præstiterunt, ut præclare scriberent, id ab adolescente Bembo & in Latina & in Italica oratione effici, omnibus, qui de ijs studijs aliquid iudicare possent, permirum videri necesse erat: præsertim id ipsum in vtraque lingua & prosa oratione & versibus, id quod Ciceronem ipsum expertum, sunt, qui negent assequi potuisse. Ac miramur profecto interdum, quid causæ sit, cur, cum oratori poeta maxime finitimus sit, negent fieri posse, ut idem orator bonus, idem egregius poeta euadat; idque non hominum modo existimatione, sed etiam re ipsa comprobatum esse: nullos enim, aut certe per paucos vtramque facultatem adeptos videmus: sed cum diuturno studio, magnificæ lucubrationibus vtraque ars egeat, non suppetit ad vtramque tempus, atque otium: & quoniam longa exercitatione, assiduoque vsu consuescimus aut oratorie dicere, quod

vicio

vitio maxime datur versus scribentibus, vel poetice, quod contra in prosæ orationis scriptoribus vitiosum in primis habendum est: si quis vtrumq; studium copularit atq; coniunxerit, magnæ cuiusdam intelligentiæ, acrisque iudicii est, præstare alterum genus, ne incurrat in alterum. præterea oratorum, poetarumq; ingenia atque naturæ contrariæ propemodum inter se sint, oportet: hinc enim ratione atque humanitate reguntur; illos, furoris afflatus ac diuinitas quædam, impellit: atq; omnino proximis, coniunctisq; in rebus faciliora recto declinatio, ac lapsus est, reprehensio vero vel insignior: creat enim errorem similitudo; & cum varia tum est, celeriter, propter rei similis comparisonem ac propinquitatem, in uersio animaduersa intromiscitur ac reprehenditur. Neque ij tamen nos sumus, qui aut Ciceronis versus valde improbandos existimemus, aut Platonem atque Aeschinem (vtrumque enim versus in adolescentia scriptis, talle memoriæ proditum est) malos, contemptosque fuisse poetas credamus. Post Siciliensem illam peregrinationem, per paucis interiectis annis, Ferrariam Bembus pater Prodominus missus est: eum magistratum, magnum in primis atque honorificum, illis temporibus Veneti, virtute belli paritum, victoriæque tamquam insigne, gerebant in aliena ciuitate. eo quoque cum patre filius exijt: sicque eo in oppido per diu fuit, ut cum ab omni iuuentute, ab omni que nobilitate plurimum coleretur, tum uero Herculi Estensi, maximo ac fortissimo uiro, qui in ea ciuitate imperium obtineret; Lucretiæ Borgiæ, quam in matrimonio Alphonsus habebat, gratus in primis, acceptusque esset. Per idem tempus, cum annos natus esset haud amplius xxv, eos sermones, qui Asulanj ab eo inscripti sunt, confecit; opus omnium pigmentorum flore atque colore distinctum. sententijs omnino cum adolescentibus de amore loquentes amicissimis quibusdam in hortis facit, ita lectissimis verbis si siue aduenisse, ita sententijs copiose atque ornate, nihil ut eius oratione cum vberius, tum vero suauius modulatus esse possit: eos liberos tanta hominum, mulierum etiam medicus

fidijs approbatione & tamquam plausu exceptos recentes  
 esse meminimus, vtexemplo cuncta eos Italia cupidissime  
 lectitant atque didicrit: vt non satis vrbani, aut elegantes  
 ij haberentur, quibus Asulanæ illæ disputationes essent in  
 cognitæ: erat per id tempus Urbini Guidusubaldus Feltri-  
 us, vir maxime spectata, maximeque nobilitata virtute: is  
 suæ ciuitatis tenebat imperium; atque cum eo Helisabetha  
 Francisci Gonzagij, qui itidem ciuitati imperabat, soror,  
 nupta erat: cuius de mulieris laudibus mira quædam littera-  
 rum monumentis, cum ab alijs multis, tum etiam ab hoc ip-  
 so Bembo mandata sunt. Ac datum est profecto Urbi-  
 natum ciuitati, vt non suos domi modo principes omni ge-  
 nere laudis claros atque insignes habeat, sed etiam, vt ex alie-  
 nis ciuitatibus mulieres, quas illi in matrimonium duxe-  
 rint, lectissimæ sere, præstantissimæque illi seminarum o-  
 mnium obtingant: Nam præter eam, quæ a me appellata  
 est, Helisabetham Gonzagiam, habuit Franciscus maria hu-  
 ius Guidusubaldi pater ex eadem familia uxorem Eleonoram,  
 quæ proximis diebus mortua est, omni muliebri laude præ-  
 ter ceteras ornatam atque illustrem: Nec verò de Victo-  
 ria Farnesia, quando in hunc sermonem venimus, fileri vl-  
 lo modo potest (quamquam inuitus facio; vt de ijs, qui  
 nunc sunt, dicam aliquid) cuius quidem mulieris modestia  
 ac pudor ingenuus illud profecto præstitisset, quod Peri-  
 clem aiunt dixisse, primam in muliere laudem esse, vt ne de  
 virtute quidem illius vlla ad viros fama emanet: sed nulla  
 ratione occultari tanta primariæ feminæ virtus potest, quin  
 ad viros quoque emergat, ac suo ipsa splendore se prodit.  
 Fortunatus igitur Guidusubaldus cum sua illa animi ma-  
 gnitudine atque æquabilitate; suaque illa prudētia; tum  
 vero hac tali coniuge, vitæque focia. Sed cum Urbini quem  
 admodum dicere incœperam, Guidusubaldus atque Heli-  
 sabetha Gonzagia essent, hominum excellentium perama-  
 tes, porque hospitales, conueniebant ad eos ex omni Italia,  
 vt quisque præstanti aliqua in arte præcelleret: eo cum Bem-  
 bus quoque forte venisset, præcipuo præter ceteros in ho-  
 nore



nore haberi coeptus est; multa enim habuit Bambus, quæ, ad hominum animos conciliandos, plurimum valere consueverant: nam & in forma summa quædam oris species ac dignitas intrat, & in statura ac proceritate decore; mira præterea in moribus suauitas quædam lenitasque amabilis; dulcisque cum sermo, tum tota vite, victusque consuetudo mitis ac clemens: ad ea cum præclara ingenij vis ac natura accederet, expetebatur, scilicet vnus omnium, maxime ab illustri illo virorum, seminarumque conuentu: quibus rebus efficiebatur, vt multum domo abesset, Vrbini que ferè viueret: quam rem multum etiam vicinitas adiuuabat, atque vltro citroque Pisaurum quidè vique perfacilis atque expedita navigatio: ita factum est, vt minus domi honores assuesceret admirari, minusque ambitionibus implicatum animum haberet. At vero id pater reprehendere, grauiter ferre, ac prope patrio iure, vt uxorem duceret, vt remp. capefferet, atque ex ordine magistratus peteret, imperio congere: sit enim ferè, vt qui in libera ciuitate, præsertim clara atque opulenta, viuunt, omnia ad honores referri putent oportere, id vnum consèctentur & expetant, vt dignitates, vt magistratus adipiscantur: si quæ sint laudes, quæ alio pertineant, eas aut non agnoscunt, aut leues atque inanes iudicant: atque hæc liberorum populorum consuetudo, quam quam per se ipsa, viq; sua fortasse minus probanda, est: nec enim compendij, honorisve causa, si ad veram illam rationem dirigas, petendi magistratus sunt, ciuib;ve alijs villo studio, aut vlla contentione præcipiendi; sed vnus reip. ratio habenda est, eiusque vnus vtilitati, salutique seruandum; vt dignioribus concedamus, & sæpe delatus nobis maior aliquis, aut magistratus, aut imperium, aut curatio, si minus ei rei gerendæ nos idoneos sentiamus, accipiendus non sit, aut etiam deponendus: nec enim errare patriam, pati æquum est. Sed, quoniam non viuitur cum perfectis hominibus, percommode popularis hæc ambitio cecidit: honorum enim cupiditate incensi, non ad suum se quisque format atque instituit arbitrium, sed ad populi, ci-

uitatisque iudicium, consilia, mores, vitam, voluntatemque instituant; dantque operam, non vt sibi ipsi, aut alijs fortasse quibusdam probati sint; sed, vt populo, ciuitati, quae qua honores scilicet expetant, placeant: ita fit, vt vna, eademque perpetuo permaneat ciuitatis forma, atque vna, eademque sit omnium ciuium communiter disciplina; neque singulorum priuatim studijs, voluntatibusque variatis, recipere quoque ratio atque institutio vertatur atque mutetur, quam quidem cautionem, prudentiamque, vna, praeter ceteras omnes, Venetorum ciuitas semper adhibuit; ut domesticos suos mores diligentissime retineret, essetque plane sua, neque quicquam exterum infundi in ciuitatem, aut vlla infici se peregrinitate pateretur. Cum igitur Bembo pater in eum cursum, quem tenuerat ipse, quemque summa cum laude, plausuque confecerat, filium induceret atque compelleret, ille contra alia spatia, cursusque alios animo ageret, quamquam patri obsequi suadebat pietas, ciuium consuetudo hortabatur, propinqui, necessarii, flagitabant, tamen sic animo cogitabat, cuius ipse gloriae cupidus esset, eam ad se non a suis modo ciuibus, sed ab omnibus etiam gentibus vltro deferri; prehensandum sibi eius rei causa neminem esse, supplicandum nemini, nullius suscipiendas inimicitias, nemini os laedendum: vnam enim esse, ex omni laudum genere, ingenij gloriam, quae, sine vlla cuiusquam querela, perfrui, ad extremum usque, homines soleant: honores imperitae modo multitudinis testimonium praesferre; ingenij laudem ac famam, etiam intelligentium hominum, habere probationem: nec vero aut voluntatum mutationem, aut fortunae temeritatem extimescere; sed stabilem, firmamque etiam ad posterum commendationem habere: postremo per multos omnibus etatibus exoriri, quorum opera, pro sua cuiusque parte, recipere possit; at, cuius ingenij monumentis ciuitas ornatur, ne multis quidem saeculis vnum extare, aut alterum: satis vero iam Bembo, magnos honores in republica, ad illustrandam familiae dignitatem, esse consequutos; satis nobilitatem, maiorum suorum

rebus gestis, suæ memoriæ stirpis esse; quando & vetustissima templa a suis iam olim gentilibus constructa, ea scilicet, quæ Iuliano dedicata sunt, Bemborum nobilitatem illustrent, & pietatis sint testes; & Francisci Bembi eius, qui multos annos ante Patriarcham Venetijs institutum, sacrorum antistes ac pontifex fuit, memoria, gentis vetustatem ostentat; tum maritima imperia, clarissimeque Francisci item Bembi victoriæ; tum Marci, qui a Cyprijs interfectus est; aliorumque multorum ob temp. susceptæ calamitates, interitusque, Bemborum et virtutis, & in patriam caritatis testimonio sint; nec vero ne in præsentia quidem defuturos, qui stirpis, gentisque gloriam tueantur, atque adaugeant; habere sese Carolum fratrem, in quo mirificam ingenij indolem, maximam virtutis spem inesse intelligat; esse præterea cum aliis nonnullos, tum Ioannem mattheum Bembum summa itidem virtutis & ingenij spe præditum adolescentem. Et vero hic quidem, nec Bembi de se iudicium sefellit, & multis, magnisque in rebus domi, forisque perutilis reip. ciuis est, semperque fuit; nam Carolus, priusquam patriæ prodesse per ætatem potuisset, extinctus est: vnam hanc litterarum atque ingenij laudem minus illos adhuc esse adeptos: eam se in suam gentem inferre cupere, ac propemodum etiam se id perficere, ac præstare posse compertum habere: sin honores sectari velit, certo scire, minus eam sibi rem ex sententia successuram, quam inuitus suscipiat, & iniucundam existimet; & multa præterea a natura impedimenta habere se, sibi ipse sit conscius: nam & blandiri ei qui possit, quem fortasse minus aut probet, aut diligit, pudore sese quodam ingenuo impediri; & existimationem suam vulgi voluntati, comitiorumque talibus, & tamquam vndis, quotannis commissam esse, propter animi quandam aut libertatem, aut si quibus ita videtur, fastidium, pati non posse; nullam autem omnino rem facilem esse, quam inuitus facias. Scire sese illam alteram honorum atque ambitionis incertam, ac periculorum plenam viam, plus fortasse utilitatis, plus apud parui, angusti, animi homines splendoris

doris polliceri; sed eam se sequi malle, quæ plus veræ solidæque dignitatis habeat: ut enim fructuosos fundos parare utilius sit: voluptarios autem, atque animi modo causa institutos, honestius ac magnificentius; sic illam ambitionis rationem vberiores in vulgus fructus fortasse ferre, hanc certe bonarum artium ac litterarum institutionem, plus apud præclara hominum ingenia magnificentiæ, plus honestatis ostendere: ac, ne multa, nihil ægrius factum est, multis filij contentione, multa contra patris, matris quoque Helenæ Marcellæ, primarię femine, castigatione, sæpe etiam obiurgatione, quam, ut ne singulare ac prope diuinum rembi ingenium, ad bonarum artium studia atque ad has mansuetiores musas natum, vulgo atque imperitiæ multitudiniproderetur: sed peruenit tamen, ut, per parentes ac necessarios, perque ciues sibi suos aliquando vitam in litteris agere, idque vnum, relictis rebus, curare sibi liceret. Sed paucis post annis dum sese Bembo libris, litterisq; obruit, dum solitudines, recessusque sibi pro foro, sibi pro curia, proque comitijs per summum otium, summamque tranquillitatem habet; Ioannes Medices Cardinalis, is cui Leo. X. nomen postea inditum est, Pont. Max. Romæ creatur. Mos, consuetudoque Pontificum est, ut si quid publicę priuatęve rei incidat, quod prolato opus non sit, quodque secreto per litteras agi oporteat, si quando, aut regibus, aut ciuitatibus respondendum, aut si quid postulandum ab ijs sit, si quid denique paulo maioris negotij implicitum cum aliquo est, id, quasi per familiares epistolas, transigant: eas litteras cera obsignant; nam publicis decretis in plumbo signum est: earum litterarum scribendarum negotium datur hominibus, ob scribendi prudentiam, atq; elegantiam, eruditissimis; ob muneris, locique dignitatem, grauissimis atque honestissimis; ob autem rerum pondus ac magnitudinem, summa fide, summaque probitate præditis: ij magna cura ac diligentia conquiruntur, magnis præmijs euocantur. Eum Leo morem cum vehementer probaret, cumque ad dignitatem pertinere arbitretur, diligentissimeq;

cum

eum retinere vellet, sine vlla dubitatione Bembum accersit, eique muneri, negotioque preponi iubet. Magnam in spem, magnam in dignitatem vocabatur Bembus; munitissimus enim Leo, liberalissimusque & habebatur & erat: ipsi autem res erat familiaris pertenuis; vix vt necessarios sumptus suppedicaret, idque ipsum magno Caroli fratris, quem sui amantissimum, obseruantissimumque habebat, labore atque industria: consuebant præterea ad Leonis famam ac bonitatem, vt quisque in quaque excellebat arte, aut disciplina; vt propemodum homini erudito, Romæ abesse, turpe esset. Huc accedebat reprehensores suos conuincendi studium quoddam; cum quanti suæ illæ artes fierent, quas illi nulli rei esse dicerent, quasque, tamquam nugas ac deliramenta, sepe Bembo obijcerent, ostendendi magna data esset occasio; nec vero a suo veteri instituto, aut a litteris abduci sese propterea arbitrabatur, quippe, qui ad scribendum inuitaretur, quæyna in re omnis sibi cura atque opera posita semper fuisset. Proficiscitur Romam Bembus, cum annos natus esset tres & quadraginta; preponiturque epistolis Pont. Max. nomine scribendis; eoque in munere gerendo datur illi socius, & tamquam collega, Iacobus Sadoletus is, qui postea Cardinalis factus est. Scripsit eorum yterque eas epistolas cum plane Latine, quod ante id tempus neque acciderat vlli; nec adeo fieri posse vlllo modo homines existimabant; ac, si verum querimus, ne cogitabant quidem: nostri enim homines, sæpe etiam transalpinæ nationes, sic Latine scribebant, vt suæ quisque ciuitatis tamen loquendi formam, consuetudinemque retineret, ac Latinis verbis, quamquam sic id quidem vsque quaque, Gallice nihilominus, aut Italice, nescio quo pacto, loquerentur: sed epistolæ cum plane Latine a Bembo, Sadoletoque scriptæ sunt; tum vero summa a doctissimis, exercitatissimisque hominibus adhibita est elegantia, summaque dignitas; id quod ex ijs libris intelligere licet, quia Bembo editi, epistolæ a se Leonis. x. nomine scriptas continent. Cum itaque Pontifici Bembus, homini nec natura hebeti, nec in scribendo

rudi, cumulatissime satisfaceret, magno ab eo honore afficiebatur: tantum porro in illum suæ liberalitatis Leo contulit, ut, qui Romam pauper tandem uenisset, suis ex fructibus Sext. amplius cxx. caperet, Pontificis plane beneficentia diues factus. Fuit ætas, tempusque illud humanitatis suauitate nimia prope quadam perfusum; vt delectationum multarum studia sæculi illius licentiæ, propemodum omnium permisso, concessa essent: nec enim ne uoluptatum quidem quarundam blandimenta nimium seuerè aspernabantur; sed multa ad oblectationem, multa ad ludum data erant cuiusq; ordinis, cuiusque ætatis hominibus: nec uero religioni habebatur, honestos, grauesque homines in hortis uisos esse; aut paulo liberiore in conuiuio, symphonia cum caneret, & mulieres accumberent, interfuisse; quamquidem sæculi illius nimium plane profusam hilaritatem, eorum temporum, quæ sequuta sunt, tristitia, uehementer corripuit, magnoque opere castigauit: quo magis vereor, id, quod dicturus sum, ne multus secus, atq; est, de Bembo, existimandi aliquid det loci. Sed quoniam nobis susceptum id est, vt de illius vita, non de laude, dicamus, ne hoc quidem reticendum nobis esse arbitrati sumus. Ac sit fere, vt mores, consuetudinesq; locorum, aut ætatum, pro ratione sibi, proque disciplina homines habeant: denique, quod fieri vident, licere putant; atque id, quod in præsentia minus reprehenditur, in posterum quoque tolerabile, concessumque fore arbitrantur: atq; omnino apud omnes gentes, etiam, quæ natura graua sunt, fieri consueuerunt moribus leuiora. In ea igitur morum, sæculiq; licentia, eximia forma mulier quædam perpulisse Bembum dicitur: neque, diu resistentem, continere eum se a lapsu potuisse, præsertim qui nullis dum sacris iniunctus esset: verum ea, vt temporibus illis lapsio, vt hac ætate fortasse labes, eum habuit euentum, vt magno, si mundo naturam audire volumus, fructu compensaretur: suscepit enim ex ea muliere liberos tres; qui vt nominentur à me, res propemodum postulat, nec ipsi nolunt; Lucilium, Torquatam, & Helenam Bem-

bam,



bam, feminam lectissimam, quę cum Petro Gradenigo primario adolescente nupta est: cui etiam liberos ex se se peperit; totiusque orbis terrarum præclarissimam ciuitatem ciuibus nobilissimis auxit: vt, si qui sunt, qui in eo Bembum grauius accusandum censeant, meam illi quidem ad suam sententiam adscribant licet: sed ij tamen se meminerint id improbare factum, quod infectum esse, optare certe non audeant. Nec vero in litteris modo scribendis Bembi fidem atque eruditionem Leo periclitatus est; sed etiam in rebus agendis hominis prudentiam, sollertiamque plurimum adamauit. itaq; cum conspirare aduersus Gallię regem cum Cęsare Maximiliano, cumque Hispaniarum rege catholico, ita reip. temporibus postulantibus, cogitaret; misit de ea conspiratione Bembum ad Venetorum senatum, qui eam magnopere ciuitatem hortaretur, vt a Gallorum, qui bus cum consenserat, amicitia discederet, ac sese cum Pontifice, reliquisque conspirationis auctoribus, ducibusque sedere & societate coniungeret. Habita est a Bembo in Venetorum senatu ea de re oratio pergrauis sane perque vehemens, quam etiam scriptam reliquit: perlegant eam nostri homines; nihil Italice scriptum, grauius ornatiusve ea oratione, dicent esse. Tenebatur præterea impendio magis Bembus studio signorum antiquorum, idque genus rerum reliquarum, credo, quod eam pulchritudinem, ordinem, partium conuenientiam, quam mente atque animo inscribendo vnus cerneret præ ceteris, ijs etiam minus liberalibus in artibus cum propemodum agnosceret, paulo magis commouebatur. atque omnino fingendi pingendique artem poeticę ex altera parte aiunt respondere: illa enim animorum, hæ sensuum mulcendorum magistræ: quam quidem ingenij doctrinęque causam, ij, qui nostra ætate consueque harum rerum cupiditate efferuntur atque insaniunt, magno vt propterea ere in alieno sint, cum asferre homines sine ingenio, sine litteris, non possint, quam morbi furorisque sui rationem allaturi sint, ipsi videant: quid enim attinet, cum animum partim per se, vique sua turpem ru-



demque, partim maleuolentia, inuidia, perfidiaque inquit  
natum gererent: domum modo atq; hortos, villasq; tot ver-  
suris faciendis, tot frustrandis, fraudandisque creditoribus,  
affabre factis signis ex marmore, aut ex ære ornatas habere?

Cumq; in dictis factisque honestatis faciem numquam, ne  
insomnis quidem, aspexerint, decorem pulchritudinemq;  
tanto in ære ac lapidibus opere adamare? equidem nec do-  
mum, nec villam, nec vero oppidum umquam, non modo  
exornatum, sed ne satis quidem mundum dixero, ubi illi  
cum ea sæditate, cum ijs animi sordibus habitent. Nam si  
qui sunt, qui talium rerum intelligentiam, tamquam suæ, in  
reliqua vita, munditiæ atq; elegantie, aut rectarum artium,  
in quibus ipsi excellant, corollarium quoddam adferant, id  
quod in Bembo usu euenerat, ijs non modo suscensendum  
non est, sed etiam gratiæ habendæ sunt: at, qui omnium di-  
sciplinarum expertes, in omni vita rudes atque agrestes, hu-  
ius vnus studij commendatione nitantur, aut in eo non vir-  
tutis quasi appendiculam, sed tamquam vitiorum ac scele-  
rum suorum, ut ipsi sperant, integumentum, ut ego inter-  
pretor, additamentum quoddam, quarant; ij non modo  
acriter vituperandi, sed etiam vehementer illudendi sunt.  
Sed cum tenui Bembo valetudine atq; imbecilla esset, cum  
que noctu magnis lucubrationibus, magnis vigilijs scribere  
necesse haberet; nam interdiu, cum a Pontificis latere di-  
scedere vestigium vix liceret, cumque multi audiendi, salu-  
tandi, deducendi, honestandiq; ut Romanus ferebat mos,  
essent; relinquebatur otij nihil: grauem diuturnumque in-  
morbum incidit; ex quo cum ægre ac difficulter conuale-  
sceret, nec recreari reficique videretur posse, de medici con-  
silio, ipsius Pont. hortatu, cæli mutandi causa, Patauium  
petijt: atque eo anno Leo moritur. Incredibile dictu est,  
quanta animi alacritate, quantaque lætitia Romanis labori-  
bus, curisque liberatus, longa sane, annorum nouem, ipso-  
rum intermissione facta, optatum ad otium studiumque  
suum vetus sese Bembo receperit; nullum ut vrbis vrbana-  
rumve rerum, aut deliciarum desiderium in eo resedis-  
se, li-  
quido

quido appareret. Et vero eos, qui a pueris, bonarum artium studijs dediti, ætatem egerunt in litteris, mordere in adolescentia interdum solet, quod a rebus agendis absint: quod si casus eos sorte aliquis ab otio ad agendum euocauerit atque traduxerit, nã illi rem totam, quam, incognitam dum haberent, admirabantur, expertam atque perspectam, præ suo vetere studio, contemnunt. quid enim in se continet, quod magnopere aut laude, aut etiam appetitione dignum sit, præclara ista agendi sollertia? si modo rem inspicimus, ac speciosa illa vocabula, communitas, vtilitas, salus hominum, paulisper ab hac disputatione facessant, rogamus: quæ enim tota in re non ratio, sed, maximam partem, fortuna dominatur, quamque non prudentia, sed plerumque (non enim libet semper dicere) malitia, regit; quid aut gloriæ, aut iucunditatis inesse possit? quasi enim cum ludas tesseris, neque contra eius ludi formulam vt venias, aduersarioque vt succum facias, animum inducere velis, si te is, qui cum ludas, contra sine vlla dubitatione circumueniat, atque decipiat, numquam tu tantum scientia atque artificio profeceris, vt cum illius dolo atque fallacia certare possis; sic in hominum vita hac, & tamquam alea, cum viri boni, vt a iustitiæ certa quadam præscriptione, ne latum quidem vniquem, discedant, abduci sese nullis aut honorum, aut pecuniæ præmijs patiantur; alij autem vulgo fraude, præstigijs, sæpe periurio, perfidiæque pugnent, vincitur nimirum simplicitas calliditate, ingenuitas impudentia, pudor molestia, fides scelere, veritas mendacio: itaque tardi, parumque efficaces habiti boni inter improbos, ludibrio sæpe sunt.

Careant igitur insigni hac rerum gerendarum laude homines litteris dediti, animo non modo equo, sed etiam hilari; ac sic habeant, nihil fere honestati hominum, in vita hac communi, esse relictum loci; sed scelus pleraque, ac turpitudinem inuasisse; quamque operam dare se reip. maximam plerique prædicent, eam omnem, communis rei simulatione, in sua quemque priuatim vtilitate augenda positam, occupatamque habere. Vñs omnino excipio Venetos; Nam

Christiana quidem res communis Romæ, non hominum consilio, sed dei immortalis mente, regitur. Vnos igitur Venetos excipio, quorum præclarissima in rep. optabile statuam esse versari: quam quoniam peregrinis nobis non licet capeffere; nec vero ea ciuitas, post hominum memoriam, prudentissima ac fortunatissima, nostræ, aut cuiusquam opis eget, illam, vt pote libertatis arcm, prudentiæ gymnasium, iustitiæ domicilium, veneremur: otium autem hoc ignobile litteratum, adolescentes senesque retineamus. quam quidem Bembus prudentiam studio ac voluntate huius sententiæ auctoribus præclare emensus, re atq; exitu ad extremum vsq; præstare non potuit: nam, cum Patavij multos iam annos esset, in ciuitate quietis ac tranquillitatis plenissima, ab omniq; contentione, ambitioneq; longe ac multum remota; cumq; omnem curam, cogitationem, operam, ad ea studia, quæ a puero adamasset, celebranda, contulisset, vel in ijs iam consumpsisset potius, magno quodam casu clementem illam vitam, quietam, tranquillamq;, prope iam decurso spatio, atque ætate iam sere exacta, recusans atque ingratis coactus est mittere. . . . . Erat Romæ temporibus illis, vir summus atq; clarissimus, singulari prudentia, admirabili animi magnitudine præditus, Alexander Farnesius Cardinalis is, qui Paulus III. appellatus est, qui, simul ac Pont. Max. factus est, ex templo tanto imperio ac potestate accepta, vt initium rerum, actionumque suarum ab illustri aliqua laude duceret, faciendum sibi esse existimavit, vt, qui quaque in ciuitate, quibusque in terris homines essent, illustri quadam aut pietatis, aut prudentiæ, aut doctrinæ laude, celebrati; illos vltro ipse, eam dignitatem haudquaquam petentes, ac ne tale quidem quicquam suspicatos, amplissimum in cardinalium collegium cooptaret. ea re sperabat cum pontificatus, collegijque, tot clarissimorum hominum accessione facta, auctum iri maiestatem; tum, specimen se quoque suæ virtutis maximum cum dedisset, magnam de se famam, opinionemque esse facturum: itaq; semel atque iterum, magna cura, magna adhi-

bita

bita diligentia, summos viros peruestigauit atque delegit, quibus grauissimam illam dignitatem, nimio a plerisque opere sæpe frustra ac nequicquam expetitam, vltro mandaret: quo facto, opinione maiorem est gloriam consequutus. Sed, vt vt alijs ea res euenit, Bembo quidem perincommode cecidit, quod suo ex otio, suaque e solitudine dulci illa erutus, rursus in eam turbam, molestiamque senex rapere tur, a qua, vix dum inclinata etate, se se tamen cupidissime vindicasset: etenim cum præstantes denuo gloria viros Paulus conquereret, atque indagaret, quos in collegium legeret; occurrit in primis homini Bembo: is forte Venetijs erat. Gaudeo, gaudeo, optima post hominès natos, atque amplissima ciuitas, cum inuestigaretur perquireturque virtus, ad te iterum potissimum ventum esse: etenim cum bonorum, prudentiumque hominum res Christiana publica egeret, sumpserat a te scilicet, iam antea, Gasparem illum Contarenum, Italici nominis lumen; in quo, cum summa probitas, castimonia, moderatio, prudentia cum summa doctrina atque eruditione contenderet, eius ipsius insignita pietate ac religione longe eæ laudes omnes vincebantur: ergo de tuâ magnorum virorum copia bis suppeditatum paucis annis rei Christianæ communi est: semel in Contarenos; iterum in Bembo. Ad eum cum Pauli missu Carolus Gualterutius Fanensis, vir apprimè bonus, nauusque & industrius, venisset cum diplomate, cumque eius dignitatis insignijs, ille enimvero recusare ac deprecari, neque abduci, nunc demum ætate confecta, pati se posse dicere, a quiete ac solitudine illa, quam vnâ, rerum omnium iucundissimam, antiquissimamque, iam inde a prima adolescentia habuisset; magnas tamen sese Pontifici, magnas collegio gratias agere atque habere; quod senectutem suam honorificentissimo de se iudicio, clarissimoque decreto tanto opere honestatam voluissent. cum in eo, multos iam dies, perseveraret, neque de sententia depelli posse videretur, nihil propius factum est, quam, vt Romam Gualterutius, re infecta, reuerteretur. Non sum nescius multos fore, qui nostræ co-

rationi hac in re parum fidei habeant: pleriq; enim omnes, quid de aliena voluntate credendum sit, de sua coniecturam faciunt: itaque incredibile multis visum iri intelligo, Bembum id vere atq; ex animo aspernatum esse, quod omnes, fere summa cupiditate, expetendum atque optabile esse existiment; tametsi scribimus hæc recenti huius facti memoria, multisque, qui in agendo adfuerunt, superstitibus, quos, mendacij atque impudentiæ nostræ conscios ac testes, habere, cur velimus causa nulla est. Sed quoniam par eorum peccatum esse censemus, qui mentiri in historia audent, atque eorum, qui dicere verum reformidant; mendacij speciem, verum cum dicturi essemus, non horruimus. Erat perinuidiosum futurum; respui tantam dignitatem, præsertim quæ non honoris modo splendorem, sed etiam muneris contineret officium: eam enim ob causam collegium dicitur Cardinalium a maioribus institutum; ut ij & adsint Pontifici, & ad omnia reip. tempora præsto sint; egerimeque laturus eam rem Paulus erat; quod minui Christianæ ciuitatis maiestas, cuius ipse princeps constitutus esset, videbatur, atque eius priuatim & consilium condemnari, & auctoritas contemni, qui non beneficium modo Bembo a se datum existimaret, sed etiam onus quoddam officij pro sua potestate impositum: ut si de suo ille honoré putaret sibi liberum esse recusare, dicto certe pontificis audientem non esse, in eo vero & collegium, quod sanctum esset, & Pontificem violari. itaque adcurrunt ad eum vndique amici ac necessarii; agunt, hortantur, obsecrant, si sua ipse gloria minus moueatur, gentis ac posteritatis tamen memoriam nomenque respiciat; ac tantam dignitatem in domum suam illatam ne ipse a sese abiudicet. Parum primo Bembus eorum moueri oratione; ut pote qui eadem sæpenumero audisset iam olim prope omnia, ac refutasset: vbi vero ad eum Petrus Landus adiit, qui ciuitatis, haud multo post, princeps fuit; qui vnus apud Venetos magistratus amplissimus est, idemque perpetuus; isque longa atque accurata oratione cum eo agere cœpit, cum ostenderet quantum ei re subiturus es-

set

set'offensionis atque inuidiæ; quam indigne Pont. Max. quam grauitèr omnem sacerdotum amplissimū ordinem eam ignominiam ferre necesse esset; cumque adderet numquam hæc, sine nutu atque consilio dei immortalis, accidere solere; diligenter videret, ne diuino numini refragaretur; tum vero, animo sane suspenso ac perturbato, hominem Bembus in præsentia dimittit, rem in diem posterum differt; & quoniam religionem sibi inieciisset, diligentius deliberaturum sese pollicetur. Postridie eius dici, cum res homini in religionem plane venisset: fuit enim non versuta hæc, atque ad hominum opiniones captandas simulata, quam in multis videmus, rugis supercilioque horridam, tristitia; sed, vere atque ex animo, pietatis colentissimus; proximum in sanum mane ingressus est. Erat tum forte sacerdos ad aram, atque historiam de ijs, quæ a Christo dicta, aut gesta in terris sunt, quod euangelium appellamus, clara voce, vt mos sacrificium facientibus est, effati incœperat: uix dum pedem in templum intulerat Bembus; ac sacerdos Petre, ait, sequere me. ea uero illi uox, dei prope ipsius ore mit-ti, uisa est. Itaque, cum omnem ex animo dubitationem sustulisset, quasi dei accitu, Romam proficisci statuit. magnus sit domum eius omnium hominum atque ordinum concursus, frequens gratulatio, maximus totius ciuitatis plausus. ille uero, paucis post diebus, filias, recessusque suos, in quibus placatam, tranquillamque vitam prope omnem traduxisset atque exegisset, crebro appellans, atque identidem respectans, Romam ire perrexit. Vere hoc dicere possum; sic homini hoc discessu hilaritatem prorsus excussam, vt eius pristinam iucunditatem, suauitatemque amici, familiaresque ex illa die desiderauerimus; atque, in omne tempus amissam esse, doluerimus. Cultus est Romæ Bembus cum a bonis plerisque omnibus Contareno, Sado leto, Cortesio, Morono cardinalibus amplissimis, hominibusque cruditissimis; tum vero præcipue a Reginaldo. Polo, homine, dei immortalis, dubio procul, beneficio, ex ultima vsque Britannia ad nos uecto, uel de cælo potius, si mo  
do

do dictu' fas est, lapso; cuius de laudibus, quamquam de tam præclara ac plane diuina virtute nemo satis digne vquam loquetur, alius mihi profecto dicendi locus dabitur. hoc certe haud facile in præsentia dijudicare audeam; plus ne eam insulam, multis vulneribus Christianæ reip. per summam impietatem infligendis, nocuisse dicam; an, quod in illo solo talis, tantusque vir ortus & procreatus sit, vnde vere, planeq; Christianæ pietatis, vitæque exemplum petere mus; profuisse. Is igitur cum Bembo familiarissime vixit; cumque senis optimi multas, magnasque animi dotes maximi fecit; tum vero apertum, simplexq; hominis ingenium, suæ ipsius voluntati atque naturæ consimile ac par, plurimum semper adamauit. Sed, cum diligentissime Bembus coleretur a multis, summo etiam a Paulo honore afficiebatur; tantaque apud eum fuisse gratia dicitur, vt nullam vquam rem ab eo postularit, quin perfecerit atque abstulerit: sed enim hoc non solum auctoritatis, gratiæq; fuit, sed etiam moderationis & pudoris. Tum ea erat Bembi, in dicenda sententia, libertas, ea simplicitas, eaque in omni vita clementia atque ingenuitas inerat; vt, si ante eum Paulus mortem obiisset, quod natura postulare videbatur, aliquot enim annos illum Paulus antecessit ætate, creatum iri eum Pont. Max. plerique compertum haberent. Sed, cum equo Bembus sorte veheretur, paulum in ostio ad parietem latus offendit; qua ex plaga, homo senex ac debilis, in febriculam incidit; atque ex ea, cum sensim extenuari, conficique se intelligeret, cumque mortem multos dies quasi præstolatus esset, animo non modo forti, sed etiam æquo; vt de sua illa migratione cum amicis, interdum etiam iocaretur; diem suum pie, sancteque obiit. Cultus erat iam pridem omni officio Bembus ab Hieronymo Quirino Ismerij filio; homine partim genere ac nobilitate, partim fide, munificentia, humanitate, morum suauitate ac dulcedine, clarissimo. Is illi statuam mortuo posuit nobili artificio factam ex marmore, atque eam celeberrima Antonij in æde Patavij locauit; inscripsitque in basi in hanc fere sententiam: propterea



propterea a se illam statuam Bembo statutam, atque in publico positam esse, ut cuius animi simulacra orbis terrarum cerneret, eius ne corporis quidem desideraret imaginem. Fuit omnino perpolitum Bembi ingenium, perq; acre; maximeque perspicax, acutumq; iudicium; plurima in alios, in se nimium pæne multa inquirens; in seligendis, collocandisque verbis, multum ponebat operæ, atque in ea re magnam cum prudentiam, tum vero etiam diligentiam adhibebat: hoc enim vnum sibi persuaferat esse, quod in oratione nouitatem, & quasi, patrijs moribus conseruatis, peregrinitatem tamen quandam effingeret; quæ, cum multum omnibus in rebus admirationis habeat, ob id ipsum plurimum etiam non modo dignitatis, sed etiam iucunditatis adferre solet. Ac profecto, quantum intelligere nos possumus, præclare hoc, quod difficillimum semper habitum est, Bembus præstitit, vt, cum minus sere v̄sitate loqueretur, hospitis speciem tamen effugeret. quod si qui sunt, qui vulgi opinione ducti, quotidianam hanc tritam, communemque dictionem in hominum eruditorum, aut versibus, aut prosa oratione vel postulent, vel expectent; atque ob eam causam Bembi oratione, quæ a plebeio ac peruagato hoc tabernariorum atque opificum sermone longe dissonat, minus delectentur; ijerunt ex eorum numero, qui de ijs studijs existimare aut leuiter, aut nihil possint. C. quidem Cæsar, vt litteris proditum video, & ipse bene loquendi laudem, non populi consuetudine, sed multo studio, multisq; litteris, & ijs quidem reconditis & exquisitis, assequutus est; & cum de ratione Latine loquendi ad Ciceronem ipsum accuratissime, pluribus quidem libris, scriberet, verborum delectum originem dixit esse eloquentiæ. Iure igitur Bembus, maiore quadam cura, in verbis eligendis torquebatur, præsertim cum Etrusce scriberet: itaque noua, splendida, decoraque eius in primis oratio est: parum enim fidei consuetudini semper habuit; quod ea partim varia atque inconstans, partim etiam vitiosa atq; corrupta esset; & quoniam ne Romam quidem, nec adeo Athenas illas ipsas Atticas,

quibus temporibus eloquentia maxime floruit, diutius tenere illud potuisse scriptum legerat, vt ne barbarie earum infuscareretur atque inquinaretur oratio; repudiandum sibi hunc sermonem, qui nunc est, statuebat esse; atque cum, qui fuerat in Etruscis olim hominibus purus atque emendatus, cum minus dum exterarum nationum in Italiam confluxerat, adsciscendum: qui cum illi non de populo, futili inanique doctore, discendus esset; sed e veterum libris, grauisimis auctoribus, percipiendus; illud etiam eadem opera adsequebatur, vt eius, dignitatem, grauitatemque haberet oratio: nam quotidianus quidem, vulgarisque hic hominum sermo, e sordidis artibus maximam partem ductus, multum ex officina, multum e taberna, e sellaque redoleat, necesse est. Sunt igitur Bembi de ratione Etrusce loquenti libri tres in dialogo mirabiliter scripti; quibus profecto effectum est, vt, quod homines Etrusce loquantur, non bonę modo iam consuetudinis sit, quam tamen fluxam atque instabilem videmus esse, sed iam etiam scientię ac rationis, quę mutari nullo modo possunt: quamquam video non deesse, qui, cum cogitandi laborem se ipsi aut nolint, aut etiam nequeant, Bembi scripta non tam expurgata, quam religione nimia prope quadam attenuata esse contendant. Sed sit sane suus cuique modus: difficile est enim, in omni re statuere quatenus: & tamen, si cum aliorum libris Bembi scripta conferantur, facile iudicium erit: mihi quidem eius oratio vehementer probatur: non modo, quia elegans, noua, splendidaque est, &, vt ita dicam, nobilis; sed, quia est etiam, Isocrateo prope more, vber atque ornata. Sunt etiam eius versus Etrusce scripti, & quidem permulti, graues atque pleni; vt hanc quidem laudem, si modo nos de ijs rebus existimare aliquid possumus, Bembo a ceteris omnibus concedi, necesse sit: in ijs est carmen de Caroli fratris morte: videor mihi hoc vere affirmare posse, neminem vmquam tam plane, tam ornate, tam dolenter quemquam luxisse, atque illis Bembo versibus fratris obitum lamentatus est. Scripsit præterea volumina epistolarum aliquot:

quarum

quarum paulo magis decoram video a nonnullis locutionem existimari . suum cuique omnino iudicium ; eamque ob causam difficillimum est , omnibus æque placere : nam , vt Theognis ait , laudatus a Platone poeta ,

οὐ δὲ γὰρ ὁ θεὸς

οὐδ' ὧν παρὰ τὰς ἀδελφεῖς, οὐτ' ἀνέχων .

mihi quidem , cum has epistolas cum ijs , quæ a Græcis , Latinisve scripta olim sunt , contuli ; valde hæ cum illis congruere videntur . Sed pollutas pleriq ; lue quadam etiam nunc aures habemus ; nec plane dum e vulgi sæce enatauimus atque emerfimus : paucos enim adhuc bonos auctores Etrusca habuit lingua , quibus lectitandis nostrorum hominum expoliretur , expurgareturque iudicium . Itaque homines ornatæ , factæque orationis insueti , nec pulchritudinem intelligunt , aut cernunt , & splendore ipso præstrikti læduntur ; præsertim qui in veterum Græcorum ac Latinorum libris vsque adeo versati , volutatique non sint , vt illorum virtutes aut transferre ipsi in sua scripta , aut in alienis agnoscere non possint : atque Etrusce quidem a Bembo scripta hæc sunt . Latine vero de Actna ad Angelum Gabrielem scripsit adolescens ; quem video libellum illi postea Seni non valde probatum fuisse : de Virgilij Culice , & Terentij fabulis librum vnum : de Guidoubaldo Feretrio , atque Elisabetha Gonzagia ad Nicolaum Teupolum librum itidem vnum , qui valde doctis omnibus probatus est ; a Gabriele quidem Faerno , homine eruditissimo atq ; huius generis acerrimo existimatore , in cælum fertur . Sunt etiam Bembi , præter eas epistolas , quæ Leonis nomine ab eo scriptæ sunt , suarum quoque priuatim epistolarum volumina ; ac seorsum epistola de imitatione ad Ioannem Picum libri prope instar , sane perlegenda . sunt prætera eius versus Latini multo , dulces , elegantesq ; ; vt me quidem æque propemodum , ac veterum illorum poetarum scripta , delectent . scripsit etiam magna cura , magnaque assiduitate ciuitatis suæ historiam , nudiusculam illam quidem : est enim vnum Cæsarem imitatus ; sed puram in primis atque illustrem .



IOANNIS CASAE  
AD ILLVSTRISSIMVM,  
AC SAPIENTISSIMVM

Venetiarum Principem;

Franciscum Donatum

*In Historias Petri Bembi.*



VLTAE sunt artes, Illustrissime  
PRINCEPS, quod tu minime i-  
gnoras; cum ad vitam sustentan-  
dam inuentæ, tum ad cultum, aut  
etiam ad iucunditatem; volupta-  
temq; ab hominibus excogitatæ:  
quarum in singulis qui excellenti  
quadam scientia aliquando præ-  
ter ceteros præstiterunt, magno a-  
pud omnes gentes in honore habiti sunt. nec vero iniuria id  
quidem: nihil est enim præstantius, nihil omnino homini  
laudabilius, quam de hominum genere bene, quoquo mo-  
do possis, mereri; eamque cognationem, quam a natura ha-  
beamus, nostra quoque opera, hoc est dandis beneficijs, ar-  
ctius etiam astringere. Quod si harum commoditatum, v-  
tilitatumque effectoriis tantus honos habendus est singu-  
lis: quibusnam tandem aut litterarum, aut operum monu-  
mentis eius gloriam digne illustrabimus, si cuius ars, ac di-  
sciplina tanta sit, vt vniuersa illa contineat ac complectatur?  
aut si quis harum omnium artium moderator, & tam-  
quam architectus, quatenus quamque, quoque modo pro-  
gredi deceat, indicet atque præscribat? est enim difficilis il-  
la quidem, & ardua in præclaris nonnullorum hominum  
inge-

ingenijs, ceterarum omnium princeps, ac magistra, minime tibi quidem incognita, facultas quedam, quæ ciuitatum procurationem sibi vindicet, & reip. regendæ muneri præposita sit. atque eam artem civilem rationem, eandemque prudentiam licet appellare. cuius quidem disciplinæ qui compotes sunt, non vna modo, aut altera re separatim hominibus commodare, ac prædesse, sed vniuersam eorum gubernationem suscipere voluit: nec illud efficere solum conantur, illi priuatim vt libere, vt tuto, vt iucunde, sed vt bene etiam beateque publice vsuant. Quamphrem tanti, ac tam præclari operis artifices, non vt reliquarum artium magistri laudibus solum extollendi sunt, sed etiam, si modo dictu fas est, in deorum immortalium numero, quibus cum humanarum rerum procurationem propemodum communem habeant, venerandi atque colendi. atque horum artificum vestro insensatu maxima omnino facultas est, semper quæ sit id quod res ipsa declarat: nec enim tanta, tamque opulenta, ac beata ciuitas vel constitui initio potuit, vel deinceps tantopere augeri & crescere; nec vero vno, eodemque statu, & tanquam habitu tot sæcula, id quod nullis gentibus, vt totius vetustatis memoriam quam longissime repetamus, vsu euenit, manere, sine eximia quadam prudentia; sineque admirabili ac diuino cum patrum vestrorum, tum vestro, qui nunc eam talem tantamque tuemini ac regitis, consilio: Ac video equidem pluribus, quam vos, gentibus aliquot annos dominatam olim esse ciuitatem vnam; aut alteram. verumtamen (libere epim dicam, quod sentio) imperium bello partum sæpe feriatem, sæpe violentiam, atque iniusticiam, fortunæ quidem certe temeritatem semper habet, at bene domi constitutæ res, sinequæ vllò ciuitatis motu tot sæculorum diuturnitate firmata, vna, eademque reip. ratio moderata & concors, ea vero tota virtutis est, ac prudentiæ: itaque in bello illæ; atque inter armam stetissent, in pace atque in otio copciderunt; quippe, quæ non ratione, sed viribus nixæ erant: nec enim quietis, hoc est parendi vicissim atque imperandi, artes didicerant.

vos pacis, id est iuris, atque equitatis studia, quæ vincula sunt ciuitatis, cum domi coleretis, nihilominus foris belli gloria floruistis. etenim cum ciuili illa, quæ modo a me appellata ratio est, duabus contineatur partibus, bellicarum, atque vrbinarum rerum scientia, & tractatione: illi, cum bellicam laudem nimio adamaissent opere, alteram reip. partem incultam propemodum reliquerunt: vos vtramque quidem, sed præcipuam, vt par fuit, maxime adepti, complexique estis. ergo ex omni Italia, tamquam e turbulento ac formidoloso mari aliquo, tanta hominum vis ad vos confluit, vestramque in urbem se se, quasi in portum, refert, vix vt iam capere tantam multitudinem suis illa tectis possit: qui cum e suis ciuitatibus in vestram migrant, protectiones ab iniurijs fore domi se se vestræ aduenas, quam suæ ciues, certe confidunt. Maxima igitur laus vestræ reip. vobisque magnis, clarisque in ea ciuib. debetur; quæ in eo munere, quod de humanis omnino muneribus longe præstantissimum sit, vna excellat plurimum. præstant enim alij alijs virtutibus populi. vobis autem id vnum proprium perenneque est, rem tueri publicam; hoc est humanum genus animi ratione, non felicitate aliqua, quæ casum habeat necesse est, & varietatem fortunæ propriam, conseruare: hæc enim & stabilis ipsa est, & diuturnitatem atque adeo, quoad res humanæ ferre possunt, perpetuitatem, quod vestra est resp. consecuta, parere consuevit. Fortunati igitur ciues tui.

Te vero equidem semper beatum, semper gloriatione dignum existimaui: cum propter multas, magnasque virtutes tuas, animi magnitudinem, continentiam, suauissimos, eosdemque castitatis, religionis, pietatis plenissimos mores, dulcem illam tuam, vberemque dicendi copiam; tum vero propter diuinam istam animi tranquillitatem, atque æquitatem. Cum enim tot annos in hac post hominum memoriam clarissima rep. summa cum gloria versatus sis; cumque dignitatis præstantia quamplurimis semper antecieris: communis iuris æquabilitatem transisti numquam, ac ne cogitasti quidem: quin etiam (memini enim me de hoc ipso

Bembo



BEMBO sepe audire ) cum tua te virtus multos iam ab hinc  
 annos ad summam amplitudinem perduceret; tuaque præ  
 clarissima patria ad istum honoris gradum, quem vnum al-  
 tissimum habet, ipsa te tollere cuperet, atque adniteretur,  
 deque tua gloria sollicita esset: liberaisti tu eam omni cura,  
 atque alijs quibusdam, in istum locum magna quadam pro  
 peratione festinantibus, cum anteuertere posses, vltro cessi-  
 sti. magnifica vero laus, honorem, tantum præsertim, cuius  
 cupiditate ceteri inflammentur, tam modice concupiscere.  
 sed eadem tamen ipsa resp. simul ac data facultas est, iam du-  
 dum tibi debitam, tibi que reseruata dignitatem istam ad  
 te scilicet eundem cupidissime detulit. neque tamen, ne sic  
 quidem, æquabilitatem animi tui tu illam veterem amisisti.  
 atque hoc ipso in honore maximo gerendo, cum grauita-  
 tem ac dignitatem sic adhibeas quasi reip. humanitatem, sa-  
 cilitatemque, vt tuam, retines. ita nec ciuitatis maximæ cla-  
 rissimæque maiestas desideranda est; nec optimi, præstan-  
 tissimique ciuis humanitas requirenda. Quid, quod dua-  
 rum maxime insignium virtutum, integritatis, ac pruden-  
 tiæ tuæ, duos esse certissimos testes videmus, paupertatem  
 alterius, summam alterius tuam apud omnes gratiam, atq;  
 auctoritatem? quo quidem ex testimonio intelligere omnes  
 necesse est, ita te in rep. administranda ad octuagesimum vs-  
 que annum ætatem contriuisse, vt publicas res sic procura-  
 res, vt tuas; sic autem ab ijs manus abstineres, vt ab alienis: ita  
 factum esse, vt, cum tu sic animum induxisses tuum, vt bo-  
 no ciui gratis reip. seruiendum esse statueres; illa contra e-  
 gregiæ tuæ erga se voluntatis tibi præmium, quod habuerit  
 præclarissimum, laudis & gloriæ tribuere cupierit. Ac mihi  
 quidem in te intuenti verum omnino videri illud solet,  
 quod a sapientibus traditum est. aiunt enim homines fer-  
 reis alios, alios æreis, quosdam argenteis animis gigni: esse  
 etiam paucos illos quidem, sed tamen nonnullos, quibus au-  
 rea animorum natura data est, ijsque seorsum regendarum  
 ciuitatum munus a Deo adsignatum: illos alios, quo sua  
 quemque aut durtia, aut vilitas impellat, ferri: at vos ex illo  
aureo

aureo genere natura ipsos per vos locupletes atque honoratos, ad salutem civium, populorumque incolumitatem, vi tamque omnium quietam & beatam ortos, nec honores concupiscere, & diuitias contemnere, & generosarum volucrum ritu, cælum modo spectare; vbi vobis ciuitatum rectoribus, ac conseruatoribus certum locum, ac diffinitum esse teneatis. Quæ cum ita se se habeant; tam præclari hominum maximorum cœtus atque concilij instituta, tam diuturnæ resp. moderationem, tam eximie ciuitatis magistratum descriptionem, opes & copias, tum res vestras domibellique gestas, a populis gentibusque alijs audiri, manareque ad posteros, non iam ad vestram modo gloriam pertinet, sed etiam ad eandem ipsam, in qua versamini atq; exercemini, hominum salutis curam: habebunt enim extere nationes non modo, quod magnopere laudent, quodque admirentur plurimum, sed etiam quod imitari cupiant, vndeque exemplum petere possint, qualem esse optimam, firmissimamq; remp. ac statum ciuitatis maxime diuturnum, maximeque expetendum, oporteat. Quare rerum vestrarum historia hæc, quam Petrus Bembus Cardinalis vir idem clarissimus, idem scriptor vnus omnium politissimus, scripsit, merito & flagitata iam pridem a multis est, & expectata semper ab omnibus. quid enim aut ad delectationem iucundius, aut ad disciplinam (est enim historia vitæ magistra) grauius, constantius ve esse possit, quam ciuitatis omnium prudentissimæ leges, mores, instituta, consilia, magnarum variarumque rerum casus atque euenta, de omnium dulcissimo elegantissimoque auctore audire, eoque ipso nec in mendacio gratiam quærente, nec in veritate similitatem extimescente? fuit enim Bembi non stilus modo purus & elegans; sed animus etiam sincerus in primis ac simplex. qui cum summa iam senectute patriæ vestræ rogatu, vel iussu potius, res vestras gestas scribere aggrediretur, neque ad hanc ætatem, memoriamque nostram peruenire se se scribendo posse consideret; sepe mecum locutus est, & quidem crebro te appellans, cum permoleste ferret excludi se se tem

pore a tuarum laudum, tuique similium commemoratione, qua nos re commoti faciendum nobis esse duximus, ut eius historiam ad te potissimum mitteremus, optimi scilicet senis virique clarissimi, atque hominis dilectissimi plenas grauitatis, plenas auctoritatis, plenas dignitatis lucubrationes; ad sanctissimum itidem, e germanoque illo Platonis auro senem, in clarissima post homines natos rep, principem, ciuemque vnum omnium facundissimum: Accipies igitur tu illam, non a nobis quidem, sed a Bembo per nos tibi missam: patriæque tuæ vtrumque gratulabere: eadem enim res maxime scriptione, ac memoria dignas ad historiam supeditauit; eadem grauisimum luculentissimumque suarum rerum gestarum scriptorem, ac testem peperit.

IOANNES CASA

RANVIO FARNESIO

CARDINALI



NON eram equidem nescius, eum iam in locum progressam esse virtutem tuam, ut amplissimo isto honoris ac dignitatis præmio diutius carere non posset. Cum enim superioribus mensibus, permultos dies ut tecum essem, mihi contigisset, facile, præsertim id curans atque attendens, intelligere potui, non modo eximia quamdam ac prope diuinam animi, & ingenij in te indolem elucere, sed ipsos iam apparere virtutis fructus; eosque, præter ætatem ipsam, plenos atque vberes. Itaque non dubitabam, quin Paulus Pont. Max. qui eo usque virtuti semper fauit, ut eam in alienis vltro tam sæpe hominibus illustraret, passurus non esset, ut illa in suis iniquitatibus iaceret. Sed, quamquam exploratum tu quidem meritumque ac prope debitum, summum istum honorem massequutus es; tamen vel hoc ipso nomine, quod istud

honoris insigne, virtutis præmiū citius, quam aui tui, hominis sanctissimi, in te beneficium omnes dixerint, tibi plurimum gratulor, neque cuiquam concedo; quamquam omnium bonorum flagrare in te studia & voluntates, certo scio: ut plus me voluptatis ac lætitiæ ex ea re ceperit. id, quod ego tametsi pro mea in te, fratremque tuum, virum maxime illustrem, Cardinalem Farnesium, clarissimamque in familiam vestram observantia, mea ipse sponte fecissem, tamen eo etiam non equidem magis, sed, nescio quomodo, libentius facio, quod excitarunt me litteræ tuæ, quibus nihil excogitari potest humanius: in pias enim me non ad gratulandum modo tibi dignitatem tuam, sed etiam ad eam tecum vna fruendam; in quo ego cum suavisimos tuos mores, maximeque in me propensam voluntatem tuam agnosco, tum dupliciter lætor; & quod tantum patrocinium, quantum in tua esse auctoritate & gratia par est, promptum mihi paratumque esse intelligo; & quod de tua bonitate atque humanitate, tanta dignitatis accessione, nihil diminutum esse perspicio: tamen si numquam, id quidem aliter fore, putavi. Sed ad illud redeo, ut non modo istam tibi dignitatem gratuler plurimum; magnopereque gaudeam; ne fortunam quidem honori tuo defuisse; sed multo etiam magis ea re læter; beatumque esse te prædicem: *ἀγαθὸς ὁ ἄνθρωπος ὃν ἀγαπᾷ ὁ θεός*: Sic enim est profecto, nam, cum fortuna bonis comitatur, vix tum demum laudem habet & plausum; improborum autem; aut etiam obscuro-rum hominum, prosperitatis invidia est comes. Quo magis enitendum tibi est, omnique cura, studio, labore, industria perficiendum; ut hominum summam de te expectationem, quam primæ tuæ isthæc ætas, tam vario laudis genere florens, tamquam veram futuram anni vbertatem ostendere solet, sic excitavit, non modo expleas, sed etiam superes. Perge igitur, qua cœpisti, eadem celeritate & cursu ad virtutem contendere: neque de tuo pristino labore, assiduitate, diligentia, industria, quicquam remiseris: breui enim & obrectatorum voculas, si quæ concitatae sunt, comprime,



mes, & Pont. Max. amplissimi que collegij vestri, in te cooptando, iudicium non comprobabis solum, sed etiam illustrabis; perficiesque, ut nullum esse tam nouum, tamque exquisitum honorem, qui in amplificanda dignitate tua extracordinarius videri possit, omnes & intelligant & fateantur. Qua quidem in re, pro eo quanti te facio, sepe multumque de te cogitans, grauem tibi constitutam esse aduersariam video: est enim non ineptiarum modo, sed vitiorum etiam omnium altrix & procreatrix assentatio: ea igitur animum tuum, qui & natura firmus est, & educatione ac disciplina corroboratus, quamquam est illa quidem temeraria atque impudens, fortasse non nihil verebitur. Sed eadem tamen, etate, quæ tua lubrica est ac periculosa, tum potentia, quæ solet esse licentior, freta, adoriri te minime dubitabit. quæ cum & tallendi & impellendi omnes vias noverit, omnium temporum momenta teneat, omniaque ad voluntatem loquatur, omnes autem cupiditates exsuscitet, eadem ijs ministrat omnia, semouenda tibi a te est, proculque ab animo, atque auribus tuis eius præstigiæ & quasi cantiones, remouenda. Quod tibi quidem facile factu erit: est enim vna simplexque cautio. etenim, si eos audies, si ijs aures tuas dederis, quorum monitis ac præceptis animus tuus excultus, tamquam astrum, enitet ac splendet; si eos, qui tibi hactenus iter monstrarunt, duces habebis, nihil errabis, atque ad virtutem, quamquam *μακρὸς τε καὶ ὀπίσθιος ὁ δρόμος ἐστίν*, quam celerrime peruenies. Verum sentio me ab eo, quod his litteris propositum fuerat, aberrasse longius: secisseq; insolentius, qui te, in eo præsertim, in quo gratulatione magis vtendum fuit, cohortari ausus sim. Sed dabis mihi profecto veniam, tuæ laudis ac gloriæ studiis incenso, si sim ardentius fortasse elatus, quam tua summa dignitas, pudorque meus postulat.

lauerit.



# IOANNES CASA

## ARCHIEP. BENEVENT.

PETRO VICTORIO S.



VVM forte ad quotidianas occupationes meas podagra accessisset sane molesta: red-  
ditæ, mi VICTORI, mihi sunt litteræ  
tuæ. Eo factum est, vt serius ad eas tibi re-  
sponderem, quam nostra summa coniu-  
ctio postulabat. Sed eas tamen litteras e-

ruditionis atque elegantie plenas: amore autem singulari il-  
lo in me tuo etiam redundantes, gratissimas, iucundissimas-  
que mihi accidisse scito. Quod enim vir omnium doctissi-  
mus, atque in iudicando acerrimus, pedetemptim, verecun-  
deque dissentire a nobis aggrediebare, in re præsertim haud  
magni apud me ponderis: veterem tuam erga me beneco-  
lentiam, amantissimiq; animi gratum obsequium agnosce-  
bam. Quod autem Electæ orationem aliorum, atque ego,  
alijque multi acciperamus, interpretabare: idque stilo illo  
tuo subtili, atque presso, qualis eruditorum hominum ser-  
mo inter se de studijs litterarum disputantium esse debet, de-  
clarabas: in eo ingenij, doctrineque, & eloquentie tue vis;  
lumenque mihi iam pridem cognitum, elucebat. Verum-  
tamen, quod ad me attinet, omni ego te molestia libero:  
siquidem in eo expeditissima mea ratio est. Nos enim poë-  
tarum more vti se res dederit, ita vel populi, vel eruditorum  
hominum sententiam nostro quodam iure sequimur, atq;  
alias si sit opus, aliter de eadem re dicimus. Quare, mi Vi-  
ctori, optimos adolescentes, mihi que iure carissimos, qui  
apud te erudiuntur in litteris, posthac, mea quidem causa,  
sententiam tuam ne celaueris: neque id amicitie tribues,  
quod ab amicitia plurimum discrepat, vt expurgare iudi-  
cium nostrum non audeas. Atque adeo sic habeto, nihil  
mihi in litteris tam plane esse exploratum atque comper-  
tum, quam quod tu idem probes, atq; confirmes: quam-  
quam



quam de his quidem Euripidis versibus nonnulla mihi in mentem veniebant, cur in pristina illa mea interpretatione propemodum perseverarem. Primo enim vix mihi verisimile fiebat, calamitosissimę virgini, in tanto capitis sui, fratrisque sui discrimine, otium ad contemplandam, ac prædicandam Helenę pulchritudinem fuisse, præsertim quam odisset, quametiam diris statim prosequeretur, cuique deos iratos atque insensos optaret: propterea quod se fratremque suum, totamque Græciam euertisset. Nam ita Helenę personam tractare Euripidem par fuit, vt Electrę personę, quam in manibus habebat, ne obliuisceretur. Deinde Helenę pulchritudinem, quę nulla ei mulieri sua culpa obtigerat, indigne ferentem Electram facere, fortasse nihil attinuit: at lasciuiam, & formę, cultusque importunum illud studium, in sororis cęde, & luctu, in domus, familieque ærumna, atque excidio reprehendere, ac detestari: id vero cum Electrę persona congruere, nisi te aliter arbitrari viderem, plane putassem. Nam quod ait Electra, sue huiusce orationis initio, ad ingenium naturamque referri mihi aptius videbatur, quam ad corpus & pulchritudinem posse: sic enim interpretamur. Quam magnę ingenij sunt, ac naturę in vtramque partem vires: ferimur enim natura alij ad pernitiem, alij ad salutem, vt quique proclives ad virtutem, aut ad vitia sumus: pessundedit ergo Helenam non forma, sed ingenium. Nam pulchritudo quidem multis sæpe malo, multis sæpe saluti fuit. Quod video idem præcepisse eos, qui de finib. bonorum disseruerunt: vt ea sententia, quam duobus his versibus complexus Euripides est, vix futura vera sit, si hoc sensisse illum defendimus: qui pulchritudinis composes sint, salutare quiddam habere sat inuerecundum, impudicumque animi ingenium qui possident, ijs ea res semper calamitati est, numquam saluti. Helenę quidem certe non pulchritudo profuit, sed ingenium obsuit. Id igitur mihi accusare videbatur infelix Electra, pannisque obsita, torridaque: Helenam inclinata iam etate meretricium animum illum pristinum retinere, quum fugę infamiam illam

subijc-




subijisset, propter quam in publicum etiam prodire, non au-  
dere ipsa se fateretur. Castissima scilicet puella vehementer  
indignatur, queriturque, eam iam prope anum factam, ne  
malo quidem doctam, deterri a lascivia ac petulantia pos-  
se. Ipsum quoque verbum Mulier, nescio quid vitupera-  
tionis præferre visum olim mihi est, quum illud nescio  
quid versiculorum lusimus. Est eadem, quæ solet: non He-  
lena, inquit, sed mulier. Illud etiam interdum suspicari mi-  
hi veniebat in mentem, si ad cutem totondisse Helenam ca-  
pillum Euripides significaret, dicturum illum fuisse potius  
τὸ χρῶμα, aut τὴν βαΐδα, quam παρ' ἄνδρας τείχεα: quod video  
doctis nonnullis idem placere. Sed hæc tu melius scilicet,  
vel longe potius omnium optime: nam nos quidem vehe-  
menter sane occupati, non tam ut aliquid statueremus;  
quam ut aliquid ad epistolam tuam rescriberemus, cursim  
hec ad te exarauimus. Quare ad illud redimus, quod ini-  
tio scriptum a me est: pro sexcentis mihi auctoritas, iudici-  
umque tuum rationibus semper erit: eaque mihi loci  
huius, aliorumque omnium interpretatio erit  
certissima, quam tibi maxime probatam  
esse intellexero. Vale xi.

Calend. Febr.

MDLVI.

A decorative woodcut ornament, likely a tailpiece or initial, featuring a central floral motif with symmetrical, stylized leaves and flowers. The design is intricate, with multiple layers of floral patterns radiating from a central point. The ornament is positioned at the bottom center of the page, below the main text block.



# GASPARIS CONTARENI, VITA.

*Non suo loco posita, quia sero ad nos  
missa est.*



**V**U per multum inter laudatio-  
nem atque historiam interesse  
oportere facile intelligerem;  
propterea quod illa virtutis mo-  
do præconium quærit; hæc ve-  
ritatis in ytramque partem testi-  
monium continet; sæpe mihi  
de GASPARIS CONTARENI  
vita cogitanti veniebat in men-

tem, vereri, ne, si eam litteris mandassẽm, laudare me ho-  
minem magis quam, qui eius vitæ cursus fuisset, narrare  
voluisse, multi arbitrarẽntur. qui cum commemoratum  
a me de illo nihil vidẽrent, quod esset a laude sciundum,  
quæ reprehensionem habitura fuissent, dedita operã a  
me prætermissa esse existimarent. Sed cum laudatoris sit,  
de cuius laude dicit, eius bona verbis amplificare, aliquid  
etiam alieni adfingere; vitia oratione attenuare, aut eti-  
am silentio præterire; in altero facile præstare possunt, ut  
hic meus commentarius plurimum a laudatione, dissen-  
tiat: nec enim sermone nostro Contareni virtutem auge-  
re conandum nobis est: in altero, ut de eius vituperatione  
indicem nihil, non nos, sed res ipsa laudationi persimili-  
lem narrationem nostram efficiet. Quod si qui erunt,  
qui cum plus de aliena virtute prædicari sentiant, quam  
quantum de sua ipsi sibi polliceri soleant, aut egre id se-

N rant,

rant, aut orationi meæ fidem non habeant, ij sic cogitare debebunt; dici hæc a nobis de eo, qui iam non sit: qui- que cum suæ ciuitatis probis viris omnibus, tum aliarum gentium, exterarumq; nationum clarissimis quibusque hominibus notus, beneq; cognitus fuerit. quorum cum magna pars sit superstes, nulla nobis causa est, cur de mor- tuo mentientes, tot viuorum, illustrium præsertim ho- minum, vanitatis impudentiæque nostræ testimonia col- ligere velimus: clarorum autem virorum laudibus, fa- uere potius quam obrectare omnes debebunt. mihi cer- te aut de Contareno tacendum fuit: aut de eo, ni menti- ri forte maluisssem, cum laude dicendum.

VENETORVM Ciuitas optime morata, optimeque constituta est: id ex eo intelligere licet, quod vna tempe- ratione, vnīs legibus, sine vlla seditione, sine vllō intesti- no malo, annos eorum respublica amplius mille manet: quodque a parvis initijs profecta ad eam opulentiam at- que ad id imperium, quod videmus peruenit: complu- res vrbes, easque magnas atque florentes, socias vestigales- que habet: Corcyræ, Cretæ, Cypri, multis magnisq; in- sulis, transmarinisque prouincijs dominatur. Classem instructam paratamque habet, quantam nullus rex, nul- læ nationes valeant comparare. Ea ciuitas vna omnium, de quibus memoriæ proditum sit, libertatis æquabilita- tisque maxime amans, maximeque retinens est: quippe quæ durissimis quondam Italiæ temporibus; seruitutem fugiens, e continenti sese in vndas æstusque coniecerit; fortunisque omnibus relictis, vnā modo secum extule- rit libertatem, atque in ea tuenda tot sæculorum spatium versata, studium voluntatemque, vsu etiam atque exerci- tatione corroborauit. Itaque libertatis fortasse nomen a- libi quoque gentium inuenias; libertatem ipsam puram atque incorruptam, ab omni metu vacuam, vtiā aspicere in alijs ciuitatibus, vti quondam fuerat, deorum nobis beneficio aliquando liceat. Illud salutare institu- tum mordicus a Venetis retentum est, vt reipublice at- tingendæ,

tingendę præter quam ijs, qui initio in ciuitatem conuen-  
nerunt, quique germani Veneti & tamquam aborigines  
sunt, potestatem præterea facerent nemini; nisi siquan-  
do deliberata re, bene de republica meritis, eius vrbis in-  
quilinis, alijsue quibusdam, id ius nominatim ad hodie-  
num diem concessum est. Ex eo igitur priscorum gene-  
re ciuium Aloisius Contarenius fuit, cum prudens pater-  
familias & locuplex, tum præstans senator & nobilis: at-  
que is Polyxenam Malipetriam in matrimonio habuit;  
feminam primariam; ea, cum aliquot iam peperisset pue-  
ros, neque ij diutius viuerent, ad amicas æqualesque di-  
citur rursus prægnans retulisse; a quibus, vt sunt plerę-  
que mulieres religiosę, admonita esse dicitur; vt qui na-  
tus esset puer, ei nomen imponeretur vnum ex ijs nomi-  
nibus, quibus vocati ij reges sunt, qui ad Christum deum  
nostrum paruulum ac lactantem venerunt: fore enim vt  
vitalis esset. Cum salua igitur paucis post diebus peperis-  
set, puerum nominari GASPAREM iussit, qui primus  
eius familię hoc nomine appellatus est. Is vbi adoleuit  
magna in eo ingenij indoles erat, magna ad litterarum  
studia propensio: itaque facile Aloisius pater, consilium;  
quod de puero ceperat, mutauit: mercaturis enim illum  
faciendis, rei que augendę, quippe cui multę atque am-  
plę multis in locis res rationesque cum multis essent con-  
tractę, filium scilicet natu maximum Venetijs destinaue-  
rat: est enim fere in liberis ciuitatibus, mercaturis rem-  
querere, nobilitati quoque non modo non turpe, sed, si  
bono modo fiat, etiam honestum. verum vbi pueri inge-  
nium naturamque, maius quiddam spectare atque polli-  
ceri intellectum est, consilium illud de mercatura fundi-  
tus pater abiecit; neque vlla in re filij voluntati ac studio  
defuit. Is vbi quod satis esset operę Antonio Iustinia-  
no, Laurentioque Bragadeno Venetijs visus est dedisse:  
nam ij publice a ciuitate constituti erant, qui iuuentu-  
tem in dialecticis, atque in philosophia erudirent: Pata-  
uium profectus, Petro Pomponatio Mantuano, magno

nobilique philosopho, in disciplinam sese tradidit. Erat in adolescente naturæ yis peracris illa quidem, & ut mihi videbatur, peracuta, sed tamen nescio quomodo magnitudine & firmitate potius præstans; & quod maxime rem continet, ad sapientiæ studia accommodatum & tamquam philosophum inerat ingenium: memoria omnino valebat plurimum: huc accedebat animi ac victus vitæque totius constantia quædam, ut, quam semel instituisset rationem, de ea non defatigatione, non pigritia, non voluptate depelleretur. Opinio est in omni vita re venerea illum omnino usum esse numquam, defixa mens scilicet in eo studio, cui se ab ineunte ætate dederat: eoque capta atque alta, nihil præterea concupierat. itaque celeriter affectus est, ut æqualium magister, graviorum natu magistrorumque tamquam equalis, & compar haberetur. certum temporis spatium, horarum sane haud amplius trium, meditationi & bibliothecæ attributum, & tamquam sepositum habuisse dicitur, cui tempori nec umquam quicquam detraheret nec sere adderet; qui reliquus erat dies in congressionibus amicorum, colloctionibusque consumebatur: eque de litteris scilicet erant, ut in suo studio, ne cum vacare quidem videretur, cessaret. Idque ipsum, nihil agens, ageret tamen, vigeretque propositum, & tamen animum a contentione relaxaret. Illud etiam narrari nobis ab eo ipso meminimus, cum diceret numquam se in omni adolescentia commisisse, ut mane aliquid postridie aggrediretur ediscere, quin prius ea quæ pridie percepisset, diligentissime reminiscendo recordatus esset: vitandam enim a fortiorum consuetudinem aiebat, qui crudi sese tamen ingurgitant, quoque magis cibo replentur, oneranturque, minus virium, minus valetudinis habent. in eo igitur cursu, cum sedulitate magis quam contentione aut labore admirabiles progressus efficeret: atque eos, qui in eodem cûrículo erant, longo intervallo antecederet, mortem Aloisius pater obiit. Duo de viginti ille annos natus erat eo tempore.

re. liberorum autem, magnum sane numerum, filios septem, quattuor filias, præterea magna cum multis contra-  
cta implicitaque negotia, Aloisius reliquerat. Atque o-  
diosum omnino negotium est homini in cogitationis ac  
doctrinæ studijs occupato, familiaris rei procuratio;  
ut minus mihi mirum videri soleat, Democritum, nobi-  
lem quondam philosophum, ut ea cura, eoque impedi-  
mento liberaretur, omnes fortunas suas, sicuti litteris  
proditum est, abiecit. Verumtamen quamquam in  
uitus ac mærenis discedebat a litteris, tamen Patauio pro-  
fectus est: atque eandem illam animi moderationem æ-  
quabilitatemque adhibens, fratribus partim in Apuliam,  
partim in Alexandriam (ibi enim magnas societates Alo-  
isius pater habuerat) distributis, partim Venetijs relictis;  
bericæ domi constitutis rebus Patauium reuersus est: stu-  
diumque haudquaquam longo interuallo a se intermis-  
sum, cupide renouauit. in ea vrbe doctissimorum homi-  
num plena, ac liberalibus artibus affluenti, aliquot an-  
nos commoratus est: cum in principibus iam philoso-  
phis numeraretur, atque eius nomen plurimum in dies  
increbresceret. Atque hoc loco postulari exigique a no-  
bis arbitrati sumus, ut, qui eius progressus & quale tam-  
quam iter ad percipiendas fuerit disciplinas, demonstra-  
remus. A primis igitur dialecticæ elementis profectus  
sic omnem philosophiam perlustrauit, ut illius singulas  
tamquam oras non viseret modo atque inspiceret, quod  
plerique facimus, sed in vnaquaque etiam illius quasi re-  
gione commoraretur & habitaret. itaque illud affecutus  
est, nihil in ea ut arte, ita copiosa & magna atque varia,  
tam esset magnum atque arduum, aut tam minutum at-  
que paruum, quod eius aut diligentiam lateret aut fuge-  
ret intelligentiam: nihil autem tam abstrusum aut recon-  
ditum, quin promptum illi expositumque quamuis su-  
bito esset atque ex tempore. Eius nos rei per magnum  
quondam specimen cepimus: nam cum Florentiæ forte es-  
semus, qua ille Roma profectus, iter in Germaniam habe-  
bat



bat ad Cæsarem erant in ea vrbe, cum alij complures in ea philosophia, quæ de natura est, docti atque exercitati; tum duo præter ceteros PETRVS Victorius & FRANCISCVS Medices, quorum erat vtriusque & natura admirabilis & exquisita doctrina; tum studium ardens in vtroque ac peracre vigeat, flagransque & singularis in vtroque industria: sed alterius breue tempus doctrinæ augendæ & declarandæ fuit; Victorius qualis vir, quantusq; iam tum esset, ea, quæ nunc est eius doctrina, libri que ab eo editi declarant: ij per eos dies ad Contarenum sane ventitabant, a quo nos quoque non fere discedebamus: hoc affirmare possum, cum omnis inter eos sermo esset de physicis, nullius rei mentionem esse factam a summis illis viris, ingenio præstantibus, animo vacuo, otio abundantibus, studio incensis, tempore paratis, a bibliotheca & litteris recentibus, quin eam Contarenus, & memoria teneret, & intelligentia comprehensam haberet, & oratione tam facile explicaret, quam quæ facillima sunt. Præstabat id non tam credo memoria, qua tamen valebat; vt antea dictum est (natura enim quoque plurimum ille excellenti fuit) quam ipsa, via ac ratione percepta, doctrina: sic enim eum ipsum dicere solitum esse accepimus. Non modo certam artium multarum inter se quandam naturalem esse dispositionem, vt aliam alia suo quæque loco deinceps tamquam subsequatur, & cum priori posterior quasi coagmentetur: sed vnius quoque eiusdemque cuiusvis scientiæ si quis ordinem & tamquam seriem conturbauerit atque resciderit, ad exitum perueniri non posse: magnoque in errore versatos, superioris etatis homines aiebat esse, qui multa properantes transilirent; aut vllam artem ediscere se posse dissipatam arbitrarentur, aut mutilam atque hiantem: amputatis enim interfecisq; disciplinis progredi perueniri que ad scientiam non magis posse, quam interruptis iter pontibus confici. Vnum autem omnino sibi comitem ac monitorem ad Aristotelis iter, multis sæpe obstructum difficultatibus, Thomam

Aquina-

Aquinatem asciuerat, hominem non contentionis, sed veritatis amantem. qui & subtilitatem habeat, nec ultra, quam par est, progrediatur acumine; atque idem articulum partiteq; ac distribute doceat; doctus etiam Græcis Latinisq; litteris erat. Poetas Homerum, Virgilium, Lucretium, Horatium lectitauerat atq; didicerat. Itaq; cum non artis facitandæ, sed eruditionis liberalisq; doctrinæ fruendæ causa, philosophiæ se dedidisset, omnes tamen artifices, magistrosque omnes, non scientia modo, sed fama quoque & celebritate facile superabat. Erat hominis vita atque victus non tam excultus atque expolitus, quam cum grauitate quadam simplex ac lenis placatusque; oratio inculta illa quidem atq; inornata, sed hoc ipso, quod omni careret fuco elegans ac cum auctoritate. nulla mollities, nullæ, ne in adolescentia quidem, animi aut corporis deliciæ; sermo nulla assentatione suffusus; nulla animus maleuolentia infuscatus. Et cum festiuitas leposque haud magnopere adesset, aberat etiam rusticitas atque tristitia. Quin etiam hoc ab eo dici memini; de uorare sese certorum hominum (qui in aliqua vitæ parte claudicarent) incommoda aut etiam vitia solere, simulac de bonis, quibus illi excellerent, aliquid degustasset. Ac cum Galeatius Florimontius, qui nunc Sueflæ episcopus est; vir cum omnibus honestis artibus perpolitus, tum præcipue castus atque integer, tum religione ac pietate in primis incensus; in notandis autem reprehendendisque amicorum vitijs vnus omnium maxime acer ac liber: castigatorem nonnumquam etiam subamarior, atque is a Contareno in fratris locum diligebatur. Cum ille igitur nobis audientibus nequire se satis mirari diceret, illum, qui omnium esset mundissimus ac sanissimus, cum hominibus quibusdam, quos ipse appellabat, id, quod nobis minime necesse est, qui turpitudine aliqua, tamquam morbo, adfecti atque inquinati haberentur, tam sæpe conflitari. Quæ ille cum sanè commotus ac stomachans diceret. Quid nos, inquit Contarenius, numquam ne ab-

sinthio

linthio aut scamoneę radice curari nos patimur? Quid  
 ni? inquit ille. Ergo inquit Contarenius earum potio-  
 num exforbemus sapores tæterrimos, vt fucó epoto, illi-  
 us iuuemur vi salutari, horum vitia, si qua sunt, non de-  
 uorabimus, & tamq̃ amaritiem perferemus atq; exor-  
 bebimus, vt illorum tamquam vescamur virtute, atque  
 alamur bonis? quid autem ipsis nobis fiet, si amandum  
 statuerimus, nisi qui perfectus absolutusque fuerit, esse  
 neminem: laudare se, quod in quoque probaret, liben-  
 ter aiebat, quod reprehenderet, vituperare non se neces-  
 se habere. Hanc animi æquitatem, hanc tam præclaram  
 maximarum artium doctrinam, alia longe ijs maiora bo-  
 na decorabant. Summa integritas, summa innocentia,  
 pietas, non hæc quę facie, motu, amictu commendatur,  
 quam in multis cernimus, simulata, & specie, atque ora-  
 tione hominum opinionem captans, sed solida, nuda, sin-  
 ceraque, in mente atque in animo inerat, quibus ille re-  
 bus instructus, cum magnum eius esset nomen, magna-  
 que non solum laus, sed etiam admiratio, aliquanto citi-  
 us quam constituerat Patauio decessit. Nam cum omnis  
 prope dixerim terrarum orbis eo tempore contra Vene-  
 tos conspirasset, tæterrimumque ei ciuitati bellum intul-  
 lisset afflictis Venetorū opibus, Patauio ipso obseſſo, nec  
 multo post amisso, maturius omnino, quam in animo ha-  
 bebat, inuitus, non dum discendi siti scilicet expleta, do-  
 mum se se recipere coactus est. Erat eius ætas non dum  
 firmata, vt rei publicę operam nauare posset: itaque in ijs  
 sese studijs aliquot annos continuit, cum eius domus tam  
 quam bonarum artium gymnasium quoddam ab ijs, qui  
 doctrinæ desiderio tenebantur, frequentaretur. Verum  
 tamen ad rem publicam vbi primum accessit, eius inge-  
 nium, quod de Hortensio est memoriæ proditum, tam-  
 quam Phidiæ signum, simul aspectum ac probatum est,  
 itaque cum tres & triginta tum haberet annos, a ciuitate  
 ad Cæsarem Carolum hunc V. in Germaniam orator  
 (sic enim Veneti appellant) est missus. Legationis mu-  
 nus

nus magnam apud Venetos habet dignitatem, magnam ad summos honores magistratusque adipiscendos commendationem; sepeque a multis vna petitur, & in comitio suffragijs oratores magna ambitione creantur.

Gerebat illis temporibus in Italia bellum Cæsar cum rege Galliarum, cum quo illi antea quoque continentia bella intercesserant, atque cum eo Pont. Max. Leo X. se se coniunxerat: cum rege Veneti conspirauerant, atque omnino impetus belli ad mediolanum confederat; nam eam urbem Gallis Venetisque defendentibus, Cæsaris ac Leonis copiarum oppugnabant. Ad eum, qui cum bellum suæ erat ciuitati, planeque ad hostem ire se Contarenius intelligebat, apud quem exploratoris, non legati locum obtinere eum necesse esset, atque ipsa res cogeret. Accedebat etiam quod Cæsarem quibuscum inimicitias exercebat, ijs solere esse amariorem audierat: illisque maxime, qui Gallorum fauerent rebus. Itaque animo sane commoto ad Cæsarem adijisse dicitur, nam & sponte ipse sua verecundus, ingenio quodam, quod tamen sine segnitia esset, pudore fuit. Verum eadem illa doctrina, castitatis, ingenuitatis, innocentie opinio, multo ante eius aduentum ad externas quoque nationes perlata, Cæsaris illi animum voluntatemque conciliauerat; nam amare ille plurimum ingeniosos apertosque hominum animos dicitur. Itaque ut semel in primo illo, qui ei cum Cæsare fuit, congressu, hilari vultu acceptus & comiter appellatus est, faciles ad eum deinde semper aditus habuit: & illo, quamquam ciuitati erat iratus, non modo pacato, sed etiam propicio usus est. Ac paulatim cum eam, quæ antea de se fuerat, opinionem magis ac magis in dies confirmaret atque augeret, iam ipsi Cæsari non modo gratus, sed etiam familiaris erat.

Itaque cum certior factus esset, Gallorum Venetorumque copias in Insubribus suas superatasque, Gallos ex oppido esse expulsos eade & fuga suorum, qui eam rem nuntiarent Contareno misisse dicitur, atque ijs præcepisse, ut de incommodo, quod Veneti acceperant, retice-

rent, neque illorum copias in eo prælio dicerent inter-  
fuisse: eam in illo sese corporis imbecillitatem aspicere, vt  
excruciari eum illam noctem suæ tanta illa patriæ clade  
nuntiata nolit. In Hispaniam Cæsar constituerat reuer-  
ti, neque per Gallorum fines, qua proximum erat iter,  
quod exercitum non habebat, ire poterat. itaq; per Bel-  
gas profectus ad oceanum perrexit, atq; ibi nauibus con-  
scensis in Britanniam appulit, paucisque intermissis die-  
bus rursus naues soluit atque in Hispaniam contendit.  
toto hoc itinere eum Contarenus prosequutus est, cum-  
que in Hispaniam peruenissent, biennium apud eum est  
commoratus, atque in ea legatione omnino quinquen-  
nio consumpto Venetias redijt. Cum illud re confir-  
masset, quod a Græcis quibusdam poetis mandatum ver-  
sibus video: Magnam gratiosi nuntij esse vtilitatem.  
Nam cum omne id temporis spatium inimico inter se a-  
nimo Cæsar & Veneti essent, ac fere continenter bello in-  
ter se contenderent: multa ille tamen ob eam, qua suo no-  
mine erat apud Cæsarem, gratiam, obtinuit: multa suæ  
ciuitatis mandata confecit: magno quoque vsui reipubli-  
cæ fuit: simulque illud est assequutus, vt multarum ma-  
gnarumque rerum diuturna tractatione ac consuetudi-  
ne; tot nationum naturis, moribus, institutis cognitis at-  
que perceptis, magnum rerum agendarum vsum, ma-  
gnamque haberet prudentiam. Itaq; cum diligentiam,  
operam, curam, prudentiamque suam ciuitati mirifice  
probasset; absens & in senatum lectus est: qui honos Ve-  
netorum legibus non fere diuturnior anno & mensibus  
quattuor est: & quod olim, exiguis etiam tunc ciuitatis  
rebus, precibus rogandi erant, qui domesticis suis relictis  
negotijs, ad consilium de publicis capiendum conueni-  
rent, Rogatorum concilium appellatur: eiusque perma-  
gna & potestas est & dignitas; quippe cui omnis respu-  
blica permessa sit, vicissimque in hac ciuitatis amplitudi-  
ne ac dignitate a clarissimis quibusque ciuib; summis o-  
pibus, summa contentione expetitur. Magnæ præterea  
aucto-

auctoritatis est in ea ciuitate magistratus, cui ab eo nomen inditum est, quod præcipua, magna atq; ampla procuratio demandata illi est, ærarij ac vectigalium, quæ in continenti, Veneti magna atq; ampla habent; nam eum magistratum illi Sapientes terræ firmæ appellant. hanc quoque potestatem Contarenus statim renuntiata legatione, maxima totius ciuitatis voluntate, omnibus suffragijs adeptus est. Habuit de ea ipsa legatione, more maiorum, orationem in senatu vberem ac plenam, cum de Cæsaris ingenio, voluntate, institutis, opibus, copijsq; disfereret; earumque nationum, ad quas adijisset, mores, leges, facultates, consilia exponeret: quæ cum ab eo distinctius scilicet atque eruditius dicerentur, quam Veneratorum hominum aures audire ad eam diem consueffent; tanta diligentia, tantoque silentio atque attentione audiebatur, vt vocis bonitas, quæ ille sane exili fuit, non magno opere desideraretur. Non sum vulgi opinionis, iudicijque nescius: arbitrantur enim philosophiam, hominum, vitæque huius communis quasi corruptelam esse quandam: atq; eos, qui in studijs cogitationis ac doctrinæ, paulo vltius progrediente ætate versati sint, homines in solitudine atque in angulis educatos, curiæ lucem aspicere, aut in huius ciuilis turbæ, ac fori strepitu & concursatione, & in rerum agendarum tumultu, & tam quam acie, sine magna animi titubatione negant ausuros esse consistere, hominum consuetudinis imperitos, legum, morum, sermonum, voluntatumque ignaros, atque a communi vita et hominum sensibus, victuque longe multumque abhorrentes: sic vulgo existimant. Sed falluntur sane, multoque id aliter euenit. Nam, qui, tamquam inermes, ad prælium & pugnam; sic nullis aut leuibus doctrinæ præceptis, quasi armis, instructi ad rem publicam accedunt, ij artem, quam facere intendunt, vnam quidem omnium maximam ac difficillimam, reipublicæ patriæque periculo discere coguntur; atque vt in vetere Græcorum prouerbio est, dolio faciendò figlinam

aggrediuntur percipere: idque ipsum de malis auctori-  
bus, magistrisque sane inscijs atque improbis, vulgo & fo-  
ro. Quamquam nobilitari homines ijdem Græci in foro  
aiunt, qui si hoc sentiant, virtutem, vt maiore in luce  
posita locataque sit, ita magis magisque splendescere atq;  
illustrari, ipsi sane videant, vbi nam eam potissimum in  
bono lumine collocent: sin illud præcipiunt, a populo,  
bene viuendi rationem, tuendarumque ciuitatum disci-  
plinam peti oportere, aut in foro cum reliquis mercibus  
expositam, virtutem venire, nã ego, mihi locum modo  
demonstrari, magno emere possum. Sed non est ita.

Nam sponte quidem sua, aut prudentiam hominum ani-  
mus atque ingenia non magnopere gignunt; aut huius  
nobis ætatis, tamquam sterilitas quædam vehemenrer la-  
mentanda est. quibus autem opinionibus imbutæ eo-  
rum mentes, & tamquam consitæ, ad rem p. e populi di-  
sciplina, & quasi cultura prodire soleant operæpretium  
est attendere. Nam ij, qui animum philosophiæ præce-  
ptis excoluerunt, regendarumque ciuitatum artem edi-  
dicerunt; neq; timidi sunt, quod scientia earum rerum,  
quas quisque tractet, animum addere, non adimere so-  
let; neque audaces ac temerarij, quod stultitia ac temeri-  
tas plurimum ab arte ac sapientia dissident. Reipublicæ  
vero gubernator ille de populo, nec ignauiam a verecun-  
dia segregare, neque præcipitem aut pertinacem ciuem  
seiuungere a forti atque constanti magnopere nouit, nisi  
vsu demum atque experientia doctus, cum sæpe lapsus,  
sæpe deceptus multa in rep. offenderit, & ciuitatis pericu-  
lo ac detrimento (vt antea a me dictum est) prudentiam  
didicerit. Philosophia autem, quæ vel maxime in effin-  
gendis, atque ad virtutem conformandis, hominum sen-  
sibus atque motibus occupata sit, &, vt vt illi morati tan-  
dem sint, quemadmodum cum ijs conflictari non incom-  
mode queamus, vias rationesque tradat, neque ab homi-  
num abhorret moribus, &, qui sit optimus rei publicæ sta-  
tus, intelligit, & quibus artibus, inclinata ruentesque ci-  
uitatis



uitates subleuentur, tenet; & ad eas, quę non optimis institutis ac legibus temperatę sint, accommodari se se tamen non reculat: remediaque temporum, locorum, casuumque incommodis adhibet salutaria. eadem multa de hominum vitijs, quęque eorum cautiones sint precipit. eadem qui, cuique arti, cuique fortunę, cuique animi aut corporis affectioni, mores sensusq; comitari soleant, comonet. Ad eam doctrinam tam fructuosam, tamque optimam vbi vsus quoque atque exercitatio accessit, tum vero pręclari illi ac singulares ciues existunt: qualis vel in primis Contarenius sua in republica fuit: qui cum ingenuarum artium in gremio educatus & tamquam philosophię alumnus quidam, ad agendum descendisset, maximo que sibi vsui ea pręcepta, quę olim imbiberat, esse intelligeret, suos ciues hortari non desistebat, vt ea peruestigarent, quę de naturis humani generis, deque rerum publicarum gubernationibus a philosophis explicantur. Nec vero occultabat hoc ipse de se; nam a principio, cum primum in senatum lectus fuit, sæpe factum esse aiebat, vt in suggestum ascendere, sententię dicendę causa, cum cuperet, ausus non sit; quod pudore quodam & rei insolentia retraheretur: eamq; rem magno sibi dolori esse solitam; itaq; in animo habuisse, nisi eum animi timorem ac verecundiam peruinceret, ad rempublicam posthac non accedere, suumque locum alijs concessurum, quibus ad dicendum animus non deesset: nec enim verum esse, fortibus ac strenuis ciuibus ab ignauis timidisque locum præripi: verum nihil necesse fuit, talis ciuis prudentia ac consilio remp. priuari. Nam paucis mensibus, cum se se animo facile confirmasset, sic sententiam dicebat, vt neminem magis prudenter, magisve compositę loquutum vmquam fuisse constaret. Docebat ille quidem verbis, quam maxime poterat, proprijs, cum partite ac distincte, tum memoriter ac copiose: animos autem cum oratione minime conaretur impellere, auctoritate ipsa vehementer permouebat & fide, lingua celeri ac volubili le-

porem atque ornatum illum oratorium neque adhibebat, neque adhiberi æquum esse censebat: animos enim ciuium inflecti atque incitari, quo maxime tempore sedatos rectosque eos esse oporteret, cum consilium capturi de rep. essent, turpe atque inutile esse existimabat: eosque, qui magno quodam conatu orationis vim ad sensus atque impetus animorum & motus commouendos admouerent; si id suæ priuatæ utilitatis causa susciperent, improbe; si recip. causa, arroganter sine controuersia facere aiebat; quod tantum sibi sumant, vt non communi temp. consilio regi velint, sed suo; quamque ipsi probarent sententiam, in eam ceteros ciues non adducere, sed compellere studerent. Eodem tempore Contarenus Brixie præfectus renuntiatus est. cum magistratum capitaneum Veneti appellant: quo cum proficisci cogitaret: iamque impedimenta imposita in lintrem haberet, repente horribilis nuntius adfertur, Romam à Cæsaris militibus captam; Pontificem Max. in arcem compulsum, urbem ipsam diripi ac vastari. quibus rebus Venetias nuntiatis, magnus subito cum dolor, tum etiam terror inuasit. Itaque mutato consilio Contarenus, cum vereretur alijs armis Brixiam egere, quam, quibus se se ipse assuefecerat, consilio atque auctoritate, cum magistratum recusauit. atque interim otium a rep. nactus, studijs scilicet suis illis pristinis obsequebatur. Bellum, cum grauis hæc plaga accepta est, cum Cæsare Veneti, ac Clemens VII. Pont. Max. communiter gerebant; sed totius imperij summa tradita erat Franciscomariæ Vrbinatium principi, quem illi ducem appellant; cum Veneti suarum copiarum seorsum ducem habebant; nam ciuem terrestres copias ducere, per leges non licet: ac cum deditione facta, Clemens iam complures menses in custodia à Cæsaris militibus asseruaretur, cumque urbis depopulandæ, vastandæ, incendendæ, modum homines feri, ac barbari sibi statuerent nullum; cui rei Cæsarem, quod longe abesset gentium, cum maxime cuperet, negant potuisse occurrere: com-

moti

moti rei indignitate atq; acerbitate Christianorum principes plerique omnes inter se de Pont. Max. e custodia educendo conspirauerunt. eius rei causa concilium Ferraria indictum est, quod Alphonsum Estensem, qui eius urbis imperium, a maioribus acceptum, eo tempore obtinebat, maximi animi hominem, rei que militaris peritissimum, adiungi sibi vehementer studebant: a quo cum propter consilium ac virtutem, tum propter oppidi opportunitatem, opes, bellicque instrumenta, quibus ille abundaret, earumque rerum omnium facultates, quæ ad bellum vsui erant, multa, magna que auxilia subministrari sibi ad id bellum intelligebant posse. Eo Gallie Britannique reges Legatos miserunt cum mandatis homines nobilissimos; idem & ij, quibus Pontificis Max. salus priuatim curæ erat, fecerunt, & Mediolanensis dux Franciscus Sfortia. Eodem Veneti Contarenum mittunt: maxime enim eorum reipublicæ intererat eam conficirem, propterea quod cum Pontifice, quemadmodum dictum a me est, societate & sedere coniuncti, continentibus bellis, non longe ab suis finibus, cum Cæsare contenderent. Eo concilio peracto, atq; haud ita multo post pontifice liberato, ad eum Côtarenus, suæ ciuitatis iussu legatus profectus est. Magna erat eo tempore omnium rerum perturbatio, magni Gallie, Italiaeque totius videbantur motus impendere. quod & Clemens ipse iniquissimo animo contumeliam, quam acceperat, ferre existimabatur, quod per pacis simulationem circumuentus in hostium potestatem venisset, quod superbe crudeliterque tractatus, & in deditionem receptus tamdiu in custodia fuisset retentus, atque ad extremum quod non dimissus, sed elapsus e manibus & cathenis esset: quod omnia exempla cruciatuque in suos editi Romæ atque in omnibus vicis, & oppidis essent. Accedebat quod Florentini Hippolytum atque Alexandrum Pontificis fratrum filios, qui ipsius potentia in ea vrbe imperium antea obtinuiscent, e ciuitate eieccherant. quod ille grauissime atq; in

dignissime ferebat: eius dolor quam in partem erumperet, expectabatur ab omnibus. Eadem Gallie regis causa erat, atque condicio: nam & bello superatus captusque, tantum se de veteri virtutis opinione, deque bellica gloria deperdidisse, maximo erat illi dolori; & sui liberorumque suorum mercatu (vt ipse existimabat) nundinationeque illa Cæsaris, hostili scilicet in eum odio exarserat. Tum Veneti multis de causis Franciscum Sfortiam in regnum restitui volebant: atque eam rem ad suam remp. magnopere pertinere arbitrabantur. quibus omnibus rebus efficiebatur, vt, in tanta animorum incitatione & discordia renouari in Italia bellum necesse esse, omnibus videretur. Interim Clemens cum Cæsare in gratiam redierat, amicitiamque conciliauerat: &, quo liberius in patriam iracundiam exercere posset, iustissimas suas in Cæsarem minuerat inimicitias; & suas illi iniurias aut condonauerat, aut vicissim pacis simulatione, idoneum doloris sui vlciscendi tempus expectabat. Atque cum Cæsaris duces & exercitus, illius nomine Florentiam oppugnarent, faciendum sibi esse existimauit, vt propius ipse accederet: itaque Bononiam sese contulerat. Eo Cæsar quoque ex Hispania venit, vt a Pont. Max. cuius vnus ea potestas est, diadema ceteraque imperij insignia acciperet. atque ei aduenienti cum obuiam Contarenus extra urbem processisset, dicitur eum Cæsar per quam longo sane intervallo a se visum agnouisse, atque ijs oculis, eaque vultus hilaritate eum aspexisse, vt id a multitudine, quæ visendi causa prodierat, & omnes vias oppleuerat, animaduerneretur; atque ex ea re coniectura fieret, rem inter Cæsarem & Venetos conuenturam: id quod exitus comprobauit. Nam præter omnium opinionem, in tanta animorum incitatione & discordia, tot vltro citroque illatis acceptisque iniurijs ac detrimentis, cum pacificatio ni locus vix vllus videretur esse relictus, recessum tamen ab armis est, paxque inter omnes constituta. Quæ res per

per Contarenum acta magna ex parte & confecta, cum suæ ciuitati gratissima atque optatissima accidisset, mirifice eius & gloriam & auctoritatem auxit, vt nullam rem tantam, aut tam difficilem esse censerent, quin eam ille animo & cogitatione suscipere, & consilio tueri, & auctoritate atq; industria conficere posset. Memoria teneo me Romam illis temporibus venisse; tantus erat omnium, qui in ea vrbe tunc aderant, de Contareni doctrina, prudentia, continentia, pietate, consensus, tantaq; admiratio, vt non amarent modo eum, qui tunc erant ciuitatis principes, sed etiam vererentur & colerent. Atq; omnino multa præclare legibus sancita sunt apud Venetos, in his, quod vetantur legati ab his, ad quos missi sunt, vlla aut munera, aut beneficiâ accipere; quod vtinam aliæ quædam ciuitates aut reperissent, aut repertum a Venetis, imitari saltem vellent; ne suos ciues (id quod vsu fere euenit) plerosque toris venales, domi hostes haberent. quam diu enim absunt neglecta, quam susceperunt, rei publicæ cura, a quibus locupletari se sperant, eorum gratiam aucupantur, atque ijs se se venditant: iidem domum reuersi, beneficijs ac muneribus alligati, atque deuincti, quam patriæ caritatem debent, eam alienis, sepe etiam hostibus, præstare ac persolvere coguntur. ita dum alij aliorum aut regum aut nationum rem gerunt, deserta nimirum a ciuibus publica res eorum iam pridem labat & corruiat. At Contarenum eæ ciuitates, apud quas magna cura, summaque fide ac diligentia rem suam publicam gessit, præclarissimis muneribus donauerunt: tot enim tamque variarum gentium constantissimo consensu mirifice probatum, summoque laudatum opere, maxima dignitate, estimatione, gloria muneratum, ditatumque domum dimiserunt. Seuerissimis legibus Venetijs ambitus constitutus est; suffragium ne per se, neve per alium quemquam rogent interdictum est. itaque cum a ciuitate ipsa vniuersa, non a singularibus ciuibus nominatim, petendi magistratus sint: idque sæpe (iidem enim eosdem magistratus,

certis intermissis temporibus, crebro gerunt) vna virtute  
 nixam omnium ciuium ambitionem esse oportet: vt qui  
 sæpissime amplissimas dignitates adepti sint, ij nõ amico  
 rum aut propinquorum diligentij, aut tenuiorum homi  
 num officij, aut etiam fortasse avaritiæ, sed ipsius resp. cer  
 tissimum de se testimonium habeant: nam multis lo  
 cis reprehendendi erroris sui ciuitati facultas datur: itaq;  
 sæpe vsu venit, vt, qui semel primo aliquem honorem  
 cunctis suffragijs affecuti sint; iidem, iterum petentes, re  
 pulsam ferant. Quo maior eorum ciuium splendor est,  
 qui omnium dignitatum cursum & tamquam spatia &  
 circuitum iterum & sæpius sine vlla offensione consece  
 rint. ij clarissimi apud ciuitatem sunt: ijs honos ab omni  
 bus ætatibus, omnibusque ordinibus habetur. ij, cum o  
 pibus & potentia ne infimos quidem ciues antecedant,  
 dignitate, existimatione, auctoritate, gloria antefereun  
 tur omnibus: eadem est enim ciuium omnium parque  
 species, vna toga, eaque simplex; nullus omnino non mo  
 do comitatus, sed ne comes quidem; vt primi ciuitatis (si  
 quis illorum consuetudinis ignarus interuenerit) vni de  
 multis facile videri possint. Sed ij, quoquo venerint, sa  
 lutantur, appetuntur: ijs in vijs deceditur, obuiam itur:  
 in curia, in foro assurgitur: vt mihi virtus nudata phale  
 ris omnibus & aduenticijs ornamentis exuta, in vna ea ci  
 uitate sua ipsa pulchritudine & lumine nitere ac splende  
 scere semper sit visa. Proflus visendæ Venetiæ sunt, non  
 propter vrbis modo eximiam pulchritudinem, nouita  
 temq; antea inauditam. etenim maximã formosissimam  
 quæ vrbein, in medijs excitatam ætibus sese e fluctibus e  
 rigere, quis non miretur? naues onerarias maximas, pas  
 sim ad priuatorum ianuam religatas, triremes in plateis  
 nauigantes, quis sine magna admiratione ac voluptate as  
 pexerit? Mihi quidem sic videtur, hanc profecto vrbein,  
 si conspicata modo esset antiquitas, Neptunum nimi  
 rum aliquem ex profundo ac latebris excitasset, atque  
 cum celsissima illa tecta struentem ac fabricantem secis  
 set:

set: qui tamen si nullus scilicet vniquam fuit, tamen si sit, aut esse si possit aliquis, nullum illi attribui munus aut opus illa vrbe præclarius posset: aut quod magis diuinæ conueniret naturæ. Sed hæc oculorum, illa animi ex eius vrbis cognitione voluptas capitur, vt equidem sentio, vel maxima, quod unæ dominantur apud eos leges: ijs & magistratus obtemperant, & ciues eque ad vnum omnes: atque eo vsque mihi potentiam execrata prudentissima ciuitas videtur, vt neminem vnum vlli magistratui præesse passa sit. terni, quini, seni, deni imperia, potestates, singulos magistratus gerunt. vt non solum domini os, quo nulla tætrior, nulla oculis detestabilior obijei species potest, aspiciendum ciuibus non sit; sed ne domini quidem imago & similitudo, aut effigies. Quamobrem spectatum exteræ nationes alacri animo Venetias eant; nec vrbis modo causa, quod dicere institueram, sed vel maxime ciuitatis; pulcherrimo totius orbis terrarum spectaculo sese ad eam diem caruisse profecto intelligent. Postquam Roma Contarenius redijt, confestim ad summos honorum gradus sine vlla dubitatione vel controuersia elatus est. nam & maturius, quam ciuitatis consuetudo antea tulisset, Sapiens magnus factus est, & Cõsiliarius. qui duo magistratus summi apud Venetos sunt. neque dubium erat quin, si quis ex diui Marci Procuratorum collegio demortuus esset, eius Contarenius in locum substitueretur. ea vna procuratio perpetua Venetorum legibus est; id vnum ad honorum perfuctionem Contareno a fuit. Itaque sic in republica versabatur, vt etiam si litteras omnino non didicisset, illustrissimum tamen ciuitatis locum obtinere eum necesse esset. sic autem doctrinæ gloria celebrabatur, vt, tametsi rempublicam attigisset nõquam, ciuium omnium, qui fama ac nomine excellunt, clarissimus suo tamen nomine fuisset futurus. Accedebat Christianæ theologiæ singularis quædam atque exquisita cognitio: eaque non scientiæ modo aut ostentationis disceptationisve, sed vitæ ac disciplinæ



causa comparata : ad eius enim præcepta animum mentemque referens, omnes suas cogitationes, consilia, actiones, vitam denique omnem conformauerat atque direxerat : vt non modo ad philosophorum regulas bene beateque, sed etiam ad Christianorum diuinum hoc præscriptum pie sancteque viueret. Est Venetijs quidam, quasi Romanorum, qui quondam fuit, campus ille atque comitium, quod magnum ab illis concilium nominatur. ad id concilium omnes, quibus ferre suffragium per ætatem licet, statutis diebus conueniunt. ibi cum Contarenus forte esset consiliarius, custosque positus sortibus, quibus Veneti in petendis magistratibus vtuntur; nam quorum fors exijt, ij pronuntiant quem potissimum sua sententia ei magistratui, cuius comitia habentur, gerendo idoneum esse existiment : itaque mirifico casu accidit, vt ibi cum esset, in vniuersæ ciuitatis conspectu atque oculis, publice Roma allatæ litteræ sint, in quibus res omnibus noua, omnibus inopinata : illi quidem certe ipsi prorsus incredibilis, scripta esset, cooptatum Contarenum a Paulo Pont. Max. in Cardinalium collegium esse. Legerunt eas inter se litteras primum eius collegæ, a quibus satis magno interposito ille interuallo, ad fortium vrnas, vt dixi, absidebat. Itaque excepta inter legendum vox ab ijs, qui proximi confederant, susurro primum & rumore dubio, bonam euenire, felicem, faustamque eam illi dignitatem precante, ad aures Contareni profluit. ille vero respuere, nec adduci posse vt eam sibi rem narrari saltem pateretur : atque omnino ne aures quidem ad audiendum præbere. Verum recitatis palam litteris magna vniuersæ frequentiæ approbatione ac lætitia, inter se colloqui consurrexerunt collegæ, atque ad eum cum magna, cum lætitiâ, tum etiam obseruantie significatione adierunt. quod ille cum vehementer commotus recusaret, ac se se id ætatis ad aliud vitæ genus negaret posse traduci, ad curiæ vestibulum ab ijs, vniuerso eo concilio comitatus, deductus est. Cumque collegæ,

hominis

hominis honestandi studio, domum reducere eum summa contentione pergerent, prorsus non tulit. Erat eo tempore inter collegas Aloisius Mozanigus, grandior natu vir, qui apud ciuitatem gratissimus cum esset, princeps que consilij publici haberetur, sepe a Contareno de re publica dissenserat: is ad eum gratulatum cum alijs non adiit, credo quod pedibus erat admodum infirmis. hic clara voce, vt a cuncto exaudiretur senatu, rei nouitate percitus, adiurans, cum frontem feriret ac Paulo malediceret, adfirmasse dicitur maximam ab eo ciuitati iniuriam fieri, quod eam ciue priuaret, quem illa vnum omnium habuisset optimum. Consilio dimisso, id enim is conuentus nomen habet, vniuersa ciuitas domum ad Contarenum lecta atque alacris confluere coepit. ille vero suspenso animo incertusque etiam nunc quid ageret, minus multo erat, quam ceteri, hilaris; nec mehercule iniuria. quid enim honos ille homini in re sua familiari ampla atque illustri, in republica principi, in toto orbe terrarum claro atque nobili, afferebat, præter molestias ac labores? mutanda, vitæ victusque quinquagesimo demum anno ratio tota & consuetudo; suæ ciuitatis dediscendi mores, alienæ ediscendi, haud parum quidem ab ea, ad quam ille se se exercuerat, disciplina abhorrentes; viuendum ad vnius hominis non semper prudentissimi, pæne arbitrium atque nutum; comitatus magni alendi, sæpe diu eodem censu; aliæ cogitationes, consilia, instituta, officia, actiones, persona suscipienda prorsus alia. Sunt hæc homini, æquabilitatis ac dignitatis potius, quam potentiae atque opum cupido incommoda vehementer odiosa, grauius ac molesta, præsertim si quis antepartis honoribus tamquam ex saturatus, & parta iam gloria contentus est. Sæpe mihi narrauit vir omnium clarissimus atque grauissimus, quem Romæ his paucis annis a sua ciuitate legatum, summa apud duos Pontifices Max. auctoritate summaque gratia vidimus, Paulum & Iulium tertios (in vtriusque enim tempora eius legatio incidit) Mattheus Dandalus: se se, cum  
vehemen

vehementer auctor Contareno fuisset eius honoris accipiendi, qui non ab eo expetitus, sed ad eum delatus esset; magna contentione ratiocinandoque vix ægre ad extremum homini persuasisse, ne committeret, vt Pauli consilium, in quod non ille temere incurrisset, sed sine vlla dubitatione duce Deo deuenisset, aspernari videretur: præsertim his reip. Christianæ temporibus: multos enim fore, qui eam rem aliorum acciperent, atque ille faceret: quique in Romanam ecclesiam impietatis scelerisque ne farij Gasparem Contarenum, virum vnum omnium maxime pium, maximeque religiosum, subscriptorem habere gloriaturi, se seque in eo impudentissime iactaturi essent; quippe qui, cum a Pont. Max. ne beneficium quidem accipiendum sibi esse statueret, quid de causa illa tota iudicaret nemini dubium relinqueret. Hæc cum Dandalus diceret; adderetque, eos, qui Contareno acquisiti futuri essent; suspicatuos tamen esse non ob animi magnitudinem atq; æquabilitatem, tantam illum dignitatem a se remouisse, sed propter imbecillitatem atque ignauiam defugisse: peruenit homo grauis atq; eloquens, omni que necessitudinis genere cum eo ab adolescentia coniunctus, cum propter affinitatem, tum præcipue propter morum, voluntatum, studiorum similitudinem, vt dubitantem confirmaret: atque in suam sententiam diutulum cunctantem ac tergiuersantem perduceret: qui maximam partem eorum, quæ a me posita in hoc commentario sunt, nos docuit. Omnino verum id est, quod ait apud Euripidem Theseus, cum Herculem, quo tempore ille Athenas in exilium venit, multis honoribus ac beneficijs prosequeretur: sic enim ait. Laudem feremus omnium pulcherrimam vniuersa a Græcia, Fecisse cum memorabimur bonis bene: quod ille Græce optime, nos Latine vt potuimus. Verumtamen is est virtutis splendor, vt non modo ij, qui eius compotes sint, honore digni habeantur, sed etiam si qui honorem illis, qui adepti eam sint, habeant, honorati ipsi & clari ob eam rem eue-

dant.

dant. Id, quod Theseus de se sperabat, Paulus etiam assuetus est; nec enim dici potest quantum in Contareni dignitate amplificanda suam ipse gloriam propagarit. Quamquam fuit ille suo quoque nomine insignibus laudibus ornatus, virque egregie magnanimus & plane maximus. Ab hoc tempore aliud tamquam vitæ exordium & quasi origo, Contareno nascitur. Antiquiores habentur Venetum mores, propterea quod inquinari se externis consuetudinibus ea ciuitas passa non est. victu & cultu non modo a luxuria longe absunt, sed etiam de lautitia hac, quæ plerasque Italiæ ciuitates nuper inuasit, per multum circumscripserunt: quippe qui prisco more esse se principes, quam videri malunt. consuetudo autem eorum moderatioq; vitæ cotidiana discrepat illa quidem fortasse non nihil, sed ita, ut ad summam expolitionem desit forsitan aliquid; firmum autem quiddam ac solidum certe subsit, & leuitate atque ineptijs vacet. quod Romæ contra mihi visum est fieri: aptiores enim in conuietibus & congressionibus Romani homines sunt: sed accersito quodam interdum genere, minimeque vernaculo; vitæ autem cultus lautior est, atq; ut video nonnullos existimare, etiam delicatior. in principibus quidem luxus pæne regalis; magnus equorum, iumentorumq; numerus, multitudo familiarium; lauta, splendida, sumptuosa suppellex: ut dedisse mihi operam videantur non modo re magni ut essent atque clari, sed etiam specie ac pompa. Neque eo hoc dico, quod exterarum rerum, quæ ad dignitatem ac decorem pertinent, rationem non habendam esse existimem, aut quo mihi id arrogem, ut utriusque ciuitatis studia rectiora sint, dijudicare me posse profitear: sed illud affirmo, hanc quasi migrationem e sua in alienam, non illam quidem deterius, sed longe longeque aliter moratam ciuitatem Cõtareno, ingrauescente iam ætate, subitam ac repentinam necessario molestamuisse. Verumtamen ita vitæ victusque mutatio facta ab eo est, ut ingenium tamen, institutaque illa sua pristina re-

tine

tineret: nec vlllos spiritus, tanta facta accessione dignitatis atque fortune, sibi sumeret: sed probitas, affabilitas, & eadem, quæ in priuato fuerat, facilitas atque humanitas (quamquam inuidiosa illa, tantoque opere a multis ex petita purpura recens induta erat) integumentis inuoluta, & quasi personata elucebat tamen, & agnoscebatur ab omnibus. Nam cum intempestiui ipsi complures, molestique sæpe essent, propterea quod omnibus præsto ille semper erat, admonitus est a suis, non tam faciles eius ordinis ceteros se se præbere consueuisse, sed certam diei horam constitutam habere, antequam adiri ad se nõ paterentur: neque cuiq̃ sui potestatem facerent. Quibus ille respondit non se putare honorem illum sibi soli esse datum, sed eius partem amicos, partem inopes homines & egentes iure sibi optimo vindicare. ad quorum arbitrium viuendum sibi esse statueret, non ad suum: nec enim æquum esse amicorum clientumque negotijs, tempus, idoneum quod sit, a se præscribi, sed ab ijs ipsis, quid rerum suarum occasiones ac momenta exigant, statui oportere. Itaque vt quique ad eum veniebant, statim admittebantur, ac quibus operam suam semel esset pollicitus, fidem in eo religiosissime seruabat; vt sæpe tenuium aut miserorum hominum causa ad summos reges iterum & sæpius adire non dubitauerit: cum id præcipue Christiani esse officij contenderet, id maxime hominum genus auxilio iuuare, quod maxime opis & auxilii egeret. Quod iudicium ipsius etiam faciebat, vt reliquias Græcæ nationis, multis grauibisque malis conflictatas, foueret, ac; quibuscumque rebus posset, subleuaret. accedebat autem huic animi propensione erga illos, vt miseros & durissima seruitute oppressos, quod memor erat veterum beneficiorum, quæ vniuersi mortales ab erudita ea gente accepissent: inde namque & bonas artes, & cuncta ingenua studia profecta per omnes terras manasse affirmabat. Nam quin maiores eorum pietatem Christianam, cultumque hunc optimum nostræ vitæ strenue adiuuissent,

iuuissent, dubitari non posse dicebat. cum Basilus, Chrysostomus, Nazianzenus quasi signiferi huius sanctissimi doctorum hominum gregis fuissent, qui pectora nostra excoluerunt, ac scriptis laboribusque suis veros ritus, explosis inde falsis opinionibus, eo infuerunt. quare oportere nos, si grati esse velimus, lapides etiam stirpesque eius telluris amplexari, ne dum homines, cum quibus tot arctissimis vinculis coniuncti sumus, omni amore prosequi non debeamus, vigeat autem eo magis in animo ipsius hæc opinio, quia illos ipsos summos theologos, quos appellauimus, ut philosophos quoque eiusdem gentis, cotidie in manibus habebat. & eorum laboribus, vigilijs que se instructum esse recordabatur. Benigniores cum esse cum res non pateretur, quod proximum erat, fidem diligentissime præstabat, ut ad diem, quibus deberet, semper persolueret. quæ res a, potentioribus non paucis neglecta, efficere solet, ut multis in locis sit fides angustior. neque hoc tantum maioribus, in nominibus custodiebat: ad tempusque his, qui se grandiore pecunia iuuissent, respondere debet (quod tamen ut faceret egre & urgente tantum aliqua necessitate committebat) verum etiam aduersus tenues homines, quibus aliquid deberet, se talem præstabat. quæ culpa moribus eorum inhaerens, inquinat non parum eorum splendorem; miserosque illos creditores ad desperationem & laqueum aliquando adigit. Declarat quâ opere maculam hanc fugeret: quamque omni in re iustitiam coleret, vox edita aliquando ab ipso, quum sorte audisset dicentem suum iubere minutum quandam opificem cras redire: castigatum enim illum iussit pecuniam eam statim dissolvere: addiditque, si unde id faceret, non esset, sumeret ex abaco vas, ipsumque diuenderet: arbitrari enim se tenuem illum hominem magis mercede sua, quam se argento illo, mensæque ornatu egere. Eodemque pacto toto animo abhorrebat ab indignis graui & honesto viro quæstibus: non pauci enim ne desit ipsis pecunia in minime necessarijs sumptibus, & ut ina-



nem splendorem retinere possint, cogunt illam illiberatissima quavis ratione ac sordidissima. Quum igitur eo tempore, quo Bononiam legati nomine obtinebat, qui, pars illius muneris obeundi, illatarum iniuriarum causas audiebat, ita cum eo egisset (putabat enim Contarenum eiusdem animi esse, cuius plerumque sunt, qui negotijs illis implicantur.) Esuribimus profecto: nullum enim emolumentum parit imposita mihi cura: cuncta: que in ciuitate concordiae atque otij plena sunt: inquit ille: Voluptatem magnam mihi nuntias, cupioq; hunc statum rerum permanere, videreq; diem illum, quo ego, vt habeam sumptum vnde faciam, mulam etiam, qua vehor, cum omni ornatu proscribere cogar. Non putavi autem alienum esse has etiam ipsius voces memoriae mandare, quum praesertim huiusmodi breuia dicta, quia ab intimis sensibus proficiscuntur, subitoque prolata sunt, in singulis factis ac motibus animi, vt reliquis etiam casibus humanis, videantur in primis mores voluntatemque eorum, vnde erumpunt, indicare: eedemque voces multum valere non sine causa semper existimatae sint, ad homines informandos: illosq; etiam emendandos, qui contrarijs vitijs tenentur. quam causam fuisse puto, cur plures & docti & prudentes viri sedulo multas collegerint, & volumina etiam ex ipsis confecerint. Saepe multumq; ineunte adolescentia cum iracundia, quae paulo sibi consueuisset esse molestior, quasi luctatum, ad extremum prostratam illam & domitam aiebat oppresxisse: non modo enim turpe, sed etiam miserum sibi semper visum, ira incitatos a consilio atq; a nobismetipsis abscedere; quod de se Terentianus ille praedicaret, Prae iracundia Mene me non sum apud me; Bibulum autem illum, qui cum L. Libone fuit ad Oricum (quamq; hoc scribonio ab inimicissimo homine memoriae traditum est, & qui quacumque re potuit, existimationem eius semper violauit) sibi nullius pretij hominem videri fuisse, qui cum de compositione agendum esset cum Caesare, ad colloquium non  
pro



prodijt, ob eam rem, quod furenter consueuisset irasci; ne res maximæ spei, maximæq; vtilitatis eius iracundia impe direntur. Itaq; non modo stomachantem, sed ne commotum quidem visum illum a se vñq; esse, qui cum eo familiarissime vixerunt, affirmant. vt nimium prope patiens ac lentus existimaretur: neq; ijs, qui in epulis, in cubiculo ipsi ministrarent, sæpe cessantibus, sæpe etiam peccantibus, non modo non conuicium faceret, sed ne verbo quidem malediceret. Quod igitur de non nullis doctis viris memoriæ præditum est; vt Socrate, Stilpone Megareo; quum illi natura propensi essent ad aliquod vitium, effecisse tantum eos studio ac diligentia sua, vt nullum vñquam in vita ipsorum vestigium rerum illarum appareret, id vè de hoc nostro prædicari potest: in illisque sine dubio Contarenius enumerari debet, qui vitiosam naturam compresserint: ac quidquid illic aliquod maius malum, si creuisset, ferre potuisset, tenerum adhuc & imbecillum fregerint, & omnes eius fibras extirparint. Superbiorem ipsum (de quo etiam supra non nihil significatum est) copia bonorum, quæ aut a fortuna acceperat, aut ipse suo labore industriaque quæsiuerat, non fecerat: in quod vitium passim multi, minoribus multo ornamentis decorati, ruunt. & sane hanc culpam ille, vt scopulum aliquem, magnopere vitabat. quod si vñq; in sermone aliquo aliquid a se sorte prolatum intelligeret, quod tenuem modo vmbra illius mali retineret, valde dolebat, vt contigit quodam tempore. Cum enim Paulus III. loqueretur cum ipso de augendo numero summorum antistitum, ostendissetque se in animo habere quosdam in eum ordinem cooptare, Contareno minime probatos (quod ille etiam præ se ferebat, atque id tunc palam dicebat) videns ipsum suæ voluntati refragari Pontifex Max. inquit, ijs ipsis verbis. Insitum fuit semper Cardinalibus, vt nouis repugnarent, ne sibi alij dignitate exequerentur, respondit igitur ille commotior quam solebat. Noli sanctissime pater ita de me existimare: cognitum. n.

tibi plane est, quot ego nominarim, idoneam prorsus materiam huic operi efficiendo: & vnde fingi possint personæ tantæ dignitati sustinendæ aptæ. nam quod ad me attinet, non puto purpurâ hanc maximum esse eorum, quos in vita assecutus sum, honorum. Extrema hæc verba illa occasione edita, statim ut domum redijt, doluit sibi excidisse. ut qui noluisset specimen aliquod a se vmq̃ datum, aut superbi hominis, aut inanis huius honoris & gloriæ cupidi. Quin etiam dicētabat amplissima sacerdotia plus in se oneris, quam splendoris habere: quoque maiora illa forent, eo molestiæ plus sollicitudinisque continere. quare se sæpe vicem dolere solitum eorum, qui Pontifices Maximi creati forent. quia pondus Aetnæ grauius humeris suis sustinerent. cuius iudicij Seleucus quoque rex quondam fuit: ille namque dixit; quæ vox eius monimentis litterarum mandata est a doctis viris, ut errorem eorum coarguerent, qui falso putant, opulētissimos quoque homines beatos esse, magnisque semper voluntatibus frui, cernentes splendorem vitæ illius ac florem; inquit igitur ille, nescire priuatos illius status incommoda: ideoque magnopere falli in iudicio de illo faciendo: quod si scirent tantum, quam arduum sit, ac molestiæ plenum, tot epistolas scribere ac legere, futurum prorsus ut diadema abiectum iaceret sine honore vllō: nec quemquam inuentum iri tam stultum, qui ipsum tolleret ac capiti suo imponeret. nec tamen non multo maioribus grauioribusque curis premi necessario illos, si munus suum fideliter obire vellent, qui vitam moresque eorum, quibus præfunt, regendos susceperunt, animosque ab omni labe purgandos, quam qui in eo tantum eximio statu rerum suarum, regnoque conseruando, occupati sunt. Quum igitur hoc crimen Contarenius vehementer reformidaret, ac, si quis uere existimare posset, vacuus prorsus ab ipso foret, non tamen penitus potuit ea suspicione carere. Erat ille in omni suo sermone, factioq; integer ac liber: remotus ab omnib; blandicijs orationis: acerrimus

acerrimus inimicus vanitatis illius, assentationisque, quæ nunc in locum inuasit simplicis veritatis, libertatisque loquendi, merito quondam magnopere probatæ. ob quod etiam ingenij bonum ferunt eum Carolo Cæsari valde acceptum fuisse, quum ob alias etiam animi dotes ab eo diligeretur. Hæc igitur probitas nuda, expersque omnis fuci ac fallaciarum: quæque, vti eo venerat, ita se Romæ in longe alijs moribus, institutisque conseruat, causa fuit, vt superbiæ a non nullis insimularetur. quasi ille contemnens ceteros præ se, quidquid sentiret de omni re contra commoda illorum diceret: nec sua quicquam interesse putaret potentioribus aduersari. quam ansam quidam arripientes, ipsum, vt contumacem & inhumanum apud Paulum III. criminati sunt. quod nimis libere in senatu contra ipsum sententiam diceret, atque honestissimos quosque viros offenderet. ipse vero id diuerso consilio faciebat: neque vt impediret commoda aliquorum, sed vt religioni suæ & ei, quod rectum esse sentiebat, seruiret. Vt autem, quod non verum esset, nec ordine factum, quamuis intelligeret se apud aliquos offensurum, accusabat, ita gratiam aliorum astuta simulataque oratione non aucupabatur: cui rei ostendendæ in vtramque partem exemplum hoc satis accommodatum erit. Contigit aliquando, vt eo astante in senatu ageretur de Camarino in potestatem tradendo vni alicui Pont. Max. nepotum, eo genere iuris, quod feudum appellant. admonuit igitur Contarenius Paulum, vt ante quam de tanta re quicquid statueretur, colendæ iustitiæ causa, uacueque a culpa conseruandæ sanctissimæ sedis, mandaret vt iura Varanæ familie, quæ diu in possessione eius oppidi fuerat, diligenter noscerentur: ne iniuriæ aliquid ipsa in ea re acciperet. Hæc sententia, præsentis animo dicta, illa ipsa die per urbem sparsa disseminataque est: quare Hercules Varanus, qui Romæ tunc erat, statim domum ad Contarenum venit, gratiasque illi maximas egit, causamque ei suam totam commendauit. cui quidem ille, eadem animi

fim

simplicitate, quod tamen quidam ab agresti inhumanoque ingenio profectum potius dicerent, respondit. Non necesse erat te mihi isto nomine gratias agere: quod enim feci tunc, vt æquitati officioque meo satisfacerem, feci, nec quicquam amplius cogitationis suscipiam de ista re, præter id, quod mihi fides mea præscripserit, nisi aliquid a Pontifice ipso, quod eo faciat, curæ meæ mandatum fuerit. Blandus aliquis, illa occasione vsus, studuisset gratiæ illi, sine vlllo suo labore partæ, nouam gratiam addere: animumque honesti viri inani spe, falsisque pollicitationibus, lactasset. Quare mihi venit in mentem arbitrari non paucis in rebus simile fuisse Contareni ingenium naturæ moribusq; Dionis Syracusani: vt enim reliqua, in quib. ipsis inter se magnopere conuenit, taceam, non deerant etiam in regia illa Dionysij filij (vt ab eruditissimis viris memoriæ proditum est) qui castissimi illius & integerrimi viri maximas virtutes & sane easdem has, propinquis vitiorum vocabulis deformarent, ac grauitatem superbiam esse dicerent: libertatemque loquendi contumaciam vocarent: qui Dion, cum induci non posset, vt vna cum alijs peccaret, qui se omni genere vitiorum contaminarent, eorum peccata videbatur dissimilitudine vitæ coarguere. Fertur tamen ille durior fuisse natura, tristiorque. vnde temperare indolem illam summo studio ipsum debere a doctissimo viro, studiosissimoque gloriæ ipsius elegantissima voce dictum est: hortatus enim est Plato vt Gratijs hostias imolaret, suasitq; vt aliquid etiam daret moribus suorum temporum, institutisque reliquorum mortalium: non quia id omnino verum esset, sed quia ad congressus hominum frequentandos: benevolentiamque eorundem retinendam, obsequium sæpe necessarium foret. Atque hæc priuati officij sunt, illa publici; quod malas consuetudines tollendas curauit, illas veteres renouandas; quod multarum legum præclarissimarum auctor suatorque fuit; quod in dicenda sententia numquam inuidiam reformidauit, multaq;

con

contra collegarum suorum commodum sæpe suscepit atque perfecit. Vitiosa quadam consuetudine duabus, sæpe etiam pluribus ciuitatibus, vnus & idem dabatur cultos, qui Græco verbo episcopi appellantur: neque in ijs ipsis ætatis progressus expectabatur, qui annalibus Pontificum Maximorum legibus constitutus est; adolescentuli, sæpe pueri, maximis administrationibus præficiuntur. Has atque huiusmodi alias prauas corruptasque consuetudines sua Contarenius sententia delebat: moresque sacerdotum hominum, nimium nonnumquam deformatos emendabat, magnaque sua ipse offensione communem reipublicæ leuabat inuidiam. Non eadem condicione est collegium Cardinalium ceterarumque ciuitatum senatus aut consilium; nam illæ ex ea, quam habent, ciuium copia in suos senatus, qui aptissimi visi sint, legunt. in collegium Cardinalium e toto orbe terrarum, qui aut doctrina, aut nobilitate, aut prudentia, aut probitate, religione, pietate excellunt, si Pontifici Maximo visum sit, eos cōoptare licet: eoque factum est, vt summa is ordo amplitudine, summa auctoritate, summo splendore, omni ille quidem tempore fuerit; quippe e Christianorum flore decerptus atque collectus. Verumtamen ijs, de quibus institutus mihi sermo est, temporibus præcipuum quoddam in eo lumen enituit: propterea quod Paulus Pont. Max. magni atque acris iudicij vir, eximia singularique virtute homines nactus, ad eam illos dignitatem vltro ipse euocauerat. vt ei collegio, quod per se antea esset clarissimum, ea re lucis tamen permultum attulisse uideretur. Ex hac virorum clarissimorum copia, cum mittendus ad Cæsarem Legatus esset, Contarenius potissimum ad id munus delectus est: causa mittendi ea fuit. Vehementer erat Cæsar anxius sollicitusque, quod Germani, qui plurimum armis possunt, neque præstolli in bellis erant, neque eum pecunia iuuabant; propterea quod maximis inter se seditionibus de religione contendebant, atque intestinis dissensionibus distenti, nulli

illi vsui esse poterant. Abiecti quidam perditique ac desperati homines, xxx. fere abhinc annis, iam pridem receptas ratasq; disciplinæ Christianæ sententias in controuersiam reuocauerunt, multitudiniqu; persuaferunt imperite, vt a Romano Pont. quod caput Christianæ reip. atq; ecclesiæ est, desciscerent, se seque in libertatem vindicarent. quod malum tarde initio serpens, ab ijs neglectum a quib. opprimi id & poterat & debebat, paulatim infimæ plebis, vulgiq; mulierum, animis, legum vinculis laxandis & dissoluendis, pollicendaq; cupiditatum multarum licetia in fraudem inductis, paucis annis opinione magis adcreuit. idemq; nefarius furor, postq̃ populare existimari coeptum est pietatem euertere, multos quoq; principes inuasit. Alios metus impellebat, veritos ne a suis defereretur, si ab illis dissentire pergerent, partim rerum nouarum studio, partim leuitate & stultitia, quod deo immortali, legibusque spernendis, fortitudinis opinionem facere se se de se nonnulli arbitrarentur; partim etiam auaritia, quod sacerdotum maximas amplissimasque possessiones publicatas, inter se partiebantur. multi tamen, quibus esset Deus pro sua ipsorum pietate propicius, veram integramque pietatem constantissime complexi, nullis permulceri illecebris, nullis illici præmijs, nullo timore depelli se se passi sunt. eaq; a maioribus, quæ acceperunt, instituta ad hoc vsque tempus fortissimo animo retinuerunt. Sed tanta inter vtrosq; extitit non modo contentio ac disceptatio, sed iam concertatio atque pugna, tantumque exarsit odium, vt maximæ, bellicosissimæ, florentissimæ, atq; adeo, ante hunc furorem, religiosissimæ, optimæque de rep. meritæ nationis, vires, opes, & copię absumptæ, in se se ipsa conficienda atque defendenda, sint. quibus rebus permotus Cæsar animo & cogitatione in ea cura defigebatur, si per compositionem minui id malum sedariq; discordiæ possent. qua de re cum omni contentione cum Germaniæ ciuitatibus ageret; primo Christianorum omnium concilium in ijs maxime locis indici postulauerunt,



stulauerunt, quo adire tuto ipsi possentis erat locus nūquam gentium: quippe cum ab omnibus defecissent, nec ullis sese gentibus committere auderent, præterquam in eorum ipsorum finibus, ad id concilium venturos, eiusque decretis iudicijsque staturos se se pollicentur. id eo ab illis consilio fiebat, quod Pontificem Max. numquam eo descensurum sibi persuaferant. verum ubi probata Paulo III. condicionem, ac ne de loco quidem, cuius iniquitate deterritum iri eum maxime sperabant, recusari senserunt; paulatim regredi, neque in eo quod ultro ipsi postulauerant, manere; dirimi controuersias per colloquium posse; id breuius, expeditius, certiusque esse, dicere; longum esse expectare, dum ex ultimis terris conueniretur. Omnia sibi Cæsar experienda existimabat, si vlla ratione mederi ei tanto malo posset. Itaque deliguntur homines docti ex utroque numero vrideni. ad colloquium venitur; magna contentione, magna pertinacia, ab ijs, qui se ipsi Protestantes appellant, disputatur, atque in omni genere calumniæ delitescitur: eos ijs, qui ratas veteres sententias esse volunt, Catholicique appellantur, acriter refellunt, constantissimeque in sententia perseuerant. Ad extremum, cum concertationum exitus nullus reperiretur, nec quicquam inter eos conueniret, prorsus disjunctis discordibusque opinionibus, infecta re, a colloquio discedunt: quod, quoniam se absente factum erat, Cæsar sperans Germanos suum aspectum atque auctoritatem reueritos, aliquid de pertinacia atque calumnijs remissuros, iterum deligi homines iubet, qui colloquendi causa Ratisbonam conueniant: atque eo ipse proficiscitur, ut maiore auctoritate de concordia ageretur, si mulque magnopere a Paulo III. per litteras petit, legatum ut ad se mitteret, qui ad rem tantam & tam grauem maxime esset idoneus. Paulus e tanta præclarissimorum hominum facultate & copia Contarenum sine vlla dubitatione delegit, atque hominem in Germaniam mittit; quod is & magnum iam antea eius gentis propter eas cau



fas; quæ commemorata à nobis sunt, haberet vsum, & Cæsari esset gratissimus: idemque innocentiae, doctrinae, prudentiae, facilitatis, animique moderationis, magna apud Germanos opinione excelleret: quique (id quod Cæsar magnopere postulauerat, maximeque ad rem pertinere arbitrabatur) in disputando minime esset ambitiosus, minimeque pertinax: eo cum venisset mirabiliter acceptus à Germania est, & magno in honore apud Cæsarem fuit.

Nam cum omnes Germaniae principes; tum rex Romanorum ipse, officij, honorisque hominis causa, domum ad eum venit; & in sacris ceremonijsque solemnibus, datus ei locus est secundum Cæsarem primus: nihilque earum rerum, quæ ad homines magnos honestandos adhiberi consueuerunt, in eo prætermisum est: quæ, tametsi ordini scilicet debebantur & dignitati, tamen cum alacrius aliquanto; tum etiam cumulatius, quam antea solita sint, personæ dicuntur esse perfoluta. Accedebat quod Cæsar, iucundissima eius consuetudine & sermonibus delectatus, sæpe hominem ad se extra ordinem vocabat: cumque de grauioribus negotijs, deque republica collocuti inter se essent, multa ad eum Cæsar de suis priuatim rebus referebat; multa de Geometria, multa de Geographia querebat quibus ille scientijs, quod ex ad rem militarem (quæ illi spectanda erat maxime) pertinent, operam multam illis temporibus dabat. illa autem cum in promptu Contareni haberet, quod puerili disciplina erat in ijs artibus studiose versatus, omnia scilicet certa, dilucidaque respondebat. Quæ cum de Contareni apud Cæsarem familiaritate ac gratia, apud omnem autem Germaniam auctoritate & fama, Romam essent allata; ventum est in spem fore, vt res conueniret, mitigatissime Contareni lenitate & prudentia Germanorum animis ætærimæ discordiæ tollerentur. quæ res quoniam maiorem in modum illi gloriæ futura erat; homini vehementer inuideri cœptum est. Nec deerant etiam Romæ, qui dicerent, nulla alia de causa ipsum Germanis gratum

tum acceptumque esse, nisi quia aduersarijs indulxisset; ac decreta, quæ pugnacissime defendere debebat, iisdem prodidisset. Hæ vero graues acerbæque voces ab ijs, qui ex quo animo laudem gloriamque Contareni non ferebant, emanabant: nec tantum illic, vbi plurimum ipsi obesse poterant, improbe mittebantur, verum etiam per omnem Italiam fusæ ac disseminate, magnopere illius estimationem ac dignitatem lædebant. quas tamen ille, magno animo præditus, rei que ipsius nature non ignarus, primo contempsit, ad eum namque malucoli hi sermones inuidorum in Germaniam vsque delati sunt; simulque sperabat exitum earum rerum innocentiam suam, si demque patefacturum: cui sane ipse toto animo incumbebat. Contigit tamen tunc, quod sæpe in magnis arduis que rebus vsu venit, vt negotium illud, Christianæ reip. magnopere vtile, atque adeo salutare, in medio cursu fractum ac dissipatum sit. id autem magna ex parte factum est malitia fraudeque illorum, qui Cæsaris potentiam, quæ multum compositis rebus, Germaniæque pacata creuisset, suspectam habebant, suisque rebus periculosam existimabant. hi namque non modo veterum discordiarum fibras, vt oportebat, communis utilitatis causa non euellabant, verum etiam nouarum simultatum semina occulte iaciebant, in aures eorum, quibus commissa res erat, insusurrantes, ac falsos quosdam metus eo inferentes. Vt autem astuta hæc consilia rem remorabantur, & ne ad exitum adduceretur impediabant, ita subito exortum est, quod animos Germanorum ad longe alias curas traderet; finemque disputationi illi ac colloquio faceret: hoc autem fuit incurfus Turcarum regis in Pannoniam cum maximis copijs, communisque hostis metus: nec enim effecit tunc timor ille, quod plerumque consuevit, magnopere exacerbatis animis, vt stimulum periculum tantum admoueret ad odia extinguenda & gratiam reconciliandam; sed potius spem, quæcumque erat, malorum illorum sedandorum eo tempore intercidit, ac sustulit.

stulit. Missis igitur sermonibus illis, quod factum est ex  
 tremo mense Quintili, coeperunt Germani arma: totosq;  
 quæ se ad impetum illum coercendum, finesq; suos tueri  
 dos contulerunt: Caesar vero aliam rationem iniit eiꝝ  
 periculi callido consilio propulsandi; quod a veteribus et  
 iam duabus non semel vsurpatum fuit, & satis tutum  
 semper utileq; cognitum est: statuit. n. cum classe, quam  
 maximam ædificauerat, orhaueratq; in Africam nauigã  
 re: magno namq; spatio Solimanus inde remotus; auxi  
 lium illis locis ferre nullo modo poterat, & ne maiorem  
 etiam aliquam plagam in Græcia acciperet, non sine causa  
 metuere debebat. Urgebant præterea Caroli, vt hoc facer  
 et, assiduæ preces Hispanorum, crebraq; damna stimula  
 bant; quæ cuncta illa maritima regio cotidie accipiebat;  
 ob frequentem irruptionem piratarum. adeo vt mare pe  
 nelominò clausum illic foret. Quare vt tam grauibꝯ ma  
 lis regium illud suum liberaret, dekeretque maculam  
 quam sibi videbatur suscipere ob tantam licentiam præ  
 donum, statuit, vt dictum est, apparatus illius belli non de  
 esse, sedemque nefariorum hominum, si posset, omni ra  
 tione euertere: quamuis inimici timoris ipsum argue  
 rent, quod ferocissimum hostem declinaret, ac tellurem,  
 quam maxime tueri debebat, tanto impendente pericu  
 lo, destitueret: in Italiam igitur celeriter venit. Cum  
 vero muneris, quod sustinebat, non sine magna animi  
 sui molestia finem factum esse vidisset Contareus, nec  
 se posse amplius nauare operam reipublicæ, vna cum Cæ  
 sare reuersus est. Postea vero quam Tridentum ventum  
 est, imperatorem, vt se dimitteret, rogauit: velle enim  
 se, quum commode id facere posset, ecclesiam suæ fidei  
 commissam, quæ non longe inde abesset, inuisere: ac,  
 postquam publice non posset, priuatim religioni officio  
 que suo seruire. Venerunt tamen eo tempore Roma a  
 Pontifice Max. litteræ, quæ iuberent ipsum, persona lo  
 gati retenta, apud imperatorem esse, Mediolanumq; vna  
 cum eo proficisci. in quam urbem ille, vt veteris imperij  
 iuris,

iuris; non multo ante receptam, volebat (ut moris est) cum pompa ingredi; inde quo Lucam accedere, quo in loco Pontifex ipse Caesarque statuerant simul congregari ac de communibus rebus studiose agere. Accidit tunc itinere res, quæ vehementer animum optimi viri commoveret: cum enim Brixiam ventum esset; cuius eius loci honestus sane vir, ac vetus amicus Contareni, qui ad ipsum salutatum venerat, quæsit ex eo simpliciter, quæ mens ipsum impulisset, ut capita, quæ ferrentur, prolata; ab aduersarijs; adeo absurda, & a vera ratione aliena, in Germania comprobaret. cui statim respondit ille, eas esse meras nugas; rumoresque prorsus inanes, & quos omnium aures respuere deberent. se namque, ne dum anceps quod esset, & in quo scrupulus aliquis resideret, sine auctoritate Pontificis Max. concessurus aduersarijs fuisset, ea etiam quæ rata in primis sunt & firmaliter recepturum non fuisse. non destitit auctor eius sermonis, sed addidit, rem aliter, atque illæ putaret, se habere: neque, in incertam esse, ac nullo auctore prolatam famam illam; se namque litteras vidisse ab eius ordinis homine scriptas, summo viro, quem etiam nominavit, quæ id commemorarent, ac verum esse contenderent. non potuit tunc homo lenissimus sibi temperare, quin stomacharetur exclamaretque. Digna vero mercede hæc est meorum laborum: si vera sunt, quæ narras. statimque ut innocentiam suam, existimationemque tueretur, misit epistolam ad Pontificem Max. qua valde questus est de iniuria illa, sermoneque improbissimo, quem Roma profectum, ac per omnem Italiam ab iniquissimis dissipatum, contra dignitatem suam comperisset: rogauitque simul, ut si penitus eum non aspernaretur, saltem se indicta causa ne condemnaret: nec quicquam de illa re secum statueret, ante quam ipse ad eum peruenisset: sperare enim se facile causam suam probaturum, ostensurumque, laudem se ac premio, non reprehensione aut poena vlla, ob ea, quæ in Germania gessisset, dignum esse. Cum Mediolanum

lanum peruentum esset, quæ ciuitas omni genere lætitiæ, magnificentiaque apparatus Cæsarem excepit, mirifice suo quodam facto Contarenum Carolus decorauit, ac, quid sentiret de virtute, singulæque probitate hominis, notum testatumque omnibus esse voluit: lateri enim suo ipsum in omni ea pompa herere voluit: cumque hoc ille modestiæ causa recusaret, sequereturque aliquanto post, mandauit humanissimus princeps vni e famulis, vt pæne inuitum ipsum traheret ac prope se collocaret, omneque id tempus, donec eo perueniret, quo paratum illi hospitium erat, consumpsit cum eo iucundissimis sermonibus, id vero quum personæ dignitatiue datum non sine causa aliquis arbitrari posset, licet tamen existimare, multum etiam ad hoc valuisse iudicium, quod fecerat de homine; quod putaret, vt qui veræ gloriæ non ignarus esset, eam rem non minus sibi, quam Contareno, laudi & honori futuram. Et sane litteris mandatum est, eius nominis primum Augustum Cæsarem, quum primum Alexandream, quam bello ceperat, ingressus est, in magna copia honestorum ac clarorum virorum, Areum, grauissimum & eruditissimum hominem, sibi adiunxisse, familiariterque cum eo solo in tanta illa lætitia, fortunæque suæ magnitudine locutum esse. quem etiam, vt magis eum ciues sui suspicerent ac fortunatum iudicarent, manu teneret: erat enim philosophus ille Alexandrinus. Sed aliæ quoque res, dum illic mansit, indicio esse poterunt, quantopere Contarenum diligeret: id quod animaduersum ab alijs opulentis viris, qui in eo comitatu erant, fecit vt omnes ipsum colerent, ac de illo celebrando quasi inter se contenderent. Cæsar, qui, vt supra ostendi, mare transire statuerat, quæ ad cursum illum necessaria erant, studiose parabat: imperatque vt Genuam classis, propinquosque in portus cogeretur. quare, vt id celerius fieret, statuit sibi in eam urbem accedendum, inde que Lucam eundem, quo Pontifex Max. se venturum significarat. Contareno igitur breviori via se Lucam con-

contulit, atque illic, quod maxime cupiebat, post paucos dies Pontificem Max. vidit, qui sane hilari vultu, nulloque signo edito offensionis, ipsum accepit. nec multo post eodem imperator venit, qui non cessauit etiam in alijs magnis rebus, quas cum Paulo III. egit, multa prædicare de prudentia, industria, probitate legati; quibus omnibus virtutibus, in munere illo obeundo, usus fuerat in Germania: nec non questus est, quod Romæ multas falso iactatas forent contra fidem & dignitatem ipsius, quum ille integre sincereque personam eam sustinuisset, ac negotia cuncta cum fide administrasset, cui statim sapientissimus senex: quique ignarus non erat artium marum, quibus plerique Romæ utuntur, aut inuidia commoti, aut, si alios deprefferint, sperantes se in locum illorum inuasuros, respondit, sibi eximie cognitam esse ac probatam Contareni uirtutem; seque eam ob causam ipsum tunc in Germaniam misisse; tantumque oneris ei imposuisse; facturumque etiam breui, ut nemo dubitare possit de beneuolentia sua erga illum, ac, quo denique loco eum haberet, se omnibus declaraturum. Non contentus autem hoc Pontifex, ut omnem scrupulum ex animo Contareni euelleret, gauderetque ille secum tam præclaro testimonio suarum virtutum, notum esse voluit ipsi eum sermonem: simulque suasisit illi, ut contemneret maleuolas voces improborum, nec putaret eas quicquam valere ad existimationem suam violandam. fontem etiam huius mali aperire volens, testimonium citauit veterum poetarum, qui naturam inuidiæ versibus suis expresserunt; moremque illam habere tradiderunt; ut summa loca ferire non minus, quam venti editissima quæque appetere, ac violentius verberare consuerunt: omnique demum ratione, qua potuit, ostendit se eum valde carum habere; cumque etiam gratias amanter egisset pro susceptis laboribus, fecit ei potestatem, ut tot itineribus defatigatus Romam reficiendi sui causa breuiore via accederet: ipse namque



que vicinitate inquitatus; Bononiam profectus est; inde  
 que Ariminum venit; ac Flabintia denique via Romam  
 reuersus est; non dum autem duobus mēſibus tranſa-  
 ctis; memor eius quod dixerat; de augenda dignitate Co-  
 tarenſi; legatum ipſum Bononiæ declarauit; quæ publica  
 cura præſentiaque reliquas omnes ſuperat; quas intra  
 ſuos fines imperiumque ſtatus reipſi poſſidet. Ille igitur  
 hoc nouo onere ſibi impoſito; vt qui non minus rebus  
 gerendis; quam contemplandis factus erat; Martio mēſe  
 ſe in præſentiam contulit; factumque eſt; vt M. I. K.  
 Aprilis in urbem ingrederetur; qui dies apud eos maxi-  
 me celebris agitur; conſecratus genitrici eius; qui ſalutem  
 nobis dedit; ſumma igitur letitia totius ciuitatis exceptus  
 eſt; conataque eſt illa; quam ſpem conceperat animo de  
 probitate & prudentia ipſius; externis etiam rebus; hono-  
 ribusque omnibus indicare; certo enim ſciebat futurum  
 ſibi illum potius eſſe optimum parentem; quam durum  
 aliquem & auarum dominum; aut etiam fortunarum ſua-  
 rum expilatores; in quibus certe illi falſi non ſunt; vt pri-  
 mum oneris ſes illas attingit nullo negotio cognitum eſt;  
 non minus ipſum in rebus iudicandis elemeſtia vti & ex-  
 quitate; quam ſummo illo iure; quod ſæpe merito repre-  
 henditur; ac; ſi quis vere exiſtimet; quod alio nomine ap-  
 pelleretur dignum eſt. Totos dies ille cauſis audiendis; con-  
 trouerſijsque tollendis operam dabat; nec vñquam mō-  
 leſto ſane hoc; & odioſo munere; præſentim homini in ac-  
 hiſculis ſtudijsque educato; deſtigabatur. hoc autem facie-  
 bat; naturamque ſuam; conſuetudinemque fleſcebat;  
 quia veræ gloriæ deditus erat; ac prodeſſe mortalibus;  
 quacumque re poterat; ſtudebat; quare quodcumque mu-  
 nus obiret; dignum viribus operaque ſua; in ipſum tota  
 mente incumbēbat. Erant hæc curæ cogitationeſque hoc  
 tempore Cotarenſi; procurabātque ille comoda eius  
 nobiliſſimæ ciuitatis; cum repente; inopinante illo; Ro-  
 mæ litteræ venerunt; quæ ipſum ad aliud munus traduce-  
 rent; in quo ſane ille diutius verſatus fuerat; quodque o-



mnes numeros honestatis in se habebat. Cum enim sedari numquam potuissent vlla vllius opera iræ inter Franciscum Gallorum regem, & Carolum V. imperatorem, sed cotidie magis nouis iniurijs inferendis inflammarentur eorum animi, gerereturque aut pararetur ab ipsis semper bellum tæterrimum, quod in singulos dies reip. Christianæ grauissima vulnera imponeret, & ad internicionem denique redigeret maxime pias nationes, officij sui esse ratus est Paulus Pont. Max. tanto malo, si vlla ratione posset, mederi; tantumque & tam sæuum incendium extinguere. quare mittendos sibi esse censuit scorsum ad ambos potentissimos reges, legatos, prudentissimos viros & tanto oneri sustinendo pares: præclare enim sciebat, quanta vis esset in ministris ad vnamquamq; rem efficiendam; hancque curam, omnium maximam, requirere personas in primis sapientia & auctoritate præditas atque ornatas. & non minus gratas acceptasque principibus ijs, quorum animos delinire ac flectere deberent. Elegit igitur, quem ad Cæsarem, in Hispanijs tunc degentem, mitteret, Gasparem Contarenum: & ad Gallorum regem ire voluit Iacobum Sadoletum; ambos viros probos, atq; omni ingenij laude florentes; & vt collegas in amplissimo sacerdotio, ita multis honestis artibus inter se coniunctos, ac maxime bonis omnibus probatos: quæ res gesta est sextili mense. Erat eo tempore Sadoletus Romæ. quare significauit per litteras Pontifex Contareno, quid de illo statuisset: mandauitque, vt, quæ ad iter necessaria erant, expediret: socium namque ipse in honestissimo illo munere intra paucos dies in viam se daturum. Hoc accepto nuntio ille, qui nullum vmquam utilitatis aliorum causa laborem recusarat, quamuis ætate iam confectus esset, & satis imbecilla valetudine, æquo tamen animo tulit sibi onus illud imponi. quod si animam etiam in ea legatione se profusurum esse certo scisset: tanta erat pietate præditus, & ita dicto audiens esse summo Pontifici cupiebat, vt ipsam prorsus repudiaturus

non fuerit. Appropinquabat sane illi mors, quæ tamen longè alia ratione, & vbi minime expectabatur, ipsum oppressit: nec enim (vt a me nunc diligenter narrabitur) aut laboribus, aut defatigationibus nouis accelerata est.

Agebat Contarenus ætatis suæ annum .LIX. in his curis, quas ostendi, toto animo occupatus: partem tamen illarum iam in id munus, quod instabat, deriuans. Incumbens igitur illis, quæ multæ profecto ac graues erant, molesto anni tempore, vt par esset ipsis sustinendis, aliquando reficiendi sui causâ se in propinquum vrbi locum conferebat: vbi manens & æstum declinaret, quo conficiebatur domi, & aliquantulum a perpetuis suis laboribus animum relaxaret: nam siquid maioris momenti subito euenisset, facile illuc adibatur, vbi etiam potestatem sui omnibus faciebat. Locus autem valde animo ipsius, temporique illi accommodatus, ac quo plurimum varijs de causis delectabatur, erat sacellum Diuæ Mariæ a Monre vocatæ, cuius possessio procuratioque est sodalium Diuæ Iustinæ. Acciderat autem, vt illis ipsis diebus, qui primi Sextilis mēsis fuere, fratris filius, illius salutandi & visendi causa, Bononiam veniret, qui superiore anno Patuij inter sodales illos receptus fuerat: vocabatur vero nouo nomine, vt consuetudo est eorum, qui se sacris aliquibus initiant, Placidus. cum autem probus adolescens esset, feminaque non nullarum virtutum in se contineret, a Contareno diligebatur, ille igitur primo apud suos in vrbe mansit in Diui Proculi dicato ipsis domicilio. vt tamen eo facilius frui posset Contarenus, ipseque itidem sitim suam expleret videndi virum, quem maxime optabat, secum sanguine coniunctum, cuius etiam visendi alienigenæ desiderio flagrabant, impetrauit a suis, vt se illic esse paterentur. quæ causa reliquis causis addita est frequentandi recessum eum, diutiusque illic commorandi. Hic collis ab vrbe abest spatium mille passuum, amœnissimus, & natura & arte factus ad animum multis modis paciscendum, atque omni honesta voluptate explendum. &

sane

sane, qui desideria optimi huius viri, gaudiaque cognita haberet: quod non magno negotio omnibus contingere potuit, qui familiariter cum eo vixissent: facile iudicaret paucos illos dies, quos illic traduxit, iucundissimos ei fuisse omnium, quos in vita umquam degustasset: vivebat enim cum sui amantissimo fratris filio, cumque alijs non nullis comitibus illius, eorundemque sacrorum socijs, honestis sane viris & eruditis: rem diuinam crebro faciebat; omnisque sermo illic erat de rebus, quibus maxime capiebatur. Cum igitur, vt traditum a me est, calores essent maximi, crebro in porticulam quandam declinandorum illorum causa veniebant: & , vt illic frequentius deambulabant, ita etiam aliquando posita mensa cibum capiebant: vergit enim illa ad septemtriones; vrbemque ipsam quasi ante pedes positam prospicit; planitiemque omnem, quæ ipsam cingit: quin etiam remotiores vrbes illinc commodè cernuntur Mutina, Ferraria, aliaque nobilia oppida. quare non sine causa expectitur prospectus ille, paritque oculis incredibilem voluptatem: quamuis tunc, capto iucunditate illius, Contarenò nihil tale timenti, exitium comparauerit: aurà enim illa lenis, quæ flabat: frigidiusculusque aër, cum temperamentum corporis ipsius rarius esset, paruoque momento sæpe commoueretur; facile ad imas partes penetravit, sanguineque inflammato abscessum in latere creauit, e genere eorum, quæ ἀποστήματα Græci vocant. quare statim febris consecuta est, quæ septimo die ipsum consumpsit; quamuis magna diligentia summorum medicorum curatus sit: simul ac enim primum cognouit se egrotare, Bononiam reuersus est. Ipse autem in primis naturam vimque eius morbi mature perspexit: tribus namque diebus, ante quam animam efflaret, omnem rem Ludouico Beccatello, vni e familiaribus suis, quo plurimum in rebus maioris ponderis utebatur, enarrauit. Dixit igitur grauitatem eius morbi non apparere: reconditasque corporis partes magis ipsum oppressisse, quam exterior

res male habere: in promptuque esse. addiditque genus id morbi periculum magnum in se continere: quod si vires corporis eę forent, vt spatio trium quattuorve dierum resisterent, sine dubio morbum ipsum impetum suum remissurum: se tamen magnopere vereri, ne contra ipse deficiat; naturaque penitus frangatur: intelligere enim se venę motum valde imbecillum esse. Cui ille; qui saluti ipsius omni studio prospiciebat, respondit, rogans vt abduceret paulisper animum ab his molestis cogitationibus, rationemque omnem sui curandi in prudentia diligentiaque medicorum positam esse vellet: affirmans præterea Deum optimum maximum, quem semper ille pie coluisset, ipsi præsidio futurum: esse autem accurate incumbendum valetudini recuperandę, vt cito mandatum sibi munus obiret; iterque ad imperatorem faceret. Ille vero statim hilari vultu, ad alium longe maiorem imperatorem sibi iter instare, dixit, idque ipsos breui cognituros: neque tamen se hoc dicere, quia mortem valde perhorrescat, parumq; animo æquo serat se e vita discedere: intelligere enim se præclare quot quantaq; beneficia a Deo acceperit, quorum etiam plęraq; commemorauit, non glorię causa ostentationisque, cui tunc locus minime erat, verum vt se gratum esse erga auctorem illorum significaret. Inquit igitur se ortum esse ea in ciuitate, quę nulli earum cederet, quę in vniuerso terrarum orbe existunt: e familiaque, quę haud postremum locum in ea rep. teneret: consecutumque itidem illic esse honores non paruos: & vt domi, ita etiam foris gradus maximos dignitatis adeptum esse: vtramq; vitam se cum laude aliqua coluisse: & eam, quę in contemplatione rerum versatur, & eam, quę rebus agendis incumbit: peruenisse ad etatis annum LIX. quem terminum vitę non multi attingere potuerunt: quare secum quoque hac parte non male actum esse: canereque se debere vna cum sacro Hebręorum vate carmen, quod ad æquum gratumque animum significandum pertinet, nomenque il-

lius

lius laude gloriaque cumulandum, quia non tam liberallyter se gesserit erga multos, neque tot bonis expleuerit omnem populum gentemq;. Vnum tantum sibi molestum esse, quod, vt optabat, commodis quorundam tenuiorum hominum non prospexerit, qui sibi, postquam ad sacrum illum honoris gradum ascenderit, fideliter ministrarint: sperare tamen se Deum optimum max. Pontificemque, cuius dignitati toto animo inseruierit, fortunam eorum subleuatu- ros. Nec oblitus est suo opportunoque tempore mandare custodi ipsius, vt priuilegium, quod beneficii loco a Pontifice impetrarat, ad delicta penitus abstergenda traditum, sibi legeret, dum mente orationeque consisteret. Cum hæc animo versaret, sane constanti ac forti, atque hoc sermone semet consolaretur, suos, qui præsentem aderant (ij autem erant, vt quisq; maxime illi acceptus probatusque fuerat) angebat, atque ita perturbabat, vt lacrimas vix tenere possent: a quibus tamen sibi diligenter temperabant, quamuis intelligerent ne magna quidem copia ipsarum spectante illo effusarum, posse ipsum commoueri, & e statu illo animi deijci. Eadem vero hominis prouidentia in intelligendo, prædicandoque suis vitæ suæ fine, exitu ipso comprobata est, quæ in ceteris rebus iudicandis significandisque sæpe apparuerat: crescente enim semper vi morbi, remedijsque omnibus superatis, oppressus ille est; animamque efflauit. **K.** Sept. meridiæ. Quamuis autem horas circiter sex antea voce orbatus esset, non tamen sensu animi, intelligentiaque extremo illo tempore caruit, vt certis quibusdam notis indicijsque perspectum est; confiditque clementia conseruatoris nostri, vt Christianum virum decet; & cum aliter non posset, se spem omnem suam in eo collocatam habere nutu, admonitus diligenter de hoc, significauit. Vt vero se constantem in hoc, maximeque pium præbuit, ita, quæ moris est consuetudinisque, non solum magno, verum etiam alacri animo geri, custodiri- que passus est. quæ sane, vt nuntia morus, perterrefaciunt

ciunt plerosque; ac valde omnes, qui non firmas radices egerunt in persuasione Christianam, perturbant. Reliquit vero ille discessu suo suos omnes mororis ac luctus plenissimos: ut vniuersam quoque ciuitatem dolore magno adfectam, quæ sane, quacumque ratione potuit, funus illius honestauit, & quam molesta ipsi optimi custodis mors fuisset, planum fecit. die autem, quæ secuta est mortem ipsius, funus ductum est. Orationem de laudibus eiusdem, & honeste acta cuncta vita, habuit Romulus Amazeus, disertus & nobilis orator, qui tunc in ea vrbe, domicilio quodam vetere omnium disciplinarum, & humaniores litteras docebat, & negotia publica reip. administrabat. corpus in Diui Proculi depositum est, eo consilio, ut Venetias postea comportaretur, in sepulchroque maiorum ipsius, clarissimorum virorum, collocaretur. Paulus III. nuntio allato de obitu Contareni, ægre admodum illum tulit: declarauitque quanti hominem fecisset, omni genere liberalitatis usus erga domum illius. nec tantum Pontifex Maximus, qui sæpe opera ipsius fidei & utili usus fuerat, verum etiam Romæ ceteri probi viri morte ipsius vehementer consticti sunt. nam, quantum luctum eadem in patria excitari, non facile dici potest. omnes denique, qui aliquando doctrinam illius gustarant, singularisque probitatis hominis specimen aliquod acceperant, publicam illam cladem existimarunt. Ciuis autem collega quoque ipsius in amplissimo sacerdotio Petrus Bembo quantum dolorem cepisset ex graui morbo Contareni, desperataque iam a medicis salute, notum omnibus esse voluit: in epistola enim ad Flaminium Tomarotium, quomodo adfectus animo esset audito casu illo, & propinqua morte optimi & honestissimi viri, diligenter narrauit. Verbis ipsis, quum illustri loco posita sint: alioque sermone edita, supersedebat. Possem etiam aliorum multorum, doctorum & excellentium virorum, testimonia citare, qui quantum damnum morte illius factum esset, scriptis suis testati sunt.

in quibus etiam non nulli, qui ab eo vehementer dissentiebant de ratione viuendi, veroque cultu Christiani hominis, & acerrimi aduersarij opinionum, quas ille in Germania defendit, extiterunt: magnifice tamen de eruditione, continentiaque illius in illis ipsis libris, quibus sententias ipsius oppugnabant, locuti sunt. quod sere vusu venire non solet, ut a quibus de veritate homines dissentiant, non eosdem etiam conentur deformare, atque ita auctoritate omni ipsos spoliare. Et quoniam de dolore, quem illo tempore cepit Paulus III. mentionem feci, libet etiam commemorare, quod ab eodem illo familiari Contareni, & omnibus officijs cum eo coniuncto, Ludouico Beccatello, honesto in primis & fide digno viro, accepi, ad id confirmandum vehementer accommodatum: declarat enim mansisse diu in animo Pontificis ergitudinem hanc, ac leui quoque momento refricari solitam tantam plagam. nisi forte aliquis putet sapientissimum illum senem cotidie magis, in magna penuria talium virorum, cognouisse quantum incommodum olim acceptum fuerit obitu eius viri, qui ut quietorum temporum ornamentum ingens, ita perturbatorum presidium firmum erat: quum enim ad se illum euocasset, opera ipsius quibusdam in rebus usus, diligenter ex eo quaesiuisset, an praesens forte ille adfuisset, quum fato Contarenius functus est: rogauitque ut diceret aliquid de institutis & vita illius, cui statim, mihi affirmauit ille, se respondisse id, quod erat: mirificam fuisse Contareni integritatem fidemque in ijs omnibus rebus gerendis, quae mandata illi ab ipso forent, intelligeret ve ipse sua sponte, facere ad dignitatem Romanae reip. conseruandam: virumque illum vera probitate praeditum fuisse, non ficta ac simulata, quam personam plerique, ut eo perueniant, quocupiant, sibi callide imponunt: vnumque omnium Contarenorum veteres ac maxime ratas opiniones & animo probasse, & verbis etiam semper defendisse. quo sermone accepto commotum Pontificem Maximum, qui deambulabat,



labat, stetit, manuque iterum percussisse mensam prope positam, dixisseque non sine gemitu quodam ac suspirio, quod indicauit euulsam fuisse penitus omnem ex animo ipsius suspicionem, quæ quondam eo inculcata de illo vocibus maleuolorum fuerat. Amisimus profecto magnum virum, ac valde vtilem reip. nostræ ciuem. sed, vt alia, ita hoc magno constantique animo ferendum.

Quoniam autem non semel dictum est in hac vita de magna labe animi quorundam, quum ab ipso illo vitio magnopere Contareus abhorreret, qui alienam personam induentes (vnde Græco vocabulo, sumpto ab actoribus fabularum, vulgo ὑποκριταὶ appellantur) & eam quidem semper meliorem, vel optimam potius omnium, longe alij videri volunt, quam vere sint; atque ita magnis in rebus imponunt simplicibus hominibus, nihil inde mali suspicantibus; vnde plurimum ipsos expectare oportebat; non alienum esse duxi de hoc etiam differere: & si enim numquam defuerunt, qui fallacias & dolos horum nefariorum hominum aperirent, ac maxime illos esse cauendos in vita admonerēt, numquam tamen ita probi viri eruditi & instructi fuerunt, vt satis possent artes eorum intelligere, atque in insidias etiam vitare. In primis autem in pietatem nostram Christianam, quæ tota in simplicitate animi fundata est, radices egit, atque incommoda sæpe magna apud nos peperit hæc fraus. Quo maiore odio digni sunt hi pessimi mortales, qui in re, quæ quo magis pura integraque est, eo magis probatur, astutis consilijs vtuntur, ac dolos malos exercent. Hoc etiam aliquo modo significasse videtur doctissimus vir Plato, qui, hoc genus hominum notans, inquit. postremam iniustitiam esse, videri uelle optimū uirum, quum minime sis. Idemque ab Aeschilo, non solum graui poëta, sed etiam docto in disciplina Pythagorea prolatum est, quum ferret in celum magnis laudibus Amphiaræum, summum illum augurem, eundemque sanctissimum virum: inquit enim ipsum non studuisse quod mul-

ti faciunt, ut videretur optimus, verum ut esset. nam quod nos, malis multis doctos, reddunt etiam aliquando dubios & incertos: faciuntque, ut probos honestosque viros ab improbis & impuris distinguere nequeamus, non dici etiam potest quantopere hoc pacto obsint, cum apud Euripidem etiam sapiens antea semper habitus Theus, eo nomine suspectam habuerit eximiam probitatem, castitatemque filij: insimulatus enim falso Hippolytus, quod cubile ipsius violasset, quum se ille apud eum purgaret, quod vita sua ab eo scelere valde remota esset, fidem ea de causa non fecit: timuit enim pater ne tenuis victus, cultusque, quo filius delectabatur: abstinentiaque a vescendis animantibus, simulata foret: simulque ne disciplina Orphei, quam ille profitebatur, familiaritasque demum Dianæ, in qua se valde iactabat, ficta esset. quare in alteram partem miserabiliter peccauit. Sed eo redeamus vnde digressi sumus. Idem etiam intimus consilij Contareni: nec minus studiosus famę existimationisque huius optimi, ac prudentissimi viri, quem sibi in vita tamquam viuum quoddam exemplar probitatis proposuerat, notam, quam improbe vitæ ipsius inurere preposuerat quidam amicus studuit, hoc pacto deleuit. Narrat enim forte euenisse, ut illo ipso tempore, quo grauius Contarenius ægrotabat, Bernardinus Ochinus, illę nouę condendę Franciscanę familię dux & auctor, Bononiam venerit, Romam ad causam dicendam euocatus: insimulabatur enim in ijs contionibus, quas Venetijs habuerat non nulla dixisse, quę veteribus decretis Romanę reip. aduersabantur: additque habuisse illum litteras ad se scriptas a Giberto episcopo Veronensi, quibus a se petebat, ut diligenter ageret cum legato, ut hortaretur hominem ad sistendum se in iudicio: coramque ad ea, quę ipsi obieciabantur, defendenda: quum cognouisset ipsum timide ad id descendere, egereque stimulo quopiam & auctoritate magni alicuius & grauis viri: neque enim adhuc Gibertus hominis leuitatem inconstantiamque perspe-

T xerat.

xerat : is autem vesperi venerat, quum iam cenassent omnes, legatus tamen adhuc in lectulo vigilet: qui, quum speraret morbum postridie leuiorem fore, vt commodius eum audire posset, loqui que cum ipso familiariter, iussit vt preberentur illi, quæ ad curandum corpus pertinerent: contigisse vero contra, vt ea nocte morbus ingrauesceret: quare mane legatum totum distentum fuisse in remedijs, quæ medici adhibenda iusserant, sumendis, nouisque curationibus: vnde factum fuerit, vt neq; de hospite illo, neque de alia vlla re agi cum eo potuerit. Bernardinus interim, cui in primis mala sua mens, malus que animus cognitus erat: atque vmbra etiam, vt, qui si bi alicuius sceleris conscij sunt, faciunt, reformidabat, coepit vereri ne astute illic detineretur: putabat enim fingere morbum legatum. quo metu homo oppressus (nam hoc verum esse non multo post e consilio, quod cepit perspectum est) non cessabat Ludouicum urgere, vt rogaret legatum potestatem sibi faceret abscondi; in quo ille ipsi non obtemperabat, putans breui fore vt melius esset legato: videbatur enim sibi perspexisse cupere illum magnopere cum Bernardino loqui; qui sane vsque ad id tempus magnum sibi nomen ex facultate illa dicendi, & opinione sanctitatis conciliarat: Cum autem, magis magisque semper timore crescente, instaret, Ludouicus in portuno sane tempore coactus est, cum estu febris in lectulo legatus iactaretur, eo irrumpere, rogareque vt pateretur ipsum abire: in quo sane humanissimus vir ei morem gessit. quumque ad eum Bernardinus introductus esset, hæc ipsa verba protulit. Vides quo in statu sim. excusatio hæc apud te iusta sit: & ora, vt Deus opt. max. mihi propicius sit: feliciterque institutum iter perage. cui ille tantum, demisso (vt moris est) capite, respondit se prorsus ita facturum: ilicoque abiit. Hic est sermo, quem Bononiæ habuit cum sanctissimo, & modestissimo uiro Bernardinus. nec verbum præterea additum est. qui tamen postea, quum susceptam uitæ rationem deseruisset:

set : acerrimumque se hostem Pontificiæ potestatis præ-  
buisset, vt se sapienter id fecisse ostenderet : a perditaque  
causa & flagitijs multis contaminata, merito defecisse : ha-  
bereque se multos socios eius consilij probare vellet, non  
veritus est criminari amicum, memoriæq; ac litteris pro-  
dere : questum secum esse eo tempore Contarenum de  
moribus institutisq; Romanorum antistitem : & infecta  
tione seua atq; iniusta bonorum : huiuscemodiq; alia mul-  
ta scribere prorsus inania ; & quæ non solum a veritate  
abhorrerent, sed etiam vitæ eius, cui adfecta erant, nullo  
modo conuenirent. quæ cuncta Ludouicus (vt est vir o-  
ptimus & omnis officij, quod in amicitia coli debeat, o-  
bseruâtissimus) asseuerabat, resellendi eius mendacij cau-  
sa, & purgandæ innocentie uiri illius mortui, quem ui-  
tium magnopere dilexerat, nec tantum hoc se ita habere ;  
testimonio suo confirmabat, sed alios etiam testes huius  
rei producebat, qui præsentibus illis adfuerant : in quibus  
etiam nominabat Iulium Contarenum, fratris legati fi-  
lium : qui post eius mortem & ob naturæ probitatem, &  
ob commendationem patrui, creatus est Pont. Ciuitalis,  
cui præfecturæ regendæ præpositus antea fuerat. Cum  
hoc tanti momenti sit ad integritatem Contareni o-  
stendendam, abstergendamque maculam illi falso asper-  
sam, volui totam rem, vt factam eam accepi : ac pene ijs-  
dem uerbis, quibus mihi exposita est, commemorare.

Rebus autem gestis ab eo dum uixit enarratis, nunc quæ  
monimenta ingenij reliquerit, fructusque otij ipsius in-  
dicabo. prius tamen, quod adhuc ualet aliquid ad confir-  
mandam doctrinam hominis, testimonium de ea re gra-  
uissimi & eruditissimi uiri citabo : quod additum supe-  
rioribus testimonijs, quæ prodidi de eximio ingenio ipsi-  
us, præstantique cognitione omnium disciplinarum, ve-  
ra esse declarabit : simulque non sinet quempiam dubi-  
tare, quomodo ille, in vita plerumque occupata, tot tam-  
que præclara opera efficere potuerit, quæ multum etiam  
posteris profint, perpetuoque testentur, qualis ille, quan-

tusque vir fuerit. Ludouicus igitur, cui cognomen ferrei oris fuerit, nobilis philosophus, & qui multos annos in Bononienſi gymnaſio ſumma cum laude & admiratione omnium, qui aliquando ipſum diſputantem audierunt, matrem eam omnium optimarum artium coluit, mortuo Côtareno, quum ſermo ipſi eſſet inſtitutus cum honeſtis quibuſdam viris de damno, quod eo tempore factum eſſet interitu illius, plurimisque animi dotibus, ac maximis virtutibus, vna cum eo extinctis, inquit doloris plenus: (nâm virum cum valde dilexerat, in familiaritatemque ſe eius inſinuarat illo tempore, quo legati nomine urbem eam rexit.) Ego, quod mihi videor meo iure facere poſſe: nec enim malum me omnino eſſe exiſtimatorem harum rerum arbitror; adfirmo hunc hominem omnibus, quos aliquando cognoui in philoſophiæ ſtudijs merito laudatos, qui ſane non pauci fuere, præſtitiffe & ſcientia multarum rerum, & iudicij firmitate: ipſumque vere philoſophi grauiſſimo nomine dignum fuiſſe iudicò. Certe quum ego dealiquare, propria eius ſtudijs, cum eo diſerebam, videbar mihi præ illo minutus quidam philoſophus eſſe; vel potius nouus quiſpiam auditor, & plane rudis eius artis, quam profiterer, quare ad ipſum ſæpe me conſerebam, vbi locus aliquis obſcurior mihi negotium faceſſeret: in qua quæſtione quum paulo antea ipſe toto animo verſatus eſſem, & aliquas etiam horas, euolutis pluribus voluminibus, præterita die conſumpſiſſem: ille vero, vt exiſtimari poteſt, ſpatio multorum annorum nullam cogitationem de ipſa ſuſcepſiſſet, ita tamen apte & exquisitè nodos illos diſſoluebat, vt videretur diu multumque non multo antea de ea cogitaſſe. quare (inquit) ſæpe ego pæne ſtupidus euafi; mihi que potius cum cæleſti aliqua natura, quam cum mortali homine viſus ſum loqui: idque nunc, quia res ita ſe habet, verumque id prorſus eſt, prædico, nulla alia cauſa impulſus. quis enim non videt aſſentationi nunc locum non eſſe; quæ præterea a perſona, quam ſuſtineo longè ſemper abeſſe

abesse debet? Hęc asseueranter tunc ab illo prolata quum  
essent, auxerunt magnopere opinionem, quam, qui ade-  
rant, de præstanti Contareni ingenio antea in animis hæ-  
bebant. Sed etiam scripta, quanta fuerit eruditio ipsius,  
aperiunt: quę sane, vt ordine a me tradantur, hæc sunt.  
Edidit iuuenis adhuc (xxx. enim tertium ætatis annum  
tunc agebat) librum contra iudicium Petri Mantuani do-  
ctoris sui; nec tamen ea de causa minus pius, quamuis cõ-  
tra pietatem facere videretur, fuit: ille enim in omni ser-  
mone suo adfirmare solitus erat, ex opinione sententiaq;  
Aristotelis existimari debere animos nostros esse morta-  
les, quum contra ipse, sedulo aduersus eum disputans, ci-  
tatis multis locis, & tamquam tabulis obsignatis, ostende-  
rit longe aliter principem Peripateticorum de ea re sen-  
sisse: viderique potius immortalitate donatos ipsos Ari-  
stotelem esse voluisse. cuius opinionis antea Plato, vnde  
didicerat, sine vlla dubitatione fuerat. Argumenta autem  
illa firma ad probandum & graua fuisse, opusque to-  
tum valde elaboratum, perspicitur, quia acutissimus ille  
physicus in libro, quo defendit opinionem illam suam;  
acriter oppugnatam ab eo, quem instruxerat, tradit eum  
librum & doctissimum omnium & vberimum esse, qui  
omni tempore materiam illam persecuti sunt: additque  
videri prorsus eum diuina opera & manu fabricatum fuis-  
se. Scripsit etiam de Elementis libros quinque; in qui-  
bus viam omnem, rationemque Aristotelis diligenter ex-  
pressit: misit autem illos ad Mattheum Dandalum sor-  
oris suę virum: cuius hic supra mentio cum magnis verif-  
ique ipsius laudibus facta est. Addidit his, in altiore phi-  
losophiæ parte, libros quattuor, quos dicauit Paulo Iusti-  
niano, nobilissimo & clarissimo suo ciui. qui odio rerum  
humanarum, quum pertæsum esset varietatis ipsarum;  
vt facilius diuinas contempleretur: deoque ipsi toto ani-  
mo seruirer; in Etruscos montes cœtumque Camaldulen-  
sium se contulerat. Hi libri ei, qui attente legerit, nullo  
negotio patefacient, quæ fuerit vis animi ipsius, & quan-  
ta

ta prudentia in rebus grauioribus tractandis. Sed idem etiam (vt melius adhuc intelligatur factum illum natura et studio fuisse ad personam eam sustinendam, quam ipsi multo postea sapientissimus Pontifex: multumque semper omni in re prouidens, imposuit) iuuenis adhuc, vitamque colens liberam, ac nullis sacris astrictam: occasio nem hanc eius rei nactus, quod familiaris ipsius Pontifex Bergomas destinatus fuerat, ipsum instituere cupiens, duos libros scripsit de officio eorum sacerdotum: finxitque ita atque informauit talem virum, quales si forent, quibus tantum hodie commissum est, non laboraremus. quis enim non fateatur pias in primis castasque fuisse cogitationes ipsius: totaque mente ac studio solitum esse in illis volutari optimum virum, postquam alium instruere & ornare in ea vita ausus est, quam ipse adhuc non attigerat: nec vnumquam cogitarat, præcepta illa sibi vitilia aliquando futura? Præterea; quum orta quæstio esset in senatu de Pontificis max. potestate, diuinitus ne illa stabilita foret, an humanis consilijs regeretur: quumque multum de ea re illic in vtramque partem disputatum esset, domum reuersus, vt quid ipse de eo sentiret, ostenderet: omniique errore ciues suos liberaret, spatio vnus noctis libellum confecit, qui nunc excusus in manibus versatur. Sed, vt iisdem etiam in suo proprioque ipsorum munere prodesset: effigiemque eius reipublice; in qua natus erat, exprimeret, quinque libros confecit de magistratibus, reque publica Venetorum, qui itidem diuulgati sunt. Postquam vero in amplissimorum antistitum collegium cooptatus est, perlectis diligenter synodis omnibus, quæ varijs temporibus ob emendandum statum Christianæ reip. coactæ sunt, in breue quoddam corpus grauißimas quasque ipsarum collegit: seruato temporum ordine: materiaque omni, quam persecutæ sunt, demonstrata. Vtile vero mirifice potuit esse volumen illud ei synodo, de qua tunc summis contentionibus agebatur: quamque Paulus III. aduersarijs, reconciliando

rum



rum animorum gratia, proponebat: multumque opis ad  
ferre illis omnibus, qui in eo certamine versari deberent.  
misit autem opus hoc multarum vigiliarum ad eum, cu-  
ius maxime intererat, quid de ea re fieret: & qui eo tem-  
pore tota mente in illam curam incumberebat. Absolu-  
to autem illo, par huic opus; & quod eundem finem ha-  
beret, aggressus est: scripsit enim quattuor libros de riti-  
bus ceremonijsque nostrę religionis persuasionisq; Chri-  
stianę, quę Sacramenta appellant: quibus libris comple-  
xus est materiam illam omnem, & quę radix visque ipsa  
rum fuisset, declaravit: quidque demum pie credi, & cu-  
studiri de illis deberet, veris rationibus, argumentisq; sa-  
tis firmis comprobavit. nam ipsum, argumento hoc sum-  
pto, si, quod pollicitus erat, prestare voluisset, debuisse  
omnem questionem, de qua nunc tot tantęque lites &  
concertationes inter dissidentes partes reip. existunt, ex-  
plicare planum & exploratum est. quare sic quoque pre-  
clare instruxit & armavit illos, qui pro veritate commi-  
nus congressuri erant cum hominibus magno errore in-  
flatis, & causam eam malam obstinate defendentibus.  
Ut autem libellum alium, admodum utilem pravis opi-  
nionibus ex animis hominum euellendis, conficeret, oc-  
casionem hanc habuit. Factum est, quum ille Bononiam  
legati nomine obtineret, ut vir prudens, salutisq; gre-  
gis illius, qui fidei ipsius potestatique commissus foret,  
ut pastorem bonum decet, valde studiosus, ad eum veni-  
ret, medicinam ab eo petens; rationemque accipere cu-  
piens, qua saluum ipsum incolumemq; redderet, quum  
grauiter ægrotare non paruum partem ipsius cognosset:  
quam tamen totam rem ille ita tractari volebat, quum  
honestam nobilemque ciuitatem regeret, ut ne ignomi-  
nia illa notaretur, & tamen remedium cito adhiberet, ne  
magis malum serperet. Consilium ipsius quum mirifi-  
ce probasset Contarenius, multa animo reuoluens, ut e-  
rat summus & accuratus medicus huius pestilentis mor-  
bi, statuit demum ita rem esse agendam. Consecit tam-  
quam

quam institutionem quandam breuem Christiani hominis: collegitque, quæ magis mordere animum debent, probra omnia: & ita, vt aperire ipsa oporteat cum dolore sacerdoti: illum autem commentariolum *καὶ τὴν χροίαν* appellauit. qui sane non vni illi ciuitati sanandæ factus videretur, sed Christianis omnibus in officio retinendis, & ab illa contagione liberandis. eum vero grauis ille vir ad suos comportauit, diuulgatumque studio quodam & arte effecit, vt vulgo reciperetur, cunctique se viæ illi tenendæ, legibusque seruandis astringerent: statim enim probatus fuit omnibus, exceptis paucis illis, qui plane per diti ac desperati forent: posteaque & ipse formis excusus est. Quum autem, vt gesta tunc res est, temporique illi aptum fuit, nomen & ciuitatis & præfecti ipsius in sacris rebus curandis celauerim, illa postea patefacta, quum in commodi nihil amplius inde nasci possit, deberi puto per sonam etiam a me indicari. Moronus enim Mutinensium episcopus is fuit, qui & ipse non multo post ob singularem prudentiam in rebus gerendis, præclarâsq; alias animi dotes, auctus dignitate est a Pontifice maximo: cuius amplissimi sacerdotij insigne Bononiæ manibus suis legatus capiti ipsius imposuit. Illustrauit etiam scholijs quibusdam suis Contarenus multos obscuros locos in epistolis Diui Pauli, quum ipsas accurate legeret, quo sane in studio toto animo occupatus erat, cum mors eum oppressit. Sed etiam epistolas ipse non paucas conscripsit eruditas, & optimorum præceptorum plenas: vt libellos etiam non nullos alios, aliquam occasionem illorum conficiendorum nactus: præcipue autem studijs amicorum, varijsque eorum temporibus seruiens. in quibus est quæstio diligenter explicata, perdifficilis sane, magnique semper momenti habita ad vitam bene beateque degendam; qua traditur liberam esse potestatem nostrâ, omnique nexu causarum ac necessitate solutam. veteres illi *σοφὴ καὶ φημίαν* ipsam vocabant. & qui de fato disserunt, re huic contraria, necessario de ipsa disputationem suscipiunt.

suscipiunt. eum vero librum misit ad Victoriam Colu-  
mnam: feminam lectissimam, & quæ ob eximium amo-  
rem erga virum mortuum, admirabilemque ingenij lau-  
dem in condendo carmine, maximo quoque honore di-  
gna est. Sed etiam, ut sorori suæ, quæ se in castissimum  
cœtum mulierum Muranarum coniecerat, morem gere-  
ret: animumque ipsius suauissimo cibo aleret in ea solitu-  
dine, cui se dicauerat, interpretatus est duos Hebræorum  
illorum cantus Italico nostræ ætatis sermone: cum enim  
ille doctrina ingenioque suo prodesse quoque alienis stu-  
deret; non visus sibi est posse suis yllo modo deesse.

Quin etiam, eodem honesto desiderio incensus, ut utili-  
tibus fratrum suorum seruiret, qui crebro, mercaturis  
faciendis operam dantes, nauigabant, confecit libellum  
de cœtu maris, & quam causam reciproca illa fluctuum a-  
gitatio haberet, diligenter monstrauit: qui tamen liber  
amico ipsius commodatus, magno adhibito studio, recu-  
perari numquam potuit. Sed ne omnia diligenter mi-  
nutiona ipsius opera, quæ plurima sunt, enumerem: in  
quibus tamen appareret specimen illius doctrinæ ac iudi-  
cij, finem faciam: possum enim vere adfirmare, quodcum-  
que temporis vacuum a negotijs transigebatur, in his re-  
bus ipsum consumere solitum: omnesque vigilias suas  
eum consueſſe temporibus amicorum necessariorumque  
suorum consecrare: neque enim ostentationis & gloriæ  
causa huiusmodi seripſiones suscipiebat: in hisque se-  
dies atque noctes macerabat: quamuis iustus inde honos,  
neque magnopere reprehendendus consequatur: sed, ut  
nos dixi, voluntati amicorum, de commodisque in-  
dulgens: siue studiis suis memoriz-  
que feruens, ascriben-

do numquam cessabat. **V**

# PLVRES ORATIONES THVCYDIDIS.

conuersa ab eodem: nec tamen omnes continentes. h  
quod suspicari licet factum esse, quia non  
nullae ipsarum, interiectae inter  
has, perierint.

*Corcyraeorum oratio ad Athenienses.*



VI subsidium ad eos rogatum Athenienses veniunt, a quibus nullam pro magno aliquo beneficio gratiam; nullumque ex foedere auxilium deberi sibi intelligunt; id quod nos in praesentia facimus; ij primum eam rem; maxime quidem vilitati illis esse doceant oportet: si minus, certe non detrimento: deinde memores sese gratosque fore: quarum quidem rerum si nulla plane confirmata est, minime debent irasci, cum eorum nihil; quae postulauerant, impetrauerunt. Miserunt igitur nos Corcyraei, qui ita vos auxilium rogemus, ut haec firmissima (ut sperant) ad vos adferamus: quamquam accidit, ut vnum idemque nostrum institutum cum vobis nostris cum postulatis minime congruere videri possit, tum vero nobis hoc tempore inutile sit: nam, qui antehac numquam cuiquam nostra voluntate socij fuerimus, nunc id ipsum ab alijs implorare cogimur: vnaque in hoc Corinthiorum bello propter id ipsum deserti ab auxilio sumus, deque eo, quod antea nobis prudentiae ascribebatur, cum minime cogemur alieno arbitrio, cum alterum auxilio iuuaremus, ipsi periclitari in bello, id modo nobis reliquum est, ut inconulti homines, imbecillique animi iudicemur. Tametsi profligauimus nos quidem proxima nauali pugna ipsi per nos Corinthios: verumtamen, quoniam maioribus comparatis ex Peloponneso, reliquaue ex Graecia copijs  
bellum

bellum nobis inferre parant, neque domesticis nos opibus illorum impetum vlllo modo sustinere posse confidimus, summumque nostrum periculum agitur, si forte sub horum imperium redigamur, opem cum a vobis, tum a ceteris omnibus cogimur implorare: est autem æquum ignosci nobis, si non malitia, sed opinionis errore, ea audemus, quæ priori otio nostro sunt repugnantia. Quod si ea, quæ uolumus, a uobis impetrabimus, nempe casus hic nostræ necessitatis, multis uobis nominibus decori erit: primum quod non incommoda alijs ferentes, sed iniuriâ accipientes opæ vestra tuebimini: deinde quod maxime necessario nostro tempore amplexi nos, testatum beneficium vestrum clarissima memoria, maximeq; sempiterna collocabitis: tum valemus nos classe post quidem vos plurimum. Ac spectate quam magnam vobis fors occasionem ostendat, quam hostibus vestris acerbam: etenim ex copiæ, quas vobis esse adiunctas magnæ pecuniæ, magnæque gratiæ anteponeretis, sine periculo, sineque sumptu, non modo vltro sese vobis offerunt, sed adferunt præterea in vulgus quidem gloriam, a nobis autem quibus subuenitis, gratiam, vobis vero ipsis potentiam: quæ quidem per paucis vniquam vna omnia obtigerunt, paucique ita opem ab alijs imploratum veniunt, vt non minorem illis, vnde auxilium sibi postulant, vacuitatem periculorum atq; ornamentum apportent, quam ipsi inde ablati sint. Bellum autem, in quo nostra extare poterit utilitas, si qui vestrum sunt, qui nullum fore arbitrentur, ij erant longe: neq; sentiunt Lacedæmonios metu vestri bellum iam animo conceptum habere: Corinthios autem cum vobis esse inimicos, tum apud eos plurimum possideatque eo nunc operam dare, vt antea vos occupent, & cum suo hoc in nos conatu implicent, ne propter commune odium contra se nobiscum conspiretis, neq; eos alterutrum frustretur, quin aut nobis damnum, aut sibi firmitudinē comparent. Vestrum est igitur recipiendis in amicitiam Corcyraeis, cupientibus quidem eos præuenire, præoccu-

pareque ipsorum infidias, potiusquam contra aliquid infidiarum moliri. Quod si contentent, non esse rectum fuosa vobis colonos recipi; illud docendi sunt: colonias, quamdiu illis benigne sit a vetere ciuitate, tamdiu illam colere solere: vbi autem iniuria inferatur, alienari ab ea: non enim ut seruitutem perpetiantur deductæ sunt, sed ut iuris æquabilitatem cum ijs, qui domi remanent retineant. Iniuriam autem hos facere, id vero manifestum est: cum enim in iudiciũ de Epidamno vocarentur, armis maluerunt quam iure experiri. sitque adeo vobis pro disciplina id; quod in nos propinquos cognatosque suos patrarunt, ne vos infraudem deduci patiamini, neue, quod vos rogarint, temere faciatis. quem enim gratum hostibus fecisse maxime raro pænituerit, is quam diutissime tutus erit. Nec vero nobis recipiendis frangitis fœdus; quod cum Lacedæmonijs ictum est: cauetur enim quæ Græciæ ciuitates fœderi adscriptæ non essent, eas utriusque commodum sit licere sibi socias adiungere. Estque omnino illud haud quaquam serendum, si his quidem licet naues ex fœderatis complere, prætereaque reliqua ex Græcia; nihiloque secius ex his, qui sub vestro imperio sunt: vobis autem cum hoc ipso auxilio, tum reliqua omni ope interdicent: ponentque in iniuria, si, quæ vos rogamus, ea aufcremus a vobis. At vero nos longe sane plura habebimus, in quibus vos, nisi exorari vos sinetis, accusemus: nam nos quidem, quibus periculum intenditur, neque vobis sumus inimici, repellitis: hos vero, qui & hostes sunt vobis, & nos oppugnatum veniunt, tantum abest ut prohibeatis, vt etiam e finibus vestris conductas copias habere eos patiamini: id quod minime æquum est fieri a vobis: sed aut interdicere debetis ijs, qui vestræ ditionis mercede apud aliquos militant, ne apud hos mereant, aut nos quoque omnino quidem, vt videbitur, iuuare: maxime vero vt aperte in amicitiam receptos, tueamini. Ostendi igitur, quod initio proposueram, multis de causis hanc rem vobis vtilitati esse, præcipueque quod eosdem habeamus

mus inimicos, quod manifestissimum est argumentum : eosque haudquaquam infirmos, sed qui nocere ijs, qui a se defecerint, valeant. Naturali vero & non terrestri auxilio oblato, non idem habet incommodi ipsum repudiare. Itaque prohibendi vobis omnes sunt, si quidem possitis, classes habere: sin minus, firmissimi quique amici vobis adiungendi. Siquis vero ex usu vestro ea, quæ a nobis dicuntur, esse existimat: metuit autem, ne, si hæc secuti eritis, sedus rumpatur, is tenere debet, suum hunc metum, adiunctis viribus, pauciori hostibus fore: quod autem illis animum auget, qui nos sententia sua non recipiunt, minime firmum cum sit, apud validos hostes fore a metu vacuum. Nec vero existimate de Corcyra magis nunc consuli, quam de ipsis Athenis: quibus quidem haud recte sane prospiciunt, qui præsentia modo intuentes, ad id bellum, quod impendet, quodque adeo prope iam iamque adest, civitatem sibi adiungere dubitant, quæ conciliata alienatave magnas in vtramque partem habitura sit opportunitates: est enim posita in eo cursu, qui est ex Italia atque ex Sicilia: ut cum inde ad Peloponnesios ire classem, tum illinc eo transmittere, facile prohibere possit, tum summa eadem ad alia omnia est opportunitate. Atque, ut per breui comprehendam, vosque cum vniuersos, tum vero singulos doceam: minime vobis committendum esse, ut nos destituatis. Tres omnino Græcis sunt classes non contemnendæ: ea quæ apud vos est, nostraque, atque hæc Corinthiorum. quarum si vnam deseritis, necesse est duas in vnum coire: atque ita, ubi nos prius Corinthij oppresserint, cum Corcyreis simul Peloponnesijsque classe decertabitis: quod si nos receperitis, nostras naues, quibuscum bellum aduersus eos geratis, ad vestras adiungatis.

Corinthiorum





VONIAM Corcyraei hi non modo de sese recipiendis, sed de nostra etiam iniuria, deque eo, quod oppugnari se a nobis rectum esse negent, dissenserunt, nos quoque; necesse est utraque de re pauca prius memorare, quam ad reliquam orationem accedamus: sic enim & de nostris postulatis certius, quod constituatis, habebitis: & quod hi vos rogant, non sine causa respuetis. Aiunt igitur sua factum esse temperantia, quod neminem antehac sibi socium adiunxerint: illi vero non virtute, sed malitia id instituerunt, quod facinororum suorum nec socios, nec vero testes habere, nec adeo, eos cum inuitarent, erubescere volebant. Tum ciuitas ipsa opportuno loco posita, cum proficisci ipsi nauibus minimum cogantur, & alios necessitate ad se appulsos, quam plurimos excipiant, eos iniuriarum disceptatores constituit, quas ipsi alijs inferunt grauiores omnino, quam ut ullius fœderis pactio pati possit: atque in hac pulchra a fœderibus solutione, in qua se iactant, non illud spectatum est, ne in alienæ societatem iniuriæ traherentur, sed illud, ipsi ut per se iniuriam facerent: atque, ubi plus viribus valerent, vim inferrent: ubi clam essent, fraudarent: ubi quid adripuissent, nulla esset verecundia. Etenim viri boni si essent, quemadmodum dicunt, quominus fontes fuissent, eo illustrius suam virtutem, cum equo parique iure viuerent, ostendere potuissent. Sed nec in alium quemquam, nec in nos tales extiterunt: cumque nostri sint coloni, semper a nobis dissident: nunc bellum etiam faciunt. Dicunt autem non se ad iniuriam patientiam deductos esse: verum nos quoque negamus propterea a nobis eos in coloniam missos esse, ut contumelia ab illis adficeremur, sed ut principatum teneremus, & quo ad decet, ab illis coleremur. Reliquæ itaque coloniæ ma-  

gnope

gnopere nos obseruant, diligimurque a colonis plurimum: perspicuum est, si maiori ipsorum parti placemus, his solis recte nos meritoque displicere non posse: nec contra quam decet, bello persecuturos ipsos fuisse, nisi in signi aliqua accepta contumelia: & tamen siquid aliquando a nobis peccatum esset, dolori nostro concedi id ab illis æquum erat: nos autem horum moderationi vim afferre turpe putare. Verum contumelia & diuitiarum affluentia elati, cum alia multa in nos deliquerunt, tum Epidamnium, oppidum nostrum, quoad intestinis malis vexatum est, non vendicarunt; ubi vero nos subsidio uenimus, ui captum occuparunt. At petijisse dicunt, uti hac de causa iure antea inter nos disceptaretur: qua quidem in re animaduertendum est, non qui iustitiam prætexat, quique ubi in tuto sit, tum demum in ius eat, eum aliquid dicere: sed qui, priusquam in certamen uenerit, factis pariter atque oratione æquitatem retinuerit. Nam hi qui dem non ante oppidum a se oppugnatum, sed ubi eam rem minime a nobis negligi intellexerunt, iustitiæ tandem splendorem obiecerunt: atque huc ueniunt, nec satis habent, quæ ipsi ea in re peccarunt, nisi uos quoque non belli, sed maleficij socios habere postulent, atque a nobis dissentientes secum consentire iubeant: illi uero tum adire uos debuerunt, cum procul aberant a periculo: neque id tempus expectare, cum & nos iniuriam accepimus, & ipsi in discrimen uenerunt, cumque uos, qui minime illorum potentiæ participes fuistis, nunc illis auxilium impertiamini, qui que ab illorum facinoribus multum afueritis, eque atque ipsi a nobis acculemini: sed communicata pridem potentia, quæ deinde consecuta essent, ea quoque communia habere, nec tam inique inuidiam modo suorum uobiscum facinorum partiri. Docuimus igitur, cur & nos iustitia consili huc uenimus, & ij uolenti iniusti que sint: nunc, cur eos a uobis recipi ius esse negemus, attendite. Quamquam enim sedere cauetur, quæ ciuitates adscriptæ non sint, ijs licere cum alterutro sese

se se coniungere: tamen haud ijs ea coniunctio permiffa est, qui alteri iniuriam faciant, sed ijs, qui, cum nemini se se subtrahant, praesidio egeant: quique ijs, a quibus recepti sint, si prudentes fuerint, pro pace bellum conflatum non sint. id quod vobis, nisi audire nos voletis, visu venire necesse est: non enim his tantum adiutores, sed etiam nobis pro federatis hostes efficiemini: etenim si cum ijs vos coniugatis, minime selectis vobis cum ijs pugnare necesse habebimus. Est igitur æquum maxime quidem vtroque ut reiiciatis: sin minus, contra atque illi postulant, nobiscum ut contra eos conspiretis: cum Corinthijs enim sædus iecistis, cum Corcyraeis autem ne inducias quidem vniquam vllas pepigistis. Nec vero hunc morem institute eorum, qui ab alijs defecerunt, recipiendorum: quando ne nos quidem, cum a vobis Samijs defecissent, deq; illis tuendis reliquorum Peloponnesiorum in contrarias partes sententiae distraherentur, contra vos suffragium tulimus: aperteque restitimus, cum contendere remus quemque ad se pertinentes socios punire ius esse. Quod si, qui aliqua in re deliquerunt, eos ad vos receptos tuebimini, profecto extabunt de vestris haud pauciores, qui ad opem nostram confugiant. Quare contra vos magis eam rem, quam contra nos inducetis in morem. Ac iustas quidem postulandi causas, firmasq; Græcorum legibus has habuimus: quibus autem vos admonemus ac rogemus, ut eam nobis gratiam, quam debetis, reseratis, hæc habemus: quam quidem nos, qui neq; hostes vobis sumus, ut damno: nec rursus amici, ut molestie vobis futuri simus, nunc repetimus. Etenim cum longarum nauium quondam egeretis, ad Aeginetarum bellum id, quod supra Medorum res gestum est, naues a Corinthijs x. numero accepistis: atq; hoc nostro beneficio: itemque illo de Samijs, cum perfecimus nos, quominus illos Peloponnesij armis defenderent, consecuti estis, Aeginetas ut superaretis, & Samios vicisceremini: idque ipsum eo potissimum tempore accidit, cum homi-

nes in hostem elati, omnia præ vna victoria contemnunt, cum & eos, qui præsto sint, tametsi antea hostes erant, tamen amicos putant: quique obstant, etiam si forte amici sunt, pro hostibus habent; quin proprias etiam res propter præsentis contentionis studium facere deteriores solent. Hæc vos animo repetere, hæc iuniores de maioribus natu discere debetis, atque ita statuere, paribus nos beneficijs remunerari vos æquum esse; nec vero sic existimare; rectum quidem hoc esse, sed vtile fore bellum: ubi enim minimum turpitudinis, ibi utilitatis est plurimum. Tum autem bellum quidem, quod cum futurum Corcyrei dicerent, eius vos metu territantes iniuriam facere iubebant, incertum est: nec eo decet suspensos vos certas iam, presentesque cum Corinthijs inimicitias suscipere; potiusque uestra erit moderationis, siquid antea suspitionis propter Megarenses susceperatis, id nunc oblitterare: posterius enim beneficium, tametsi leuius est, tempore quidem illatum, uel ad grauiores delendas iniurias satis uirium habet. Nec uero quod maritimas pollicentur copias, mouere id uos debet: firmiore enim potentia muniti sunt, qui ab æqualium iniurijs sibi temperant, quam qui quod adest tantum, quodque præsens est cogitantes, cum periculo augentur & crescunt. Et quoniam in id ipsum incidimus, in quo illud apud Lacedæmonios vsurpatum est a vobis, suum quemque socium punire ius esse, nunc idem a vobis responsum expetimus: qui nostro cum suffragio beneficium cōsecuti fueritis, uestra sententia detrimentum inferre nobis non debetis. Par igitur pari referte: atque illud cogitate, hoc vobis tempus datum esse, in quo & qui adsint, amici in primis iudicentur: & qui obstant, hostes; ac Corcyræos hosce neque in societatem repugnantibus nobis recipite, nec iniuriam facientes adiuuate. Atque hæc si ita feceritis, cum officio fungemini, tum optime vobis ipsis consulētis.

*Corinthiorum oratio ad Lacedæmonios.*




**Q**UOD uos fidentiores reddit Lacedæmonij de uestris publicis priuatifq; institutis, facit, ut minorem fidem habeatis alijs, siquid dixerimus: atque ex hoc modestiam vos quidem conseruatis, sed iidem in maiore externarum rerum ignorantione versamini. Nam cum sexpenumero, quæ nobis ab Atheniënsibus damna impenderent, prædiceremus, non ut vnumquodque dictum est a nobis, sic vos percipistis, sed ita arbitrati estis, suarum quemque potius priuatim inimicitiarum causa ad dicendum accedere: eoque non antea quam illa euenirent, sed cum geruntur iam, hosce conuocatis socios, in quorum conuentu ut loquamur, magnopere scilicet ad nos pertinet: quoniam & ab Atheniensibus contumelia adfecti, & a vobis neglecti, plurima de quibus queramur, habemus. Ac siquidem illi occulte iniuriam Græciæ inferrent, planum id nobis esset faciendum, utpote cum eius rei vos essetis ignari: nunc autem quid opus est longa ijs oratione, quorum alios in seruitutem adductos, alijs insidias, in quibus nostri in primis socij, factas videtis? quæ illi ad bellum, siquod forte gerendum fuerit, iamdudum præparata habent. Quorsum enim pertinuit, Corcyram repugnantibus vobis occupare? aut Potideam obsidere? quorum alterum est opus maximo ad res Thraciæ usui, alterum permagnum scilicet nauium numerum Peloponneso suppeditabat. Atque hæc culpa euenerunt vestra, qui post Medorum res primum munire eos urbem passi sitis, deinde longos muros constituere: atque adeo hoc quoque tempore non modo ijs, quos illi in seruitutem adduxerunt, sed vestris etiam socijs libertatem vos adimitis. siquidem non is, qui seruitute opprimit, sed qui, prohibere cum possit, aspernatur, is verius id agit, præsertim cum sibi vindicandæ

dicandæ in libertatem Græciæ laudem asciscat. Vix igitur nunc tandem conuenimus: ac ne nunc quidem certa de re: neque enim amplius, fiat nobis iniuria nec ne, sed quo maxime modo eam repellamus, quærendum erat. Nam hi quidem deliberata re, molientes iam abiecta cunctatione incertos animi inuadunt: tenemus enim quam Athenienses via, atque vt pedetemptim alios aggre-  
diantur. Ac quamdiu quidem latere se vos, propter vestram tarditatem, arbitrati fuerint, minus confident: vbi vero animaduernerint intelligere quidem vos quægerantur, sed ea negligere, tum vero acriter incumbere. soli enim vos ex omnibus Græcis Lacedæmonij cunctamini, neque vi cuiquam, sed procrastinando resistitis: soli neque non crescentes statim hostium opes, sed posteaquam duplicatæ sunt, tum demum eas tollitis. At enim cauti dicti estis. In eo igitur oratio plusquam res valuit. etenim & Medum ex vltimis orbis terræ finibus, antea in Peloponnesum inuectum scimus, quam vos satis ad occurrendum parati essetis: & iidem nunc Athenienses, qui haud quaquam tam longe quam ille, sed admodum prope absunt, negligitis: defendereque bellum quam ipsi inferre mauultis, fortunæque, cum longe validioribus, quam vos estis, certantes vos permittere: propterea quod & Barbaros ipsos quamplurima sefellisse tenetis, & ipsos vos Atheniensibus magis ijs rebus, in quibus ab illis offensum est, quam vestro subsidio restitisse. Nam spes quidem vestra quosdam iam, qui vobis credentes, eo imparati erant, perdidit. Nec vero existimare vos velim, odij potius, quam obiurgationis causa hæc a nobis commemorari: obiurgatio enim errantium est amicorum: accusatio autem iniuriam facientium inimicorum; tum nos, si quisquam est alius, idoneos esse profiteamur, qui alterum reprehendamus: præsertim cum multum inter vos, atque illos intersit: id quod minime vos sentire nobis videmini, minimeque ratiocinati esse; quales Athenienses sunt, quibuscum futura vobis res est, quamque multum,

atque adeo quam prorsus vobis antecellant : illi enim & ad nouandum prompti, & ad excogitandum acuti, & ad ea perficienda, quæ mente præceperint celeres sunt. vos contra quæ habetis conseruatis, nihil excogitatis, vixque necessaria quæ sunt, obitis. Illi rursus, & supra vires audent, & supra consilium experiuntur, & in rebus aduersis bona spe sunt : vestra autem consuetudinis est, minus etiam, quam vires, quamque consilium vestrum ferat, suscipere, neque firmis rebus confidere, & aduersis leuatum iri vos desperare. Præterea illi strenui, vos tardi : illi multum peregrinantur, vos domi maxime manetis. sic enim illi existimant, sua profectioe aliquid sibi quæsitum iri : vos vero in eis quoque, quæ prompta iam parataque habetis, si ad alia aggressi fueritis, detrimenti aliquid accepturos vos putatis ; iidem superatis hostibus plurimum progrediuntur, ac minimum ; ipsi victi si sint, recedunt. Præterea corporibus quidem, tamquam maxime alienis : mentibus autem, vt proprijs, vbi patriæ profuturi sint, vtuntur : atque ea, quæ animo perceperint, cum re non adsequuntur, suis se priuari rebus arbitrantur : quod si quid inuaserint, eoque potiti sint, parui id præ ijs, quæ effecturi sint, pendunt : sin autem conata minime perfecterunt, alia rursus sperando id damnum sarciant : soli enim ea, quæ concupierunt, vno eodemque tempore sperant ac tenent : propterea quod quæ in animum vt facerent induxerunt, confestim aggrediuntur, ijsque in rebus omnem ætatem cum industria ac labore exigunt : & quoniam continenter in quærendo sunt occupati, partis quam minimum fruuntur ; nec uero aliud esse, diem se sum agere, putant, quam quæ agenda sunt, administrare : delidiosum autem otium æque in molestijs numerant, atque operosum negotium. Quo circa recte aliquis sic breui comprehendens dixerit, tales eos extitisse natura, vt neque ipsi quiescere possent, nec alios paterentur. Atque hac uobis tali constituta aduersaria ciuitate Lacedæmonij tamen cunctamini : atque ita statuitis, non



ijs mortalibus otium quam maxime esse diuturnum, qui  
 re sane ac factis iustitiam colant: animi tamē eius esse intel  
 ligantur, vt, si quis iniuria prouocauerit, minime id latu-  
 ri sint: sed eo æquitatem metimini, vt neque alijs graues  
 vos sitis, &, dum iniuriam acceptā vlciscimini, ne aliquid  
 incommodi ipsi capiat: id quod vix adsequeremini, si  
 vobis vestræ similis ciuitas finitima accidisset. Nunc ve-  
 ro, id quod antea ostendimus, nimium antiquis institutis  
 cum ijs agitis. Necessario enim, vt in artibus, quę nouis-  
 sime gignuntur, ea excellunt. Ac quietæ quidem ciui-  
 tati optimum est institutis stabilibus vt: qui vero multis  
 occurrere coguntur, ij multa noua excogitent necesse  
 est: eoque Atheniensium res propter varios illorum co-  
 natus magis, quam vestræ renouatæ sunt. Verum sit in  
 hunc vsque diem vestra cunctatio definita, ferreque cum  
 alijs, tum vero Potidæatis auxilium ita, vt polliciti estis:  
 atque in Atticam confestim impetum facite, ne homines  
 amicos, cognatosque vestros inimicissimis prodatis: reli-  
 quosque nos ad aliam aliquam amicitiam per desperatio-  
 nem detrudatis: nec enim ea in re quicquam aut in deos,  
 fœderis testes, aut in homines, qui audituri hæc sunt, pecca-  
 bimus: rumpunt enim fœdus, non qui destituti ad alios  
 sese conferunt, sed qui, quibus auxilio sese futuros iureiu-  
 rando sanxerunt, eos destituunt. Quod si promptos præ-  
 bere vos voletis, permanebimus: nec enim sine scelere ve-  
 stram commutare amicitiam possumus, aut quemquam  
 inuenire, quo cum æque ac vobiscum consueueri-  
 mus. Hæc prudenter statuite: dateque ope-  
 ram ne Peloponnesum, cuius principa-  
 tum obtinetis, minus amplam,  
 quam a maioribus acce-  
 pistis, habeatis.





**N**ON ob eam causam Lacedæmonij legati nos quidem sumus, vt, socios vestros cōtra diceremus, sed vt de quibus nos ciuitas misit, ea ageremus. Verumtamen cum haud paruam nos increpantium vociferationem audierimus, adsumus: minime nos quidem, vt ciuitatum criminationibus respondemus, quando neque nostra, nec vero illorum ad iudices tamen oratio haberetur: sed ne vos tantis de rebus facile socijs adfensi, minus prudens consilium caperetis: & simul ad omnem istam orationem, quæ habita est in nos, dicere volumus; docereque nos non immerito, quæ possidemus, tenere, & nostram non indignam esse ciuitatem, quæ aliquo in numero habeatur. Ac valde quidem prisca commemorare nihil attinet, quorum auditionem magis, quam aspectum eorum, qui audituri sunt, testem habeamus. Medicas autem res, atq; ea, quorum conscij vos estis, vsurpare, quamquam molesta est earum rerum assidua prædicatio, tamen necesse est. etenim si ea, quæ tunc cum periculo gessimus, vtilitatem habuerunt, atque eius vos re participes fuistis, iniquum est nos verborum fructu, siquis est, vsque quaque priuari; nec vero deprecandi potius quicquam, quam testificandi ostendendiq; causa, qua cum ciuitate certamen vobis constitutum sit, nisi prouideritis, verba faciemus. Itaque & ad Marathonem cum Barbaro nos manum per nos conseruisse dicimus, & ille cum post rediisset, neque eius impetum vllō modo terra possemus sustinere, vniuersa ciuitate in naues imposita classe ad Salaminam vna cum ceteris decertasse: quæ quidem res eum cohibuit quominus, ad vnāquamque singulatim ciuitatem classe adpulsa, Peloponnesum vastaret, cum illæ contra tantum nauium numerum opem inter se mutuo ferre non possent: cuius quidem rei eius ipsius factum maximo est argumento: na uali

uali enim pugna victus, vt qui non iam easdem haberet copias, confestim cum maxima exercitus parte donum reuersus est. Quæ cum ita ceciderint, aperteque intelletum sit, in nauibus fortunas Græciæ constitisse, tria nos ad eam rem maxime vtilia subinistrauimus, nauium maximum numerum, ducemq; hominem prudentissimum, atque animi eximiam quandam alacritatem. Ac nauium quidem quadringentarum numero duas tertias partes, aut paulo eo pauciores, ducem vero Themistoclem, cuius in primis opera perfectum est, vt in nauibus in freto cōfligeretur: quæ res sine vlla dubitatione rem Græciæ publicam conseruauit. Itaque eam ob causam maxime ille homo peregrinus omnium, qui ad vos vmquam accesserint, in honore apud vos fuit: animû vero summe promptum, summeque fortem præ nobis tulimus, qui cum pedestribus copijs subsidio nobis venisset nemo, cumque reliqui ad nos vsque iam in hostium essent potestatem re dacti, statuimus vrbe relictâ, corruptisque rebus nostris, communem tamen sociorum, qui reliqui erant, salutem non deferere, neque committere, vt dissipati inutiles illis essemus, sed nauibus conscensis fortunam experiri: nec vero suscensere, quod nos antea non defenderatis. Itaque illud adfirmare possumus, non maius nos a vobis beneficium accepisse, quam dederimus: vos enim incolumibus etiam tunc oppidis vestris, atque vtea incolere in posterum vobis liceret, cum de vobis iam solliciti maximam partem non de nobis essetis, nobis succurristis. Itaque quamdiu nos incolumes tuimus, subsidio non venistis: nos autem ea vrbe, quæ iam nulla erat, nos cōmouimus: proque eo, quod tenui iam spe tenebatur, decertantes, vos pro nostra quidem parte, nosque ipsos saluos conseruauimus. Quod si aut initio ne agri vastarentur metuentes, Medo, id quod alij fecerunt, nos dedissemus, aut postea naues conscendere, utpote amissis iam omnibus bonis, ausi non essemus, nihil profecto erat, cur vos cum haud quaquam satis magnam pro hostium classe nauium faculta-

facultatem haberetis, proelio uelletis contendere, omnia-  
que illi sine ullo labore ex sententia successissent. Num  
igitur Lacedæmonij cum propter summam, quæ in no-  
bis eo tempore fuit, animi alacritatem, tum propter existi-  
mandi prudentiam, propterque imperium hoc, quod  
obtinemus, digni uidemur, qui non tanta inuidia apud  
Græcos simus? Nec enim id ipsum imperium per vim oc-  
cupauimus; sed cum uos, quod reliquum esset cum Bar-  
baris belli persequi recusaretis, socij se ad nos contulerūt,  
&, ut ipsorum duces in bello essemus, rogauerunt, quod  
nos ad hanc usque diem re ipsa primum coacti produxi-  
mus, maxime quidem timore commoti, deinde dignita-  
te, postremo etiam utilitate: nec enim tutum iam uiuere  
est, multorum odijs in nos excitatis; nonnullis etiam, qui  
defecissent a nobis, euerfis, cum uos nō eque atque antea  
amicos, sed suspectos atque inensos haberemus, deposito  
imperio in periculum nos committere; præsertim cum,  
ij, qui a nobis desciscerent, uobis sese adiungerent. Nec  
uero accusandi sunt, qui in maximis periculis utilitati cō-  
sulunt. Vos itaque Lacedæmonij sic Peloponnesi ciuita-  
tibus præstis, ut uestrum in ea re commodum proposi-  
tum habeatis. Quod si imperio eo tempore in perpet-  
uum, id quod nos fecimus, retinendo, odia in uos conci-  
tassetis, exploratum habemus, cum socijs nō secus, ac nos  
sumus, molesti essetis, coactum uos iri aut fortiter illis im-  
perare, aut ipsi periculum subire. Quare nihil nos mi-  
randum, nihil a cōmuni hominum consuetudine abhor-  
rens, fecimus, quod & delatum nobis imperium recepi-  
mus, neque nunc gloria, metu, utilitate, maximis qui-  
dem rebus, inducti illud deponimus. Nec uero id adeo  
nunc primum ortum est a nobis, sed ita semper compara-  
tum fuit, ut potentior imbecillio rem coërceat. Tum ue-  
ro digni eo nobis uidemur esse, ne uobis quidem secus iu-  
dicantibus, quoad utilitatis quidem rationem haberi pla-  
cuit. nunc autem ad honestatem abit, qua proposita ne-  
mo tamen unquam, cui uiribus aliquid consequi liceret,  
ab eo

ab eo commodo obtinendo remotus est. Satis vero magnam laudem ijs merentur, qui cum, hominum secuti naturam, alijs dominantur, pro potentia non iniqui sunt. Itaque si qui ea, quę nos obtinemus, acceperint, illos perfecturos putamus, ut qua nos sumus æquitate appareat: nam nobis quidem vituperatio, potiusquā laus nostram ob æquitatem comparata est. Quod enim in rerum contractarum controuersijs cum socijs nostri iuris iacturam facimus: quodq; illi apud nos eisdem legibus iudicio nobiscum contendunt, litigiosi habemur: nec cuiquam in mentem venit cogitare, quid sit, cur ceteris, qui alibi gentium rerum potiuntur, minusque æqui, quam nos, sunt ijs, quos in ditione tenent, vitio id non detur: nam ubi vim adhibere licet, litigare nihil attinet. At hi adueti iam æquo parique iure nobiscum viuere, si paulum modo de eo, quod ipsi æquum esse opinantur, aut propter nostrum iudicium, aut propter eam, quę imperio comitatur, potentiam, aut quoquomodo, imminutum fuerit, non propterea, quod maxima illis pars remissa est, gratiam habent, sed aliquid ademptum esse ægrius ferunt, quam si a principio, repudiatis legibus, aperte iniuriam facere instituissemus. Namq; illud ne ipsi quidem sic disputarunt, inopem potenti non decere succumbere, sed nescio quo pacto circumueniri iudicio se, quam vi cogi, iracundius homines ferunt: in altero enim par pari iniuriam infert: in altero qui plus potest imbecilliori vim adfert. Itaque cum a Medis multo tractarentur asperius, sustinuerunt: nostrum autem imperium acerbum videri nihil mirum: semper enim id, quod instat præsensque est, ijs, qui sub alterius ditione sunt, graue est. Quod si sublatis nobis ad vos summa imperij redeat, nã vos bene uolentiam, quam propter nostri metum collectam habetis, si quidem eam mentem, qua fuistis, cum contra Medos imperium breui tempore obtinuistis, conseruatis, celeriter effundetis. Vos enim nec admisceri se alios vestris inter vos legibus permittitis, & qui aliquo exitis, neq; ijs

ipsis vtimini, neq; ijs, quibus reliqua Græcia viuere con-  
suevit. Quamobrem etiam atque etiam deliberate: nec  
enim parua res agitur, neq; aliorum adducti voluntate  
ac querela proprium vobismet ipsis laborem imponite:  
atque in bello, quam multa improuisa accidunt, prius-  
quam id susceperitis, prospicite: vbi enim longius du-  
ctum est, in graues & acerbos casus desinere consuevit:  
a quibus æque vtrique absumus, atque vtram in par-  
tem euasurum sit, incertum periculosumque est. At ho-  
mines mouendis bellis præpostere faciunt: rem enim præ-  
cipiunt, quod erat posterum: vbi vero iam plectuntur,  
tum demum ad orationem redeunt. Nos igitur, qui nul-  
lo dum tali in errore neque ipsi sumus, neque versari vos  
videmus, edicimus vobis, vt dum integrum est, dum re-  
cta capere vtrisque consilia licet, ne sedus rumpatis, ne eu-  
iusiurandum violetis: de controuersijs autem iure ex se,  
dere disceptetis. Si minus, deos periurij vindices testa-  
ti, qua vos præeuntes nos deducetis, ea vos belli auctores  
propulsabimus.

*Contio Pericls.*



**N** pristina ego mea sententia maneo.  
Athenienses, Peloponnesijs ceden-  
dum non esse: quamquam intelligo  
non eadem alacritate homines bellum  
cum suadetur, suscipere, & cū vsus ve-  
nit, gerere solere: sed aduersis in rebus  
animo immutari consueuisse. Hoc igitur quoque tem-  
pore faciendum mihi esse video, vt nō dissimilis fere sim  
auctor consilij. Quamobrem, qui mihi assensi fueritis,  
cōmuni sententię, si quid sorte fecus ceciderit, vt opem u-  
ferre memineritis, æquum erit; aut ne si ex sententia qui-  
dem successerit, vllam vobis prudentiæ partem vindiceb-  
tis. Fieri enim potest, vt aduersi rerum casus temerita-  
tem ipsi in se habeant, non minus, quam hominum cogi-  
tatio-

tationes: eamque adeo ob causam, vbi quicquid contra ac ratio postulet, euenit, fortunam accusare solemus. Lacedæmonij igitur cum iam antea inimico sese in nos animo esse præselerant, tum vel maxime id hoc tempore aperte ferunt: cum enim in sœdere sit; si quid controuersig oriatur, vti de ea re iure inter nos disceptemus: ab utroque autem, quod vterque habeat, teneatur, numquam nec ex iure agere nobiscum, cum iudicium nos non recusaturos profiteremur, nec iudicium ipsi accipere voluerunt. Bello scilicet malunt, quam oratione de controuersijs disceptare: nec iam huc expostulatum, sed imperatum, veniunt: iubent enim discedere nos a Potidæa, et Aeginæ leges suas iuraque reddere: tum plebiscitum, quod de Megarensisibus factum est, rescindere: Græciam etiam suis vt legibus vti permittamus, qui ad nos nouissimi venerunt, edicunt nobis. Nec vero, quod ad Megarensum plebiscitum adinet: id enim illi obijciunt in primis, quo etiam sublato bellum futurum negant, existimare vos velim, paruam ob causam bellum vos habituros, si de eo delendo recusaueritis, neque arbitrari culpam in vobis residere, quod leui de causa ad arma ieritis: nam parua hac in re vestrum omne firmamentum agitur: quo enim animo sitis temptamini, atque in hoc si parueritis, perinde quasi metu adducti in eo quoque dicto audientes futuri sitis, continuo maius aliud aliquid imperabitur: quod si contra enitemini, efficietis profecto, vt illi faciendum sibi esse intelligant, vt sese nobis æquiores posthac præbeant. Protinus igitur considerate, vtrum obedire nullo dum dâno facto malitis, an, id quod mihi vtilius videtur, parua æque & magna de causa bellum suscipere, neque vlla in re succumbere, atque earum, quas habetis, rerum possessionem sine villo metu in posterum retinere. Etenim cum pares, ante factum ea de re iudicium, paribus satisfactionem imperant, siue ea de magnis, siue de paruis sit controuersijs, eadem est libertatis imminutio. Quod autem ad bellum atque ad vtriusque;



nostrum facultates admet, nihilo nos inferiores futuros esse de me, dum singula persequor, cognoscite. Sua Peloponnesij manu agros colunt & officinas exercent: pecuniam nec priuatam, nec in aërio habent. Diuturni præterea bellis, atque etiam transmarini rudes insolentesque sunt, ut pote bellis inter se ob paupertatem leuibus contendere adfuerit: qui vero huiusmodi sunt, neque naues complere, neque terrestres exercitus sepius summittere possunt; præsertim cum a priuatis suis rebus absint, & de suo impendant, & mare præterea clausum habeant. Huc accedit, quod bella prompta magis parataque pecunia; quam vectigalis extortaque vi sustinet: at homines agricolæ, atque opifices promptiores ad bellandum corporibus sunt, quam pecunia: illa enim ex periculis salua exitura sperant: hanc antea consumptum iri metuunt: præsertim cum id, quod usu euenturum verisimile est, bellum sua opinione longius ducetur: nam vno quidem proelio vel totius Græciæ impetum Peloponnesij, qui cum illis consentiunt, sustinere possunt: bellum autem contra haudquaquam suo similem hostium apparatus gerere, nullo modo poterunt: quippe qui commune concilium, ut si quid subito opus sit, celeriter administretur, nullum habent: & pares in dicenda sententia alienigenæ que inter se cum sint, de suis quisque rebus sollicitus est: hæc autem exitus habere nullos consueuerunt, cum alij aliquos vlisci maxime cupiant, alij res suas quam minimum detrimenti capere: cunctique longo interuallo conueniant, breui de re publica cōsultant, maximam temporis partem in re quisque sua agenda distinetur: tum singuli suam sibi negligentiam minime obscuram putant: alij enim curæ fore, atque ita sibi quoque prospectum iri sperant. Itaque, dum hoc singuli separatim opinantur, interire vniuersam rempublicam non intelligunt. Valdè etiam rei illos pecuniarie angustia morabitur: tarde enim illa conficiet, eoque cunctari cogentur. At rei gerendæ occasio instabilem celeremque motum habet. Nihil est autem, quod circumuallari

uallari nos ab ijs metuamus, aut cur eorū timeamus classem: nam urbem huic parem opponere, etiam si per hostem liceat, difficile est: nedum intra hostium fines, idque ipsam nostras nobis pariter contra munitiones obijciuntibus. Quod si castellum communierint: alicuius illi qui dem agri nostri, incursionibus, transfugis ve ad se recipiendis, nocebunt parti: sed vallo simul circumunire nos, & quominus classe, qua valemus plurimum, ad eorum fines penetremus, eosque vlciscamur, prohibere non poterunt: plus enim nobis maritimarum rerum exercitatio ad pedestre bellum, quam illis terrestrium vltus ad nauale attulit. Nec vero nauticarum rerum scientiam facile illi adipisci poterunt: quandoquidem ne vos quidem plene dum eam percepistis: quamuis a Medicis confestim rebus in id magno studio incubueritis. Qui igitur homines agricolæ, iidemque maris insueti, quibus ne exerceri quidem per nos licebit, quia semper cum magno nauium numero in statione contra illos erimus, quicquam quod operæ pretium sit, efficere poterunt? contra paucas enim naues in statione manentes fortunam pugnae temptarent, cum multitudine freta erit inscitia: tanto autem nauium numero circumsepti quiescent, in exercitatieque imperitiores erunt, eoque etiam ignauiores. Artis enim, si quicquam aliud, res nautica est: nec subcisiuis operis, cumque vacamus, ediscitur, sed ipsa potius nullum ab operis vacuum tempus relinquit: at enim pecuniam, quæ Olympijs, quæque Delphis est, tollent: nautasque, quos peregrinos habemus, maiori stipendio allectos a nobis conabuntur abducere: ipsique, atque inquilini naues opplebunt. Magni omnino id referret: nisi illis nos aduersarij simus: nunc autem, præterquam quod nos hostes habent, illud quoque, quod maximum est, accedit, quod gubernatoribus, reliquisque nautis, ciuibus utimur Atheniensibus: ijsque cum numero, tum scientia inter reliquos totius Græciæ omnes, præstantibus. Tum nemo e mercede conductis domo cum periculo exula

re, ac minori propolita ſpe, maioris paucorum dierum ſtipendij cauſa, cum ijs ſe ſe coniungere, atque eandem belli fortunam ſubire uolet. Ac Peloponneſiorum quidem res hoc ſere loco ſunt: noſtræ uero cum ijs incommodis, quibus eos laborare a me demonſtratum eſt, uacant, tum haud paulo meliores ſunt: etenim ſi intra fines illi noſtros pedestres copias introducent, nos in ipſorum nauibus proſiciſcemur, nec uero cum Peloponneſi pars modo aliqua, Attica autem uel omnis vaſtabitur, conferenda tamen hæc erunt: alios enim illi agros parare ſine prælio ac dimicatione non poterunt: nos magnam agrorum vim cum in inſulis, tum in continenti habebimus: maximum eſt enim maris imperium obtinere: id quod ex eo intelligere licet: etenim inſulam ſi incoleremur, qui magis vacui a periculo forèt, ne capi umquam expugnariq; poſſent? id ipſum igitur, quam proxime poteſtis, animo in præſentia verſantes, ſpretis agris ædificijsq; maris modo, atque urbis cuſtodiam retinere: neq; earum rerum iactura & dolore incenſi cum Peloponneſijs manum conferite: longe enim nobis multitudine antecedunt, ut, ſi eos deuicerimus, paulo poſt tamen contra haud quaquã minores eorum copias de integro pugnandum nobis ſit: ſin autem aliquid offendemus, etiam a ſocijs quibus noſtra nixa eſt ciuitas, relinquemur: nec enim, ubi non ſatis virium ad ſe ſe bello perſequendos nobis ſuperciſſe animaduertent, in officio continebuntur. Quamobrem non de agris nobis ædificijsq; nimio opere deplorandum eſt; ſed de corporibus: neq; enim per ea homines parantur, ſed illa homines parant. quin equidem, perſuaderi ſi id uobis poſſe conſiderem, hortarer uos, uti ultro ipſi ex urbe egreſſi ea ſponte ueſtra corrumperetis, quo perſpectum Lacedæmonijs eſſet, nihil hæc uos mouere, nec eorum quidem cauſa obtemperaturos eſſe. Multa præterea ad ſpem uictoriæ habeo, modo non vno eodemq; tempore bellum gerere atque imperium propagare uelitis; neque præterquam, quæ bellum hoc habet pericula, ultro aliqua

aliqua addatis, nam me quidem nostra propriaque pecca-  
 ta magis, quam hostium consilia terrent. Verum alio lo-  
 co hæc quidem vna cum factis ipsis exponentur. nunc  
 cum ijs responsis hos dimittendos censeo: Megarensibus  
 nos fori & portuum potestatem facturos, cum Lacedæ-  
 monij neque nos, neque socios nostros oppido prohibe-  
 bunt, quando neutrum ne fieret, sædere exceptum est.  
 Ciuitates autem suis legibus vti iubebimus, si, cum sædus  
 quoque icimus, suis eas legibus vtentes habebamus: &  
 cum suis ipsi quoque ciuitatibus permiserint, vt nō quo-  
 modo Lacedæmonijs commodum est, sed vt suo quæq;  
 arbitratu leges habeant insitutas: tum iudicium nos ex-  
 sædere accipere paratos esse: neque bellum priores illatu-  
 ros, sed inferentibus restituros; hæc enim cum iusta sunt,  
 tum vero digna, quæ ab hac ciuitate respondeantur. Il-  
 lud autem tenendum est, necessarium esse bellum: idque  
 quo alacrius suscipietur a nobis, eo minus acriter insta-  
 bunt hostes. Maxima vero, quæ sunt pericula, ea cum  
 priuatis, tum populis, maximam etiam gloriam pariunt.  
 Itaque parentes nostri, cum Medos contra, intijis haud  
 quaquam tantis, orsi consisterent, fortunis relictis omni-  
 bus: cumq; plus consilij, quam secundarum rerum, plus  
 animi, quam virium haberent, Barbaros propullarunt,  
 atque hæc, qualia nunc sunt, effecerunt: quibus ignauior-  
 es nos esse haud quaquam decet. Hostem igitur  
 omni ratione repellamus, atque enitamur, vt  
 vti hæc ne minora, quam  
 acceperimus, po-  
 steris  
 nostris prodamus,

*Oratio, qua Pericles laudauit cines suos, in hoc bello interfectos.*



**P**LERIQUE eorum, qui antea ex hoc loco dixerunt, eum, qui orationem hanc ad vetus institutum addiderit, collaudarunt; propterea quod eam de ijs, qui in praelijs interfecti sepelirétur, haberi præclarum esset: mihi vero satis futurum fuisse videtur, si ijs, qui re virtutem præstiterunt, re etiam honos haberetur, cuiusmodi hæc sunt, quæ hoc tempore circum sepulchrum illud publice comparata videtis: neque vno in homine recte secusve ad fidem faciendam dicente multorum laus in discrimen adduceretur: difficilis enim est in dicendo mediocritas ea de re, in qua vix opinio veritatis comprobetur. nam conscius quidem auditor ac beneuolus minus fortasse pronuntiatum arbitrabitur, quam quod ipse tenet cupitque: imperitus autem vel redundare aliquid, siquid maius, quam suum efficere possit ingenium, audierit, propter inuidiam existimabit: eo enim vsque aliena laus audiendo tolleratur, quoad quisque se quoque, quod de alio audit, de se præstare posse confidit: in quo autem superari se sentiunt, invident, eoque fidem non habent. Verumtamen, quoniam a veteribus comprobatum est præclare hoc habere, me quoque necesse est legi obsequi, dareque operam, ut ad cuiusque vestrum opinionem voluntatemque, quam possum proxime, oratione accedam. Ordiam igitur a maioribus primum: æquum est enim, simulque ad hoc tempus accommodatum, hunc illis memoriæ honorem tribui. Etenim cum terram hanc iidem continenter tenuerint, liberam eam per virtutem posteris deinceps ad hoc vsque tempus tradiderunt. Atque cum hi laudem merentur, tum vero etiam magis patres nostri: cum enim ad ea, quæ acceperant, tantum addidissent, quantum

quantum hoc est imperium, quod obtinemus, magno id labore partum nobis reliquerunt; id quod multum quoque ab ipsis nobis præfertim, qui grandiores natum sumus, propagatum est, ciuitasque omni pacis bellicæ apparatus quam copiosissime instructa. Atque ego bellicas res, quoque modo singula bello parta habeamus, ac si quando vel ipsi, vel patres nostri, aut a Barbaris illatum nobis, aut a Græcis magno animo bellum propulsauius, ne longior notis de rebus fuisse uidear, præteribo: meque ad horum laudationem conuertam, si quibus studijs adepti hæc sumus, qualique republica, quibusue moribus hæc magna euaserunt, ante dixero: hæc enim cum huic temporis congruere, tum vniuersæ ciuium atque exterorum frequentię auditu non inutilia esse existimo. Nam ea nostra resp. est, quæ non aliorum instituta æmuletur, multique nos sibi proponunt exemplar potius, quam ipsi alios imitemur: ac nomen quidem, propterea quod non a paucis teneretur, sed gereretur a multis, a populi sibi potestate inuenit: legibus vero priuata quidem in re eadem est iuris omnibus æquabilitas constituta: dignitate autem ut quisque in aliquo excellit, ita alijs in republica præferatur: neque in honoribus mandandis, certo potius generi, quam virtuti fauimus: nec vero ob paupertatem, qui aliqua modo re prodesse ciuitati possit, quamquam dignitatis splendor absit, repellitur. Libere vero nos cum in republica administranda gerimus, tum vero in quotidiana inter nos vitæ consuetudine minime sumus suspiciosi: neque alijs, si quando voluptate potiantur, irascimur: nec vero tristitiam, minime noxiam illam: quidem sed tamen odiosam visu præteximus. Ac qui in priuata vitæ consuetudine minime difficles sumus, a republica violanda metu omnium maxime deterremur: & cum magistratibus continenter dicto sumus audientes, tum vero legibus paremus: ijsque in primis, quæ de ijs, qui per iniustitiam opprimantur, iniuria prohibendis scitæ sunt, quæque cum scriptæ non

A A sint,

sint, communi omnium consensu ignominiam irrogant. Multa vero apud nos animo ad requiem conceduntur: sunt enim nobis certa anniuersaria sacra instituta, ludique: tum lauta priuatis res domestica atque elegans est, cuius quotidiana oblectatione tristitiam excutiant; adportantur autem propter vrbs magnitudinem ex omnibus terris ad nos omnia: contingitque nobis, vt eos fructus, quos hæc terra gignit, atq; eos, qui apud alias gentes nascuntur, æque proprios habeamus. In rei vero militaris studio, ijs rebus hostibus antecellimus: vrbs enim nostra omnibus semper patet, neque vlla lege peregrinos pellimus, ab vllaue disciplina, aut spectaculo excludimus, quod minime absconditum siqui ex hostibus aspexerint, adiuuentur: nec enim commentatione, aut dolo tam in re gerenda, quam virtute propriam nitimur. Atq; illi quidem sic educantur, vt statim a pueris magno labore sese ad fortitudinem exerceant: nos vero lenius instituti, nihilo secius eque, atque illi, equalibus nos periculis obijcimus. cui rei illud argumento est, quod neq; singulatim Lacedæmonij intra fines nostros, sed vniuersi exercitum ducunt; & nos, vbi in aliorum fines inuasimus, haud magno negotio, pro suis dimicantes fortunis bello plerumque superamus: cum vniuersis autem copijs nostris nulli vmquam hostes conflixerunt; propterea quod vno eodemque tempore maritimis rebus studemus, & diuersis in locis terra bellum gerimus. Quod si aliquando cum aliqua exercitus nostri parte manum conseruerint, ac non nullos prælio vicerint, omnes se se nos fudisse gloriantur, uictique ipsi rursus si sint, ab vniuersis nobis superatos se prædicant. Quocirca si ab otio magis, quam a laborum exercitatione atque a virtute, natura nobis potius, quam legibus tradita, profecti venire in discrimen velimus, super sit nobis, vt laborem in rebus asperis, antequam venerint, ne præceperimus, & vbi ad eas iam ventum sit, non minorem quam ij, qui continenter laborando male habiti sint, virtutem præste-



præstemus. Atque cum ijs in rebus ciuitas nostra admiratione digna est, tum vero etiam in alijs: elegantiam enim cum parsimonia adamamus, & sapientiæ studio sine deſidia delectamur: diuitiarum vero fructum in illarũ vſu, vbi tempus poſtulet, potius, quam in verborum magnificentia ponimus. nec vero cuiquam turpe apud nos eſt de ſua paupertate confiteri, ſed eam non re euitare id vero multo eſt turpius: præterea iſdem rem ſuam familia rem, iſdem publicam gerere licet: quinimo ne ij quidem, qui in opere faciundo occupantur, penitus ſunt in republica rudes: ſoli enim nos, ſiqui hæc non attingunt omnino, non inertes eos, ſed rudes rei publicæ ciues iudicamus. In deliberando autem iſdem aut recte de rebus dijudicamus, aut recte nobis in mentem venit; neque iſ ſumus, qui ita exiſtimemus, dicta factis obefſe, ſed illud potius ſi, antequam oratione edoctus ſueris, rem ſuſceperis. Itaque in eo quoque maxime præcellimus, quod iſdem excellenti animi magnitudine ſumus, &, quidquid agimus conſiderate cogitateque agimus. At ceteris inſcitia confidentiam adfert, cognitio ignauiam. Optimi vero iure illi habentur, qui cum aſperas ac iucundas res facile internofcant, ne ſic quidem vllum adire periculum recuſent. Quod autem ad benignitatem adtinet, contra nos, ac vulgo adſolet, facimus: non enim accipien-  
dis, ſed dandis beneficijs amicitias nobis comparamus: firmitus enim in eo, de quo bene promeritus ſis, vtpote que propter beneuolentiam debeatur manet gratia: quã vero retuleris, ea imbecillior eſt: non enim beneuolentia adductum beneficium contuliſſe, ſed, quod te debere intelligeres, diſſoluiffe arbitrantur: tum ſoli omnium nõ vtilitatis cogitatione, ſed ipſius liberalitatis fidentia audacter benefici ſumus. Atq;, vt in pauca conferam, cum vniuerſa noſtra ciuitas totius græciæ quaſi ludus eſt, atq;, inſtitutio, tum ſinguli quique, vt mihi quidem videntur, corporibus ad varia multipliciaq; rerum genera cum dignitate ac lepore habiles ſumus. Atq; hæc non in ver

borum magnificentia temporis causa posita esse; sed fa-  
 ctorum veritate niti, hoc ipsum ciuitatis nostræ imperi-  
 um, quod ijs moribus partum habemus, ostendit: sola  
 enim ex omnibus huius memorię, si quis periculum de  
 se fecerit, ditionem vincit ac famam: solaque ea est, a qua  
 neque bellum inferentes hostes calamitatem accepisse pu-  
 deat: neque, in quos dominetur, parere se se indigno  
 querantur domino: Magna vero opum nostrarum mo-  
 numenta (neque enim eę intestatę sunt) cum habeamus,  
 cum ijs, qui nunc sunt, hominibus, tum vero etiam po-  
 steris magnam nostri admirationem relinquemus. Nec  
 adeo Homerus laudator nobis, adhibendus est, aut alius  
 quispiam, qui versibus in pręsentia modo delectet, sed  
 ab existimatione rerum gestarum veritas discrepet: ad  
 omnia enim maria, terrarumque omnes, virtute nobis adi-  
 tum patefecimus: atque omnibus in locis sempiterna se-  
 cundarum, aduersarumque rerum monumenta extruxi-  
 mus. Pro tali igitur ciuitate cum hi, quod eam sibi eripi  
 pati non possent, fortissimo pręstantissimoque animo  
 dimicantes occiderunt, tum ceteros pro eadem omnem  
 excipere laborem decet: cuius etiam rei causa in ijs, quę  
 ad eam pertinent sui ipse longior; quo scilicet ostende-  
 rem, non pari vobis conatu entendum esse, atque ijs,  
 quorum in republica hæc paria non sunt: simulque ut  
 horum laudationem ijs, quę a me exposita sunt, argu-  
 mentis confirmarem: pleraque enim ad eos ipsos perti-  
 nent: nam in quibus ego ciuitatem laudavi, ijs horum;  
 taliumque virtus illam ornauit. Nec adeo multorum  
 Gręcorum res gestę eęque, atque horum, par orationi  
 pondus habere reperientur. Atque equidem reor, ho-  
 rum hunc exitum, qui & primus indicauit & postremus  
 confirmauit, hominis declarare virtutem: nam, qui cete-  
 ris rebus minus aliquando probi fuerint, eos bellicam su-  
 am in patria tuenda virtutem extollere æquum est: male  
 enim facta benefactis delent: magisque profuerunt pu-  
 blice, quam priuatim nocuerunt. At horum nemo vel  
 pro

propter diuitias, quod ijs diutius frui magnificeret, languidior fuit; vel propter paupertatis effugiendæ, atque aliquando abundandi spem, periculum distulit: hostium autem pœnas sumere sua ipsorum salute optabilius cum ducerent, simulque statuerent omnium periculorum hoc esse pulcherrimum, illos vlcisci, atque has appetere laudes voluerunt; & incertum quidem rei bene gerendæ euentum spei mandarunt: id autem, quod semel a se approbatum haberent, factis committendum statuerunt: cumque plus in eo ponerent, vt, pugnando si quid aduersi accidisset, ferrent, quam vt cedendo salutem consequerentur, verborum quidem ignominiam fugerunt; rem autem corporibus subierunt, minimoque fortunæ ac temporis momento cum summa potius spe, quam pauore vlllo tenerentur, e vita discesserunt. Atque hi quidem merito tales in patriam extiterunt. Qui autem reliqui sunt, ij eam debent in hostem mentem dari sibi optare, quæ offensionis, non virtutis habeat minus; nec ex oratione solum vtilitatem attendere, quam pluribus apud vos, quibus ea nihilo secius nota est, persequi facile licet, quantum in conseruanda patria, hostibusque propulsandis boni insit, commemorantem; sed potius eius vires quotidie re intuentes, illius amore incendi: quæ cum magnæ nobis visæ fuerint, illud cogitare debemus, ab ijs parta hæc esse, qui recta cum cognoscerent, tum etiam auderent, quique cum turpitudinis verecundiâ rem gererent: nec vero si quid conati aliquid offenderant, sciendum sibi esse existimabant, vt sua propterea ciuitatem virtute priuarent, sed præmium omnium præclarissimum ipsi permittebant: cum enim corpora publicè traderent, priuatim, quæ numquam consenesceret, laudem acquirabant: clarissimumque monumentum consequentur, nō tam quidem illud, in quo siti ipsi sunt, quam in quo apud omnes quæcumque aut verborum, aut rerum occasio sese dederit, illorum gloria perpetuis laudibus celebrata conditur. Clari enim viri vnipersum orbem

bem terrarum sepulchrum habent, atque eos non tantum domesticis in bustis inscripta elogia apud suos celebrant, quantum apud exteras nationes non scripta, nec operum magis, quam cogitationis vniuscuiusq; animo; ac menti illorum memoria obuersatur. Hos igitur vos nunc imitati beatam vitam in libertate: libertatem vero in fortitudine ponite, atque in re bellica periculum subire nolite spernere: nec enim miserorum est magis, quibus nulla meliorum sit rerum expectatio, mortem contemnere, quam eorum, quorum vitæ in contrariam partem conuersio etiam nunc agitur: præsertim quibus siquid aduersi euenerit, magna mutatio futura sit: vehementius enim viros quidem generosos cum turpitudine coniunctum incommodum angit, quam cum animi robore communi in spe simul nata sensuque carens mors. Quo circa ne vos quidem, quicumque horum parentes adestis, miserabor potius, quam consolabor: nec enim ignoratis varijs vos multiplicibusque miserijs natos: præclare vero cum illis agitur, si quibus decora hæc obtigerint, qualis horum interitus est, vesterque luctus, quibusque vitæ fuerit felicitas equalis. Nec vero me fugit, quâ difficile factu sit, hæc cuiquam persuaderi: præsertim cum persæpe futurum sit, vt aliorum res secundæ, quibus vos quoque aliquando florueritis, vobis memoriam refricent: nec enim cum ijs, quæ numquam experti sumus, bonis caremus, dolori ea res est, sed cum ea, quibus adsueuimus, eripiuntur. Verumtamen qui quidem liberos etiam nunc procreare per etatem possunt, consolari se se nouæ spe sobolis debent: filijs enim alijs suscipiendis, cum priuatim eorum, qui extincti sunt, obliuiscuntur, tum vero ciuitati dupliciter proderunt; quod ea neque ab hominibus deferetur, & protectior erit. Nec enim euenire potest, vt æqui bonique aliquid ab his cogitentur, qui collatis in commune pro virili cuiusque parte liberis, periculum non equauerunt. Qui vero maiores nati estis, quibus maxima vitæ pars, quod lucro est appo-  
 ne

nendum, beate acta est, quæ reliqua sit, breuem fore cogitate, atque eam ipsam ista horum gloria eleuate: sola enim laudis cupiditas senescit numquam: nec vero languida atque iners ætas pecuniam modo, quod non nulli dicere solent, consecratur, sed dignitatem. Magnum vero certamen horum filijs, fratribusque paratum video: eum enim, qui non sit, extollere omnes laudibus consueverunt. Itaque cum excellenti virtute fueritis, vix tum demum non pares, sed aliquanto tamen deteriores, quam hi, dicemini: viuis enim inuidetur ab eiusdem laudis æmulis: qui vero e medio excesserunt, eos hominum beneuolentia sine vlla obtrectatione honorat. Quod si mihi de mulierum quoque officio non nihil dicendum est, quæ quidem viris estis orbatæ, breue est, quod de re tota præcipiam: etenim si vestra congruere cum natura volitis, magno id vobis honori erit, cum quam minimum do vestris cum vitijs, tum etiam bonis ad homines fama emanabit. Hæc nos quoque non inutilia habuimus, quæ, huic legi obsecuti, oratione persequeremur. Ac vobis quidem partim iam, qui humanantur decorati sunt, partim vero eorū liberis, quoad e pueris exceßerint, ex hac die publice alimenta ciuitas præbebit, quæ vtilem in primis talium certaminum coronam ijs, reliquisque omnibus decreuit. Etenim qui maxima virtuti præmia proponunt, eorum fortissimi ciues rempublicam gerunt. Sed iam, vbi suum quique luxerint, discedite.

*Contio Periclis ad Athenienses.*



**M**INIME mihi inopinata vestra in me accidit iracundia: et enim insimulari me sentio, eamque ob causam contionem aduocaui: vti, si quid aut mihi iniuria insensi estis, aut aduersis in rebus animo succumbitis, admonerem vos atque expostularem. Nam equidem sic existimo, magis vni-

uer

fructus remotus adhuc obscurusq; est: tantaque rerum, commutatione facta, idque in breui, imbecillus animus uester est ad constanter in sententia permanendum: frangunt enim animos, atque abijciunt, quæ subita atque improuisa præterque omnem rationem eueniunt: qualia sunt quæ uobis acciderunt, in primisque pestilentia. Verum tamen qui tantam ciuitatem incolatis, quique in ea dignis institutis educati sitis, omnem fortunam subire paratos esse decet: neque gloriam uestram obscurari pati: æque enim homines solent eos, qui quam habent dignitatem, eam per ignauiam amittunt, accusare; atque eos, qui quæ indigni sint, eam sibi per temeritatem arrogant, odisse. Quapropter rem familiarem deplorare desinite, ad salutem reip. incumbite: nam quod ad laborem adtinet, qui necessario in bello sustinendus est; ne nimis magnus ille sit: ac nihilominus tamen hostes superaturi simus, ea quidem de re satis profecto uobis esse debent, quæ alias sepe in eam sententiam a me dicta sunt; nihil esse, cur merito reformidare bellū hoc deberetis: sed illud tamen ostendam, quod neque venire uobis in mentem de uestris ad imperium obtinendum opibus mihi videtur, nec ego antea commemorauī, nec uero ne hoc quidem tempore dicerem, ueritus scilicet ne inflatus gloriari viderer, nisi timore uos præter modum exterritos intelligerem. Etenim uestris uos modo socijs imperare arbitramini: ego uero illud defendo, cum duo sint omnino, quæ perspicuum habeant usum, mare scilicet, & terra; alteri uos uniuerso dominari, non modo quoad tenetis nunc, uerum etiam quoad progredi uoletis: tanta enim nauium facultate nauigantes uos, non rex, non ulla alia natio est, quæ impedire hoc tempore possit. Quamobrem maiores omnino hæ mihi opes videntur, quam ut cum agrorum ædificiorumque, quibus priuari uos magnum ducitis, usu comparanda uobis sit. Minime igitur graui ter hæc ferte, sed potius leniter: diuitiarumque istas delicias, huius magnitudinem imperij spectantes, paruipendite,

dite : atque ita cogitate : si in libertatem incubuerimus , illamque conseruabimus , eam ipsam facile per se hæc esse recuperaturam : qui vero alterius parent imperio , ij ea quoq ; , quæ antea parta habuerint , amittere consuerunt . Nec vero committamus ut vtræque re inferiores , quam patres nostri fuerunt ,prehendamus : qui non ab alio tradita hæc , sed suo parta labore , & tenuerunt , & conseruata se , nobis prodiderunt : turpius est enim quæ habetas , ea tibi eripi , quam , quæ acquirere coneris , ea adsequi non posse . In hostes autem animo non fidenti modo , sed etiam despicienti ire debetis . Nam fiduciam quidem , fortunata stultitia , vel ignauo pepererit ; despicientiam vero conscientia modo , quantum quisque hostibus con filio anteat , id quod in vobis est , efficit : si quidem pari fortunæ condicione animum prudentia commūhit aduersariorum contemptione : & spei , cuius in rebus dubijs omnis vis ac robur est , nihil magnopere confidit : sed suis viribus consilioque , cuius prouidentia multo est certior , nixa est . Ciuitatis igitur maiestati , quam propter imperium obtinet , quando quidem ea vniuersi gloriari soletis , succurrite : nec enim laborem fugere , aut ne honores quidem consecrari debetis : nec vero existimate vna modo de re esse certamen , an pro libertate seruitutem habeatis : sed etiam de imperio amittendo agi , de quo periculo , quod vobis ab ijs imminet , quos propter imperium infestos inimicosque habetis : quod quidem vobis imperium , ne , si qui sint quidem , qui metu atque inertia adducti hoc tempore ad iustitiam remigrare velint , deponere iam liceat : iam enim illud quasi tyrannidem obtinetis , quam occupare , iniustum habetur : deponere , periculosum est . Nam hi quidem per breui temp . si hec alij persuadeant , aut sicubi ipsi per se suo arbitratu viuāt , euerterint : nec enim stabilis est inertia , quæ non industria comitatu instructa sit : nec in ea ciuitate , quæ imperium obtineat , sed in ea , quæ alteri pareat , ad tranquillam est seruitutem utilis . Vos vero neque a talibus ciui-

bus



bus induci vos patiamini : neque mihi , cui de suscipiendo bello adfensi estis , ne si irruentes quidem hostes ea in nos fecerunt , quibus par fuit imperium recusantes , affici , insensu sitis . Nam pestilentia quidem hæc , omnibus improuisa , vnaque omnium rerum maxime inopinata accidit : propter quam certo scio aliquanto me etiam magis odio vobis esse , haud meo quidem merito , nisi si quid etiam vobis boni , non ratione , sed casu , euenerit , id quoque mihi assignaturi estis : sed quæ diuinitus accidunt , vt necessitas cogit : quæ ab hostibus inferuntur , vt virtus postulat , ita ferenda sunt : isque mos ciuitati antea fuit . cum vos manere sinite ; cogitateque huius vrbs nomen summa esse apud omne mortales gloria : propterea quod in rebus aduersis animo non deficiat , quodque maximum ciuium numerum , laboresque quam plurimos , bellis gerendis consumpserit , maximasque ad hoc vsque tempus opes habeat : quarum quidem in perpetuum , si quid etiam aliquando nobis accidat : naturalis est enim rerum omnium imminutio , posteris memoria relinquitur , quod & Græci Græcis quam plurimis imperauimus , & maximis bellis partim cum vniuersis ; partim cum singulis contendimus , vrhemque omnibus bonis vndique refertam ac maximam incoluimus . Atque hæc , inertes qui sunt , fortasse reprehendent : qui vero moliri aliquid , atque agere cupiunt , etiam æmulabuntur : quibus autem opes nullæ sunt , inuidebunt . Sed omnes : qui hoc sibi sumunt , vt alij imperent , odiosi inuisque in præsentia sunt . Verumtamen qui maximis in rebus inuidiam subeunt , prudens cōsiliū incunt : odium enim minime diuturnum est : at splendor in præsens , atque in posterum gloria perpetuis laudibus celebrata , sempiterna est . Vos igitur id , quod in reliquum tempus honestum futurum est , nec est in præsentī turpe , cogitatione præcipientes , omnibus iam paratis rebus vtrumque vobis conseruate : neque ad Lacedæmonios de pace mittite , neque præsentibus malis premi vos præ vobis ferte . Nam

qui rebus aduersis animo minime franguntur, et re maxime resistunt, ij & populorum & priuatorum fortissimi sunt.

*Oratio Platæorum legatorum ad Lacedæmonios  
in exercitu.*



**R**E in iniustam facitis Archidame atque Lacedæmonij, minimeque vobis ac patribus vestris dignam, qui exercitum in Platæorum fines introducatis: Pausanias enim ille Cleombroti filius, Lacedæmonius, cum Græciam Medorum dominatu, vna cum ijs Græcis, qui pugna illius, quæ apud nos facta est, periculum subire non recusarunt, liberaflet, immolatis in Platæorum foro Ioui liberatori hostijs, omnibusque adhibitis socijs; vrbem atq; agrum Platæis reddidit, suisque legibus vti voluit, nec bellum illis villo tempore quemquam iniuste, aut seruitutis iniungendæ causa facere; si minus, auxilium omnes socios, pro suis quemque viribus, ferre. Hęc igitur patres vestri virtutis nobis atque alacritatis, qua in adeundis periculis illis fuimus, præmia tribuerunt. At vos contra, quam illi censuerunt, facitis: vna enim cum Thebanis, nobis inimicissimis, seruitute oppressum nos venitis. Quamobrem deos, in illo sedere testes interpositos, tum patrios vestros, nostrosque hosce penates, testati, edicimus vobis, ne quam Platæorum finibus iniuriam inferatis: neq; iusiurandum violetis, sed, quemadmodum Pausanias sanxit, nostris nos legibus vti permittatis.

Archidami

*Archidami, Lacedæmoniorum regis, defensio.*



**E**QUVM vos quidem Plataei dicitis, si modo cum dictis facta consentient. In libertate igitur, quam Pausaniæ permisso habetis, cum ipsi remanete, tum vero alios, qui illorum socij periculorum vobiscum eo tempore coniurarunt, nunc autem Atheniensium imperio subiecti sunt, vindicare horum enim ceterorumque libertatis recuperandæ causâ tantus hic conatus, bellumque hoc excitatum est, cuius vos æquum est maxime quidem participes esse, ac vos quoque iusiurandum conservare: si minus, at saltem quiescere, remque vestram agere, neutriusque esse partis: atque in amicitiam quidem utrosque recipere: in belli autem societatem neutros. & his quidem contenti erimus.

*Defensio altera Archidami, contra responsum, quod dederant legati illi.*



**T** vos urbem Lacedæmonijs nobis atque ædificia tradite, finesque monstrate, tum arbores, & si qua præterea habetis, quorum iniri numerus possit, nobis adnumerate: ipsi autem in quas-cumque commodum est partes, tantisper dum bellum est, cedite, atque eo confecto, nos, quæ acceperimus, reddemus vobis. Interim apud nos deposita habebimus, colemusque, & quod vobis futurum sit satis, pensabimus.

te satis est in periculis præsidij: excutit enim memoriam  
pauor: ars autem sine animi robore nullo est vsui. Illo-  
rum igitur artificio vestram virtutem obijcite: timori au-  
tem, qui propter aduersum prælium in animos vestros  
inuasit, quod imparatos tunc vos offenderint, opponite.  
Itaque eo illos vincitis, quod & nauium numero præsta-  
tis, & prope vobis amicam terram, vbi parati in armis præ-  
sto vobis milites sunt, prælium committitis. Fit autem  
sere, vt qui plures, paratioresque sint, ij victoriam conse-  
quantur. Itaque omnia vobis ad vnum firma esse reperti-  
mus, nec accidere posse, vt vlla in re merito labamur:  
quin ea ipsa, in quibus antea offendimus, comparata nunc  
pro disciplina nobis erunt. Magna igitur fiducia guber-  
natores nauæque suum quisque munus obite: nec ve-  
ro locum, qui cuique attributus sit, deserite: nam nihilo  
secius a nobis, quam a superioribus ducibus instructi in  
prælium proficiscimini, neque nos cuiquam, cur turpis  
esse debeat, causam relinquemus. Quod si quis omnino  
deceuerit ignauus esse, is pro delicto poenam sustinebit:  
fortes autem pro virtute præmium ferent.

Contio Phormionis, ducis Atheniensium, ad exer-  
citum naualem.



VM perterritos vos nauium multi-  
tudo milites animaduertam, cum-  
que turpe factu existimem, quæ mini-  
me formidolosa sunt, ea extimescere,  
conuocaui vos. Nam illi quidem, pri-  
mum quod victi antea superatiq; a vo-  
bis sunt, ac ne ipsi quidem pares vobis sese esse confidunt,  
propterea non equum in certamen descenderunt, sed na-  
uium multitudinem coëgerunt: deinde id vnum, quo  
maxime freti ad vos eunt: magnos enim in remilitari  
quasi suo sibi iure spiritus sumunt, nulla alia re confisi  
sperant, quam quod cum propter vsu, quem in terre-  
stri-

bus habent, pleraque ex sententia gesserint, idem quoque in re nautica usu venturum arbitrantur. At hoc, si ea id in re illis adiumento est, nos certe hoc tempore plurimum præstabimus: nec enim illis virtute cedimus, sed, quod alteri in altero maiorem habemus usum, propterea maiore sumus fiducia: huc accedit, quod Lacedæmonij, qui propter auctoritatem imperium in socios obtinent, inuitos plerumque in periculum trahunt: numquam enim longe superati illi iterum rem prælio committerent. Ne igitur illorum formidaueritis audaciam: multo vero vos illis maiori iustiorique estis formidini; tum quod antea superastis, tum quod ita animum illi induxerunt, nisi præclarum quoddam virtutis specimen daturi essetis, numquam vos commissuros fuisse, ut contra confisteretis. Nam qui numero præstant aduersarijs, sicut hi, copijs magis, quam animo nixi, prælium ineunt: qui vero multis partibus sunt inferiores, neque vlla necessitate coguntur, propter excellens animi robur resistere audent. quæ reputâtes hi, rei admiratione commoti, potius quàm consentaneo apparatu nos metuunt. Multi vero excitus, quod sum in re militari non haberent, sunt etiam qui propter timiditatem a paucioribus sunt superati: quarum rerum vtraque a nobis hoc tempore longe abest. prælium vero ego minime intra sinum mea quidem sponte committam, nec adeo eo proficiscar: etenim scio paucioribus nauibus, celeritate & scientia præstantibus, contra maiorem nauium minus peritarum, numerum aduersariam esse locorum angustiam. Nec enim modo & ratione quisquam, nisi ex longo interuallo prospectus fuerit, incitare se in hostes, neque, cum forte laborarit, tempore regredi poterit; nec vero hostium naues diducere, nec celeritate eludere, quæ sunt propria munera nauium, remorum pulsu & celeritate præstantium: sed naualem pugnam pedestrem facere necesse habeat, in quo maior nauium numerus plus potest. Hæc igitur ego, quoad fieri poterit, prouidebo. Vos pro nauibus estote

estote parati in armis, præsertim cum paruo interposito spatio incurfus futurus sit: quæque iussi eritis, celeriter administrate, atque ordinem in re gerenda, ac silentium plurimi facite, quo modo multa bellicis in rebus, præcipueque naualibus pugnis prodest administrare: ac pristina virtute vestra illis resistite. Magnum vero certamen, vtrum Peloponnesijs rerum nauticarum spem præcidatis, an de Atheniensibus mari metum augeatis. Iterum igitur atque iterum vos moneo, vt plerosque horum victos a vobis esse memineritis: semel autem superatus animus similiter eadem experiri pericula nescit.

*Contio Mitylenæorum ad Lacedæmonios.*



**S**ICUT Lacedæmonij, sociique in re positum hoc esse Grecorum, vt qui in bellis defecerint, pristinaque amicitiam deseruerint, ijs, a quibus recipiuntur, quatenus ea reiuuantur, lætitiæ sint; sed ijdem, habiti veterum amicorum proditores, improbi iudicentur: idque iudicium haud sane iniquum est, si modo qui defecerint, atque ij, a quibus sese disunxerint, parem inter se nacti sint animi voluntatem, paresq; cum viribus, tum præparatione fuerint, neque vlla iusta defectionis causa intercesserit: quæ quidem nobis atque Atheniensibus secus obtigerunt: nec ea re improbi cuiquam videri debemus, quod in honore apud hos in pace habiti, in periculis illos deserimus: differendum est enim nobis de iustitia in primis ac fide, præsertim qui in societatem recipi postulemus: nam nulla est neque priuatis stabilis amicitia, neque populis firma societas, quæ non mutua virtutis opinione, & morum reliquis in rebus similitudine nitatur: studiorum enim dissimilitudines rerum quoq; discordias gignunt. Est igitur nobis societas cum Atheniensibus inita bello Medico, illo scilicet tempore, cum vos negotio destiti-

stis: illi autem extrema belli persecuti sunt: nec tamen Græciæ seruituti Atheniensium addicendæ, sed eius Medorum dominatu liberandæ, societatem coiuiimus: itaque, quamdiu æquo illi imperarunt iure, duces eos alacri animo secuti sumus. At postquam ex Medorum quidem inimicijs permultum remitti: sociorum autem seruitutem in angustum ab illis adduci animaduertimus, metuere sane iam tunc incepimus: sed cum singuli seorsum ab alijs, id quod in tam magno varioque sententiarum numero accidere necesse fuit, se defendere socij non possent, omnes seruitute oppressi sunt, præter nos atque Chios. Ergo nos, quibus leges ac libertas nomine dumtaxat relicta est, socij consortesque belli fuimus, cum iam Atheniensibus ducibus parum fidei haberemus: erant enim nobis pro disciplina, quæ illi antea gesserant: neque enim consentaneum est, ut eos sustulerint, quibuscum vna nobiscum ictum habuerint sædus, & reliquis, ubi se patrandi facultas ostenderit, non idem parèt. Etenim, si omnes etiam nunc libertatem retineremus, minus esset metuendum, nequam illi nouam rem molirentur: nunc autem, qui plerosque seruitute oppresse-  
runt: nobiscum autem æquo adhuc iure viuunt, verissimile est grauius id, quam ante, esse laturos: quibus scilicet maxima succubuerit pars, cum ijs solos nos ex æquari: idque eo magis, quod illis opes, nobis solitudo atque inopia adaucta est: solus enim vtrinque par mutuusque metus fidelis est sæderum custos. Nam si qui sunt, qui moliri contra quippiam cupiant, quoniam id nulla re superiores conantur, deterrentur: nobis autem ob eam causam libertas relicta est, quod orationis honestate, consilijque itinere ac fallaciæ, aditum sibi ad dominationem occupandam facilius munire posse, quam virium via armorumque, sperant. Testimonioque simul id esse voluerunt: equo namque fœdere socios nullo modo belli ejus participes futuros fuisse, nisi ijs, in quos illi impetum facerent, in aliquo deliquissent: tum potentissimos quos  
que



que in maxime infirmos primum concitarunt, ut eos ipsos cum ad extremum reseruassent, amputatis circumcisisque reliquis, imbecilliores ad expugnandum haberent. Nam a nobis si duxissent initium, omnibus cum sua uietiam tunc integris, tum locum, ubi consisterent habentibus, non tam facile eos subegissent: non nihil etiam nostra illis classis terroris iniecit, ne quando aut ipsa per se, aut vobis, aliquibus uel alijs adiuncta, eos in periculum arcesseret, tum multum quoque nostro in ciuitatem eorum, ac principes deinceps obsequio ad incolumitatem profectum est. Nec tamen ne sic quidem, nisi hoc interuenisset bellum, diu hoc prestare nobis videmur potuisse: coniecturam enim de alijs facimus. Quæ nam igitur ista firma fuit amicitia? quæ ista secura sanè libertas? in qua inuiti nos mutuo amplexaremur, atque illi in bello nos metu adducti colerent, nos illis contra in otio idem præstaremus, ac fidem, quam beniuolentia confirmare plurimum apud alios consueuit, nos timoris præsidio munitam haberemus: metuque potius, quam amore copulati in societate contereremur: atque utricumque patrandi impunitas prius addidisset animum, princeps is peccandi initium facturus esset. Quocirca si quis est, qui nos sceleris condemnet, propterea quod, cum illi ea, quæ in nos edituri erant flagitia, traherent, ipsi anteuerimus: nec itidem dum certum sciremus, siquid de eo acturi essent, expectauimus, non rectam ille rationem inuit: etenim si illorum insidijs nostras opponere nobis licuisset, illisque remtrahentibus eodem nobis modo cunctandi data esset facultas, quid erat causæ, cur æqui paresque cum illis essemus, eorum obtemperaremus imperio? Cum igitur, ubicumque vellent, uti in nos impetum facerent, illorum esset arbitrij, nostri quoque arbitrij est, ut, ubi visum sit, anticipemus obsistere. Has nos defectionis, Lacedæmonij socijque, defensiones causasque habuimus, cum audientibus ad intelligendum iure nos fecisse, perspicuas, tum vero ad perterrendos nos, atque ut salutem aliqua

nobis ratione quæreremus hortandos firmas: antea quoque nos quidem id conatos, quo tempore, cum etiam nunc pax esset, de defectione ad vos misimus, atque a vobis reiecti eo conatu destitimus. Nunc autem a Bræotijis inuitati e vestigio paruimus: duplicemque rati sumus defectionem nostram futuram; alteram a Græcis, ne vna cum Atheniensibus vexandi nobis essent vniuersi, sed vna cum libertatis auctoribus, seruitute liberandi; alteram, vt ab Atheniensibus deficeremus, quo minus posthac ab illis tolleremur, sed ipsi anteuerteremus. Verum præpropera îparataq; paulo magis nostra defectio fuit: quo etiam magis receptis nobis subsidium celeriter mittere debetis, vt, & quibus decet, auxilio esse vos cognosci possit, simulque hostibus vt detrimento sitis. Nam tempus quidem magis nunc idoneum est, quam vmquam antea: Athenienses enim & pestilentia exhausti sunt, & sumptibus: naues autem illorum partim circum vestra sunt littora, partim contra nos dispositæ sunt: vt verisimile sit; si pedestribus copijs simul & nauibus in eos hac quoque æstate imperum seccritis, nullam eos nauium facultatem habituros. Quare aut vobis ad se proficiscentibus non resistent, aut ab vtrisque discedent. Nec vero existimare quisquam debet, pro alienis fortunis proprium vos subire periculum: si quis est enim, cui Lesbos longinqua videatur, illi propinqua ex ea utilitas extabit. At non in Atheniensium finibus bellum geretur: verum in illorum, quibus Athenienses iuantur: ex sociorum enim vectigalibus pecunia illis reficitur, quæ quidem edomitis nobis, etiam adaucta erunt: propterea quod nulli posthac deficient, vnaque ad Atheniensium facultates nostræ addentur, simul & durior erimus condicione, quam ij, qui seruituti antea addicti sunt. Quod si vos auxilium præsto nobis animo seretis; cum ciuitatem nauibus abundantem, id quod vobis maxime deest, adiungetis vobis, & Athenienses, abductis illorum socijs, facilius delebitis, fidentius namque cuncti se ad vos adplicabunt; tum, in quo

quo accusamini, quod ijs, qui ad vos defecerint, non subuenitis, eius rei culpam effugietis. Quod si libertatis vindices profiteri vos cognitum fuerit, bellicas opes vestras multum ea re confirmabitis. Vos igitur spem illam, quam in vobis Græci repositam habent: Iouemque hunc olympium, cuius in templo nō secus ac supplices sumus, veriti, Mitylenæis in fidem atque amicitiam receptis succurrite: noliteque nos respuere, qui proprio capitis nostri periculo commune omnibus emolumentum, si quidem ex sententia successerit: contraque, si nihil a vobis impetrauerimus, magis etiam commune detrimentum adferamus. Tales igitur vos præbete, quales vos viros esse Græci confidunt, qualesque noster hic postulat metus.

*Contio Tentiapli.*



**G**o Mitylenas protinus contendendum Alcida ducesque Peloponnesij, prius, quam de nostro aduentu auditum sit, quo in statu sumus, censeo: exstimandum est enim, multa nos apud hostes, quippe qui modo vrbe potiti sint, sine præsidio offensuros: maxime quidem mari, quæ nec illi hostium incursum verentur, & nobis vsu euenit, vt plurimum valeamus: sed pedestrem quoque manum, credibile est, vtpote ratam se vicisse, dispersam incautius in tectis esse. Itaque si improviso simul, & noctu, in homines impetum fecerimus, spero equidem ab ijs nos adiutos, si qui reliqui in vrbe sunt, qui nobis cupiant, esse victuros. Nec vero periculum reformidate, sed ita cum animis vestris cogitate, nullis alijs in rebus inane illud belli, quod fertur, quam in talibus esse positum: quas quidem qui ipsi in se cauerint duces, atque eas ubi in hoste animaduenterint, rei bene gerendæ occasionem non dimiserint, ijs quam plurima ex sententia eueniunt.

Quasi argumentum duarum, quæ sequuntur orationum, ex auctoris verbis expressum.



VM populus Atheniensis multis de causis Mitylenensium defectionē acerbissimè tulisset, simulatque eos per Pachētem receptos esse certior factus est, plebiscitum confectum per iram fecit, ut omnes puberes interficerentur, ac sine vlla mora cum eo plebiscito celeriter misit, qui in omnem Mitylenensium ciuitatem scire eum exēplo iuberet. Postridie eius dici, deferuescente iam iracundia, multi rei acerbitem accusare: plerosque tam immanis sententiæ pænitere; Mitylenensium vero legati, qui forte Athenis aderant, vna cum ijs Atheniensibus, qui ipsorum rebus fauebant, vbi molliri ciuitas visa est, in spem miseri veniunt mitigari populum posse, atque ad humaniorem aliquam sententiam traduci. Qui cum per amicos anxij sollicitique id agerent, cumq; omnibus ad pedes prostrati supplices flentēsque iacerent atq; eos, qui pridie quoque ab alijs dissenserant, plebiscitumq; illud improbauerant, adiutores haberent; ecce tibi Cleo Cleæneti filius, hesternæ illius sententiæ auctor, vir naturā vnus ex omnibus ciuibus violentissimus & auctoritate idem apud populum longe maxima, is plebis inconstantiam increpitans, ut ciuitatis labantem iam voluntatem confirmaret, & plebiscitum, quod se maxime contendente auctore factum esset, tueretur, aduocata conuocatione, ad hunc fere modum loquutus est.

syndiuis. *Concio Cleonis.* *in hoc oratione*  
*in hoc oratione* *in hoc oratione* *in hoc oratione*



INTELLEXI equidem & saepe alias, &  
 maxime hoc tempore, cum vestra vos  
 de Mitylenæis sententiâ penitet, libe-  
 ros populos alijs imperare nequire: ad  
 sueti enim securæ inter vos, minimeq;  
 infidiose vitæ rationi, eundem morem

erga socios quoque vestros retinetis: nec quidquid, aut  
 illorum oratione adducti peccaueritis, aut misericordia  
 commoti dissolutiores fueritis, non socijs gratum, sed  
 periculosum vobis langorem vestrum esse intelligitis: et  
 haud animo reputantes imperium hoc, quod obtinetis,  
 tyrannidem esse: illos contra vos consilia inire, vobisque  
 inuitos parere. Haud vos beneficijs magno quidem ve-  
 stro detrimento dandis, sed cum viribus magis, quam il-  
 lorum in vos beneuolentia vt valeatis perficere, dicto  
 vt vobis audientes sint, eos adducetis: illud certe minime  
 omnium ferendum, si, quæ semel statuerimus, eorum fir-  
 mum erit nihil: neque intelligemus commodius admini-  
 strari rem publicam, quæ minus præclaris legibus, verum  
 stabilibus vtatur, quam eam, quæ optimas leges habeat;  
 sed parum ratas: plusq; habere vilitatem incertam mo-  
 destiæ compotem, quam intemperantia præditam per-  
 spicaciam: meliusque fere ab ijs, qui paulo sunt tardio-  
 res, quam ab ijs, qui ingenij præstent acumine, res publi-  
 cas geri. Nam hi quidem anteire legibus prudentia, &  
 in omni de republica disputatione superiores discedere  
 videri volunt; quasi vero non maioribus in rebus antea  
 prudentiâ ostentarint: atq; ijs quidem rebus ciuitates hi  
 labefactant. Qui uero intelligentiæ suæ minus cōfidunt,  
 ij nec suo plus, q̄ legum consilio tribuunt, nec se idoneos  
 esse arbitrantur, qui recte dicentis sententiâ refutent: &  
 cum existimatores in neutram partem propēsi sint, poti-  
 us q̄ aduersarij, plerisq; in reb. recte statuūt: id quod uos  
 quoq; præstare debetis, neq; eloquentiæ ui, & prudentiæ

adq;

conten-

contentione elati contra, atque ipsi sentiat, ciuibz vestris suadete. Nam quod ad me adtinet, in eadem equidem sententia perseuero, atque eos miror, qui de Mityleneis iterum retulerunt, moramq; quæ siuerunt, id quod ijs vtile est, qui iniuriam intulerint; siquidem iracundia demum obtusa, qui læsus est, in eum, qui lacepsierit, inuadit: at contra, cum vindictio quam maxime propinqua iniuriæ acceptæ est, tum, paribus nixa viribus, iustissimas pœnas repetit: tum eum quoque admiror, quicumque ille futurus est, qui contradicaturus sit, & faciendum sibi esse existimet, vt Mitylenensium scelera vtilitati nobis, nostras autem calamitates detrimento socijs esse ostendat; atque aut eloquentia fretus id, quod vobis summe placitum est, non ita decretum esse pugnabit, aut, suo compendio ductus, eleganti elaborataque oratione ad aliam vos sententiam traducere conabitur. Res certe publica talium concertationum præmia alijs tribuit, periculum ipsa subit, cuius sane quidem rei culpa in vobis refidet, qui certamina hæc perperam administratis: etenim dictorum spectatores, rerum autem auditores esse consueuistis. Nam & de futurarum rerum euentu ex disertorum hominū oratione statuitis, & quæ facta iam sunt, nihilo plus fidei ijs, quæ oculis cernitis, quam ijs, quæ solummodo auditis, habentes, quanta ea ornata orationis vbertas fecerit, tanti æstimatis: qui, cum ea dicuntur, quæ a consuetudine abhorrent, per facile capi soletis: quæ vero approbantur in vulgus, ea respuitis, in vnaquaque re nouitati seruietes: vilitata autem & quotidiana contemnentes, datiq; operam maxime quidē pro se quisq;, talia quædam vt dicere ipsi possitis: si minus in eo inter vos pugnat, vt ne tardius, quæ dicta, sunt percepisse videamini: quod si qua acutius aliquis dixerit, in ijs vos & approbatione & intelligentia vestra præeundis prompti: in prospiciendo autem, quos ea euentus habitura sunt, tardistis: cum quæ alia prope dixerim omnia, quam quæ in vita hac communi versantur, vestigetis, ne in ijs quidem

ipsis

ipsis, quæ ante oculos posita sunt, sapitis satis; ac prorsus audiendi voluptate deliniti, sophistarum potius spectatoribus, quam de republica consultantibus similes consideretis. Quibus ego a rebus abducere vos conor, doceoque Mitylenæos vnam quidem ciuitatem, maximam vobis fecisse iniuriam. Nam siqui sunt, qui cum imperium nostrum perferre non possent, aut siqui hostium coactu a nobis defecerint, ueniam equidem illis tribuo: qui vero & insulam incolant, & mœnia habeant, quique cum hostes nostros mari modo vereantur, quo tempore tiriæ præsidio aduersus eos muniti essent, cum suis legibus uiuerent, cumque honos illis a nobis, ut quibus maxime, haberetur, hæc patrauerint, quid aliud egisse eos dicamus, quam ut insidiarentur nobis, magisque in nos eos inuadere, quam a nobis euadere voluisse? (defectio certe eorum est, quibus per vim inferatur iniuria) de disseque operam, ut ubi cum inimicissimis nobis sese coniunxissent, tollerent nos: id quod acerbius est, quam si ipsi per se, nacti vires, bellum intulissent. Nec vero aliorum calamitates, qui, cum a vobis defecissent, in potestatem nostram redacti sunt, sibi exemplo habuerunt: nec adeo beatæ illorum res, ne in discrimen irruerent, illos retardarunt. sed præcipites audacia, plusque quam quantum suæ vires: minus autem, quam quantum voluntas ferebat, spei habentes, bellum susceperunt, atque equitati uim anteposuerunt. Nam, quo maxime tempore uincere se posse arbitrati sunt, nulla laceßiti iniuria, impetum in uos fecerunt: sic enim sere fit, ut eæ ciuitates, quibus maxime ne copinantibus, ut, uel breue modo ad tempus, fortunatae sint, acciderit, insolentia efferantur: plerumque autem quæ consilio ac ratione, quam quæ fortuito prospere hominibus euenerunt, stabiliora sunt: faciliusque sere aduersam fortunam refellimus, quam secundam conseruamus. Quod utinam nullo umquam præcipuo, præter ceteros, a nobis habiti honore Mitylenæi fuissent: neque enim hunc in locum eorum progressa es-



set audacia. Nam omnino sic est hominum ingenium, ut obsequentia contemnant, repugnantia admirentur. Luant igitur nunc saltem scelere suo dignas pœnas, neque culpa in principes translata populus supplicio liberetur: æque enim omnes ad uestram perniciem incubuerunt; qui si ad uos sese contulissent (erat enim in illorum potestate) rursus nunc ciuitate fruerentur: uerum, fortunam cum paucis experiri tutius arbitrati, vna cum ijs, deficere maluerunt. Ac cum animis uestris cogitate, eequem ex omnibus socijs non leui quaque de causa defecturum a uobis esse existimetis, si easdem ijs pœnas constituetis, qui hostium coactu, atque ijs, qui sua voluntate a uobis defecerint, cum libertatem, si conata perfecerint, propositam habeant; sin autem minus, nullam tamen insanabilem plagam accepturi sint: at vos de vnaquaque ciuitate capitum, ac fortunarum uestrarum in discrimen venietis: & bene re gesta, tamen urbem recipientis perditam, & vectigalia, quibus opes uestrę nituntur, in reliquum tempus amittetis: siquid autem secus acciderit, ad eos, quos habemus hostes, alios addetis: atque id tempus, quod maxime in ijs propulsandis, qui inimici iam uobis sunt, ponendum erat, inferendo socijs uestris bello consumetis: non igitur spes ostendatur, siue quæ oratione persuadet, siue quæ pœcunia paratur, fore ut illorum scelera humana patiamur: nec enim imprudentes nocuerunt, sed scientes insidiati sunt: misericordiam autem error habet. Itaque cum a principio equidem pugnaui, tum uero nunc contendo, ne id, quod antea sciuis, irritum faciatis, neque tribus ad imperium obtinendum maxime inutilibus rebus, misericordia, orationis dulcedine, & clementia in fraudem induci uos patiamini. Nam & misericordia paribus tribuenda est, non ijs, quos neque contra in futurum quicquam misereat, & in perpetuum hostes uobis esse ipsa res cogat: & qui dicendo aures uestras suauitate permulcent oratores, ijs alijs minoribus in rebus campus non deerit.

Nam

Nam nunc quidem brevis voluptatis fructu nimio ciuitas multaretur : ipsis autem pro bene dictis bene facta commodaque tribuentur : clementia vero aduersus eos exercenda est, quos deinceps vobiscum coniunctos, non in eos, quos similiter, atque antea hostes habituri sumus. Atque ut in vnum conferam, si mihi assensi eritis, ea facietis, quæ iusta in Mitylenæos sunt, & in remp. vestram salutaria : sin aliter statuetis, nec illi gratiam habebunt, & ipsi vestro vosmet iudicio condemnabitis : iniuste enim vos imperium, si quidem iure hi defecerunt, obtinetis : quod si contra, quam deceat, tamen faciendum id vobis esse statuistis, contra quoque, quam honestum sit, utilitatis causa in eos animaduertite ; nisi forte principatum dimittere mauultis, & sine omni periculo ad officium vos conuertere : ac pares ab illis penas repetite, ne maior nostra, qui insidijs obstiterimus, quam eorum, qui insidias secerint, videatur esse lentitudo : illud animo versantes, quales illos existimandum sit in, vos futuros fuisse, si vicissent : præsertim cum ab ijs initium iniuriæ inferendæ ortum sit. Nam, qui sine causa quempiam læserunt, ij acerrime vrgere, sanguinemque solent appetere, superstitis scilicet inimici periculo commoti : Etenim qui ab eo, a quo minime fuit necesse, percussus sit, is capitalior, si forte euaserit, hostis est, quam qui pari etiam nunc condicione inimicitias gerit. Ne igitur vos ipsi pdideritis, sed mala, quæ ab ipsis accepissetis, vobis ante oculos atque in conspectu statuite : faciteque ut etiam atque etiam recordemini, ut omnia minoris æstimaueritis, quam ut illi vestras in manus deuenirent : ac par pari nunc referte, neque in ipso negotio subito relanguescite : quantaque vobis acerbitas modo imminuerit, memoria retinete : & cum ab ijs dignas pænas repetite, tum in posterum documentum socijs vestris statuite fore, ut, quicumq; defecerint, morte multentur : hac enim re intellecta, minus posthac cogemini, posthabitis

hostibus, cum socijs vestris bellum gerere.

*Hæc quoque sunt expressæ Thucydide.*

*Ad hæc Diodotus, Eucratidis filius, qui in priore quoq; contione vehementer Cleonis sententia, de Mitylenais necandis, restitisset, cum in sup. gestum venisset, ita respondit.*



Ecce eos, qui iterum de Mitylenæis referunt, reprehendo; nec eos, qui magnis de rebus sæpius deliberari que-  
runtur, laudo: duas autem res maxime consilio inimicas, ac rationi esse existimo, festinationem, atque iracundiam, quorum alterum amentiam, alterum inscitiam, & leuitatem habet. Quod si quis orationem rerum agenda-  
rum magistratam negat, atque in eo pugnat, hæc ille aut stultus est, aut sua id priuatim aliquid refert: stultitiæ est enim aliquid præterea esse statuere, quo futuris mini meque perspicuis de rebus differi posset: priuatim vero interest, cum turpe aliquid persuadere in animo habeas, bene autem te de re minime honesta dicere posse diffidas, bene calumniari, atque cum aduersarios, tum vero etiam auditores exterrere. Illi enim uero omnium maxime molesti sunt, qui alterius sententiam pretio addictam criminantur: etenim cum stultitiæ is, qui nihil sorte per suaferit, arguitur, imprudens habitus magis, quam improbus discedit: cui vero obiecta est auaritia, is, & cum per suaferit, suspectus est, & cum id minus sit assecutus, præter stultitiam improbitatis etiam reus fit. Ac ne rep. quidem id est, quippe quæ metu suis consiliarijs priuetur, multumque adeo illi prospectum sit, si huiusmodi ciuibz nulla ad dicendum facultas fuerit: minimum enim in se fiduciæ ad peccandum habebunt. Quando-  
quidem boni ciuis est, non metu exterritis ijs, qui cōtra dicturi sint, sed æquo certamine contendentem superiorem in dicendo discessisse iudicari: prudentis autem ciui

tatis, qui plurima sapienter suaserit, cum haud honore amplificare, sed ne de ea quidem, quam is obtinet, dignitate quicquam detrudere: contraque, qui minus prudenter senserint, illis eam rem non modo fraudi, sed ne dede cori quidem esse censere: sic enim neque is, cui ex sententia euenerit, quo etiam pluri habeatur, contra, atque ipse sentiat, dicendo, gratiam aucupabitur: nec cui minus successerit, ipse quoque, quo sibi aliquid conciliet gratiæ, sese contioni venditabit: quæ contra a nobis fiunt: atque huc accedit, ut si quis sui quidem questus causa, sed quæ nihilo tamen minus ad remp. pertineant, dicere in suspicionem venerit, ob tenuis auaritiæ opinionis inuidiam, certo remp. utilitatis fructu priuemus: atque eo res deducta est, ut, quæ recta sunt, si simpliciter sincereque dicantur, nihilominus suspiciosa sint, quam quæ improba sunt: ut æque necesse habeat, qui maxime perniosa suadere cupiat, populum inducere, atque is, qui salutare aliquid adferat, mendacii fidem facere: solaque hæc est ciuitas, cui propter peruersam calliditatem aperte sineque circuitione prodesse nemo possit: nam, si quis aliquid attulerit, quod perspicue bonum sit, delitescere tamen in eo occulte fraudis aliquid ac furti veremini. Quare in tam suspiciosa ciuitate, institutisque his vestris, maximis de rebus dicentibus nobis longius prospiciendum est, quam vos, quibus breue ad cogitandum spatium fuit, prouidetis; præsertim cum suasio nostra legibus teneatur, vestra autem auditio libera solutaque sit: etenim si eadem, qui sua sit, ac qui in eam sententiæ est, pæna plecteretur, profecto haud paulo vos cōsideratius iudicaretis: nam nunc quidem, quacumque de re facti sitis iratiores, si quando aliquid forte offendistis, eius, qui auctor fuerit, sententiam vnā multatis: vestras autem, quæ multæ in eius erroris societate fuerunt, absoluitis. Ego sane equidem non eo in contionem ascendi, ut Mitylenensium causam agerem, nec vero eos rursum ut accularem: nec enim de illorum iniurijs, si sapimus, suscepta nobis est hoc tempo

re contentio, de nostra recte ineunda ratione: neque enim, ne si aperuero quidem plurimum eos peccasse, propterea occidendos illos censebo, nisi id reip. conducat: neque cōtra, quamquam non nihil illos loci venie reliquisse ostendero, nisi ea res ad remp. pertineat, ignoscendum statuam: puto enim de futuris magis vos rebus, quam de præsentibus consuli. Itaque in quo Cleo maxime nitentur, cum contenderet multum in posterum ad defensionem coercendas profuturum, si quis ei rei pœnam capitis constituerit, in eo ego quoque ex altera parte futuris niscus, ab illo vehementer dissentio: enimvero haud æquum esse existimo præ illius speciosa ratione vtilem meam a vobis sententiam respuī: etenim illius oratio, propterea quod magis ius sequeretur, ob præsentem vestram in Mitylenæos iracundiam fortasse vos traxerit: non in iudicio cum ijs contendimus, ut iuris ratio habenda sit, sed de illis deliberamus, qua nam potissimum condicione plurimum reip. nostræ sint profuturi. Multa igitur singulis in ciuitatibus, eaque haud quaquam huic paria, sed multo leuiora peccata capite sancita sunt: attamen elati spe periculum non reformidant: nemo autem desperans conata se perficere posse maius aliquod facinus suscipit. Ac sepe, quæ minus, aut suis viribus, aut externis auxilijs instructa ciuitas defecisse visa est, hoc freta id incœpit: natura enim omnes publice priuatimque ad peccandum ferimur; qui quidem impetus nulla lege coerceri potest: nam per omnia suppliciorum sunt homines genera peruagati, siquid ab inferenda improbos iniuria deterrere possent: ac verisimile est grauissimis antiquitus criminibus mitiores fuisse pœnas constitutas: sed cum illæ temporis diuturnitate negligerentur, capitalia pleraque euaserunt: perfringitur tamen id quoque. Aut igitur metus maior aliquis inueniendus est, aut ne in hoc quidem satis est roboris ponendum. Nam egestas necessitatem, audaciam porrigit, incitat: copiæ, contumeliæ & arrogantię iniustitiam ministrant: tum ceteri iidem casus

sus dolore, vt quisque maiore aliqua vi premitur, præcipientes in pericula trahunt: spes in primis, atque amor; illum enim præeuntem hæc subsequitur; atq; hic ingressionem meditans, illa secundum fortunæ euentum proponens, pleraque turbant ac miscent: atque hæc, quoniam latent, perspicuis malis peiora sunt. Ipsa præterea fortuna multa ad instigandum congerit; nam nec opinantibus non numquam sese offert, atque imparatos in discrimen trahit, ipsaq; præcipue, præter ceteros, ciuitates impellit, utpote quæ res maximas, libertatem aut etiam in alios imperium, propositas habeant, simul se quisque stulte, quam quanti sit, carius æstimat. Atque omnino nec fieri potest, magnæq; inscitie est, cum summo humanum ingenium studio ad aliquid agendum incubuit, legum seueritate, vilo ve alio acerbioris genere deterritum iri, existimare. Quare nec pœna capitis freti, tamquam eam vadem acceperimus, minus prudens consilium inire debemus: nec quicquam statuere, quo spes ijs, qui defecerint, ad sanitatem reuertendi, peccatumque suum celeriter corrigendi præcidatur; sic enim cogitate. Nam sic quidem, si qui, cum defecerint, sustinere se non posse sentiant, integri adhuc, vt, & quod impensum sit, in præsentia sarcire, & vectigal deinceps pendere valeant, in deditionem veniant: illo autem modo ecquos putatis fore, qui non se multo acrius, quam nunc, ad tolerandam obsidionem comparent, atque eam, quam longissime possint, producant: quippe cum nihil referre intelligant, tarde ne sese, an celeriter dederint? Quid igitur? ea res non ne vobis damno erit? cum in obsidionem sumptum facere cogemini, propterea quod nullum compositioni locum reliquum feceritis, & vrbe potiti, perditam ciuitatem recipietis, vectigalque, quod ex ea percipitis, in reliquum amittetis? Atqui hoc vno maxime hostibus resistimus. Quamobrem non est nobis committendum, vt seueri potius peccatorum iudices cum simus, damno afficiamur, quam vt modera-

tione



tione in puniendo adhibita in futurum prospiciamus, ut integris ciuitatibus firmiora vectigalia habeamus. Nec vero in legum seueritate, sed in rerum procuratione satis esse ad custodiam praesidij existimemus, contra quidem, ac nunc facimus: etenim si quis, cum liber esset, atque imperio per vim opprimeretur, iure se in libertatem vindicaret, acerbè nos in eum receptum animaduertimus. Atqui liberorum populorum defectiones non acriter puniendae, sed acriter cauendae sunt, praeripiendum quæ, ut ne in eam quidem cogitationem deueniant: at, cum in ditionem recepti sint, culpa quam minimum dilanda est. Ac videte, quam vehementer hoc etiam nomine, si Cleonis sententiam secuti fueritis, erraturi sitis: nam nunc singularum vobis ciuitatum populus sauet ac cupit, nec cum principibus sua voluntate coniurat, cum quæ armis opprimitur, continuo defectionis auctoribus hostis est. Itaque multitudine nos aduersariae ciuitatis nobis amica ac socia bellum gerimus. Quod si populum Mitylenæum interfeceritis, qui a defectionis consilio auiit, & cum primum arma capiendi potestas data est, vltro nobis urbem tradidit, præterquam quod ijs, qui bene de vobis meriti sunt, necandis iniuriam facietis, id etiam statuetis, quo nihil nobilitati possit esse optatius: ciuitatibus enim ad defectionem impulsis populi auxilium paratum habebunt: siquidem exemplum vos statuetis, idem vos supplicium ijs, qui scelus in se admiserint, atque ijs, qui extra noxam sint, constituere; quinimo, si maxime illi in culpa sint, dissimulandum id esset, ne, qui vni nobis amici reliqui sunt, hostes fierent. Atque equidem multo hoc magis ad imperium tuendum conducere arbitror, si scientes iniuriam perpetiemur, quam si vel iure, quos minime expediat, interfecerimus. Nam Cleonis quidem sententia penam, quæ utilitatem eadem cum iustitia copulet, inuenire non potest. At vos præstare hæc statuite; nec misericordiae quicquam aut clementiae tribuite; quibus rebus ne ego quidem abduci vos velim, sed ijs ipsis, quæ a



me exposita sunt, rationibus persuasi Mitylenensium, quos Paches pro fontibus misit, otiose causam cognoscite, reliquos oppido uti iubete: hæc enim cum in futurum recta sunt, tum in præsens hostibus formidabilia. Nam, qui consilio nititur, plus hostibus nocet, quam qui sine animi ratione viribus.

*Hæc est epistola illa, cui CASA respondit, ea, que hic collocata est. & incipit.*

Quum forte.

## PETRVS VICTORIVS

IO. CASAE ARCHIEP.

BENEVENTANO S.



VI alias quasdam ad te scribendi occasiones omisi, ne te in magnis Reipublicæ rebus vehementer occupatum, magis impedirem, diuque mihi ab hoc officij genere temperavi: nunc quum casus tulerit, ut tecum communicare ali-

quid debeam de ijs, quæ ad studia litterarum pertinent, quibus te scio valde, atque ex animo delectari: facere non potui, quin statim ad te epistolam hanc exararem. Hoc autem si aliquis fortasse hoc tempore factum reprehenderet, atque ineptum putabit, te non omnino (quæ tua est humanitas) contempturum confido. Quin contra solet potius varietas rerum oblectare, & animum fessum grauioribus curis, assiduisque cogitationibus huiuscemodi aliquis sermo e sinu mularum promptus, reficere, atque recreare. Quum igitur hic adolescētibz nostris, qui Græcæ linguæ perdiscendæ studiosi sunt, Orestem fabulâ Euripidis interpretarer, veni ad eum locum, ubi Helena persuasa ab Electra, filia Hermionæ parteis illas imponit

EE

por-


portandi comam suam, ea de causa cessam, ceteraque, quibus maioris erat ea ætate mortuos munerari, ad sepulcrum Clytemnestræ: ut honorem eum sorori haberet, sequemagno dolore affectam esse ex acerbo illius interitu significaret. Post quæ verba, quum Electra, plena admirationis, exclamet: naturæque vim incredibilem esse in utramque partem affirmet, siue boni aliquid, siue mali ab initio vitæ illa hominibus dilargitur, ac statim, quod in vniuersum protulerat, illi ipsi rei, de qua agebatur, ac commodet: dixi, me putare, loqui ipsam de pulchritudine Helenæ: quam tantam fuisse ostendere vult, quemadmodum sane omnium sermone illa ferebatur, ut factohoc, quod vnum maxime corrumpere ipsam ac labefactare potuit, violata nulla ex parte sit: adiunxiq; in eam mentem venisse poëtam, eruditum valde atque ingeniosum virum, magnopere verisimile esse, ut quum in manibus Helenæ personam haberet, induceretque illam fecisse, quod rationibus ipsius magnopere contrarium erat, deprauareque poterat id bonum, quo illa ceteris mulieribus antecellebat: cogitarit, an ipsi contigisset, quod alij, minore pulchritudine præditis, necessario euenisset: idque nullo modo factum esse ostendere voluerit: quod niultum valet ad famam peruulgatam de illa, confirmandam: constantique omnium opinioni de eximia specie corporis ipsius respondet: simulq; commemoravi, non me fallere, Græcas declaratiunculas aliter locum capere, & ab hac sententia discrepare, quarum tamen auctoritas apud me nulla foret, quum multis signis intelligi possit, ipsas alicuius esse, vel plurium potius, qui superiore ætate vixerint, quum extinctæ iam ita in Græcia bonæ artes essent, ut vix scintillæ aliquæ veteris eruditionis in ipsa restarent. Nam quod ille putauit hoc Electram protulisse, quia pristinam & innatam malitiam in animo Helenæ manere adhuc ex facto illo cognouit: leue admodum & nugatorium me illud existimare ostendi, ad indicandam naturæ ipsius prauitatem, quæ multis atq; insignibus facinoribus

cinoribus notata erat. Si namque, quod interpres arguit ipsam fecisse, eo animo ac consilio Helena fecisset, in tenui re illa peccasset, nec satis iustam causam exclamandi Electra habuisset. Neque enim decet eam valde mirari, quum vsitatum aliquid quotidianumque sit: nec vocem eo tempore tollere oportet. Affinis enim tunc Helena illi culpæ fuisset, cui omnes mulieres vulgo obnoxie sunt: cunctæ namque formæ suæ conseruandæ uehementer studiose sunt: cauentque quicquam facere, quod gloriam illam suam imminuat. Vt autem hoc infirmum admodum argumentum eius rei demonstrandæ fuisset, ita quod ipse cogitauit, magni momenti esse ad id significandum affirmavi: quod etiâ inde perspicui posset, quia Terentius in Phormione, quum induceret seruum admirabilem quandam ac nouam pulchritudinem Virginis cuiusdam commemorantem, facit illum his signis ipsam declarare: exponit enim eam inuentam fuisse huiuscemodi quodam habitu corporis, vestituq;, qui tamen ipsam maculare nullo pacto potuit: comicus enim hic quoque eadem ratione insitam a natura, & ingentem fuisse pulchritudinem illam significare uoluit: inquit igitur apud eum Geta-Virgo pulchra, & quo magis diceret, nihil aderat adiumenti ad pulchritudinem: capillus passus, nudus pes, ipsa horrida: lacrumæ, vestitus turpis: ut ni vis boni in ipsa inesset forma, hæc formam extinguerent. Sed quid dico Terentium, studeoque hoc, testimonio etiam illius comprobare? qui sane non omnino eodem argumento utitur, quum vetus ipsius interpres Donatus tradat Apollodorum, vnde fabulam hanc vertit Terentius, fecisse tonsorem ipsum nuntium, non adolescentem, qui sorte in tonstrinam venisset: qui tonsor apud eum diceret, se nuper puellæ comam ob luctum abstulisse: totumq; se effunderet, verisimile est in eam pulchritudine celebrandam, quam facto illo, maxime inimico pulchritudini, non vidit immutatam. Addit autem idem eruditus Grammaticus, varietatis huius rationem reddens, se

scire, hoc Terentium mutasse: ne externis moribus spectatorem Romanum offenderet. Nam quod videtur huic meæ sententiæ aduersari in Græcis verbis: docui aliter capiendum esse, atque interpres ille Græcus accepisset: intelligo, inquam, quod apud poetam est *παρ' ἄκρας αἰς ἀπὸ τοῦ τριχῶς*: valet enim *παρ' ἄκρας*, prope partem illam capillorum, quæ capiti hæret, tamquam Electra dixerit, ad cutem Helenam comam totondisse: quem magnū ornatum muliebris corporis quum penitus, pietati feruens, sibi dempsisset, nō tamen ipsam inde turpem redditam. Nec existimari debere hoc insolens esse, quod poeta uocarit summos capillos partem illam, quæ quasi radix ipsorum est: qui enim tondere celsariem incipiunt, ad eam partem postremo perueniunt: præcipueque in muliebri coma, quæ prolixa est valde, atque pendet e uertice, uidetur ipsa recte summa appellari potuisse. Addidi etiam, me arbitrari, si poëta diuersa ratione vltimam partem capillorum intelligere voluisset, ipsam præpositionem *παρ* additurum non fuisse: quæ fortasse causa fuerit auctori eius scholij, vt erraret, qui hoc non animaduertisset, & magis communem, vltimatamque notionem eius nominis secutus esset. Cumque molestum præterea sit, quod sequitur, *ὅτι δ' ἡ παλαι γυνὴ*: qui enim quempiam eundem esse ait, qui olim fuerit, & naturam ipsius moresque, & formam, effigiemque corporis in eo conseruatam esse intelligere potest, grauissimusque scriptor ac magnæ inter Græcos auctoritatis, contrariam in partem usurpet hanc vocem: confessus sum, hoc me magis perturbare: Plutarchus enim, solitus sæpe locis illustribus poetarum sensus suos explicare, in Alcibiadis vita, institutisque connumerandis, vbi narrat, quomodo ille Lacedæmone vixerit, ac, quemadmodum ingenium suum ad tempus versarit, quum ostendisset, quid pronuntiarī de ipso potuerit, si quis tantum, quæ extra posita in eo forent, quæq; ille simularet, spectasset: addidit, si quis contra mentem adhibuisset ad veros ipsius animi motus;

facta, & exclamari recte potuisse, *ὅτι νῦν παλαι γυνή*. Quā-  
vis enim summa arte celasset sua vitia, eruperant tamen  
illa nonnullis in rebus, & idem, qui Athenis fuerat, im-  
probissimus scilicet ac flagitiosissimus iuuenis, illic quo-  
que esse Alcibiades intelligebatur. Huiusmodi tamen  
voces antiquorum poetarum, quæ sermone omnium po-  
stea celebrabantur, ac vim prouerbiorum obtinebant, di-  
storqueri sæpe, ac longè alio sensu, quam quo primum  
editæ forent, pronuntiarī solitas esse affirmavi: quod mul-  
tis huius ipsius auctoris exemplis nullo negotio posset  
comprobari. Id autem huic ipsi loco me arbitrari eue-  
nisse, nec sane durum uideri debere, a corporis aspectu  
ad animi vim indicandam hoc Plutarchum transulisse;  
ut quod ab auctore de muliere prolatum fuerat, ipse, ijs-  
dem verbis retentis, manifesto viro accommodauit: quā-  
re me putare posse, hanc quoque tanti viri auctoritatem  
sustineri. Quod vero statim Electra Helenam execra-  
tur, & in odium Deorum immortalium venire optat, ut  
principium maximorum malorum & sibi ipsi, & fratri,  
& vniuersæ Græciæ, videri quoque sententiam meam ad  
iuuare: specie enim corporis, non prauitate animi He-  
lena tanta exitia parauerat: similemque locum huic esse  
Homericō illi, quum grauiissimi senes, qui Priamo assi-  
debant, laudata pulchritudine eiusdem mulieris, atque  
in cælum testimonio suo sublata, intelligētes tamen,  
quanta incommoda ipsa Troianis hominibus intulisset:  
utile rebus suis esse dixerunt, ut illa cō, vnde venerat, re-  
dideret, nec apud se diutius, futura semper ipsis, filiisque, de  
trimento, maneret. Hæc mihi tunc, ut alia nonnulla hu-  
iusmodi occurrerunt, quibus sententiam meam com-  
probarem, ut sit, quum semel aliquis opinionem aliqua  
suam de aliqua re amare coepit: tuetur enim eam stu-  
diose, atque omnia vndiq; ad eam confirmandam rapit.  
Exposui tamen me nulla alia re tantopere fretum, ita as-  
seuerare, quantum elegantis illius, ac necessarij sensus op-  
portunitate: quam *φαινησάν* si poeta reliquisset, puta-  
rem

rem non sine causa in hoc loco acumen ingenij ipsius de  
siderari potuisse. Ecce autem postridie quidam ex ijs,  
qui me audiunt, ad me veniunt, & cum tabellis quidem,  
vt Cicero ait, obsignatis; qui docent, tibi longe aliter de  
hac re videri: afferuntq; epistolam quandam tuam versi  
bus scriptam, in qua manifesto contra me stas. Cohorru  
igitur subito atque animo concidi, postquam vidi mihi  
tecum rem futuram, quem nullam in re aduersarium me  
habiturum vniquam putavi: & a cuius iudicio, si id scis  
sem, numquam discrepasse. Magna est autem aucto  
ritas tua merito apud hos; atque id & sua sponte ipse fa  
ciunt, vt probent, atque admirentur doctrinam, & ele  
gantiam ingenij tui, & meis etiam assiduis vocib. ad hoc  
incitantur. Quare quomodo me geram in hac re, non  
facile mecum statuere possum: atque id, quia veritatem  
huius rei non perspicio: neque enim metuerem opinio  
nem meam condemnare, & palam me in errore versa  
tum confiteri. Deceui igitur te huius quæstionis iudi  
cem sumere, atq; ita tibi omnem rem examinandam tra  
dere: vt quum tu rursus, ipsa diligenter ponderata, ostē  
das te in illa tua vetere sententia perdurare: pollicear  
prorsus me ita quoque firmiter crediturum: & omnia,  
quæ contra facere videntur, argumenta nullius ponde  
ris existimaturum. Vale, & me, quod iam pridem feci  
sti, ama. Florentia Idib. Decemb. MDLVI.



# Series chartarum.

▲bABCDEFGHIKLMNOPQRSTVXY

AA BB CC DD EE.

Omnes sunt Duerniones.

Florentię apud hæredes Bernardi Iuntæ.

Anno Domini MDLXIII.



Series chararum.



















